

PHILIPPI A TURRE
EPISCOPI ADRIENSIS
DE ANNIS IMPERII
M. ANTONINI ELAGABALI

AC DE

Initio Imperii SEVERI ALEXANDRI
DISSERTATIO APOLOGETICA II.

QUA POTISSIMUM

Verus sensus PROGRAMMATIS CYCLI PASCHALIS
S. HIPPOLYTI restituitur & vindicatur,

NEC NON

ANTIQUA MILITARIA ITINERA
Romanorum & Græcorum illustrantur.

OPUS POSTHUMUM,

Addita Auctoris Vita a Cl. Viro

JUSTO FONTANINO

Archiepisc. Ancyr. edita, nunc Notis aucta.

I T E M


FRANCISCI TRECCII VERONENSIS
ORATIO IN FUNERE AUCTORIS.



VENETIIS, MDCCXXXI.

Typis Jo. BAPTISTÆ PASCHALII.

SUPERIORUM PERMISSU, AC PRIVILEGIO.



EMINENTISS. PRINCIPI
ANGELO MARIAE
QUIRINO
S. R. E. CARDINALI
BRIXIAE EPISCOPO

LAURENTIUS A TURRE Decanus Ecclesiae Forojulienfis.



Osthumam hanc Dissertationem, Tibi fisto, PRINCEPS EMINENTISSIME, Philippi a Turre Patru mei, Episcopi Adriensis, viri profecto laudatissimi. Nec vero arroganter hoc dictum existimari velim. Eum siquidem, quem nostri hujus seculi initia ornasse plurimum, viri tum dignitate summi, tum doctrina praestantes tradiderunt, cur ego non laudem, mihi que ad imitandum propo-

nam? De re hac te ipsum judicem appello, Cardinalis amplissime. Tu Philippum non nosti tantum, sed studia, ingenium, mores probasti. Tu familiaritate, Tu litterarum commercio, Tu ejus hospitio, ea qua semper fuisti humanitate, fruebare; Tu, ut uno verbo complectar omnia, Tu in amicorum, inquam, tuorum numero Adriensem Episcopum recensuisti. Id ipsum in causa fuit, ut Opus hoc tibi potissimum instituerem; ut si qua veteris benevolentiae memoria superstes est, Auctoris nomen & famam auspicio tegas. Res sane qua de agitur, ex profana historia petita est: at quis nescit, quantum ab illa praesidii & lucis Ecclesiastica accipiat? Ita porro illum circa profanas res obversari videas, easque ita temperare Ecclesiasticis, ut hae ejus Operis principem sibi locum vindicare pene videantur. Certe hac praecipue de causa, iterum hanc molam versavit Philippus, ut christianae antiquitatis singulare Monumentum propugnaret. Cl. enim Vignolius, alter & primus in amica hac litteraria concertatione adversarius, ut quod proposuerat systema, de numerandis annis Imperii Elagabali defenderet, Canonem Paschalem Sancti Hippolyti Portuensis, ut fertur, Episcopi, in marmorea ejusdem Cathedra, quae in Vaticana Bibliotheca adservatur, insculptum,

non

non dubium modo facere, sed & falsi crimine
damnare ausus est. Igitur vel una hæc ratio sua-
dere mihi potuerat, ut tibi nuncuparem Dissert-
tationem ad Ecclesiasticæ Historiæ utilitatem
præcipuo consilio susceptam: in qua tuam agi
causam video, quum de monumento agitur,
quod inter præcipua ornamenta numeratur Bi-
bliothecæ Vaticanæ. Ejus, inquam, Bibliothecæ,
cui te post Aleandros, Sirletos, Baronios,
Casanates, Norisios, ceterosque, quorum uni-
ca charta explicatam historiam omnium oculis
subjecisti, dignitate simili, pari scientia, ea-
dem auctoritate jam præesse videmus. Gaude
ejus Bibliothecæ ornamenta defendi, cui Tu
non operam modo præstas, sed immensam quan-
dam librorum supellectilem; irrevocabili, ut
vocant, inter vivos donatione intulisti. Quam-
quam nihil est ex omni litteraria provincia,
quod tibi afferri non possit, qui summis inge-
nii viribus totum disciplinarum orbem comple-
xus, mira eruditionis ac doctrinæ monumenta
protulisti. Habes profecto in his cur tibi pla-
ceas: attamen, quia vere sapis, hæc otia vo-
cas; teque totum iis virtutibus addicis, quibus
solis ad Deum accedentes vere beati, atque im-
mortales efficimur. Hæ, ut ait D. Augustinus,
sunt bene vivendi artes, sine quibus omne quamvis

laudabile ingenium superbia vanescit , & decidit .
Amorem , dico , Dei , & proximi . Hoc inflammatus Diœcesim amplissimam multo labore , summa vigilantia gubernas . Hoc excitatus causam viduæ audis , pupillum suscipis , orfano es adjutor , pauperibus mensam paras , sinu foves & amplecteris : hoc duce , annum censum abdicasti , ut Virgines Deo dicatas sublevares : hoc igne incensus sacras ædes ædificas , & reficis : quippe probe nosti te non dominum , sed Præpositum a supremo Patrefamilias constitutum ; ut de Ecclesiæ redditibus congestæ in horreis messes , repositæque pecuniæ in ejus cultum & honorem , & in fratrum salutem dispensentur . Mirum est igitur , quantæ ex isto uberrimo divini amoris fonte virtutes oriantur ; quæ , quamvis animo eas recondas , interdum erumpunt , seseque maxime produnt ad exemplum & admirationem populorum .

His ego permotus Dissertationem hanc Tibi uni inscribere statui ; adductus etiam maximis benevolentix significationibus , quibus Auctorem prosecutus semper fuisti . De me vero quid dicam ? Nihil profecto habeo , quo possim ad te accedere , sed quicquid gratiæ , quicquid favoris , quicquid in me benevolentix , atque humanitatis contuleris , hoc totum tuum erit :

illud-

illudque usurpabo, quod Æschines, cum Socratem sequi constituisset: *pauper sum, neque munus quod tibi offeram, habeo; me ipsum tamen trado totum*. Tu vero, PRINCEPS EMINENTISSIME, si nihil in homine invenis dignum te, hoc saltem me nomine excipe, quod ei Capitulo præsum, cui olim præfuit Sylvester Quirinus hujus Foro-Julienſis Eccleſiæ Decanus, juris Divini, humanique peritiſſimus; qui, ſi temporum ratio & rerum geſtarum ſeries non me fallunt, Episcopuſ poſtea Parentinuſ fuit. Dignitaſ hæc ipſa me tibi commendat, quæ cum multis ornatur tituliſ, tum hoc vel maxime, quod a tuiſ occupari meruit.

P R Æ F A T I O.

Dicendi initio hoc nobis maxime præstandum esse videtur, ut eorum ex animo admirationem evellamus, qui post xxiii. ferme annorum spatium, ex quo Operis hujus Auctor mortalitatem explevit, nunc demum illud in hominum lucem, adpectumque prodire animadverterint. Verum potissimam, qua factum hoc sit, causam reticere, clarissimi cujusdam viri memoriam & dignitati consulturi, malumus, quam ejus injuria culpam qualemcumque a nobis avertere. Quod si leviores alias asferre licet, dicam; nec nobis tantum otii hujce præsertim postremis annis fuisse, ut scripta hæc versaremus; nec breve tempus doctis amicis debuisse concedi, qui ea relegerent, suisque additis gravissimis sententiis, comprobarent. Etenim sapientum virorum consilium judiciumque in eisdem operibus posthumis ducimus maxime necessarium, hac nostra præcipue ætate, in qua plurimi sunt, qui, ut ait S. Greg. Naz. in Or. de moderat. in disp. serv. *cum rerum suarum tardi sint judices, in alienis tamen censoriam virgulam celerrime arripiunt.* Sane experientia compertum est, viros doctissimos, qui dum viverent, ex studiis suis magnum quod sibi nomen comparaverant, prolato aliquo post eorum mortem scripto, vel omnem aliquando amplissimæ famæ mercedem perdidisse, vel plurimum diminutam posteris tradidisse. Nobis certe posthumam hanc Dissertationem edentibus, nihil simile timendum videtur, qui id facimus, non suadentibus modo viris summis, sed propemodum impellentibus.

Quæ cum ita sint, juvat statim de ratione hujus Operis paucula præfari, ut si qua in parte expolitum excultumque videbitur, laus & honos Auctori suo maneat, quæ vero minus absolvit, ipsius dignitatem non minuant. Etenim rudem adhuc aliquibus in locis, ut invenimus, tabulam exhibere malumus, quam de nostro eidem incomtum aliquid apponere. Priora igitur xii. Capita omnibus suis fere numeris constare credimus. Caput xiii. & xiv. nondum castigata dicimus. Caput vero xv. quod postremum est, uti priora duodecim elaboratum, & ad umbilicum perductum esse, minime ambigendum putamus. Præfationem nullam, nullam Capitum summam, indicem rerum, titulumque quo opus inscriberetur, nullum: nullam denique nuncupatoriam Epistolam invenimus; quæ fere tamen omnia ad operis complementum desiderari nemo non videt.

Quæ autem ipsius Dissertationis origo, & causa fuerit, quæ complectatur, quibusve cum Adversariis initum sit literarium hoc certamen, fusius a nobis nunc esset aperiendum, Verum, ne crambem
reco-

recoſtam, uti dici ſolet, exhibere videamur, brevitatē quam maxime licuerit ſtudentes, Vitam noſtri Auſtoris iterum impreſſam damus, quam tertiæ editioni Monumentorum Vet. Antii Romæ anno MDCCXXIV. præmiſit Juſtus Fontaninus Archiepiſcopus An- cyranus, quem amiſſum jure doluit paucis ab hinc annis tota literaria Reſp. quemque Patruus noſter, ex quo primo eum vidit, amavit plurimum, & maximis ſemper benevolentiæ, atque honoris argumentis proſequutus eſt. In ea etenim leſtor contententium nomina, editasque Diſſertationes inquirere: qua occaſione, & quo temporum ordine lucem adſpexerint, cognolcere facile poterit. Tota enim diſputatio, & agitata quæſtio cum ſummis, eruditiffimisque viris verſata eſt, D. Virginio Valsechio Monacho Benediſtino, in Academia Piſana publico olim ſacrarum literarum Profeſſore, & Joanne Vignolio Bibliothecæ Vaticanæ tunc altero præfeſto; & eo- que pertinet, ut Antonini Elagabali mors certo anno, menſe, vel etiam die ſtatuatur; quæ totius diſputationis veluti cardo eſt, & caput, ut initio ſtatim hujus Operis monemur. Nunc interim aliqua ex mente Auſtoris nobis nota ad opus ipſum exornandum, perſciendum- que, paucis liceat declarare.

Circa medium itaque Capituli 1. aſſerit milliaria Romana recentiora aliquanto breviora eſſe antiquis. Vir Cl. Marchio Scipio Maſſe- juſ, cui ſi laudes addam, minuam; quemque honoris, gratiarum- que habendarum cauſa nomino; quippe qui Diſſertationem hanc, ea qua pollet in literis auctoritate, laudavit, probavitque; Is, inquam, in ſuo egregio Opere, *Verona Illuſtrata* Tom. 1. lib. 6. col. 132. milliaria Romana antiqua recentioribus quinta parte breviora fuiſſe autumat: hoc evinci facile poſſe ſubdens, inito experimento dimensionis locorum, quæ nomen a diſtantiâ Urbium cujuſcumque regionis principum habuere, & adhuc habent; ut ſunt in agro Veronenſi duo *Quinti*, duo *Settimi*; in agro Florentino *Vigeſimo*; & ut alia ommittamus, adde in noſtro Foro-Julienſi *Triceſimo*, *Terzo*, *Sexto*; quæ nomina etiamnum, & loca manent. Qui idem clariff. Vir in alio ſuo erudito Opere *Galliæ Antiquitates*, Epiſt. præcipue VII. doctiſſimo Nicolao Garellio Equiti inſcripta, de milliariis antiquorum diſſerens, hanc ut veriorē opinionem confirmat; nempe Romanorum milliaria hodiernis Italicis quincuplo fuiſſe minora. In hanc rem & Auſtor noſter ad calcem hujus Capituli 1. notavit, in Itinerario Antonini loca obſcura ab intervallo nomen accipere, ut a *Narbona ad Vigeſimum*, ab *Aquileja ad Triceſimum*. Quod ex antiquorum, recentiorumque milliariū diſſerentia erat demonſtratu- rus. Inter ejus enim ſchedas locorum intervalla a porta Aquilejæ uſque Triceſimum, & hinc uſque Julium Carnicū, vulgo *Zuglio*,

X P R A E F A T I O.

multa cura ejus jussu a perito agrimenfore signata invenimus. Cum vero Tricelimum oppidum fere medium consistat inter Aquilejam, & Julium Carnicum, a quo proinde potuerit etiam hoc nomen mutuari; fortasse erat ille locus mansioni, sive mutationi, in hac militari via deputatus. Et Julium Carnicum, etiam *Castrum Julienne* nuncupatum, legionibus Romanis locus erat ad hyemandum, aut ad stativa Castra, nempe unius diei, vel noctis ad quiescendum exercitibus statuta mansio. Ex quibus paulatim factæ sunt Urbes, Oppida, municipia, & loca alia munita; ut advertit Samuel Pitiscus in suo Lexico Antiquitatum Romanarum, in verbo *Æstiva*, & *Castra*.

Interim, ut ad nostra unde paulisper digressi sumus, revertamur: Quum quinta saltem parte milliaria Romana breviora recentioribus essent; si & hoc perpendisset Cl. Vignolius, haud equidem tam incredibile ei visum fuisset, exercitus Romanorum, Græcorumque justo diurno itinere xx. & xxv. potuisse milliaria conficere. Sed potius esse contra veritatem quod illi placuit, viii. nempe, aut ad summum X. M. P. in diem perficisse. Quid insuper, si consuluisset laudatum Lexicon Pitisci in verbo *Milites*? Ubi posteaquam ostendit, quæ, & quot pondera & sarcinas ferebant pedites Romani, ita ut jumentis & mulis assimilarentur: *Et sic onusti*, ait cum *Bergero de viis milit. l. 1v. sect. 20. §. 7. iter grande sepe conficiebant. Tyrones suos adjuvavit Vegetius l. 19. pondus bajulare usque ad sexaginta libras, Et iter facere gradu militari. Quid ergo, in totum diem? si de triginta, aut quadraginta dicam (milliaribus) non aberrem. Hoc mihi de Macedonibus adfitebitur Polyen. 1v. 2. 10. Philippus exercebat una cum armis trecenta sepe stadia ambulare, ferentes galeas, peltes, ocreas, sarissas, Et præterea commeatum, Et quæcumque vasa quotidiani usus. Reddidi fideliter ipsa verba: Et nonne hæc sunt milliaria triginta septem? Ita Pitiscus. Nec de accelerato itinere, sed de justo militari gradu, quo tyrones in militiam relati, incedere oportebat, hæc intelligamus; ut Capite I. præsentis Operis, ex allato eodem loco Vegetii aperte colligit noster Auctor.*

Equidem, ut & hoc addam, præter omnium fidem erit, Romanos milites non ultra octo, aut decem milliaria in diem explevisse, si præsertim, ut diximus, antiqua cum recentioribus conferantur. Nam vix animo comprehendere valeo (quamvis non ignorem, singulas expeditiones justa unius diei mensura haud contineri) tot, tantaque facinora, quæ ex illorum temporum historia habemus, potuisse conficere, legiones atque exercitus in longinquas provincias traducere, difficillima itinera in Græciam, Asiam,

Asiam, atque in ultimas Orientis oras perficere; tot explere bella, urbes expugnare, domare Nationes, & per universum poene Orbem victoricia arma, atque imperium proferre tam brevi tempore; nisi pro comperto habeamus Romanos, non tam virtute, quam celeritate agendi ceteris Nationibus longe præstitisse. Verum de his abunde satis. Neque enim in re tam clara, & ab eorum omnibus, si Vignolium demas, probata, tempus ultra lectoris fastidio est terendum.

Capite V. occasione Inscriptionis a Panvinio relatæ, in qua legitur dedicatio Serapidi ab Elagabalo facta; ut hanc suspectam, imo falsam prober, inter alia, haud novum esse, ait, etiam oculatissimos in re antiquaria Scriptores minus accurate exscripsisse, vel ab aliis corrupta similia monumenta aliquando prodidisse. Quod duobus maxime exemplis sibi demonstrandum sumserat. Horum alterum præbet Inscripção Adriæ extans, quam pessime depravatam ab iis fuisse, qui eam primi protulere, se jam alibi ostendisse meminit. Cujus interpretationem Trevoltienſes Patres inseruere in suis Memoriis anni 1703. Maii, & etiam Augusti mensis. Eam commendavit doctissimus vir Gisbertus Cuperus, quo cum Philippus eam per litteras communicaverat, occasione interpretationis alterius lapidis in agro Asulano reperti. Ad quem suum studium erudita dissertatione quum contulisset vir Cl. Michael Lazzari, quæ legitur inter *Opuscula Scientifica* viri pietate, & literis commendatissimi D. Angeli Calogeræ Tom. xv. ait, nostrum Episcopum an. 1712. cuidam per epistolas secum consulenti, negasse harum vocum interpretationem, quæ nusquam ei occurrissent, nempe *Escas Rosales & Vindemiales*, se pertenturum. At ut sciamus & super has, quarum hæc similia profert Inscripção Adriensis, *ad rosas & escas ducendas*, licere credidisse sibi audere aliquid; hic subijcimus, quæ laudatus Cuperus rescribit, cui suam Episcopus aperire sententiam maluit, cujus auctoritati omnino deferendum esse sciebat, quam alteri, a quo dicitur consultus; ex cujus approbatione parum certe fructus & laudis se capere posse sperabat. Scripserat Philippus Cl. Cuperus *Idibus Decembribus* anno 1712. ut initio statim responsionis proditur, dum tarditatis literarum suarum causas affert, & excusationem petit. Datæ enim sunt in *Villa Oxensi vel Tusculano meo prope Darentriam*, *ipsis Non. Sept. 1715.* & exinde hæc habet: *Nunc venio ad pulchram illam tuam Inscriptionem, quæ profecto mihi venit acceptissimo, & quo nomine gratias tibi, quas par est, ago libens lubens. Quæ ad eam elucidandam in medium adfers, recte se se habent, nec ego eadem emendare possum. Existimabam nonnunquam ESCAS RO-*

SALES esse patinas, vel edulia, quibus rosæ intritæ vel additæ farent, quales Apicio lib. 4. c. 2. appellantur PATINÆ DE ROSIS, ubi ab eruditis commode advocatur Athenæi ROSACEA OLLA, vel compositio talis edulii. Sed obstare huic explicationi mihi videtur omnino ESCÆ VINDEMIALES, nisi per eas debeamus intelligere patinas, ut sic loquar, de vino vel uvis, sive escas, vel cibos, quibus uvæ immistæ erant, vel vino mustove preparatos. Apud Du-Gangium ex glossis ab ipso correctis legitur *ῥοδιῶν*, HÆC ROSALIA, HOC ROSALIUM; sed nescio an hic locus hujus loci sit; atque a me vel ideo adducitur, quia a nostris, quo ad literas & compositionem, vel terminationem, ut loquuntur, ROSALIBUS non alienum est. Atque ita quidem pensum meum absolvi, & video me peccaturum in humanitatem tuam, & erga me benevolentiam, si ad te non mitterem aliquid, quod dignum est eruditione tua perfecta, & ingenio præstanti. &c.

Cap. vi., ut difficultatem illam expediret, quam ipse, sui que adversarii omnium maximam jure fatentur, nempe modum conciliandi numismata Elagabali ejus Tribunicia Potestate V. insignita, cum ejusdem imperio, & annis; nulla alia verior, aut securior via ei visa est ad hunc nodum extricandum, quam si Trib. eam Potestatem inchoandam esse ostenderet a die xvi. Martii ann. 218. quo die salutatus fuit Imperator a militibus; non vero a die xvi. Maii, ut vulgati Dionis, seu Xiphilini textus tradunt. Propterea que exinde conjectavit, ob similitudinem principis literæ utriusque mensis librariorum Majum pro Martio in textum Xiphilini coniecisse. Attamen quum hanc conjecturam Vignolius minime admittat, qui negat Xiphilinum mensium nomina per unicam initialem literam scripsisse: plura hoc loco ab Auctore nostro proferuntur, ut iterum probatum faciat, facile potuisse a libris Majum pro Martio in Xiphilini textu conjici. Auctoritatem inter alia affert Camilli Peregrini, in Castigationibus ad Lupum Protospatam, quam hic non pigeat integram referre, ut eam legimus ad annum 1098. Tom. II. Scriptorum Rerum Italicæ, ubi annus captæ Urbis Antiochiæ, & Capuæ inquiritur: De anno, inquit, captæ Antiochiæ consentit Gullielmus Tyrinus lib. 5. & recentiores omnes: non sic de mense = Igitur in Lupo mensis Aprilis suppositus est pro Junii, sicut ad eandem normam hoc pariter loco dicit Capuam captam a Comite Rogerio mense Martii, qui Aprilem præit, pro Maii, qui antecedit Junium = Capua itaque recuperata est, ut citius extremo mense Majo, atque ingruente æstate, numerandi cum videantur quadraginta dies obsidionis = Verum enim vero mensem MARTIUM pro MAJO sæpe alias suppositum manifestum est &c. Adeoque quis inverisimile, aut non potius verisimile dicat a Græcis, quos incolas habuit Calabria Normannorum ætate, nimi-

nimirum ætate Xiphilini, Codices aliquos ejusdem exscriptos fuisse, in quibus secundum ejus regionis consuetudinem mensis Martius literis tantummodo capitalibus, fuerit indicatus, qui postea ab aliis amanuensibus in Majum sit traductus? Hanc equidem, de qua Peregrinus, consuetudinem designandi nomina propria capitalibus literis, passim animadvertimus in subscriptionibus Conciliorum, in Epistolis, Diplomatis, & pluribus similibus aliis monumentis; adeo ut sæpius maximæ fuerint exortæ lites in distinguendis nominibus eorum, qui simili litera inchoantur. Qui mos, cur etiam in mensium nominibus ab eadem litera initium ducentibus, aliquando usurpari non potuit? Hinc enim fortasse manarunt plurimæ mensium permutationes, quas pridem eruditi in subscriptionibus legum utriusque Codicis animadverterant; ut noster Auctor se suspicari, notatum reliquit.

Et quoniam auctoritate etiam, & exemplo antiquarum Inscriptionum hic usus in hoc Capite VI. firmatur, addere & nobis liceat exemplum alterum, certe non alienum, insignis & vetustissimi lapidis. In magna Collectione Inscriptionum Jani Gruteri, studio Joannis Georgii Grævii edita, Tom. I. part. II. pag. CCXCVI. editionis Amstelodamensis, a me Utini perlustrata in Bibliotheca Patriarchali, quam Illustriss. Daniel Delphinus Patriarcha Aquilejensis, hodie librorum numero & delectu ita auget atque ornat, ut virtutum omnium splendore totam amplissimam Diocesim collustrat; in hac Collectione, inquam, ubi Tabulæ Triumphorum, Ovationumque Romanorum Ducum, in Capitolio collocatæ, describuntur, columna secunda sic lego:

A . MANLIVS . T . F . TORQVATVS . ANN . DXII .
ATTICVS . COS . II . DE . FALISCEIS . IV . NON . M .

quis non videt ultimam literam M. æque posse quarto Nonas *Martias*, quam *Majas* interpretari?

Capite XI. S. Hippolytum Cyclum suum, & Chronicon anno primo Imperii Alexandri signasse, non annis Consulum probatur; eumque morem retinuisse, qui ea ætate temporum historiam texuere, & præcipue veteres Patres Eusebium, Clementem Alexandrinum, Irenæum, Hieronymum, & alios. In hanc rem, quod ubique sint obvia, exempla proferre ex Martyrum antiquissimis Actis, quæ Cæsareo temporum charactere passim notantur, superfluum & nos judicamus. Hoc tantum addentes, si non male suspicatur auctor noster, hunc morem fluxisse in Christianos Scriptores ab Evangelista Luca, qui Nativitatem D. N. J. C. an-

no Imperatoris signavit; eundem pariter S. Evangelistam eadē Cæsarea epocha, nulla vero Consulū, etiam initium prædicationis S. Joannis Baptistæ notasse. In Martyrologiis item. Ufuardi, & Romano; in quibus variæ epochæ exhibentur die 25. mensis Decembris, illa Consulū omnino omittitur. Et demum, quam verum sit Chronologiam Cæsaream, fundamentum & regulam esse Ecclesiasticæ, satis aperte demonstrat ipse S. Hippolytus, qui illam cum suo Canone, & Cyclo annectit.

Quod tandem attinet ad Caput xv., in quo Cl. Valsechii systema expenditur, quo conciliare nititur nummos Elagabali Tribunicia Pot. V. inscriptos, cum annis ejus Imperii tribus, mensibus novem, & diebus sex a Dione consignatis: & tanquam falsum atque incredibile rejicitur; ne dicta repetam, cum ipso Claro Viro libenter concludam: Penes eruditos viros, qui nullo partium studio laborent, esto judicium. Sed, & cum nostro Auctore, si quæ incommoda abs se allatæ conjecturæ, jam pridem depulsa, adhuc habent, patiar libentissime; dum, *que premunt*, ut ipse ait, *Valsechii systema ejusmodi sunt, ut se ab iis relevare nunquam sperare possit*. Hinc propositi sui, ut credimus, Valsechium minime pœniteret, nuncium nempe misisse huic controversiæ (ceteroquin nec a religioso viro, ut ipsemet initio Præfationis postremæ suæ Dissertationis facetur, contemnendæ) ut gravioribus sanctioribusque studiis, pro instituti sui munere, tempus impenderet; quum quid reponi tandem possit, nemo fortasse unquam videbit.

Integram interim Cl. Vignolii Dissertationem II. Apologeticam de Anno Primo Imperii Severi Alexandri Aug. per Capita singula Dissertatione hac altera Apologetica item II. expendit Philippus a Turre Adriensis Episcopus; & si nostra nos non fallit opinio, etiam argumenta singula in ea contenta, sententiæque sunt convulsæ. Nec non & Cl. Valsechii alterum systema denuo in Dissertatione de Initio Imperii Severi Alexandri Aug. propositum, labefactum omnino est. Ceterum communis illorum non reticenda laus est, quam eruditi de hac literaria amica concertatione verba facientes, eis tamquam propriam concesserunt; ita ut & exemplum ceteris tradant quod imitentur. Dico, contentionis genus perurbanum, dulce, festivo quodam jucundo lepore conspersum: quod dicendi prudentia, atque gravitas moderatur: sine probro, sine contumelia: in quo ratio & veritas victoriam aucupantur; lenitate tandem quadam æquabiliter profluens sine judiciali asperitate, & sine sententiarum forensium aculeis, quale nimirum ab Oratorum maximo laudatur. Hinc parvis profecta initiis, in magnum veluti exarsit incendium, ex uno Annæ Faustine Augustæ nummo

mo mota questio. Quod quum præter spem Adriensis Episcopus excitavisset, ab se extinguendum tamen fore ratus, hac iterum Dissertatione II. in arenam descendere constituit; non tantum rebus & nomini suo consulturus, sed, ut ipsemet testatur, magis ut venerabile S. Hippolyti Christianæ antiquitatis singulare monumentum suæ fidei restitueret. In suspicionem enim falsitatis, aut mendæ a Cl. Vignolio illud deductum, iisdem ab adversario congestis auctoribus, refellitur; & auctoritas ejusdem Sancti Episcopi, & tota inde dependens Chronologia (quæ alioquin magno cum Ecclesiasticæ, tum profanæ historiæ damno, subverteretur) firmatur, vindicaturque.

Supereff modo, ut de Inscriptionibus, quas ad calcem operis rejecimus, & quarum mentio fit Cap. xiv. breviter dicamus. Ex iis Auctor sex tantum, quæ sunt in ordine primæ, collegit: nam reliquas, quas se additurum promiserat, frustra inter ejus schedas conquisivimus. Hinc earum desiderio plus solliciti effecti, eas ex agro Solvensi ut descriptas haberemus, fecit, singulari qua est humanitate, Sigismundus, Comes de Attemps Goriensis cum nobilitate clarus, tum summa & animi, & ingenii spe præditus. Eas damus ut accepimus; interclusum enim jam per fere duorum annorum spatium cum finitimis Germanis commercium, dum pestilentia suspicione laboratum est, prohibuit eas propriis oculis, ut cupiebamus, perlustrare. Priorum sex discrepantes tres lectiones seposuimus, quales Patruus noster habebat; ut quæ retinendæ sint, & an reliqui quoque lapides fideliter fuerint exarati, dijudicent eruditi. Fragmentum etiam annectimus alterius Inscriptionis, paucis ab hinc annis effossæ in horto urbana nostræ habitationis, literis majoribus, & vere Romanis. Utinam, & quam summopere deesse dolemus, pars reliqua; & si adhuc nobis ejusmodi lapides invidet oblivio; aliquando e tenebris eruantur. Speramus equidem patriam urbem nostram, novis hisce prisca ævi monumentis adauctam, præsidiiisque firmatam, decoris & ornamenti plurimum accepturam; nec non & sua Romanæ Colonia jura & honores a novis opinionibus vindicaturam.


Tandem, quum hisce diebus ad manus nostras pervenerit elegans, atque erudita Oratio Cl. Viri Francisci Treccii Veronensis, in funere nostri Episcopi, antehac nusquam vulgata; ut per nos tandem lucem aspiceret, hoc loco interseri optimo jure posse judicavimus.

Addo, quod argumenta singulis Capitibus præmissa, minus concinne digesta prodierunt; quibus paullo melius consuluisse, nisi me, dum Venetiis agerem, rerum mearum ratio in patriam subito revocasset.

Nunc

XVI P R Æ F A T I O .

Nunc enim demum animadverto, monendum saltem fuisse lectorem, quænam Adversariorum præcipua Capita locis singulis oppugnarentur. Quæ una reliqua est dimovendæ culpæ ratio, sic habeas. In Capite 1. & 11. refelli Vignolii Caput 1. In Capite 111. 1v. v. & vi. item oppugnari ejusdem Capita 111. 1v. v. & vi. In Capite vii. Caput xiiii. & xiv. Valsechii. In Capite viii. iterum Vignolii Caput vii. In Cap. ix. Caput viii. In Cap. x. xi. item Caput x. & xi. In Cap. xii. Caput xiii. xiv. xv. & xvii. In Cap. xiiii. Caput xvi. In Capite demum xv. Cap. xv. & xvii. Valsechii argumenta convelluntur.







*Philippus
Episcopus*

N. r. A. LVIII. M. IX. DXXV.



*a Turre
Adriae*

Ob. 25 Feb. MDCCXVII.

PHILIPPI A TURRE

ADRIENSIS EPISCOPI

V I T A.

PHILIPPUS A TURRE, cujus Vitam, seu potius Elogium historicum, *Monumentis veteris Antii* præmittendum, scribere adgredior, suis magis, quam alienis virtutibus excellere studuit. Claro enim genere ortus, hanc laudem vir probus suam minime reputavit, sed animi atque ingenii peregregiis ornamentis a summo rerum opifice liberaliter instructus, hæc ita coluit, ut non modo inter Italos, ubi natus altusque adoleverat, sed apud externos quoque, Musarum sacris initiatos, magnam famæ celebritatem reliquerit.

I.

Majores ejus, qui gryphen dimidium colore subrufum in area aurata stantem, gentilicium insigne, ad posteros transmiserunt, (1) sub finem sæculi XIII. Mediolano in *Patriam Fori-Julii* profecti, istic in *Civitate*, unde tota regio nuncupatur, sub avito *Canaliorum* nomine confederunt. Siquidem *Forum-Julii* nomen est *civitatis & regionis*, ut *Venetie & Monsferetrius* in Italia; in Galliis vero *Bituriges*, *Cadurci*, *Andegavi*, *Cenomani*. Quam enim antiqui primo *Carnorum*, deinde *Aquilejensem regionem*; & postea *Venetiam inferiorem*, hanc ipsam, Aquileja excisa, medii ævi scriptores a principe urbe, Ducum & Patriarcharum sede, *Forum-Julii* dixerunt. *Patria* etiam dicta est, more passim, in Italia præsertim, inducto, ut terrarum tractus, qui olim *regiones*, inclinante latinitate, *patriæ* dicerentur. Hoc scriptores illarum partium quum ignorarent, fabulosas nominis causas excogitaverunt. Geographo Langobardo, quem Placidus Porcheronius publica luce donavit, & Paulo Diacono *Fori-Julii* municipi solemne est *patriam* pro *regione* usurpare. Loca non indico, totis ferme libris persæpe obvia. Hoc idem aliunde comprobatur Caspar Barthius in *Adversariis* libro XLV. cap. XIX. & lib. LIX. cap. XIV. Uberius deinde in *Commentario ad Philippidem Guillelmi Britonis* lib. VII. pag. 526. & Carolus Cangius in *Glossario Latino*. De Sancto Everardo, post Baldricum medio sæculo IX. *Fori-Julii* Duce, exstat hymnus per-

vetustus in *Gallo-Flandria* sacra & profana Jo. Buzelini lib. 1. cap. XIX. pag. 104. in quo sic canitur.

*Dum Ludovici filius
Imperaret Lotbarius,
Erat hic bujus PATRIAE
Princeps, & Dux Italiae.*

Huc pariter facit Friderici Ubaldini glossarium, Documentis Francisci Barberini subiectum, in quo v. *bigordare* legitur *PATRIA Tusciae*. Scripsit Barberinus exeunte sæculo XIII. Vox, cujus notio in Miscellaneis quoque Leibnitianis animadvertitur pag. 425. & apud Gerardum Jo. Vossium in libro VI. de Vitiis Sermomis, eodem sensu, antiquitus pervulgato, sed modo non ita, in linguam quoque Italicam fluxit. Superest enim apud scriptores vernaculos primæ notæ. Magnus poeta Dantes, Barberino æqualis, ea utitur in Cantu x. *Inferni*. Sæpe vero Sanctus Bernardinus Senensis in codice sacrarum concionum, quem, formis nondum impressum, paucis ab hinc annis contrectare licuit Florentiæ apud spectatissimum Senatorem & summum amicum Philippum Bonarotium, Magno Etruriæ Duci a cognitionibus. Denique *Patriæ* nomen uni oræ *Fori-Julii* adhæsit, cujus populos M. Antonius Sabellicus inde *Patrianos* appellat decade II. Historiæ Venetæ lib. IX. Exstat Vita Reginæ Cleopatæ, a Julio Comite Lando Italice scripta, quam A. D. 1555. Antonius Franciscus Dominus nuncupavit *Ludovico Rangonio*, *PATRIAE præfecto*, summoque *Reipublicæ Venetæ copiarum ductori*. Hæc *Patria* est regio *Fori-Julii*, jam ferme tota Venetorum imperio subiecta.

II.

Quæ vero *Civitas*, sic vulgo appellata, & ad octavum ab Utino lapidem sita, jam dictos *Canalios* excepit, notissima quondam fuit colonia, jure civium Romanorum donata. Æque ac *Alinum* Venetiæ urbs, & *Florentia* Tuscorum, postea in *Tribum Scaptiam* relata, una cum reliquis *Carnis* eidem *Venetie* accessit. Ingruente barbarie dicta est *Civitas Austria*: quod nomen, rursus illo vetere *Fori-Julii* adsumto, jamdudum ferme exiit. Ne de alterutro dubitemus, utrumque retinent veteres tabulæ A. D. 1195. exarata in *Civitate Fori-Julii*, quæ dicitur *AUSTRIA*. Liutprandus Rex Langobardorum in Legibus, per Basilium Jo. Heroldum vulgatis, more, Francis antiquioribus etiam communi, *orientalem & occi-*
den-

dentalem regni Langobardici partes, lingua suæ gentis *Austriam* & *Neustriam* compluries appellat. Heroldi codicem adi pag. 208. 210. 212. 225. 227. 239. deque etymo vocum post *Olivarium Uredium* in *Historia Comitum Flandriæ* pag. 293. Consule *Hadrianum Valesium* in *Notitia Galliarum* pag. 68. & 372. sique vacat, *Jo. Isacium Pontanum* in *Originibus Francicis* lib. v. cap. vii. *Austrie* & *Austrasie*, ut *Neustrie* & *Neustrasie*, eadem est ratio. Si lubet, vide etiam *Vossium* libro vii. de *Vitiis sermonis*, *Nicolaum Serarium* in notis ad *Epistolam cxxviii.* *Sancti Bonifacii* martyris, & *Petrum Louwium* ad *Militiam sacram* *Jo. Molani* pag. 142. *Austrie* & *Neustrie* regiones *Italicæ* occurrunt in *Desiderii* & *Adelchii* *Langobardorum* Regum *rescriptis* apud *Cornellium Margarinum* in *Bullario Casinensi* *tomo II.* pag. 11. 12. 17. *Austriam* *solam* habet *Paullus Diaconus* lib. v. cap. xxxix. & *Descriptio Veronæ*, *Pippino Rege Langobardorum* *inconcinnis* *rhythmis* confecta, apud *Jo. Mabillonium* in *Analectis* *tomo I.* p. 374. ubi *terminus* *Veronensis* ab *Austrie* (non *Austræ*, ut mendo *typographico* *ibidem* legitur) *terre finibus* abesse pronunciat, ab hisque ad illam *clarere* *famam Hannonis* tunc *viventis* *Episcopi*. *Terminus, terra, & fines* illo ævo *regiones & provincias* significabant, ut *periti* norunt, nosque *ipli* *alibi* *adnotavimus*. Sed & *S. Paulinus Patriarcha Aquilejensis* in *Sacrostylabo*, quem *A. D. 794.* *coram Carolo Magno, Francofurtensi Concilio* obtulit, apud *Labbeum* *tomo VII.* pag. 1022. *Austriam* & *Neustriam* *Italicas* *memorat*. Ait enim, *se cum collegis, fratribus, & consacerdotibus suis Ligurie, AUSTRIÆ, HESPERIÆ, Emilie,* *Elipandi* *infanias* *refutare* *paratum*. *Labbeus* *ad oram* *pandit*, *se Austrie* *vocabulum* *non* *assecutum*. *Corrigendum* *enim,* & *in Istriam* *mutandum* *putavit*. At *quomodo* *hoc* *stare* *poteſt*, *ſi Austriam & Istriam* *distin-* *ctim* *legi* *mox* *audiemus?* Quæ *Latinis Hesperia, Longobardis* *fuit* *Neustria, Græca & barbara* *vocum* *origine* *utrobique* *ſpectata*. *Audi* *Macrobius* *libro 1. Saturnal.* *cap. 111.* *HESPERIA Italia, quod* *OCCASUS* *ſubjecta* *ſit,* *nominatur*. Ita & *Neustria*. Ne *vero* *ambigi* *poſſit,* *quia Austrie* *nomenclatione* *Venetia inferior,* *de qua* *in* *Notitia Theodoſiana* *ſit* *mentio,* *ſeu Fori-Julii* *Ducatus* *comprehen-* *deretur,* *teſtimonium* *inſigne* *ex* *vetere* *hymno* *in* *laudem* *Sancti* *Hermagoræ, Aquileje* *civitatis & Austrie* *regionis* *apud* *Deum,* *pro* *quo* *martyrium* *fecit,* *patroni,* *huc* *reſero*.

Cujus amore, capite
Truncatus es, ut badie
Sublimet Aquilegiam
Urbem, ſervendo AUSTRIAM.

Acta quoque ejusdem martyris apud Boninum Mombritionum in Sanctuarii tomo altero pag. 2. urbem *Aquilegiæ AUSTRIÆ provincie* retinent; unde ævum, quo digesta sunt, facile colligas. Ad hæc *Austria*, ut olim Venetia, *Istrie* conjungitur in Capitulari Pippini Regis Langobardorum tom. 1. pag. 543. Baluzianæ editionis. Mandat enim de fugitivis, *ut tam in AUSTRIA, quam in ISTRIA, quamque in Emilia & Tuscia seu littore maris, per omnia loca perquirantur*. Hæc, a me olim primitus, sed fortasse leviter, tacta, nunc pro re nata, locupletius propterea explicari de-
cui, quod vetustatis ignari, vocum geographicarum sæculi semiprisci originationes aliunde perperam traxerint, quodque aliis in-
dicta ab hoc loco aliena non sint.

III.

Progenitores ergo Adriensis Episcopi in *Civitate Austria*, seu *Fori-Julii*, ubi primo subliterant, moram fixerunt, & *Canaliorum* nomine paullatim, ut fit, obsoleto, deinceps ex situ urbis, in quo interdum ædes habuerunt, a *Burgo pontis*, mox *Gabrios*, deinde *Tonios* dictos constat, vocabulis corrupte deductis ex *Gabriele*, *Antonioque*, primos illos *Canalios* sublecutis. Demum a *Turre* perantiqua, inque patriis annalibus memorata, quæ in ejusdem familiæ ædibus etiamnum surgit, cognomentum serius duraturum acceperunt. Eas ædes, *Turre* munitas, *Asquinus* castri *Varmi* dominus, quingentis ab hinc annis exstruxerat, pro more scilicet unis dynastis & optimatibus usurpato. Mos notissimus est. Labet eum nihilominus testimoniis veterum comprobare. Ricobaldus Ferrariensis, hujus ævi scriptor, ab Jo. Georgio Eccardo recens vulgatus in Corpore historico tomo I. pag. 1171. hæc habet: *nobilium locupletum erat gloria TURRES habere quo tempore urbes Italie singule multis TURRIBUS inclytæ visebantur*. Ricobaldo antiquior Beniamin Judæus Tudelenfis ex regno Navarra in Itinerario, quod scripsit Alexandro III. Pontifice, pag. 9. editionis Elzevirianæ, *Turribus* ait senatorias Genuatium familias distingui. Eodem ævo Fridericus I. Imp. Ticinensium & Placentinorum *Turres* dejecisse narratur apud Andreæ Quercetanum in Scripturibus Normannicis pag. 995. Porro ædes & *Turris* *Asquini* *Varmi* ad *Picossios* Aquilejenses primum, deinde A. D. 1319. ad *Canussios*, & demum A. D. 1329. ad nostri atavos devenerunt, ipsa *Turre Asquini de Varro* in tabulis, a me visis, semper expressa. Iidem *Canalii a Turre* per Aquilejenses Patriarchas, tunc rerum dominos, perhonestis muneribus & beneficiariis iuribus or-
nati,

nati, mox præcipuis etiam cognationibus claruerunt. Eorum aliquos laudari memini a M. Antonio Nicoletto, scriptore sæculi xvi. in Vitis, nondum editis, eorundem Patriarcharum, Bertrandi scilicet, & Joannis ex Moravia Marchionibus, qui sæculo xiv. floruerunt. Ante Nicolettum Jacobus Valvasonius in Descriptione Fori-Julii, nunquam typis excusa, inter generosas xxvi. Civitatenfes familias *Canaliis* sive *Turriis* locum quoque adsignavit.

IV.

Horum soboles *Marius a Turre*, & (2) *Camilla* ex prænobili *Fruentinorum* gente, nostrum progenuerunt: qui natus est Kalendis Majis A. D. 1657. in ipsa *Civitate Fori-Julii*. Mater hunc unum ex filiis raro exemplo ipsa lactavit. Hoc quanti referat, notatum vidi a summo viro & Cardinali Silvio Antoniano in libro 1. cap. xxxv. de *Educatione Christiana*: quod opus egregium auctore S. Carolo Borromæo scribendum suscepit. *Philippus* magnæ indolis, & summæ in literas propensionis ab ineunte ætate specimen præbuit. Quare adolescens liberalibus disciplinis, & sacra ac civili jurisprudentia imbuendus Patavium, Mularum domicilium, missus est, ubi in scholis presbyterorum Congregationis Somaschæ ingenuas artes doctus, Sebastianum Macrum Philosophiæ prælectorem audivit. Mox clarissimis publici Gymnasii præceptoribus strenuam operam dedit: quos inter memorandi Octavius Ferrarius, eloquentiæ professor insignis; & præter alios, Cæsarei juris interpretes Jo. Michael Pierrucius Collensis Tuscus, Casparis Scioppij, apud illum extincti, olim hospes atque heres. At sciendi ardor *Philippum* ad aliarum etiam facultatum prælectores impigre audiendos impulit: quos inter non mathematicos, astronomosque, sed nec medicos & anatomicos, licet suo instituto minime congruos, inauditos præteriit. Hinc factum, ut postea de corporis humani structura pro re nata egregie differentem medici etiam peritissimi mirarentur. Ubi Themide & Musis annuentibus juris divini & humani sacra ei penetralia patuerunt, doctoris insignia in utroque suscepit (3) die xxix. Januarii A. D. 1677. ætatis xix. promotore usus Antonio Vaira, quem postea successorem habuit in episcopatu. Domum revocatus, ut erat in eo vis magna, discendique aviditas incredibilis, rerum difficillimarum studio accensus, philosophicis, præsertim illis, quæ ab experimento dicuntur, & astronomicis disciplinis, se uno ferme magistro usus, haud perfunctoriam operam dedit. De rebus quoque Foro-Julien-

Julienſis Eccleſiæ illuſtrandis cogitavit, ab Joanne Delphino S. R. E. Cardinali & Patriarcha Aquilejenſi Canonicus patriæ Baſilicæ adleſtus : quo tempore ad ruſpandas in Canonicorum tabulario inſignes, quibus abundat, mediæ ævi reliquias, animum adpulit, priſcæque ſæcula memoria repetens, literatos lapides hic & illic diſperſos luſtravit. Sed librorum copia, his ſtudiis perneceſſaria, tantum non deſtitutus, ut deſiderium expleret, Romam cogitavit A. D. 1687. ætatis ſuæ triceſimo.

V.

Urbem ingeniorum altricem ingreſſus, ad omnem rem literariam, ſacram in primis, penitus noſcendam totis ingenii ſui viribus *Philippus* incubuit: quo factum, ut, parariis ſanctioribus Muſis, ad ſummorum procerum benevolentiam, quæ nimirum a virtute ducitur, facilem ſibi viam ſtraverit. Ex his poſt demortuum Carolum Pium S. R. E. Cardinalem, præcipuus fuit ejusdem ampliſſimi ordinis Leander Colloretus, omni laudum genere illuſtris: qui contreranci ſui non vulgaribus ingenii animique ornamentiſpectis, & voce omnium probatis, magno cum amore officiisque complexus eſt: quod, ut de aliis jam nihil dicam, æque præſtitit vir purpuratus & Sanctæ Sedis Apoſtolicæ Bibliothecarius Hieronymus Caſanata, magnus doctriinarum patronus. Innotuit etiam quotquot tunc Romæ iis conſpici cenebantur, quorum aliqui adhuc ſuperſunt. Silentio præteriri non debet vir probus & literarum ac literatorum ſedulus cultor Jo. Ciampinus, quique ad eum conſuebant, Emanuel Scheleſtratus, Raphael Fabrettus, Laurentius Alexander Zacagnius, Philippus Bonarotius, Franciſcus Blanchinus, & Joſephus Maria Tomaſius, ſummæ pietatis & Chriſtianæ eruditionis nomine inclytus, dein S. R. E. Cardinalis, in cujus Elogio hiſtorico alias *Turris* mentio facta eſt. Ibidem primo vidit Godefridum Guilielmum Leibnitium notum illum Germanum, cum quo variis de rebus ſermones habuit. Ab his in amicitias ſuſceptus eſt, inque ſcriptis aliquorum laudatus. Iiſdem auctoriſibus præclaro eruditorum cœtui in Aula Collegii Urbani, quod a *propaganda fide* appellatur, ſingulis menſibus cogi ſolito, & a leſtiſſimis viris frequentato, nomen dedit, ubi multas de theologicis dogmatibus, de veteri Eccleſiæ hiſtoria & diſciplina, deque ſacris Conciliis, & horum Canonibus diſceptationes habuit, ab auditoribus aure benevola exceptas. Interea factum, ut Innocentio XI. Pont. Max. ſuſſectus Alexander VIII. Joſephum Renatum Imperialem, magnarum virtutum gloria florentem, ex ſummo ærarii Pontificii Quæſtore die XIII. Februa-

PHILIPPI A TURRE. XXIII

rii A. D. 1690. sacro Senatui adscriptum, mox in Ferrariæ Ducatu pro S. R. E. Legatum pronunciaret. Per eximios & probatos viros de virtutum præstantia, quibus *Turrius* eminebat, ipse alioqui hujusmodi hominum acerrimus judex, optime edoctus, illum sibi præ aliis a cognitionibus in tanto munere esse voluit: qui quidem expectationi de se conceptæ, ipso purpurato viro locupletissimo teste, cumulate respondit.

VI.

Res postulat, ne Abbatem Sextensem Justum Fontaninum, quem noster, quoad vixit, sibi conjunctissimum habuit, indictum hoc loco abire patiamur. Quum *Turrius* adversæ valetudini consulturus, Ferraria in Forum-Julii A. D. 1695. secessisset, casu accidit, ut inter illos necessitudinis vinculum necteretur in castro Colloreti apud Fabricium loci dominum & Comitem, utriusque amantissimum, ac Leandri Cardinalis fratrem, eundemque a literarum cultu non inopem. Auditor enim fuerat Nicolai Pinelli Florentini, qui Jo. Argoli notas ad Onuphrium Panvinium de Ludis Circensibus nobili additamento locupletavit. Ad hæc Fontaninus Mantuam profectus, inde, ut amicum rursus inviseret, Ferrariam deflexit. Nec multum temporis præterlapsum, quum pene inscius Romam, *Turrio* auctore, advocatur A. D. 1697. instructissimæ Bibliothecæ Slusianæ præficiendus, quam Imperialis magno sumtu & pari animo, qui nempe Romanæ Ecclesiæ principem virum, fovendis promovendisque literis natum deceret, sui æque ac omnium eruditorum juris fecerat: cui thesauro literario nunc præest Dominicus Georgius Rhodiginus, præclarus ejusdem optimi Episcopi alumnus.

VII.

A. D. 1697. ex geminata Legatione Ferrariensi Romam redux amplissimus Cardinalis, & ob excelsas animi dotes, nunquam in illo desideratas, ferme universis purpuratorum conventibus ab Innocentio XII. Pont. Max. Alexandri VIII. successore adscriptus, in gravioris alicujus negotiis *Philippi* opera usus est, illius prudentiam, doctrinam & probitatem semper miratus. *Philippus* autem vix Romam reversus, nihil antiquius habuit, quam, ut ubique gentium laudatissimum Cardinalem, & sublatum paulo post Casanata, Sedis Apostolicæ Bibliothecarium, (4) Henricum Norisium, litteratorum facile principem, cui seni ipse juvenis nunquam antea innotuerat, propius coleret, illiusque amicitiam sibi compararet: quod ob summi

mi capitis raram & facilem comitatem, ac utriusque studiorum similitudinem, illi auspicato evenit. Romæ moratus, & a Norisio frontis exporrectæ lætitia semper acceptus, illum frequenter adiit, suavissimis tanti viri colloquiis, & prolixis non fucati animi argumentis fruiturus: quibus nos ipsi aliquando interfuimus. *Turrium* deinde episcopali fastigio auctum vir magnus perofficiosus epistolis sua manu exaratis, quoad vixit, sæpe convenit. Morti proximus episcopum monuit, ut illi epitaphium pararet. Heros enim, qui semper vivere debuisset, longa tympanitide afflictus, paullatim interiit, ereptus demum VII. Kal. Martias A. D. 1704. usque ad supremum vitæ halitum sui compos.

VIII.

Philippus licet a Cardinali Imperiali ob res graves discutiendas præsepe in consilium vocaretur, nihil tamen ex his prætermisit, quæ rectis studiis excolendis impendi poterant. Accidit An. Dom. 1699. ut, dum jussu Innocentii XII. Pontif. Maxim. rudera ex urbe Antiate in novi portus molimina adveherentur, binæ tabulæ marmoreæ prodirent, tunc nostro in comitatu Imperialis illic præsentæ. Earum alteram *M. Aquilio*, plurium dignitatum notis insigni, Antiates dicaverant; altera simulacrum & symbola *Solis Mithræ* præferbat. Dum postea Cardinalis valetudinis causa aberat, omnis generis libris ejus Bibliotheca affluente, noster a curis vacans, utramque tabulam ubere commentario explanandam suscepit, arreptaque occasione, de *Beleno*, deque aliis *Aquilejensium Diis*, & de *Colonia Foro-Julienſi* Dissertationes duas pariter adornavit. Ne quid operoso scripto, & multiplici antiquitati illustrandæ confecto, deesset, fragmenta quoque *inscriptionum Collegii fratrum Arvalium*, tunc recens in via Portuensi sinistrorsus prope villam Mallianam quarto ab Urbe lapide inventa, splendidam appendicem adjunxit. Denique postremo loco Lxxvi. Inscriptiones ineditas ex agris *Aquilejensi*, *Foro-Julienſi* & *Concordienſi*, ab amico Fontanino maximam partem suppeditatas, publicæ luci exposuit. Prodiit volumen A. D. 1700. typis Cajetani Zenobii & Georgii Plachi, illudque auctor optimo Pontifici Innocentio XII. inscripsit: qui quidem quanti illud faceret, aliquo etiam publico argumento significavit.

IX.

Ubi opus in manus hominum devenit, viri docti auctoris ingenium, judicium & eruditionem calculis suis probaverunt. Memorandi

randi in primis ex transalpinis Christophorus Cellarius, Jacobus Perizonius, Andreas Morellius, Theodorus Almeloventius, Petri duo, Burmannus, & Relandus, Jo. Albertus Fabricius, alique infra adducendi. Cellarius quidem in Differt. x. de *Magis ex Oriente*, *Stella duce*, *Bethleemum profectis* §. xiii. & xiv. de *Religione veterum Persarum* agens, cujus Historiam Thomas Hyde Oxoniensibus typis ediderat, scriptoris nostri, Hydio in cultu Mithræ adversantis, librum *eruditissimum* vocat, auctoremque ipsum *nobilissimum* dicit, suumque non esse ait inter *hos claros viros tantas lites componere*. Hydus enim ignem & Mithram non summo & divino cultu, qui uni, æterno & invisibili Deo tribuatur, sed reverentia minore, quæ creatis etiam rebus conferri possit, a Persis adoratos contenderat, *προδουλία* inter & *προλατρία* ipse distinguens. Contra noster summum utriusque cultum a Persis exhibitum, multis historicorum veterum testimoniis in medium allatis tuetur: qui, licet Persæ non sint, a Persis tamen id eos didicisse fateri debemus. In his eminet *Herodotus*, Persicorum scriptor diligentissimus. Post Cellarium Perizonius in Dissertatione de Ære gravi pag. 247. sibi honori tribuit, quædam sua de cognominibus laudem nostri meruisse: *probante*, inquit, *id nuper illustri & eximie eruditionis viro Philippo a Turre in Monumentis veteris Antii* pag. 9. Turrii quoque observationes de gente *Accoleja* pro se adducit p. 254. *Morellius* vero ad Perizonium scribens pag. 160. & 179. nostrum commendat ob *Sortes Antiaticas* egregie enarratas, & Norisium præconiis ornatum. Hæc Morellii Epistola prostat etiam in Electis de Re nummaria Hamburgi Editis A. D. 1709. & in Bibliotheca nummaria Fabricii. Idem Morellius in alia epistola, *Turrio* quoque laudato, sinceram lectionem profert lapidis, in quo is ex Fabretto legendum putarat SACERDOTAL. DEI CARNUN. quum tamen legeretur DEF. CARNUN. nempe DEFUNCTUS CARNUNTI: quem errorem Turrius a Cupero monitus postea sustulit in *Addendis*. Burmannus in præfatione ad novam Gruteriani corporis editionem pag. 3. Monumentorum veteris Antii *doctissimum* librum dicit, deque eo verba pariter facit pag. 7. & 12.

X.

Mentio Burmannicæ præfationis injecta me admonet, ut pau-
cas labeculas eidem adpersas, quæ rem Italicam spectant, raptim
hoc loco detergam. Studium emaculandæ in ipso limine splendidi-
ssimi operis nostratium historiæ literariæ diverticulum excusabit.

1. Pag. 2. *Cyriacum Anconitanum*, non *Italum*, sed *Græcum* Burmannus facit. Fuit domo *Ancona*, *Italus* nempe, ex nobili *Pizzecollia* familia, pridem extincta, *Juliano Saraceno* teste in *Notitiis historicis Anconæ* pag. 7. Prænomen habuit a *Sancto Cyriaco*, natalis foli patrono. *Franciscus Philéus* epistolæ ad eum scribit lib. 1. & 1v. fol. 2. 26. & 27. editionis magnæ.

2. *Carolus Meronus Cremonensis*, *Basilicæ Sancti Laurentii* in *Damaso* Canonicus, is est, quem Burmannus pag. 2. & 3. *Morovi* pro *Moroni* appellat. *Bibliothecæ Barberinæ* præfuit, laudaturque a *Theodoro Ryckio* in præfatione *Castigationum Lucæ Holstenii* ad *Stephanum de Urbibus*.

3. Vir doctus, Burmannum dico, eadem pag. 3. non constare ait quis fuerit *Andreas Mantinea*, *Italice Mantegna*, non *Mantegnas*. Fuit notissimus pictor, quem *Laurentius Pignorius* epist. 111. & *Angelus Portenarius* in *Felicitate Patavii* lib. 1x. cap. xxvi. diu in hac urbe moratum, *Patavinum* dixerunt: qui tamen fuit *Mantuanus*. Cum magnis ejusdem artis magistris illum prædicat summus *Vates Ludovicus Areostus* initio cantus xxxiii. *Orlandi furentis*, ubi ait

Lionardo, ANDREA MANTEGNA, e Gian Bellino.

Qui hic primus occurrit, est *Leonardus Vinci*. De *Mantinea* consulendus *Simon Furnarius* in *Expositione magni poematis* p. 509. & *Georgius Vasarius* in *Vitis Pictorum, Sculptorum & Architectorum illustrium* tom. 1. Part. 11. pag. 487. editionis 11. *Florentinæ* apud *Junctas* anni 1568. *Mantua* in æde *Sancti Andree* sinistrorsum exstat sacellum, *Mantinea* nuncupatum, ab eo pictum, in quo etiam sepultus est, hac epigraphe in pariete, ejus simulacro æneo subiecta, ex *Hippolyto Donesmundo* in *Historia Mantuana* tomo 11. lib. vi. pag. 47.

Esse parem hunc noris, si non præponis, Apelli,
Ænea Mantinea qui simulacra vides.

4. Virum literatissimum *Jo. Jucundum Veronensem* ex sacro Ordine Prædicatorum, a Burmanno memoratum, laudari video in epistola, qua senior *Aldus A. D. 1518.* *Aloyfio Mocenico* nuncupavit *Plinium juniorem*: cujus codicem *Parisiis* repertum, se ab *Jucundo* habuisse testatur *Guillelmus Budæus* in *Pandectas folio xxxii. 2.* editionis *Ascensianæ*, ubi *Sacerdotem* vocat, & antiquarium famigeratum. In libro v. de *Affe* fol. xl. 2. *Jucundus*
Vere-

Veronensis, ait, *professione architectus*, sed *antiquariorum diligentissimus*, nuper *Catonem imprimendum curavit*, in quo cum multa verba emendavit restituitque, tum cap. LVII. locum mutilatum restituit. Veteres inscriptiones ab se collectas *Jucundus* in duos libros digessit A. D. 1494. inque *Laurentii Medicis* nomine apparere voluit: quo flagitante *Alexander Cortesius* ad eas colligendas *Jucundum* impulerat. Priorem librum se habuisse testatur Jo. Baptista Fontejus de *Prisca Cæsiorum gente* pag. 232. *Jucundi* hac de re epistola ad *Laurentium*, utroque profecto digna, jam exstat in museo Fontaninio. Vide *Politianum* in *Miscellaneis* cap. LXXVII. & *Vasarium* tom. 1. part. II. pag. 145. Cl. Senator *Bonarotius* in *Observationibus ad Vasa vitrea antiquorum* pag. 209. auctor est, *Jucundi* codicem M. S. priscorum epigrammatum *Florentiæ* servari apud equitem *Antonium Franciscum Marmium*: quem ipsum vel alium *Jucundi* codicem ævo *Panvinii* servavit *Stephanus Magnus Patricius Venetus*, eodem *Panvinio* teste in *Antiquitatibus Veronensibus* lib. VI. pag. 167. & in fine lib. II. *Commentariorum in Fastos Consulares*. Hoc eodem Magni codice se usum testatur *Carolus Sigonius* in *Emendationibus* lib. 1. cap. II. pag. 141. editionis *Gruteri*. *Fabulosi Veronæ Principes* (veri tamen in *Repubblica literaria Senatores*) *Scaligeri* pater & filius multa in rem suam de hoc *Jucundo* commenti sunt: quibus larvam detrahit *Bernardus Moneta* in *Menagianis* tomo IV. pag. 266. Hæc de tanto viro pro angustia loci attigisse sufficiat.

5. *Marius Massejus*, primum *Aquinas*, postea *Cavallicensis* Episcopus, *Marcus Aquinatus* dicitur in præfatione *Burmanni* pag. 4. *Janus Vitalis* ei nuncupavit *Orationes duas Lysæ*, ab se in latinum sermonem conversas, & *Jacobi Mazochii Romanæ Academiæ bibliopolæ* formis descriptas A. D. 1515. in 4. Postremus is fuit *Massejæ* gentis *Volaterranæ*, *Gerardi* filius, & *Raphaelis* frater, cognomento *Volaterrani*, scriptis suis noti: cujus filia *Lucilla* *Paulo Ricobaldo* a *Bava* dicto nupta novos *Massejos* *Volaterris* per adoptionem propagavit, teste *Eugenio Gamurrino* in *Historia familiarum Tusciæ & Umbriæ* tomo IV. pag. 250. *Romæ* ad *Sanctum Thomam* in *Parione* ædes *Marii*, (ad quem non unas literas dedit *Jacobus Sadoletus*) hanc præferunt dedicationem stilo *Epigrammatum antiquæ Urbis*, quæ, *Mario* auspice, in unum volumen congesta, prælum *Mazochii* subierunt A. D. 1521. in forma folii.

DIVO . LEONI . ET . DIVO . IV
 LIO . CLEMENTI . PP. MM
 PIIS . FE. VICT. AC . TRIVM. SEM
 PER . AVGVSTIS . PACIS . QVIE
 TISQVE . FVND. MARIVS
 MAPHEVS . VOLATERRANVS
 SVIS . NUMINIBVS . P

Decessit *Marius Volaterris* die xxiii. Junii A. D. 1537. ætatis anno lxxviii. in basilica episcopali sepultus. *Raphael* Marii frater Volaterris quoque decesserat die xxv. Januarii A. D. 1522. ætatis lxx. in sacrarum Virginum æde, quam de suo in honorem Sancti Lini a solo extruxerat, magnifico sepulcro & ipse honestatus: quod est opus Silvii Fesulani, ex Vafario tomo 1. parte 111. p. 109.

6. Codex *Sebastiani Maccii* de quo ibidem postremo loco Burmannus, in duo volumina dispersitus, Romæ exstat in Bibliotheca Chisii: quo se usum testatur Lucas Holstenius in notis ad Cluverium pag. 89. ejusdemque excerpta edidit Mabillonius pag. 123. opusculi de Cultu Sanctorum ignotorum.

XI.

E longiori excursu in viam reduces, *Philippi* nostri præcones enumerare pergamus. Fabricius in Bibliographia antiquaria sæpe de *Antii monumentis* loquitur, Almeloovenius in Fastis Consularibus pag. 108. & 192. & Relandus etiam in Fastis pag. 90. His jungendi per celebres Franciscus Blanchinus in Dissertatione de Calendario pag. 74. 86. & 113. & R. P. D. Bernardus de Montefalconis in Antiquitate explicata tom. 1. pag. 368. 374. 380. 382. 384. & tom. 11. pag. 419. Nimius essem, si omnes, qui opus laudibus prosecuti sunt, huc adducerem. Præterire tamen non debeo V. C. Jo. Vignolium in Dissert. de Columna Antonini Pii cap. viii. in fine, ubi postquam de sacerdotum capitibus velatis egisset, plura cupientem ad *dottissimum Adriensem Episcopum Philippum a Turre* se mittere ait. Infra vero pag. 175. *Mithriacam* tabulam, ab se primo editam, & Gordiani Pii nummum, *Mithra* quoque insignitum, enarrans, ad *Turrii* Dissertationem adeundam lectorem invitat: quod pariter agit, egregiam inscriptionem *Mithriacam*, sibi a Fontanino suppeditatam, explanans pag. 328. Vignolio consonat Paullus Alexander Maffejus, sub nomine *Romualdi Ricobaldi* latens, in Apologia pro Diario Italico Montefalconii, de Adriensi Episcopo scribens pag. 27. 55. 87. Ve-

reor,

reor, ne longa testium & laudum series lectori fastidium pariat. Sed quodammodo necessaria erat ad demonstrandum quo loco esset apud doctos *Turrii* nomen. Sparsim in toto opere aliis indicta, inscitique retexit, quæ lauticiarum hujusmodi non incuriosi cum plausu exceperunt. Thomas Hearne, qui perelegantem T. Livii editionem Oxonii e theatro Sheldoniano emisit A. D. 1708. ad libri iv. caput xxxiv. in *Turrii* sententiam descendit, qui *classēs* a Livio memoratas, veras *classes* navales fuisse ostendit in hoc Commentario cap. iv. pag. 64. contra Tanaquillum Fabrum & Carolum Datum, imperitiæ Latini sermonis Livium insimulantes. Consulendus idem Hearnius tomo vi. pag. 92. in quem suas ad *Livium notas* rejecit. *Notarum* nomine, ut hoc etiam non frustra, licet obiter, moneam, *adnotationes* propterea vocitatæ, quod singularium numerorum aut literarum *signis & notis*, unde dicuntur, ipsi librorum contextui quodammodo adnectantur. Vocabulo compendii caussa hoc sensu (quamvis ut minime latinum nuper admodum explosum occurrat) nos cum vulgo eruditorum, cui tamen M. Antonius Muretus omnis latinæ elegantiae arbiter nomen dat, sæpe uti non dedignamur. Muretus enim Variarum Lectionum libro xiv. cap. xv. Sebastiani Corradi industriam exosculatur, quod *non inutilem studiosis navavit operam brevibus NOTIS ad Valerii Maximi libros additis*. Qui *notam* pro *adnotatione* usurpatam censura perstinxit, Muretum suæ ætatis *Tullium* dicit. Nos cum *Tullio* errare non pudet. Tempus nos deficeret, si eodem modo reliquos commemorare vellemus, qui *Philippi a Turre* scripta encomiis ornarunt. Adhuc tamen unum & alterum præterire non decet. Gisbertus Cuperus in epistola, quam Jacobus Basnagius inferuit Historiæ Judæorum tomo vi. lib. iiii. cap. xxiv. pag. 646. edit. iI. eum celebrat de *Junone Deum matre* sub nomine *Deæ Diæ* e tabulis Arvalium deducta. Celebrat quoque in epistolis ad Zachariam Goezium, editis Witembergæ. In Variorum corrigendis & animadvertendis post novam corporis Gruteriani editionem, ab Eduardo Holthæno corrasis, pag. cccxvii. nonnulla sunt ex *Turrii* observationibus derivata. De viro quoque honorifice loquuti sunt Antonius Pagius A. D. 791. §. vii. & Jo. Mabillonius Annalium tomo iI. lib. xxx. pag. 534. Denique in Conspectu Thefauri antiquitatum Germanicarum, quem Thomas Fritschius se Lipsiæ editurum spondit, *Turrii* Dissertationi de Beleno locus datur cap. xvi. §. 228. Integrum opus in tomos vi. & viii. Thefauri Historiarum & antiquitatum Italiæ nuper transtulit Petrus VanderAa Lugduni Batavorum A. D. 1723. Nos ea, quæ

au-

auctor ad oram libri adnotaverat, huic editioni subjecimus, suis locis commode inferenda.

XII.

Innocentio XII. ad superos evocato, Clemens XI. eidem suffectus, qui *Philippi* merita probe noverat, quum ob Pascha anni MDCC. nonnullæ difficultates de emendatione Kalendarii oboræ essent, A. D. 1701. conventum sub præfectura Cardinalis Norisii ea de re a præcipuis aliquot viris haberi voluit: in quorum numerum *Philippus*, sacrarum literarum & doctrinæ temporum peritissimus, relatus est. At hoc eodem anno mense Novembri Carolo Labia Episcopo Adriæ Venetorum, cujus Ecclesia Ravennati metropoli est contributa, e vivis erepto, non defuerunt qui unum *Philippum*, omnium maxime dignum, cui Ecclesiæ illius regimen committeretur, summo Pontifici memorarent. (5) An Romæ eum retineret, vel Episcopum invitum, sed capacem designaret, initio dubius hæsit Clemens: apud quem tanti erat, ut si Carolus Thomas Turnonius Patriarcha Antiochenus & dein Cardinalis, pro religione Christiana ad Sinas navigare detrectasset, se de nostro cogitavisse, aliquando affirmaverit. Consultius tandem ei visum, ut animarum sollicitudinem *Philippo* traderet. Quare Pontifex XVI. Kal. Februarias A. D. 1702. qua die Nicolaus Erytius eques & Reip. Venetorum Orator, abeundi facultatem ab eo postulavit, *Philippum a Turre Adriensem Episcopum* dixit: qui certe oneri se subduxisset, ni amici secus optimum rati secretis consiliis illius conatus elusissent. Ea vero occasione Cardinalis Colloreti virtus speciatim eluxit. Nos *Turrium* hanc ob causam magno curarum æstu fluctuantem & lacrymas effundentem adpeximus. Neque Imperialis certe libens tulit, se illo privari, quamvis ejus virtuti & honoribus tam studeret, quam qui maxime. A Petro Rubino S. R. E. Cardinali & Episcopo Vicetino in Titulo Sancti Marci de more ordinatur Episcopus die XIX. Martii, Deo in honorem Sancti Josephi sacra: qua ipsa die ad Clerum populumque civitatis & paræciæ Adriensis pastorales literas, omnium virtutum luminibus refertas, dedit. Scripsit etiam sub ipsum ex Urbe discesum Italicam epistolam ad clari nominis virum & amicum Bernardum Montefalconium, qui eam suo Diario Italico, ubi alias sparsim multus sermo de nostro est, Latine conversam legi voluit pag. 450. Tunc enim mense Majo extra portam Prænestinam, vulgo *majorem*, sarcophagus pervetustus detectus fuerat, in quo tela per-

PHILIPPI A TURRE. XXXI

ampla ex lini genere, quod Græci *asbeston*, latini *virum linum*, quia igne non comburitur, appellaverunt. Hæc postmodum in Bibliothecam Vaticanam migrarunt. *Turrius* in epistola sua, sarcophagi, nulla inscriptione insignis, ætatem ex anaglyphis prodit, & usum lini paucis describit. Roma discessit die xix. Junii. Ecclesiæ suæ possessionem & regimen iniit die xxvi. Novembris.

XIII.

Nihil ab episcopatus exordio prius habuit, quam, ut sibi commissi gregis salutem prospiceret. Eum honorem ita sibi creditum accepit, ut se magni oneris religione obstringi arbitraretur. Itaque in eo administrando non cujusvis necessitudinis nomen & vinculum, non potentiorum gratia aut privatæ utilitatis ratio apud illum plus, quam Dei leges & veterum consuetudinum observantia, valuerunt. Quamobrem sacerdotalem disciplinam & literarum studia in Dei ministris, caritatem, mores optimos, ac pacem in populo, promovere mox coepit. Constituit in primis, ut statis temporibus ad sacros ordines accessuri, exercitiis pietatis operam darent, deque rebus theologiam theoreticam & practicam spectantibus conventus per totum episcopatum singulis mensibus haberentur: utrumque enim intermissum fuerat. Rhodigii, ubi a multis sæculis Pontifices Adrienses ob clementiorem aerem ac populorum frequentiam, ut plurimum degunt, solemnius hæc comitia instituta.

XIV.

Infra agri Patavini fines situm est *Rhodigium*, olim *Rothige*, & *Bonusvicus*, jam præcipuum & nobile municipium, quod in chartis sæculo x. vetustioribus memorari non vidimus. Est caput parvæ Peloponnesi, quæ intra Athesum & Padum sita, *Policinum*, vulgo *Polesinum*, dicitur, vocabulo, ut ominor, prave detorto ex *peninsula*, vel fortasse transposita syllaba, ex *Polynefo*: quod censet M. Antonius Sabellicus in Historia Veneta Decade iv. lib. i. quasi scilicet *longam* seu *multam insulam* dicerent. *Polynefum* dixit etiam Baptista Egnatius in Oratione de laudibus Nicolai Ursini, *Cheronefum*, quod perinde est, vocat Coelius Rhodiginus libro v. Antiquarum Lectionum cap. i. Sub Baldo castello agri Veronenſis ad sextum a Liniaco lapidem, scisso Athesi, efficitur ea regionis pars, quæ *Rhodigii Policinum* jam nuncupatur, ab aliis partibus seu *Policinis*, Pado adjacentibus, distinguenda: quæ quidem tria sunt. I. *Ferrarie*. II. *Sancti Georgii*, & III. *Adriani*. Ad hos tractus *Atria-*

norum paludes, in veterum commentariis relatæ, protendebantur. De *Rhodigio* ac ejus *Policino* scribentes adeundi in primis Coelius proxime adductus, & Paullus Æmilius Casilinus in Dissertatione Italica *de Origine & conditione Rhodigii*. Etiam Andreæ Nicolii Historia Rhodigina, ubi tamen Annianis nugis non scater. Exstant quoque Balthassaris Bonifacii *Polynefi Origines* cum conjecturis in Martialem, Venetiis excusæ apud Pinellum A. D. 1635. in 4. sed omnium fufius & accuratius id argumentum bono rei geographicæ medii ævi pertractaverat optimus senex Camillus Comes Silvestrius: cujus historica lucubratione typis nondum expressa, consuli interim potest elegans totius peninsulæ chorographia, quam Paullus Bartholomæus Claricius, præfuli Adriensi percarus, dædala industria cælatam nuper exhibuit sub auspiciis inclytæ memoriæ Joannis Cornelli Ducis Venetorum.

XV.

Istic ergo Rhodigii novus Episcopus sacris illis exercitationibus, ab se institutis, præfecit Thomam Mariam Minorellum Theologum ex Ordine Prædicatorum, quem ob eximiam probitatem paremque doctrinam singulari benevolentia complexus est. Multa a Minorello uberrime explicabantur, ipso etiam Præfule in *verbo Dei scripto & tradito*, quod est verum & inconcussum rei theologicæ fundamentum, magna cum laude versato, plura in medium afferente. Licet vero permagnum solatium Episcopus ex Minorelli consuetudine caperet, æquum censuit sua commoda illius dignitati præferre: eundemque amicis commendatum, quos inter Fontaninus eminebat, in luce Urbis rerum dominæ vivere mauluit, ubi postea ipso Clemente XI. favente Bibliothecæ Casanatensi præfectus est. Abeunte Minorello unus Silvestrius, vir gravis, antiquæ probitatis, & Musis carus, Rhodigii superfuit, quocum Episcopus, a curis Episcopalibus interdum vacans, jucundos de re literaria sermones misceret. Ad animarum salutem alacrius promovendam presbyteros a sacris *missionibus* distos Ferraria crebro advocavit, iis pro necessitate in frequentioribus parœciæ suæ locis usurus: qui profecto viri, pietate insignes, mirum dictu quanto animarum lucro Christi Domini legem prædicarint, quantosque fructus ex sacra hac messe collegerint. Ad opem traditis sibi ovibus ferendam Episcopus identidem parœciam obibat, sacrasque ipse conciones habens, ut Episcopum decet, populorum undique confluentium animos ad Dei cultum erigebat, & diffidentes componens, pacem Christi eorum animis pro virili infere-

re satagebat. In summa ita laborabat, ut aliquando febris correptus incoeptam lustrationem Episcopatus magno sui dolore intermittere coactus fuerit.

XVI.

Ex gravioribus studiis, quoad sacrorum sollicitudo permitteret, solatium quæsit. De obscuris & implexis, quæ in sanctioribus disciplinis vel antiquis monumentis occurrerent, sæpe consultus, perhumanis & doctis epistolis respondit. Harum aliquæ studio eorum, ad quos scriptæ essent, in lucem prodierunt. A. D. 1705. prope Lugdunum in summo colle, vulgo *la Montaigne de Fourviere*, vetus inscriptio *Taurobolii* effossa est, in qua *dedicationis* tempus *consularibus* notis distinctum. Calsare Josepho Charmerio societatis Jesu presbytero interpretationem lapidis postulante, Adriensis præsul suum ea de re commentariolum observationibus minime proletariis refertum literis consignavit: qui ad Gisbertum Cuperum allatus, perque eum ad Joannem Clericum missus, ab hoc publici juris factus est A. D. 1709. in Bibliotheca selecta tomo xvii. pag. 167. & rursus per Albertum Henricum Salengrium Novo Thesauro antiquitatum Romanarum immixtus tomo iil. pag. (854.) De scripto hoc testimonium reddit eximium interioris literaturæ flos Bonarotius in Observationibus ad Vasa vitrea antiquorum pag. 188. Ex multis in tabula exhibitis, egregiaque adnotatione illustratis, Adriensis antistes *integra* collegii Consulum nomina eruit T. CLODII. VIBII. VARI, & APP. ATILII. BRADVAE, qui annum V. C. 912. Christi 160. aperuerunt. Hinc vulgares Fastos *emendari* & *suppleri* adnotavit. Emendantur enim proptereaquod ex his aliqui *Appium Annium Braduam*, & *T. Vibium Varum*, Fasti Idatiani *Braduam* & *Verum*, Prosper, & Cassiodorus *Verum* il. & *Braduam* præferant. Supplentur deinde ubi solis postremis nominibus *Braduam*, & *Varum* indicant. Apud Petrum Relandum in Fastis pag. 29. inscripti lapides omnia *Bradue* nomina, & *T. Vibium Varum* quoque, non tamen *Clodium* gentem, illi præfixam, nobis dederunt. Ad *Varum* quod attinet, Jacobus Sponius in Miscellaneis eruditæ antiquitatis sect. III. pag. 107. e schedis, ut ait, Raphaelis Fabretti falso *Verum* pro *Varo* transcripsit. De hac Sponii oscitatione Fabrettus ipse, qui saxum æri incisum ediderat Dissert. il. de Aquis & Aquæductibus pag. 106. conqueritur Inscriptionum cap. x. pag. 690. neque e suis schedis unquam monstrum illud depromi potuisse animadvertit, ubi loco *Vari* a Sponio *Verus* exhibetur. Miror ego, Sponii mendum An-

tonio Pagio non suboluisse, qui A. D. 160. alium lapidem apud Panvinium in Fastis A. V. 913. vitiosum in nomine *Vari* arbitratus, *Verum* cum Sponio legendum omnino censuit. Hæc propterea ob oculos ponere visum est, quod in quadam scriptione Italica typis excusa iidem Consules prius ignorati dicantur, quam ab Adriensi Episcopo detegerentur: qui tamen ex lapide Lugdunensi sola eorundem nomina, alias in vulgatis Consularibus Fastis discretim expressa, *corrigi* & *suppleri* tantum debere primus notavit. Sed & alia non pauca, a vero immane abhorrentia, in illa scriptione ferri neutiquam possunt. Singula persequi supervacaneum putamus, quando præsertim ex hoc nostro Elogio ea per se omnia rueri noscuntur.

XVII.

Commentariolo jam recensito alium jungimus, qui variis scriptis argumentum suppeditavit. Originem duxit ex nummo *Annie Faustine* Augustæ, æra Damascenorum in averſa parte signato, ut quidem primo creditum est, quum tamen reapse in eo legatur AFQN. A. OA. ANTONIN. *Iudus primus Olympicus Antoninianus*, ut postea Romæ constitit, quo ipsum nummum æreum maximi moduli ad hoc miserat amplissimus Senator Venetus Jo. Dominicus Theupolus, qui eum ad suæ gazæ scrinia locupletanda sibi comparaverat. Vide Diarum Literatorum Italiæ tomo x. pag. 498. Adriensis Episcopus A. D. 1710. literas de hujus nummi explicatione ad V. C. Johannem Antonium Astorium dedit, a quo motam controversiam ob ejus interpretationem acceperat. Quumque Præsul indicaret, nummum (tunc sibi non visum) ex *epocha Damascenorum*, cūsum videri A. V. 977. æræ vulgaris 224. biennio post Elagabali necem, proptereaque, secundum Pagii calculos, *Tribuniciam potestatem* I. Elagabali desumentem ex initio anni Christi 218. quo Macrini nomen e Fastis jussu Elagabali erasum, hoc illorum aures perculit, qui secus opinabantur. Ubi ex *Turrii* epistola, Astorio curante, in Diarium literatorum Italiæ inducitur tomo iv. pag. 360. patuit interpretis sententia, continuo a viris doctis in partes itum. Vir enim pereruditus Virginius Valsechius Monachus Benedictinus Florentiæ A. D. 1711. Dissertationem emisit, *de Elagabali Tribunicia Potestate* v. cujus Imperii initium, ut antiquos Scriptores in concordiam redigeret, a morte Caracallæ ducendum contendit.

XVIII.

Johannes Vignolius Bibliothecæ Vaticanæ alter. præfectus, scriptis editis clarus, medius inter hos arbiter. sedit Dissertatione edita Romæ A. D. 1713. *De Anno primo Imperii Severi Alexandri Aug. quem præfert cathedra marmorea S. Hippolyti Episcopi*, ubi Valsechio oppugnato, quod ex Herodiano Imperii Elagabali annos a *Caracallæ* interitu, non a *Macrini* fuga, numerandos conjecisset, inque nummis Elagabali Tribuniciam potestatem I. intermissam putasset, mox perelegantem epistolam secundis curis subjecit, in qua de nummo quodam Antonini Pii, cujus ectypon Gallandius vir doctus ad Fontaninum Lutecia transmiserat, sagacissime inquirens, ostendit, in averfa nummi parte Felicitatis imaginem fuisse deletam, proque ea columnam, solidam a scalpro falsarii suppositam, ut nempe ex obvio rarissimus, immo unicus hoc pacto nummus obtruderetur. In hac honesta concertatione sibi silendum non esse ratus Adriensis Episcopus, Dissertationem Apologeticam vulgavit, cui titulum fecit: *De Annis Imperii M. Aurelii Antonini Elagabali, ac de initio imperii & duobus Consulatibus Justinii junioris. Patavii typis Seminarii* A. D. 1713. Valsechii sententiam, quod anni Imperii Elagabali ab interitu *Caracallæ* inchoari debeant, Præsul strenue convellit. Iis, quæ Vignolius ad utriusque systema conciliandum attulerat, modeste respondet, Pagii sententiam, quam in epistola ad Astorium amplexus fuerat, certamque crederat, se deferere paratum, modo Hippolytæ cathedræ impedimenta e medio tollantur. In hoc scripto, cujus excerpta cum aliis edidit Jo. Albertus Fabricius Hamburgi A. D. 1716. tomo 1. operum Sancti Hippolyti martyris, auctor de tribus Elagabali uxoribus accurate disquirat: de gemino etiam Consulatu Justinii II. Augusti ab aliis intacta profert ex vetustissimis tabulis in papyro Ægyptia, Justino ipso imperante, Ravennæ conscriptis: quarum lacinias chronicis notis insignes, ex museo Fontaninio, secum peropportune communicatas atque æri incisas, amicissimi possessoris laude præmissa, vulgavit. Quum vero in subscriptione tabularum explicanda pag. 44. leviculum mendum irreplisset, ubi *Johannis* Fort. legitur pro *For*, nempe *Forensis*, qui est *tabellio*, hoc postea sublatum est in Diariis literatorum Italiæ tomo xvi. pag. 137. Henricus Brenemannus Batavus pereruditus, qui Episcopi fama motus, ut cum propius nosset, Rhodigium aliquando perrexit, quum ejusdem scripturæ specimen a *Turrio* editum memoraret in Historia Pandectarum lib. II. cap. II. in viri laudes perhonorifi-

cas effusus, hæc scripsit, quæ nullo pacto prætermittenda censuimus: inter alios, inquit, *specimen illius exhibet Illustrissimus ac Reverendissimus Adriæ Episcopus Philippus a Turre, vir egregius, quem fava nobis, qui multis nominibus incomparabili viro obstrictissimi eramus, totique orbi literato paucis ab hinc annis eripuerunt. Proferunt nempe in Dissertatione Apologetica ad nummum Annæ Faustine duas particulas instrumenti venditionis fundorum & ædificii in agro Ariminensi, scripti Ravennæ sub Justino II. Imperatore A. D. 572. quod specimen eo lubentius allegamus, quoniam circa id tempus, certe non ita multo post, conscriptum opinamur ipsum illud, quo de agimus, Florentinum Pandectarum exemplar. Hucusque Brenemannus. De eodem scripto loquens Anselmus Bandurius tomo I. Numismatum pag. CXX. Turrium vocat præstanti ingenio & doctrina præulem, quem fortissime ait suam sententiam propugnare. Varia cognita perutilia docere de uxoribus Elagabali, de habitu pacificatoris, de duplici anno apud Ægyptios, deque honoribus Augustarum post Principum, quibus nupsent, mortem.*

XIX.

Rei antiquariæ duumviri Vignolius & Valsechius rursus in arenam descendere visi sunt. Prior quidem A. D. 1714. Dissertatione inscripta *de anno Primo Imperii Severi Alexandri*. Alia vero Valsechius anno insequenti Florentiæ vulgata *de Initio Imperii Severi Alexandri*. Episcopus rei veritatem novis observationibus illustraturus, ab eruditis argumentis sua tueri & rem literariam augere statuerat, multa de antiquis militarium copiarum itineribus jam commentatus, deque tempore, quo Maximinus Aquilejam obsedit & ibidem extinctus est. Hunc enim vicina loca *Æmonæ*, Alpibus Juliis subiectæ, interque Italiam & Noricum in Pannonia prima, alias superiori, Ocra & Carvanca montibus interpositis, sitæ, ipso Februarii initio prætergressum, ex Gruteriana inscriptione ostenderat. Quam ob causam accessus ad flumen *Sontium*, de quo Herodianus, trahi nequireret ultra medium ejus mensis, quo nives solutæ torrentem effecerant. *Sontius* enim juxta ac ceteri illius regionis amnes hieme sæpenumero in immensum augetur flante austro, qui montanas nives solvit, pluviasque & diurnas & uberimas ciet. Maximinus ergo ad XII. ab Aquileja lapidem, *Sontio* fluvio trajecto ad medium Februarii, cujus initio *Æmona* transierat, urbem ipsam *Aquilejam* obsedit, ubi postea sub exitu mensis Martii A. D. 237. extinctus est. Hinc retrocedendo cum annis II. nonnullisque diebus, quos Maximinus in Imperio transigit, Adriensis.

sis Episcopus Alexandri decessoris obitum trahit ad diem xx. Mensis Martii A. D. 235. Demum Alexandri annis xiii. & diebus ix. computatis, Elagabali mortem, ejusdemque Alexandri initium, multiplici argumentorum genere undequaque firmatum, confert in diem xi. Martii A. D. 222. quæ erat præcipua inter eximios viros quæstio agitata. Quum vero Antistes in superiori Dissertatione tradidisset, Elagabalum terrestri itinere Nicomedia Romam properasse exeunte Martio A. D. 219. atque huc advenisse mense Julio ejusdem anni, confectis MD. milliariis, quæ essent xx. per singulos dies, hoc viris doctis stare non posse videbatur, nempe exercitum, qui Elagabalum comitabatur, xx. millia passuum diebus singulis confecisse. Quare noster ut hoc idem novis rationibus amplius evinceret, accuratissimo studio enarratis & in tabulas digestis variorum exercituum diurnis itineribus numerum cccxli. apud Græcos & Latinos historicos diserte memoratis, Romanorum scilicet xxxix. Cyri lxxx. Græcorum ccxv. Alexandri vii. eo tandem devenit, ut ob oculos ponat, morem fuisse, ut xx. saltem milliarius, singulis diebus per militares copias conficiendorum, communis & certa mensura esset. Quandoquidem ex his cccxli. miliarium copiarum itineribus, summa diligentia ex universa antiquitate corralis, octo tantum reperta sunt, quæ singulis diebus xx. millia passuum non plane confecerint. Horum enim sex habent milliaria xvi. duo habent xiv. reliqua ad unum æquant, immo ex his plurima superant milliarius xx. mensuram. Hæc itinera in duo capita distributa & luculento eruditionis apparatu disposita, singularum mansionum numeris & earum distantiiis ac itinerum milliariis diligenter expressis, componunt justam veluti ac plenam de *Itineribus militaribus tractationem*, antehac viris doctis intactam.

XX.

Mox de nummis Tribuniciam potestatem præferentibus, ea tamen nondum inchoata percussis, disceptat, Stare ait annos, menses, & dies Elagabali, quos Dio a morte Macrini deduxit. Stare ejus mortem collatam in diem x. Martii A. D. 222. Stare inscriptionem Canonis Hippolytei, quæ Severum Alexandrum offert jam Imperatorem die xiii. Aprilis. Stare denique nummum Cartusianum a Cl. Vignolio Dissert. i. pag. 48. cum Tr. Pot. II. Cos. III. primo exhibitum. Fortasse huc faceret Willhelmi Wottoni Historia Romana ab Antonino ad Alexandri decessum, nisi Anglice tantum prodidisset A. D. 1704. nondum, quod sciamus,

mus, in communem linguam literatorum translata. Hoc obiter. Præful subinde agit de processu consulari & non consulari, de Cyclis, præcipue Hippolyti, ejusdemque chronico & historia, deque literis initialibus, mensium nomina indicantibus. In nummis Ægyptiis annos Principum stilo Romano a die Imperii eorum natali non numerari, fusius ostendit, hoc probans sex nummis Galbæ cum nota L. B. anno Imperii ejus *secundo*; quinque Hadriani cum L. K. B. *altero & vicesimo*; uno L. Veri cum ΔΕΚΑΤΟΤ' *anno decimo*, & altero Otaciliæ uxoris Philippi cum L. Z. *anno septimo*: quos quidem nummos explicaverat in Dissertat. 1. cap. 111. Nihil certius esse arbitratur, quam ex his Augustis neminem attigisse annum in nummis expressum. Quare illorum initia a die *inaugurationis*, sive *natali* Imperii deduci non posse. Galbæ inchoavit Imperium, vel a militibus in Hispania die 11. Aprilis A. D. 68. vel die x. Junii ejusdem anni post excessum Neronis, Imperator dictus, obiitque die xv. insequentis Januarii A. D. 69. Galbæ annus *primus*, ab acclamatione inchoatus, stilo Romano desinebat. At *secundus* inibat die 11. Aprilis, menses duos & dimidium post necem Galbæ. Dum ergo Ægyptii Galbæ annum *secundum* in nummis signarunt, ejus Imperium stilo Romano a die ejus *natali* non deduxerunt. Hoc idem reliquis nummis aptatur. Ad hæc Antistes de nummis Latinis disceptat, in quibus anni Tribuniciz potestatis Imperii annos excedunt. Eos aut mendose descriptos, aut monetarios in iis cudendis lapsos, vel annos unius Imperatoris alteri datos putat. Nullum ex his vitium Ægyptiis nummis quandoquidem plurimis & legitimis, tribui debere contendit, ideoque verum non esse, Ægyptios in nummis suis annos Augustorum a die *inaugurationis*, Romano stilo, numerasse. Eo stilo numeratos non diffitetur, quem Pagius A. D. 69. §. 111. ipseque Antistes Dissert. 1. exposuerat, illum deducens ex canone Ptolemæi, in quo anni Regum non a vero die illorum *natali*, sed a *Thoth vago* numerantur. Contra Valsechium, quem perinde ac Vignolium semper, ut decuit, honorifice appellat, incredibile nequaquam videri ait, eum stilum ab Alexandrinis, apud quos Astronomi illum induxerant, ad populares tractatum. Quum enim ex jam dictis constet, annos Augustorum in nummis Ægyptiis ex eorumdem *natali* die Romano stilo non numerari, utique alio numerari debuerunt. Si vero Astronomi nos docent hujus stili cardinem *Thoth vagum* fuisse, cur hic ipse cardo in usu etiam civili non fuerit *Thoth fixus*, seu dies xxix. Augusti, unde stilus numerandi annos Augustorum in nummis manaverit? Minimi referre arbitratur sive cœptos annos eosdem

dem dicamus a *Thoth fixo* antecedente, sive anni primi nomen spacio illi temporis inditum, quod diem inaugurationis Principum & xxix. Augusti, annumque secundum, ab hac ipsa die inchoarum, intercedit. Nec Pagius de nummis Græcis postmodum aliter loquens, se priori sua opinione abdicavit. Græcis enim nummis Egyptii accensendi non sunt. Hadriani quidem nummos alio modo pro re nata sibi obvio interdum ille explicavit: priorem tamen istum stilum ideo minime respuit. Tunc stilo Egyptio non indigebat, quum anni in nummis Hadriani expressi, annos Imperii nequaquam excederent. Ex altera *Turrii* Dissertatione in schedis cubante hæc summatim delibasse sufficiat. Hanc enim curam morbi interventus luci publicæ invidit.

XXI.

Ex variarum facultatum studiis, quibus excelluit, peculiaris locus debetur Philosophiæ naturali, cujus abdita quædam & corporis humani miram structuram adhuc adolescens sagaciter exploraverat. His de rebus Johannes Maria Lancisius Clementis XI. Comes Archiatrorum sacri Palatii non semel ad eum scripsit. Longa etiam epistola de morbi genere, quo A. D. 1712. extinctus est Horatius Albanus Pontificis frater. Ei noster Anatomicorum descriptionibus fufe respondit. Utriusque vero literæ primum prodire inter Ephemerides Curiosorum Germaniæ in appendice Centuriæ III. & IV. deinde Genevæ A. D. 1718. tom. II. operum Lancisii pag. 376. De Physicis quoque scripsit nonnulla ad Antonium Vallisnerium in gymnasio Patavino publice docentem, ac inter cetera epistolarem Dissertationem Italicam de *generatione vermium*, quæ impressa est in opere Vallisnerii de hoc argumento pag. 34. Ad hæc quum Johannes Polenus Marchio, in eodem gymnasio tunc meteora, postea mathematicam ex edito loco explicans, libellum de eclipsi A. D. 1715. diei III. Maii Adriensi Episcopo dono misisset, illius phænomeni causam Antistes alia via uberime explicavit: quam Polenus summis laudibus extulit, typisque mandandam curavit A. D. 1716.

XXII.

Jam constat quæ Adriensis Præsul perhonesto ocio quæsito lucubraverit, sanctissimos Ecclesiæ Episcopos patresque imitatus, qui pastorales curas interdum amœnioribus studiis temperare consueverunt. Nunc ad reliquas ejus animi opes explicandas sermonem converto.

In

In magnis viris eæ virtutes spectantur, quæ mores componunt: quas inter summum locum prudentiæ tribuunt, sine qua nulla est virtus. Hac ergo, quam abeunti non frustra commendaverat optimus Colloretus, ita fuit præditus noster antistes, ut negocia quæque vel ardua suæ parcæ felicitè procuraverit: quo eum nomine sapius ab ipsis proceribus Venetorum Reipublicæ probatum audivimus. Quatuor enim prudentiæ novercas, quas vocat Ludovicus Granatensis, feliciter cavit. Eæ sunt *præcipitatio*, *affectio*, *pertinacia*, & *vanitas*. Contigit aliquando Episcopi munus in magnum discrimen adduci ob nonnullorum pravas artes, pacem perturbare conantium. Sed vir sapiens quo tenderent illorum molimina conspicatus, ea prorsus elusit. Non is tamen fuit, qui suam Apostolicam dignitatem a quoquam impune labefactari tacitus quodammodo & videns ipse unquam consenserit. Ubi id fortasse tentatum est, virtutem sacerdotalem invictus exeruit: neque animum certe despondit. Plura dicere non attinet. Æquum & justum ita coluit, ut semper se alienum ostenderit a suspicionis labe, qua ob favorem aliquid datur, aut ob tædium laboris ab æquo disceditur. Itaque ipse per sese controversias aut accusationes ad suum iudicium deductas sedulo expendit: sique interdum corripiendi essent qui deliquerant, tanta humanitate atque mansuetudine id fecit, ut a reis ipsis gratiam iniret. Temperantiæ plurimum studens, tenui mensa, neque ciborum delectu referta, usus est, solitus sæpe dicere, Episcoporum reditus in pauperes, non in ciborum copiam erogandos. Hospites tamen munifice & large excepit, eosque secum perpetuo habere voluisset. Immo interdum clam etiam illac prætereuntes in suas ædes per amice trahendos curavit. V. C. Dominicus Lazzarinus, politioris doctrinæ in gymnasio Patavino interpret, hoc non ignorat. Scilicet optimus præsul Pauli Apostoli, cuius auctoritate nihil est gravius, in epistola ad Romanos xii. 13. & i. ad Timotheum i. 1. 2. *hospitalitatem* Episcopo commendantis, memor fuit: ad quem locum posteriore egregie Sedulius: *Laicus*, inquit, *unum aut duos, aut tres, aut paucos recipiens, implevit hospitalitatem. Episcopus nisi omnes receperit, inhumanus est*. Patavium, ubi apud præcipuos celeberrimi gymnasii doctores magno in pretio habebatur, quotannis divertit, a Georgio Cornelio Cardinali perhumane invitatus, ut in seminario episcopali disputationes sub præclaris magistris ab ingenua juventute de more sub finem ætatis habendas sua præsentia honestaret, toti rei literariæ dirigendæ præfesto viro laborioso & perdocto Jacobo Facciolato, Episcopi studiosissimo: qui eo vix demortuo quoddam illius vitæ breviarium raptim cudidit ediditque, ut hoc pietatis, suæque observantiæ argumento tanti viri memoriæ parentaret.

XXIII.

Majorem omnium virtutum, caritatem dico, qua Deo jungimur, Praeful in omni vitæ suæ curriculo integerrime servavit. Quam vero Dei caritas gignit, inque homines exercetur, ita amplexus est, ut omnes ægrotos inviseret, & sanctissimis verbis solaretur: quo in officio peragendo nulli unquam suo incommode pepercit: quacumque enim hora arcefferetur, promptissimus accurrebat. Egenis sua ipse manu viritim pecunias largiebatur. Atque hoc loco memorare juvat quo pacto se gesserit in eleemosynis faciendis. Eas ille, disciplinæ veteris observantissimus, in Ecclesiarum, ægrotorum, viduarum, pauperumque beneficium impendit. Divini præcepti memor, quicquid ex modesta vivendi ratione superesset, in hæc pietatis officia distribuit, ipsas quoque domesticas supellestiles distributurus, ab ingruente vi morbi non interceptus. Nullas opes suis ditandis reliquit. Quin ipsos fratris filios, ab se Christiane educatos, & literis informandos in gymnasia traductos; paternis, non Ecclesiæ sumptibus ali voluit.

XXIV.

(6) Tam præclara agentem mors levi primum, deinde letali repente aggressionem adorta est. Urinæ difficultatem experiri dudum cœperat, quæ gravior sensim effecta valetudinem ejus imminuit. Initio mensis Februarii Anno Domini 1717. in febrem incidit, quæ contemnenda primum visa est. At post aliquot dies erupit, nullum remedium admittens. Ad viri periculum Vallisnerius & Facciollatus Patavio propere accurrerunt; sed (heu!) re ad extremum perducta. Episcopus vero de expianda anima sollicitus, Ecclesiæ Sacramentis magna religione susceptis, Rodigii decessit v. Kal. Martias A. D. 1717. inter præcipua Italiæ literatæ sidera collocandus; meliori tamen sæculo, vitæque longiori maxime dignus. Elatus est ferali pompa, tota urbe comitante ac lacrymas effundente, sepultus in æde principe, ubi Nicolaus ac Petrus a Turre fratres de inscripto monumento ei ponendo cogitaverunt. (7) Illud eo libentius hic damus, quod alias editum, corruptum alicubi visum fuerit.

PHILIPPO . A TVRRE
 EPISCOPO . ADRIENSI
 IN . VRBE . RERVM . DOMINA
 INTERIORIBVS . DISCIPLINIS
 MORVMQVE . SANCTIMONIA . PROBATO
 QVI
 REM . LITERARIAM . EGREGIIS . MONVMENTIS
 AVXIT
 POPVLOSQVE . SIBI RELVCTANTI . COMMISSOS
 VERBO . ET . EXEMPLO
 TAM . BENE . SERVAVIT
 VT . FINITIMIS . ET . LONGINQVIS
 MAXIMVM . SVI . DESIDERIVM . RELIQUERIT
 SOLA . IMMORTALITATIS . EIVS . FIDE LENITVM
 OBIIT . V . KAL . MARTIAS . ANNO . SAL . MDCCXVII .
 EPISCOPATVS . XIV .
 VIXIT . ANNOS . LVIII . MENSES . IX .
 DIES . XXV
 NICOLAVS . ET . PETRVS . A TVRRE
 PATRICII . FOROJVLIIENSES
 OB . TANTI . FRATRIS . JACTVRAM
 MOESTISSIMI . PP .

Tenaci memoria, subactō iudicio, & peracri meditatione instructus plurima legit, multa observavit, primo loco intimos doctrinarum fontes sedulo perscrutatus. Neque unam elegantiorē, Græcam scilicet Romanamque, sed omnium gentium & sæculorum antiquitatem mente complexus est. Quæ vero pridem in legendo observaverat, hæc postmodum, aliquid commentaturus, sua quodammodo facere videbatur. Hoc usus studiorum ductu, & ingenio critico pollens, aptoque ad omnium magnarum rerum scientiam, nihil inepte moliri visus est unquam. Poeticam facultatem Gratiis & Musis faventibus coluit, sic tamen, ut a præceptionibus Cardinalis Antoniani lib. III. c. xxxix. de Educatione Christiana, haudquam recederet. Quo optimas artes promovendi studio flagrabat, ægre tulit, Græcas Latinasque literas, Italici nominis olim proprias, aliena culpa languere, & parum coli. Græce tamen & Latine doctos, qui copia rerum neglecta, extra grammaticorum pomeria non profilirent, deque rebus parum solliciti, unis verbis diu notuque inharerent, vir sapiens non multum probavit, quum alias de religione, deque republica benemereri gravioribus vigiliis pos-

possent, exempla eorum secuti, qui, licet Græce parum docti, opera tamen cedro dignissima adornarunt, quæ Græce & Latine docti suspiciunt. Imitandos potius aiebat Musarum mystas variorum ordinum, qui in Græci & Latini eloquii arce steterunt quidem; sed perpetuo intra grammaticorum septa claudi nolentes, ad rem sacram profanamve lotis manibus contrectandum serio accesserunt. Ex his, qui turmatim occurrunt, Nicolaum Alemannum, Leonem Allatium, Lucam Holstenium, Sirmondum, Petavium, & Thomassium (summe venerabilem, omnique laude majorem, & recentis quidem, sed nunquam interituræ memoriæ Cardinalem) indicare sufficiat: quibus omnis literatorum chorus assurgit. Hi vitam suam in nudis verbis & dictionibus congerendis nequaquam triverunt. Græca & Latina lingua certe nihil præstantius, nihil utilius. Hoc negare quis audeat? Quin tamen his subsidiis ad graviores disciplinas, Græcis & latinis literis comprehensas, graviter nobis parandas uti debeamus, quis pariter neget? Græce quidem & Latine doctos, sed a multa lectione imparatos, ubi de alia facultate, quam sua, loqui contingit, pueriliter ineptire frequenter videmus, re, quam neglexerant, vel forte contemserant, pudorem hoc pacto ipsis injiciente. Peropportune huc recidit percelebris ex hac ichola Græce & Latine doctorum hominum Cœlii Rhodigini pronunciatum lib. xi. Antiquarum lectionum cap. xxvii. de se ita scribentis: multa præstiorasse ex veteribus memoriis nullum fuerit dispendium operæ, quando iis non parum sensus juvantur poetarum, quorum non vulgaria eruditio sæpe carminibus inserit: que haud facile assequare, ni librariam supellectilem diurna versaris manu, nec nocturna minus vel ultra satietatem. Ita Rhodiginus ille, vir immensæ lectionis, & utriusque linguæ professor insignis. Hæc obiter dicta ridebunt fortasse qui secus ac Turrio & Cœlio visum, agere constituerunt. Rideant illi, modo valeamus. Sed de his jam satis.

XXV.

Ceterum *Adviensis* antistes iudicio sanus & perspicax absurdas & audaciæ plenas opiniones sibi propinari passus est nunquam. Hoc agredi ausos, voce aut scripto compecuit, errori ac mendacio, & eo minus gratiæ cum dispendio veritatis, per inania officia nunquam blanditus. Et lingua & calamo a loquacitate alienus fuit. Nihil joco fudit, omnia serio scripsit. Suppilandis aliorum scriniis minime indulgit, ut crambem recoctam, nihil scilicet novi & de suo, sed totum de alieno venditans, lectorum ocio abuteretur, multisque nulla vel admodum pauca complexus, non res, sed libros emit-

teret. In tanta luce literarum & copia rerum, ipse de sapientum judicio summe sollicitus, hæc agere nefas putavit. Ut palam fiat quo loco apud externos, nedum nostrates, rei literariæ cultores, haberetur, aliquos præter Brenemannum superius adductum recensere non piget, qui Præfulem honoris causa invisuri, Rhodigium, alias non adeundum, consulto diverterunt. Quorum nomina occurrunt, hi sunt. Alexander Cuningamius Scotus, a Britannis Venetias ablegatus, Andreas Eques Fountaine Anglus, Carolus Baro Smettau Borussus, Jo. Jacobus Mascovius Saxo, Scipio Marchio Massejus Veronenfis, Nicolaus Madrisius, & Justus Comes a Pace, ambo Utinenfes, quorum alter lætissimus adolescens in ipso ætatis flore præreptus uberes lacrymas nobis elicit. Primo nominandos postremo loco servavi, Carolum Augustinum Fabrum Pistoriensem, mox S. R. E. Cardinalem, & Dominicum Passioneum Forosemproniensem, tunc magnæ spei juvenem, nunc Archiepiscopum Ephesium, & in Helvetia Sanctæ Sedis Apostolicæ Apocrisarium. Hi *Turrium* sibi Romæ pridem amicitia junctum, & quamplurimi factum, Rhodigii quoque convenerunt. Sed & quidpiam aliud hic memorandum. Religiosus Episcopus ea caritate, qua pro animarum salute flagrabat, viros cetera doctos, multisque naturæ donis instructos, sed funestissimo schismate ab ortu involutos, sinceræ benevolentia doctrinæque plenissimis verbis de errore, in quo versarentur, monere non prætermisit. Nemo vero fuit unquam, qui id, sibi peramanter dictum, ægre acciperet. Immo contra non defuit qui serio de re tanti momenti se cogitaturum cum grati animi significatione optimo antistiti polliceretur. Rebus suis postulantibus ubi eum Venetias trajicere contigit, omnium ordinum viris fuit acceptissimus, præsertim elegantis doctrinæ studiosis Jo. Baptistæ Recanato patricio Veneto, Poggii latinæ Historiæ Florentinorum editione conspicuo, Jo. Antonio Astorio, Apostolo Zeno, Hieronymo Davidi, Laurentio Patarolo aliisque non paucis, quos ad unum omnes longum esset enumerare.


XXVI.

Adriensis Episcopus, quod ad staturam, formamque attinet, fuit procerus erectusque: capillis canus, facie macer, supercilio gravis & dignitatem præferens; colore subalbus, raris ante os dentibus, sermone humanus, & ad majestatem quandam a natura ipsa compositus. Habitu corporis parum firmus, valetudine propterea imbecilli, nec prospera usus. Hæmorrhoidarum profluvium patiebatur,

tur, quod aliquot menses priusquam in cœlum reciperetur, ita suppressum, ut erumpere difficulter posset, causam fortasse morti præbuit; quandoquidem morbi genus, quo decubuit, a medicis dissecto etiam cadavere fuit ignoratum. At in eo nobiliora fuisse animi bona, quam corporis. Etenim præter excellentem, raramque doctrinam sacram æque ac profanam, probitas non passim obvia, caritas pura, ceteræque virtutes, tanto viro dignæ, in illo nunquam desideratæ.

XXVII.

(8) Multa de Ecclesiis *Aquilejensi*, *Forojuljensi*, & *Adriensi* in adversaria conjecerat; sed vel nondum perfecta, vel non concinne absoluta in schedis reliquit. Nec magnæ Ecclesiæ Aquilejensi magni Episcopi patrociniū erat invidendum. Ejus enim Patriarchatus originem omni schismatis labe purgaverat. Hæc sunt, quæ de absolutissimi antistitis vita, ac ingenii monumentis nunc scribenda duximus, quantum scilicet *Elogio historico*, ejus operi præmittendo, comprehendi poterat. Siqua ab aliis secus ac a nobis prodita sunt, ea cum suspectis & a veritatis tramite deviis omnino reputanda esse pronunciamus. Nos perspectissima tantum, quæque ipsi vidimus, literis consignavimus, ut narratores gestorum quidem, sed & laudum, quas viri laudati & ab assentionibus vacui in eum congegesserunt; quandoquidem videmus, hoc ferme unum virtuti præmium superesse. Reliqua enim præmia, uni virtuti debita, alii habere possunt, non item virtutem, quum ii, qui præmia largiuntur, virtutem largiri non possint.



N O T Æ.

Clarissimo Archiepiscopo Iusto Fontanino, vel ex hoc sui grati animi monumenta erga Philippum a Turre Episcopum Adriensem abs se prolato, quo posterorum memoria illustriora facta, virtutesque ejus elogio historico complectendo, tradidit, quodque huic præmittere editioni pretium operis esse duximus, nos plurimum esse obstrictos, ultro fateamur oportet. Verum, quum Censoria quadam scribendi formula, qua ingenium minus facile, & in ceteros minus blandum ostendit, §. XXVII. concludat, notulas aliquas addere statumus; ut sciatur ea, quæ Cl. Vir Hieronymus Comes Leonus in altera, quam italicè scripserat, Vita consignavit (Leonum enim inibi notari certo scimus) si secus ac a Fontanino prodita sunt, non esse cum suspèctis, & a veritatis tramite deviis omnino reputanda.

- (1) Sub initium; ut domesticæ tabulæ nos docent.
- (2) Hic fallitur Leonus, qui eam ex Comitibus Frumentinis de Cusano facit.
- (3) Philippus Patavii accepit Doctoris insignia, die xxv. Januarii. Et in hoc examine Promotore usus est, non Antonio Vaira, sed is fuit D. Comes Jacobus Caimus Utinensis ad lectionem juris Cæsarei de fero.

in primo loco, ut ex tabulis privilegii apparet.

- (4) Narrat Leonus Cardinalem Norisium suum Opus Cenotaphia Pisana, antequam in lucem ederet, nostri Philippi judicio subjecisse. In hoc etenim fatemur allucinatum. Norisius enim librum hunc vulgavit anno 1681. septennio antequam Patruus noster Romam proficisceretur. Illuc porro referuntur hæc verba Fontanini, ubi de amicitia cum Norisio Romæ inita, cui seni, inquit (Norisio), ipse juvenis (Philippus) nunquam antea innotuit. Sed numquid notus esse non poterat?

- (5) Uterque, Fontaninus, & Leonus, sed diversa narratione factum seu cogitatum Clementis XI. Pontificis Maximi consignarunt, de Sinarum amplissima, nempe, Legatione nostro Philippo demandanda. Putamus tamen Cl. Leonum a vero non aberrasse, postquam maxime eadem animadvertimus & in Funebris Oratione Cl. Viri Francisci Treccii, qui ab ipso vivente Episcopo multa exceperat.

Miramur vero magis Cl. Fontaninum, pro eo quod inter ipsum & Patrum nostrum epistolarum intercedebat familiarissimo commercio; miramur, inquam, illum ejusdemmet Summi Pontificis Clementis animum, mentemque.

que latuisse. *Adriensi etenim Episcopo, quum Græcam & Latinam Ecclesias spes affulisset simul posse uniri, difficillimam hanc provinciam dare cogitaverat, eum in re tanta, tamque ardua ad Rusiæ Magnum Ducem alegantando. Qua de re certissimum apud nos testimonium sunt Epistole Magni in Ecclesia Viri, postea S. R. E. Cardinalis moribus, & doctrina amplissimi.*

- (6) *De extremo morbo, ipsemet Clariss. suiue amicissimum Antonium Vallisnerium per literas consuluerat. Data sunt Rhodigii die 18. Januarii ann. 1717. Iis graves sui Corporis affectus postquam descripsit; urinae, scilicet, reddendæ difficultatem; Hæmorrhoidum suppressionem; in abdomine intumescantiam, duri-
tiem, & tensionem; sitim item inexplebilem; in periculosissimum se morbi genus prolabi ait, his verbis: che Dio voglia non vada a finire in qualche Timpanite, e poi di peggio. Et quem timorem statim initio epistolæ explicaverat, sub finem artis medicæ subsidium implorans, iterum suum vitæ terminum sibi instare affirmat hoc modo: ma ella mi dia qualche rimedio, e qualche soccorso. So che la mia salute l'è cara. Non voglio dir la vita, perche non siamo, lodato Iddio, in questi termini; ma questa sorta di mali vanno però poco a po-*

co conducendo dove haffi da arrivare. Et heu, quam prope. Vix post mensem exactum, triste vaticinium adimpletur.

- (7) *Solus Leonus sepulchrale hoc elogium ediderat; alicubi quidem corruptum. At venia est ei danda, si passim iis credit, quos par erat opinari, optime omnia nosse de Episcopo, ac de rebus ejus.*
- (8) *In recensendis ejus operibus sequens Oratio ab utroque ejus Vitæ scriptore fuit prætermissa, primus studiorum suorum in lucem editus partus = Orazione Panegirica a Domenico Mocenico, Proveditore alla Sanità &c. Detta nell' Accademia degli Animosi di Cividale &c. In Udine 1683. Nullusque eorum explicationem meminit antiqui lapidis Adriæ extantis, quam in Præfatione, diximus laudari a Patribus Trivultianis in suis memoriis anni 1703. de mense Majo, & Augusto. Epistolarem etiam Dissertationem hic subjungimus, quam vulgavit Cl. Leonus anno 1722. Tom. I. art. II. Supplementi de' Giornali, post jam editam Auctoris Vitam, hoc titulo = Lettera sopra una pubblica Iscrizione di Confini, che stà registrata a lettere antiche nel Palazzo pubblico di Asolo. E sopra un frammento d'altra Iscrizione pur d'Asolo, al Sig. Dott. Jacopo Facciolati &c.*

XLVIII

Manuscripta etiam quam plurima adservamus ; inter quæ dissertationes varii generis a Scriptoribus ejus vite partim ignoratas, tum ad Ecclesiasticam, tum ad profanam eruditionem pertinentes . Sed & doctissimorum Virorum tam ex Italia nostra, quam ex ultra montes epistolarum copia locupletatur Bibliotheca Patruī nostri, jure hæreditario ad nos delata ; omni,

ut ita dicam , scientiarum genere refertissimarum, quas ipse apprime aut profitebatur , aut certe mirifice in iis delectabatur .

Ceterum singula Philippi a Turre gesta a Cl. Leono tradita in laudata Vita, Venetiis edita anno 1721. & in Italicarum ephemeridum Tom. XXXIII. art. 1. recusa, veritate fulciri constanter, sanctèque pronunciamus .





CAPUT PRIMUM.

Totius quaestionis status. Tempus mortis Elagabali pendet a die ejus Antiochia in Urbem adventus. Hic dies ut habetur, modus militaris itineris antiquorum est explorandus. Illud iter potuit absolvi spatio trium mensium. Hinc adventus Elagabali in Julium mensem est referendus. Vignolii difficultates. Ejus de militari itinere sententia. Hujus itineris mensura XX. vel XXV. millia passuum in singulos dies fuisse probatur ex historia Romana. Locus Vegetii explicatus. Ex eodem duplex gradus militum Rom. in expeditionem eunrium. Vegetius iterum explicatus. Vignolius Auctori immerito opponit. Ejusdem mentem male interpretatur. Quid sit Mansio. Quantum altera ab altera distabat. Earum usus. Quid secundis, tertiis, quartis Castris. Mansiones ubi erant dispositae; & iterum de earum usu. Ex his falsa Vignolii opinio, de militaris itineris mensura. Probatur etiam ex absurdis, quae hinc sequerentur. Hujus itineris modus iterum exemplis demonstratur; & probatur maxime auctoritate Polybii. Riccilius emendatus. Mensis & Nox praelii Cremonensis inter Antonium, & Arrium Varum inquiritur, & statuitur. Eclipsis Lunae accidit in nocte ejusdem pugnae. Itinera militaria Romanorum in Tabella exposita; qua justum unius diei iter XX. M. P. vel exaequare, vel excedere demonstratur.

PRIMA quæ inter me, & Cl: Vignolium agitur quaestio, totius disputationis veluti cardo est & caput. Inquirimus, quo anni tempore Antoninus Elagabalus vita excesserit: num mense Martio A. C. 222., ut mihi cum Pagio visum est; an vero post diem XVI. Maii, quod ille pro-

certo habuit. Convenit autem inter nos, præcipuum temporis hujus characterem desumi ab Eutropio, qui lib. 8. cap. 13. refert Elagabalum *biennio & octo mensibus* post adventum in Urbem interfectum fuisse; quare si adventus hujus dies dignosci poterit, mors etiam facile patefiet. Porro de hoc etiam consentimus, ut idem Augustus Nicomedia discesserit initio Aprilis ann. 219. quocirca dies adventus pendet a temporis spatio, quod ille insumsit in iter Nicomedia Romam, quod quidem iter non discrepamus esse M. D. miliarium. Cum igitur in priore Opere pag. 7. viam hanc posse tribus mensibus absolvi conjecissem, propterea subdidi, *adventum Elagabali in Urbem conferendum esse in mensem Julium*: quæ verba mea V. Cl. fronti hujus capitis præfixit sibi oppugnanda. Id vero confici dixeram ex modo itineris militaris antiquorum, quod iter cum contineret in singulos dies millia passuum viginti, vel quinque & viginti, distributis diebus per mille & quingenta milliaria, & datis intervallis opportunis, tres menses conflantur: qui ducti ab exordio Aprilis, quo susceptum est Elagabali iter, in Julium definunt mensem. At V. Cl. negat Imperatorem hunc cum duabus Augustis, Matre & Avia, & maxime cum exercitu, iter hoc tam celeri gradu facere potuisse, ut Julii mensis initio Romam pervenerit. Quippe sibi ait, *non modo difficile videri, verum etiam nec fieri posse existimat, milites armis instructos, neque unius vel alterius diei, sed plurium mensium iter facturos*, viginti aut quinque & viginti milliaria in singulos dies potuisse conficere: quamquam hæc mensura itineris militaris pridem ab eruditis viris auctoritate Vegetii tradita fuerit. Ergo in hoc capite sibi probandum sumit, militare unius diei iter apud antiquos non amplius quam OCTO, aut DECEM ad summum milliaria complexum fuisse: qua ratione digestis octo hisce, vel decem miliaribus per M. D. & computatis diebus, qui ad exercitus quietem sunt necessarii, contendit septem fere menses Elagabalum consumpsisse in hoc iter, & Romam non ante Novembrem pervenisse.

At

At si ego evicero, quod a me evictum iri plane affirmo, nostram illam, & ab omnibus probatam hætenus, itineris militaris mensuram, tum auctoritate, tum exemplorum copia undequaque fulciri; hanc vero, nunc primum a Cl. Vignolio in adspæctum lucemque hominum educatam, nullo inniti solido fundamento; hoc erit etiam demonstratum, Elagabalum advenisse Romam initio mensis Julii ann. 219., atque inde ex Eutropio numeratis mensibus octo, supra annos duos, mortem ejus in Martium mensem ann. 222. omnino conferendam esse. Ceterum in re hac longior ut sim, oportet: nam ut appareat, *non modo fieri potuisse, verum etiam factum esse*, ut milites armis instructi, & plurium etiam dierum iter facturi compleverint uno die xx. & xxv. milliaria, colligenda fuere ex historia cum Romana, tum Græca itinerum militarium exempla complura: quod cum antea nemo præstiterit, nam Scriptores de militia antiquorum nihil aliud ferme attulerunt, quam locum Vegetii, de quo statim, & exempla quædam summæ celeritatis, quæ ad negotium nostrum non pertinent; propterea duo priora hæc capita, in quæ rem totam distribuam, component justam veluti ac plenam DE ITINERIBUS MILITARIBUS tractationem.

Vegetius itaque lib. 1. de re militari cap. 9. hæc habet; *Militari ergo gradu viginti millia passuum boris quinque duntaxat æstivis conficienda sunt. Pleno autem gradu, qui citator est, totidem boris viginti quatuor millia peragenda sunt. Quidquid addideris cursus est, cujus spatium non potest definiri.* Hunc ego locum Vegetii respexi cum diurno militum itineri xx. millia passuum, vel xxiv. dedi; neque me deceptum arbitratus sum, cum docti omnes consentiant, Vegetium ita intelligendum esse: inter quos Lipsius de militia Rom. lib. V. dial. 11. & 14. Petrus Ramus de militia Julii Cæsaris parte II., & Bergerius de publicis & militaribus viis lib. IV. sect. 9. At V. Cl. quamvis fateatur ita ab eruditis acceptum hunc locum; attamen Vegetium ait de tironibus loqui; quodque *a tironibus non ar-*

matris exercitii causa tantum fieri solet, id milites armis instructos exequi posse negat. Verum quidem est, Vegetium de tironibus loqui, sed si totum hoc caput, imo & librum hunc primum quis perpendat, nihil aliud doceri tirones animadvertet, quam ut assidua exercitatione discere assuescant, quod postea in acie & in militia custodiendum illis erit. Ideo enim, ut idem auctor lib. I. cap. 1. monet, *exercebantur tirones, ut quacumque evenire in acie atque in præliis possent, omnia in campestri meditatione prænoscerent. Siquidem, ut ait lib. II. cap. 22., ratio manifesta sit, semper in otio debere fieri, quod necessario faciendum videtur in prælio.* Porro gratis dicitur, tirones non incessisse armatos: id enim nec Vegetius habet, nec disciplina & consuetudo in iis exercendis patitur. Idem auctor initio capituli 19. libri ejusdem docet, *pondus quoque bajulare usque ad LX. libras, & iter facere gradu militari frequentissime cogendos esse juniores.* An ergo illis ita esse delicatis liceret, ut arma non ferrent? Ceterum num Vegetius intelligendus sit de solis tironibus, exempla itinerum militarium, quæ magno in numero cum in hoc capite, tum in sequente afferam, satis superque ostendunt.

Duplex itaque ex Vegetio fuit gradus militum Romanorum in expeditionem euntium, *militaris*, quo quinque horis æstivis conficiebant xx. millia passuum, & *plenus* quo, citatior cum esset, quinque iisdem horis M. P. XXIV. peragebant. Horæ Romanorum erant inæquales; diem enim toto anno dividebant in duodecim horas, sicuti & noctem: quare majores erant diurnæ in æstate, in hieme minores. Romæ, quæ urbs habet gradus prope 42. latitudinis, arcus diurnus in Solstitio æstivo est circiter quindecim horarum. Quamobrem quinque horæ æstivæ inæquales æquivalent æqui-noctialibus, seu nostris horis sex cum quadrante. Proinde milites ambulantes in parallelo Romano una hora æquali, seu nostra conficiebant 3200. passus. Ceterum hæc Vegetii præscriptio de consueto militari itinere accipienda est: nam aliquando plura etiam milliaria peragebantur, prout mansiones & loca, ad quæ exercitus eo die pervenire debebat, erant

grant disposita : quod in exemplis adducendis perspicuum fiet. Tunc vero plus quam quinque horis æstivo tempore militari gradu erat ambulandum.

Sed neque passus est V. Cl. a me iter militare ad *decem & octo* millia passuum perducere : quem milliarium numerum continere Mansiones in Thracia ex Lactantio de mortibus Persecut. cap. 45. affirmaveram. Siquidem ille pag. 10. ait, ex milliaribus decem & octo, quibus Maximinus Perintho ad primam Mansionem processit, justam diurni itineris militum quantitatem a me colligi non potuisse : Nam subdit, ejusmodi Maximini profectio omnino cursus fuit, & in magna celeritate posita, ut patet ex verbis Lactantii, quæ ipse profert, atque ego paullo post repetam. At non ego ex festinata illa Maximini profectio, quam ne indicavi quidem verbo ullo, militaris itineris quantitatem collegi; sed dixi, justum militum iter ex distantia Mansionum, quæ in Thracia ex Lactantio ad XVIII. milliaria extendebantur, cognosci posse: quod quam verum sit, ex iis quæ de Mansionibus postea tradam, facile constabit. Porro ipsa quoque celerissima Maximini profectio mihi plane suffragatur. *Maximinus*, inquit Lactantius cap. eodem 45. *exercitum movit à Syria, & MANSIONIBUS GEMINATIS in Bithyniam concurrit.* Et paullo post: *Accepta in deditionem Perintho, aliquanto moratus, processit ad Mansionem millia decem & octo. Nec enim poterat ulterius, Licinio jam secundam Mansionem tenente distantem millibus totidem.* Cursus certe fuit illa Maximini profectio, quia *geminatis mansionibus* concurrit. At si non geminasset mansiones, verum unam tantum peragrasset, non cursus ejus profectio, sed justum unius diei iter fuisset. Ideo enim notavit Lactantius, Maximinum *geminasse* mansiones, quia duplum itineris diurni confecit. Joannes Columbus in notis ad hunc locum Lactantii hæc scribit: *Geminatis mansionibus, idest, ut quotidie tantum itineris conficeret, quantum alias biduo.* Una ergo mansio decem & octo milliaria complectens, unius diei iter est. Ita post captam Perinthum volebat Maximinus duas mansiones, & sex & tri-
ginta

ginta millia passuum progredi : qui profecto cursus fuisset . Ergo una mansio , ac decem & octo milliaria , non cursus ; sed iustum unius diei est iter . Quoniam vero Mansiones ad itinera militaria exploranda & definienda maxime pertinent , de iis agendum est : quo etiam , quæ modo dicta sunt , plurimum accipient lucis & momenti .

Mansio , inquit Salmasius ad Solinum pag. 495. ubi plura de Mansionibus , locus erat in quo confecto itinere per noctem quiescebant , & sumebatur ut plurimum pro unius diei itinere . Nam *manere* veteribus significabat *pernoctare* , ut notavit doctissimus Gisbertus Cuperus , nunquam sine laudis præfatione nominandus , ad locum Lactantii supra allatum : Quæ cum de qualibet mansione excipiendis viatoribus apta dicantur ; Mansiones , de quibus nunc agimus , erant Stationes in viis publicis Romani Imperii , in quas se milites expeditionis tempore quiescendi causa recipiebant : quæ annis & pabulis ex vicinorum collatione instruebantur ; & ita dispositæ erant , ut altera ab altera abesset *unius diei itinere* . Quoniam vero Mansiones etiam cursui publico inserviebant , divisæ erant in Mutationes in quibus cursores mutabant equos . Idcirco in itinerario Burdigalensi , seu Hierosolymitano , in quo locorum , urbium , vicorum , villarumque nomina propria appositam habent Civitatis , Mutationis , & Mansionis denominationem , plures annotantur Mansiones quam Civitates , & multo plures Mutationes quam Mansiones . Hæc Bergerius in opere paullo ante laudato lib. IV. sect. 9. Porro apud Grecos *Mansio* est *σαθμός* , quod vocabulum Hesychius ita explicat : *σαθμοί , στρατιωτικὴ κατάλυσις* , *militare diversorium , seu mansio* . Qua voce utuntur passim historici Græci , ubi de itineribus militaribus agunt , ut Herodotus , Xenophon , Josephus , & Arrianus , quorum loca aliqua postea ad rem proferam . Latini antiquiores , quibus nomen Mansionis ignotum , *Castra* vocant , quod Romani , quibus in locis pernoctandum erat cum exercitu , statim Castra metabantur : quamobrem cum apud eos legitur , *secundis , tertiis , quartis Castris* , legitimus militare iter intelligendum est , quod

quod duobus, tribus, vel quatuor diebus conficitur. Exemplum passim extant apud Romanos Historicos, quorum aliquot usui erunt, cum de diurno militum itinere agam. Tam igitur apud veteres *Castra*, quam apud ævi sequioris Scriptores *Mansio*, & apud Græcos *σαδμός*, iter erat unius diei.

Ergo, ut ante dixi, Imperatorum ævo in viis publicis & regiis, quæ *militares* quoque appellabantur, propterea quod milites in expeditionibus per eas incedebant, Mansiones erant dispositæ, ubi Civitates non essent, ædificiis amplis, & omni commeatum copia pro eorundem militum usu instructæ. Narrat Lampridius de vita Severi Alexandri capite 45. hunc Imperatorem itinerum dies publice proposuisse; ita ut edictum penderet ante duos menses in quo scriptum erat: *Illa die, illa hora, ab urbe sum exiturus, & si Dii voluerint, in prima MANSIONE mansurus*, deinde per ordinem singulæ Mansiones notabantur: ubi quidem de militari professione sermo est. Ammianus Marcellinus lib. 16. in fine refert, Constantium ab *Argentorato*, cum pugnaretur, *Mansione quadragesima* disparatum fuisse. Vegetius quoque Mansionum militarium meminit lib. 3. cap. 8. sub initium. Porro Mansiones instructæ erant horreis publicis, in quibus commeatus, & annonæ servabantur, ut militibus itinerantibus, atque in *eis quiescentibus usui essent*. Idem Lampridius Cap. 47. de eodem Alexandro, *milites*, inquit, *expeditionis tempore sic disposuit, ut in Mansionibus annonas reciperent*. Et Eumenius in panegyrico Constantini, five alius incertus auctor cap. 16. refert Maximianum Herculium, cum fugam arriperet, commeatus omnes, qui in Mansionibus erant, consumpsisse, ne Constantini exercitus, *consumtis*, inquit, *copiis Mansionum, eum consequi posset*. Propterea maxima cura & diligentia annonæ publicæ in Mansionibus custodiebantur: quod Anthemio præfidi edixerunt Valentinianus, & Valens in leg. 2. Cod. de conditis in publicis horreis: Cum ad quamlibet urbem, *MANSIONEMVE accesseris, protinus horrea inspicere te volumus, ut devotissimis militibus depurata, & incorruptæ species præbeantur*. Ceterum

8 PHILIPPIA TURRE

terum multo ante Romanos Augustos in viis militaribus & publicis Mansiones ædificiis amplis construendas Persarum reges curaverant, ut de via quæ a Græcia in Persidem ducebat, narrat Herodotus lib. v. *Ubique*, ait, *sunt regii Statthmi pulcherrimi*: in quibus par est credere servatas quoque fuisse annonas militibus euntibus distribuendas. De hac via rursus in sequentibus.

Hinc igitur plane constat, Mansiones unius diei itinere inter se abfuisse; propterea quod ad eas quotidie oportebat milites divertere, ut paratas annonas & pabula reciperent, atque in iis pernoctarent. Nec poterant alio declinare, vel in medio inter unam & alteram Mansionem, seu Civitatem consistere: quia annonam & cetera ad cibum & usus alios necessaria non invenissent. Adducam in rem hanc egregium S. Ambrosii testimonium, eo libentius, quod reperitur eo ipso in loco, qui a Cl. Vignolio allatus est pag. 15. & 16. nimirum in Commentario Psalmi CXVIII. octonario v. *Miles*, inquit, *qui ingreditur iter, ab Imperatore itinerarium accipit, & custodit illud, ut inveniat commeatum parata subsidia. Si alio ambulaverit itinere, annonam non accipit, MANSIONEM paratam non invenit*. In Mansionibus itaque consistendum fuit militibus, ut commeatum & annonam invenirent. Hinc fit, ut tantum illi singulis diebus cogerentur ambulare, quantum Mansiones, seu Civitates inter se distabant; & tot horas infumere, quot militari gradu incedendo opus erat, ut ad locum recipiendis pabulis destinatum pervenirent. Mansiones ergo illæ, de quibus ante ex Lactantio meminimus, cum distarent decem & octo milliaria, totidem omnino die uno conficienda fuerunt militibus. Aliis in regionibus Mansionum & Civitatum varia erat, pro locorum situ & opportunitate, intercapedo. In Burdigalensi itinerario, in quo ubique, ut dictum est, notantur intervalla Civitatum & Mansionum, & identidem in summam recolliguntur, nulla fere eorum minus ab alia disjuncta est, quam XVIII. milliariis, plurimæ ad XX. & XXV. & amplius aliquando perducuntur.

Esto

Esto unum & alterum exemplum in via, quam tenuit Elagabalus, secundum summam relictam. *Fit*, inquit, *ab Aquileja Sirmium usque millia CCCCXXII. Mansiones XVII.* Rursus: *Fit a Sirmio Serdicam usque millia CCCXIII. Mansiones XIII.* Divisis milliariis per Mansiones, remanent pro unaquaque Mansionem, in primo exemplo milliaria XXV. in secundo XXIV. Ex his licet cognoscere quam vera esse possit Cl. Vignolii opinio, quæ diurno militum itineri milliaria OCTO, vel DECEM tribuit. Nam si non amplius quam octo, vel decem millia passuum confecissent milites, media via inter unam & alteram Mansionem coacti fuissent subsistere: ubi nec *commeatum subsidia*, & *annonam* recipere, nec *Mansionem paratam*, ut inquit S. Ambrosius, invenire potuissent. Nam extra Mansiones & Civitates nemo unquam scripsit fuisse loca alia (quippe Mutationes, ut nomen ipsum indicat, mutandis equis tantummodo inserviebant) in quibus *borrea* essent instructa, ut *devotissimis militibus*, uti ajunt Imperatores, *incorruptæ species*, seu *copiæ Mansionum*, ut loquitur Eumenius, præberentur. Contra vero apparet, mensuram itineris militaris, quam nos computando viam Elagabali ad XX. vel XXV. millia passuum perduximus, omnino esse & Mansionum rationi, & veritati consentaneam. Ceterum Mansiones militares fuisse in usu etiam ævo Elagabali, ex locis Lampridii de Severo Alexandro ante recitatis, in aperto est. Præterquam quod si post ipsum mensura diurni militum itineris inter unam & aliam Mansionem continebatur; ante ipsum quoque eundem modum itineris uno die milites tenuisse non est dubitandum. Nam disciplinæ militaris consuetudo ita facile mutari non potuit: quod etiam tot afferenda itinerum exempla manifeste docent.

Hæc certa cum sint, uberius tamen ac luculentius diurni militum itineris modus explicandus est & demonstrandus. Primum occurrit historicorum maximus, qui rem hanc plane dirimit ac definit. Narrat Livius lib. XXI. cap. 27. editionis Venetæ ad usum Delphini, quam in posterum quo-

que appellabo, Annibalem comparatis omnibus ad trajiciendum Rhodanum, cum ex adverso Romanus hostis consisteret, jussisse, *Hannonem cum parte copiarum ire ITER UNIUS DIEI*. Hoc *unius diei iter* quot milliaria complectatur, statim his verbis explicat: *Ad id dati duces Galli educunt inde MILLIA QUINQUE ET VIGINTI ferme*. Unum hoc testimonium, quod neque interpretatione ulla eget, neque ullis ambagibus est involutum, satis esse posset ad nostram confirmandam, & Cl. Vignolii opinionem convellendam. At exemplis etiam res hæc veluti sub oculos est proponenda. Quæ quidem exempla non unius aut alterius diei erunt, neque militis expediti & sine armis; sed, quod esse *difficile, non modo, verum etiam fieri non posse* viro Clarissimo videbatur, exercitus repræsentabunt omni apparatu instructos, & gradu militari plurium dierum, imo & mensium spatio in expeditionem euntes.

Primum atque omnium antiquissimum præbet Polybius qui lib. II. pag. 145. editionis Basil. anni 1557. de Gallis Romam properantibus ait: *Cumque jam circa urbem essent, quam Clusium appellant, distatque ab urbe Roma non amplius TRIUM DIERUM spatio, nunciatur eis &c.* Clusium, nunc *Cbiusi* apud Clanas paludes Roma abest, ut a peritis locorum accepi, milliaria circiter octoginta. At cum milliare Romanum recens aliquanto brevius sit antiquo; milliariorum enim recentia 80. conficiunt antiqua 64. circiter: quæ divisa per dies tres dant milliariorum VIGINTI ET UNUM in singulos dies itineris militaris, de quo loqui Polybius non est dubitandum.

Annibal transgressus Alpes cum Italiæ universæ immineret, atque ad eum compescendum Scipionis Consulis copiæ satis esse non viderentur, Sempronius alter Consul jussu Senatus e Sicilia Ariminum profectus, inde facto ad Trebiam itinere Collegæ conjungitur. *Hic exercitum*, inquit Polybius lib. III. pag. 268. *longo labore itineris fessum, ut qui e Lilybæo QUADRAGINTA continuis DIEBUS pedestri itinere Arimi-*

DISSERT. APOLOGETICA II. II

Ariminum pervenerat, reficit. In Antonini Itinerario a Lilybæo ad trajectum Siciliæ, seu ad Columnnam, atque inde Ariminum numerantur M. P. 991. Summa hæc per quadraginta dispersita reddit milliaria **QUINQUE ET VIGINTI**, quæ in singulos dies exercitus Sempronii peregit. Ne quid dissimulem, Livius lib. XXI. cap. 51. rem aliter narrat, & Sempronium non pedestri, sed maritimo itinere exercitum è Sicilia misisse Ariminum literis tradit: quo nostra distantia & temporis putatio concideret. Mira quidem hæc est dissensio: & num Polybio, an Livio potior fides sit habenda non liquet. Certe Polybius multo vicinior fuit rei gestæ.

At demus eum falsum in narratione; falsus tamen esse nequit in æstimatione itineris. Ille enim qui rei militaris scientissimus fuit, & sæpius in acie versatus est, nequaquam scripsisset exercitum Sempronii quadraginta diebus a Lilybæo Ariminum pedestri itinere pervenisse, nisi ex militari consuetudine hujusmodi iter intra illud temporis spatium perfici potuisset. Ergo credidit Polybius, potuisse Romanum exercitum milliaria XXV. in singulos dies explere, quod Vignolius non credit. Uter eorum magis sit probandus, judicent docti.

Alia itinera militaria persequamur. Scipio, uti refert Livius lib. XXVIII. cap. 19. cum ad novam Carthaginem in Hispania esset, L. Martium cum tertia parte Copiarum ad Castulonem oppugnandum mittit: *ipse cum cetero exercitu QUINTIS ferme ad Illiturgim CASTRIS pervenit.* Non convenit inter Geographos de situ hujus Civitatis: quidam *Lietor*, alii *Andujar*, alii *Ivisam* putant. Utra ex his fuerit Illiturgis, certe ad Bætum fluvium posita erat. Carthagine nova, unde Scipio profectus est, ad Bætum, qua ex parte illi vicinior est, in mappis Geographicis accuratioribus milliaria circiter centum numerantur, quorum 60. uni gradui Circuli terræ maximi respondent. In uno gradu contineri milliaria Romana antiqua 74. collegit insignis Mathematicus Jo: Dominicus Cassinus, ex dimensionibus atque observationibus a se factis, & collatis cum distantiiis urbium quarundam

dam ex Itinerario Antonini, ut videre licet in Historia Academiae regiae Scientiarum Parisiensis ad annum 1702. pag. 105. editionis Amstelædamensis, & in Commentariis ejusdem anni pag. 20. Quo deceptum constat Ricciolium, qui lib. v. Geographiæ Ref. cap. 34. & 36. unigraui circuli terræ maximi milliaria antiqua Romana 81. tribuit. Ergo Carthagine ad Bætum sunt millia hujusmodi antiqua 124. quæ *quinis castris*, seu diebus quinque exercitus Scipionis conficit, scilicet milliaria QUINQUE ET VIGINTI in singulos dies.

Idem Scipio, ex eodem Livii libro XXVIII. cap. 33. iterum Carthagine profectus contra Mandonium, & Indibilim, DECIMIS CASTRIS *pervenit ad Iberum flumen*. In mapis Carthagine ad Iberum ubi vicinior est, ducenta circiter milliaria colliguntur, seu antiqua Romana ducenta & quinquaginta: quæ per decem distributa, fiunt in singulos dies millia QUINQUE ET VIGINTI. In Itinerario Antonini Carthagine Dertofam, quæ Ibero adjacet, computantur M. P. 287. ex quibusemergunt fere millia NOVE ET VIGINTI diurni itineris. Utram velis ex his duabus mensuram amplecti poteris. Nolim opponat aliquis aliam Scipionis expeditionem, in qua, ut narrat Livius lib. eod. c. 16. a Bætica, qua parte Gades respicit, *septuagesimis Castris* Tarraconem rediit. Nam Scipio non recto itinere contendit, sed huc illic deflexit, *caussis regulorum, civitatumque cognoscendis*: quare nil mirum in ea profectioe septuaginta itineris posuisse dies.

Rursus idem Historicus lib. 45. cap. 19., *Paullus*, inquit, *transgressus Strymonem mille passuum ab Amphipoli Castra posuit: inde profectus QUINTO DIE Pellam pervenit*. Inter has urbes computantur in Itinerario Antonini millia passuum XCIV. Paullus ergo cum toto exercitu XIX. milliaria singulis diebus peregit.

Non unum exemplum miræ celeritatis in Cæsare occurrit; quædam etiam iusti itineris, sed ob locorum incertum situm minus idonea. Unum est tamen lib. VII. de Bello Gall.

Gall. cap. 6. ex quo de aliis judicare liceat. Cum venisset Cæsar Vellaunodunum, inde *biduo* profectus est Genabum Carnutum, & castra ante opidum posuit. Illud hodie est *Château Landon*, hoc *Orleans*: quæ milliariibus 50., ad mensuram antiquorum compositis, inter se dissident. Ergo Cæsar uno justî itineris die **QUINQUE ET VIGINTI** millia passuum emensus est. At vir Cl: ex Cæsare ipso justum iter intra octo milliaria contrahendum esse contendit: quæ ejus opinio cum ex hoc solo testimonio satis convicta sit, eam tamen latius suo loco expendam.

Pergamus ad alios. Antonius Primus, Flavianarum partium dux, apud Tacitum lib. 3. hist. cap. 15., cum Mœsici & Pannonicis legionibus Italiam ingressus, audita discordia & seditione Vitellianorum, *universo cum exercitu SECUNDIS a Verona CASTRIS Bedriacum venit*. Esse hoc justum iter modus hic usitatus loquendi ostendit, ut ante monuimus: nec ulla apparet in Historico celeritatis mentio. At Verona a Bedriaco, qui nunc pagus est vulgo *Canneto* ad Oleum fluvium; quadraginta milliarium intervallo abest; ut ex mappis Chorographicis a peritis earum regionum accuratissime descriptis accepi: quibus decem aliis adjunctis, sunt milliaria antiqua **QUINQUE ET VIGINTI** pro unoquoque itineris die.

Postero die Antonius cum parte copiarum progressus ad quantum a Cremona lapidem, profligat Arrium Varum Vitellii ducem, & cum inumbrante vespera universum Flaviani exercitus robur advenisset, cum Vitelliano exercitu, qui ab Hostilia *eo ipso die TRIGINTA millia passuum emensus* Cremonam profectus erat, tertia ferme noctis hora prælium tota nocte varium, anceps, atrox committitur: in quo tandem Flaviani victores die insequente urbem diripiunt atque incendunt. Ergo exercitus Vitellianorum, quamquam, ut fatear, causa aliqua festinandi subsit, **TRIGINTA** millia passuum uno die absolvit.

Dies prælii hujus Cremonensis inquirendus est, quod etiam usui esse debeat, cum de expeditione Mutiani prope finem capi-

capitis insequentis sermo erit. *Neutro inclinaverat fortuna*, inquit Historicus cap. 23., *donec adulta nocte Luna surgens ostenderet acies, falleretque*. Prælium cæperat *bora noctis tertia*; post quam horam, & antequam luna surgeret, varii pugnæ casus recitantur. Exorta itaque luna est circa mediam noctem; nam *adulta* nox de media nocte dicitur, sicut adulta hiems, adulta ætas, quæ inter primam & extremam media est; ut notavit Salmasius in Exercitat. Plinianis ad Solinum pag. 719. Luna media nocte exoritur, cum in ultima syzygia, seu in ultimo quadrante versatur, videlicet septimo post plenilunium die. Non enim omnino senescens erat; quia *umbras equorum virorumque* protendebat, ac Vitelliani *adverso lumine* collucebant. Itaque nox erat diei septimæ post Plenilunium. Cujusnam mensis fuerit hoc Plenilunium, ita colligo. Narrat Historicus cap. 37. audita Romæ defectione Alieni Cæcinnæ, Rossum Regulum pridie Kal. Novembres accepisse unum Consulatus diem, qui Cæcinnæ supererat. Defectio Cæcinnæ paucis diebus ante pugnam Cremonensem accidit, atque ipso Plenilunii die, ut mox ostendam. Quare cum nuncius proditionis allatus fuerit Romam labente Octobri, cujus die 31. Rossius ridiculum unius diei Consulatum occupavit, Plenilunium quod antecessit prælium Cremonense, ejusdem mensis Octobris fuit. Porro Plenilunium Octobris anno Epochæ vulgaris 69., quo hæc gesta sunt, commissum fuit tribus circiter horis ante mediam noctem diei XVIII., uti ex calculo infra patebit: a quo die, seu rectius a die postero XIX. numeratis septem diebus pugnatum est apud Cremonam nocte, quæ subsequuta fuit diem quintum & vicimum Octobris.

Nunc ostendam, quod indicavi, defectionem Alieni Cæcinnæ accidisse sub ipsum Plenilunium, quod etiam fuit Eclipticum. Refert Dio apud Xiphilinum pag. 737. editionis Hannovianæ, Alienum persuasisse Vitellianis, ut in partes Vespasiani transirent: qui primum delent Vitellii imagines, mox facti pœnitentes rursus Vitellium Imperatorem vocant, atque Alienum vinculis constringunt, *cumque jam esset*, subdit

dit Historicus, *ingens tumultus in exercitu Vitellii, tunc Lunæ defectio eum longe majorem fecit; non tantum quod obscurata est, sed quod etiam sanguinolenta atraque esset, aliosque horribiles colores emittere visa est.* Auctor notarum in Tacitum ad usum Delphini lib. 3. cap. 23. arguit Dionem, quod hanc Eclipsim referat ad noctem illam, qua pugna Cremonensis facta est, *refragantibus* inquit, *quotquot sunt historicis Latinis.* Sed perperam ille hoc imponit Dioni: qui perspicue defectum Lunæ cum tempore seditionis Cæcinnianæ, non vero prælii Cremonensis conjungit, ut ex allatis verbis constat. Verum est tamen Xiphilinum in excerpando Dione aliquantum peccasse; nam utrumque factum ita sub eadem narratione comprehendit, ut unum idemque esse videatur, vel uno eodemque tempore gestum: quæ res Auctori illi fucum fecit. At poterat etiam animadvertere hæc narrationis ejusdem prælii verba, quæ Dionem, seu Xiphilinum ab omni vindicant culpa. *Videre, inquit, licebat quoties Luna luceret, nam interdum occultabatur nubibus, pugnare illos, nonnunquam stare &c.* Non ergo ex Dione Luna tunc patiebatur defectum; si modo nubibus obducta, modo splendens erat.

Ut porro suis hæc consentientis momentis, ex Ricciolii tabulis Astronomicis instituto calculo, comperi Eclipsim illam sub hisce temporum characteribus concludi. Anno Chr. L XIX. die 18. Octobris hor. 7. 33'. 35". post merid. initium fuit eclipsis, finis hor. 11. 2'. 55". medium hor. 9. 18'. 15". seu tribus circiter horis ante medinoctium; quo temporis momento Sol versabatur in gr. 23. 57'. 11". Libræ, Luna Arietis. Tota duratio complexa est horas 3. 29'. 20". cum mora in tenebris per tres ferme horæ quadrantes, scilicet min. 44'.

Antequam ab exercitu Flaviano discedam, ex ejus post Cremonensem cladem profectio ad urbem Romæ, duorum dierum itineris quantitas est perscrutanda. *Digressus Narnia,* inquit Tacitus lib. eodem III. cap. 78., *Vespasiani exercitus, festos Saturni dies Ocriculi per orium agitabat.* Saturnalia in vetere Calendario notantur die decimo septimo Decem-

cembris cum duobus insequentibus. Inde exercitus per Flaminiam viam profectus, cap. 79., ad Saxa rubra pervenit; quod accidit nocte diei XIX. ut ostendi in prima Dissertatione cap. IV. pag. 50. At debuit saltem primum diem Saturnaliorum celebrasse Ocriculi: quare duobus diebus, nempe XVIII. & XIX. iter ad Saxa rubra perfecit. Roma Ocriculum in Itinerario Antonini sunt millia passuum XLIX. quibus si demas novem, quantum Saxa rubra distant ab Urbe, ut Victor de Cæsaribus in Maxentio testatur, exercitus Flavianus duobus diebus & quidem hibernis, atque omnium brevissimis, millia passuum XL. absolvit. Neque illum maturasse iter quis suspicetur; quin contra tum milites, tum Antonius Primus eorum dux, moras trahebant ob eas causas quas ibi memorat Historicus: & non ante festinatum est, quam *obsessi Capitolii fama*, quæ itinere jam peracto, dum essent ad Saxa rubra, audita est, *cunctos simul excirer*. Iusta igitur hæc fuit & legitima diurni itineris dimensio.

Anno insequente 70. Titus Vespasiani filius expeditionem Judaicam ab Alexandria profectus suscepit: ex qua certa depromitur ac manifesta diurni militum itineris ratio. Josephus lib. IV. aliis V. in fine eam accurate describit: cujus verba, quamvis longiora sint, operæ est pretium referre: Titus, inquit, *terreno itinere Nicopolim usque progressus ab Alexandria civitate XX. stadiorum intervallo distantem, inde militem longis navibus imponit: Niloque flumine post Mendesium tractum Thmuin usque vehitur: hinc autem egressus in terram apud Tanim civitatem divertit, unde secunda ei mansio fuit civitas Heraclea, & Pelusium tertia. Hic autem milite per biduum recreato, Pelusii fines transiit, unamque mansionem profectus per solitudines ad Cassi Jovis Templum castra ponit: posteroque die apud Ostracinem, quæ mansio aquæ inops erat. Hinc apud Rhinocoluram requiescit, & inde progressus in quartam mansionem Raphiam venit, quæ prima occurrit Syriæ civitas. Gaza vero quintæ mansionis castra suscepit, & postea in Ascalonem, atque hinc Jamniam, deinde Joppem, & ex Joppe Cæsaream pervenit.*

Sunt XIII. Mansiones: quas ut per intervalla metiri possemus, commodum opitulatur Antoninus, in cujus Itinerario urbes eadem ac Mansiones, uti extant apud Josephum, ordine tamen inverso, nam Itinerarium Antiochia Alexandriam procedit, ad amussim numerantur. Per singulas ergo Mansiones excurram, quas Josephus memorat, adnotatis ubique ex Itinerario earundem distantiiis. Itaque ab *Thmuis*; ubi terrestre iter captum est, prima Titi mansio fuit apud *Tanin* civitatem, M. P. XXII. secunda *Heracleam* XXII. & *Pelusium* tertia XXII. Hinc Titus, una mansione *per solitudines* habita, ad Casium templum castra posuit. Mansio hæc inter solitudines, ab Josepho non appellata, in Itinerario *Pentascoene* dicitur, nomine a re ipsa accepto. Nam cum inter Pelusium & Casium solitudines essent, mansio intermedia ob distantiam utrimque xx. milliarium, Pentaschoenon vocata est, scilicet *quinque Schoenorum*. Ita alibi in eodem Itinerario loca obscura ab intervallo nomen accipere observamus, ut a Narbone *ad Vigestim*, ab Aquileja *ad Tricesimum* qui locus appellationem hanc adhuc retinet. *Schoenus* autem apud Ægyptios mensura erat, a *fune* qua iterum spatia putabantur, milliaria quatuor complectens. Ergo apud Itinerarium Pelusio *Pentascoenenon* xx. milliaria notantur; hinc ad templum Jovis *Casi* xx. alia. Postero die, prosequitur Josephus, ad *Ostracinem* pervenit, M. P. XXVI. Plinius lib. V. cap. 12. scribit Ostracinem distare a Pelusio Lxv. millibus passuum: qui numerus, uno excepto milliari, plane cum Itinerario congruit. Inde Titus apud *Rhinocoluram* mansit M. P. XXIV. hinc *Raphiam* venit, XXII. postea *Gazam*, XXII. *Ascalonem* XVI. & *Jamnia* XX. A Jamnia *Joppem*, hinc *Cæsaream* profectus est. Auctor Itinerarii viam aliam per mediterranea persequitur: nam a Jamnia per Diospolim, M. P. XII. & Beteron XXII., Cæsaream XVIII. contendit. Sunt M. P. LII. Ergo Titus a Jamnia Joppem, & Cæsaream duabus mansionibus LII. milliaria confecit: nisi pauca milliaria ob flexum in mediterranea velimus detrahere.

Hoc sane exemplo nullum esse potest illustrius ac luculentius ad Romanorum exercituum justum ac legitimum unius diei iter pernosendum. In quo videat vir Clariss: nullum esse diem præter unum, qui non VIGINTI millia passuum vel exæquet, vel excedat. Verum ut hæc atque alia ante relata itinera simul animo atque oculis comprehendi possint, ea descripta damus in subjecta tabella; in cujus columna prima ponuntur Civitates & loca, unde iter susceptum, & ad quæ fuit terminatum; in secunda numerus Castrorum & Mansionum, seu dierum ejus itineris; in tertia numerus milliarium toto itinere peractus; in quarta demum ex eo numero deducta milliaria, quæ unius diei itineri conveniunt.



T A B U L A

ITINERUM MILITARIUM ROMANORUM.

UNIUS DIEI Iter ex Livio M. P. XXV.

Urbes & Loca.	Castra seu Itinera diurna.	M. P. totius iti- neris.	M. P. itineris. unius diei.
Clusio Romam	III.		
A Lilybæo Ariminum	XL.	990	XXV.
Carthagine Illiturgin	V.	124	XXV.
Ad Iberum	X.	250	XXV.
Amphipoli Pellam	V.	94	XIX.
Vellaunoduno Genabum	II.	50	XXV.
Verona Bedriacum	II.	50	XXV.
Ostilia Cremonam	I.	30	XXX.
Ocriculo ad Saxa rubra	II.	40	XX.
Thmuis in Ægypto Tanim	I.		XXII.
Heraclea	I.	22	XXII.
Pelusium	I.	22	XXII.
Pentafchoenon	I.	20	XX.
Casium	I.	20	XX.
Ostracinem	I.	26	XXVI.
Rhinocolouram	I.	24	XXIV.
Raphiam	I.	22	XXII.
Gazam	I.	22	XXII.
Ascalonem	I.	16	XVI.
Jamniam	I.	20	XX.
Joppem	I.	22	XXII.
Cæsaream	I.	22	XXII.

Sunt Castra, & Mansiones, seu diurna itinera LXXXIII. M. P. 1886.



C A P U T I I.

Ex historia Græca confirmatur iusta diurni militaris itineris mensura. Alexandri Magni fuit xx. milliaria. Et quot quum festinandum ei erat. Ejus profectio Babylone Susas non pertinet adejusdem celeritatem; sed fuit iustum iter. Apud Xenophontem plurima exempla habentur in expeditionibus Cyri. An possint comparari cum itinere Elagabali. Dæ Tabulæ exhibentur itinerum exercitus Græcorum. Allata Romanorum, Græcorum, & Alexandri diurna itinera sunt numero 405., quæ præter octo exæquant omnia, vel excedunt xx. M. P. Bina Cæsaris exempla a Vignolio opposita expenduntur. Perperam ex his deducit diurna itinera militaria non ultra OCTO milliaria producta fuisse. Duplicare quid significet. Alterum Cæsaris exemplum, item & locum Vegetii ab se adducta non est assequutus. Explicantur; Et hinc perperam conferre Elagabali in Urbem adventum in Novembrem mensem ostenditur. Item exemplum Tiridatis alienissimum esse ad militaria itinera, & ipsius Elagabali definiendum, probatur. Iter Mutiani Antiochia Romam expenditur. Ostenditur, nullum esse magis idoneum quod cum Elagabali itinere possit comparari ex allatis exemplis. Concluditur xx. imo v. & xx. M. P. exercitus antiquorum in singulos dies iusto itinere peregrisse. Item Elagabalum intra tres circiter menses Nicomedia Romam potuisse cum exercitu venire. Adventum ejus in Urbem conferendum esse in Julium mensem. Et ejusdem mortem in mensem Martium ann. 222. incidisse.

VERUM in his non conquiescimus. Nam lustratis Romanorum Castris, Græcorum quoque exercitus sunt explorandi. Horum diurna itinera ab Arriano, Herodoto, ac Xenophonte, temporum inter eos posthabita ratione, potissimum repetam. Arrianus initio lib. III. refert, Alexandrum

drum in Ægyptum contendentem *septimo postquam Gaza movit die Pelusium* pervenisse. In itinerario Antonini, ut capite superiore dictum est, Gaza Pelusium collecti numeri conficiunt M. P. CXXXIV. quæ per septem partita reddunt VINGINTI ferme milliaria in singulos dies. Hoc veluti specimen esse potest aliorum Alexandri iterum, cum militari gradu, & ad justum diei dimensum proficisceretur. Nam si festinandum illi fuit, longe majore itineris modo usus est. Scribit idem Arrianus lib. III. pag. 211. editionis G. L. Amstelædamensis 1668. nocte una & quidem brevissima Mensis Junii, ut pag. 213. notatum reperitur confecisse stadia quadringenta, seu millia passuum quinquaginta putatis octo stadiis in singula Milliaria. Item lib. eodem pag. 222. stadia sexcenta biduo emensus est, seu M. P. 75. & lib. IV. pag. 251. tridui spatio stadia mille, & quingenta M. P. 188. At Cl. Vignolius, cum de expeditionibus Alexandri maxima celeritate confectis pag. 8. & 9. agit, prætermisissis exemplis hisce, quæ obvia erant in Arriano, sed rebus suis non proderant, unum aliud ex eodem Historico lib. 3. exponit, quod quidem nihil ad celeritatem pertinet. Alexander, inquit, dierum viginti spatio Babylone Susas pervenit. Susæ autem cum milliariis circiter quadringentis a Babylone absint, hæc per viginti divisa, vicena singulis diebus contingunt. Inde ex Diodoro Siculo lib. 17. & Curtio lib. 5. cap. 5. & 8. celeritatem Alexandri in expeditionibus suis exaggerat: qua non minorem fuisse ait eam, qua Susas pervenit, confectis scilicet in dies singulos viginti milliariibus. Qui non minorem? Verum-ne hoc sit, dicant qui putare sciunt, quanto minus sit iter viginti milliarium ab itinere octo & triginta, quinquaginta, & sexaginta milliarium. Nam Alexandrum tot perfecisse milliaria in singulos dies, cum celeriter profectus est, ex paullo ante allatis exemplis constat; atque ea hæc est celeritas, quam in Alexandro laudant auctores a Vignolio adducti; non vero Susiana profectio, quæ ad justum diurni viginti milliarium itineris modum, non secus ac iter in Ægyptum, quod nuper descripsimus peracta fuit. Mirum
vero

vero illud est, quod statim ille subdit, celeritatis Alexandri in prosecutione Susiana *causam fuisse ingentes ejus regie dirisimaque urbis opes, a quibus invitabatur*. Siquidem ipsis in verbis Arriani, quæ vir doctus recitat, liquido apparet, nulla opus fuisse Alexandro festinatione ad occupandas Susianas divitias; propterea quod eo in itinere comperiit ex literis Philoxeni, quem statim ab Arbellenſe prælio Susas miserat, *Susios Urbem tradidisse omnemque pecuniam Alexandro SALVAM ESSE*. Præterea si vir idem Clarissimus, qui verba Diodori lib. 17. statim post hæc affert ad ostendendam vim magnam auri & argenti quam in Susianis thesauris repperat Alexander, eundem Historicum paucis ante lineis consulisset, tantum a vero abesse intellexisset, ut Alexander properato itinere contenderit Susas, ut imo *sextis castris* postquam Babylone digressus est, in regione Sitacene *PLUSCULOS DIES moram traxerit, quo miles a labore itineris reficeretur, simul ut militarium ordinum rationem diligentem iniret, administrationesque ducum, & præfectorum ampliores faceret*. Hæc ipsa narrans Curtius lib. v. cap. 6. ait Alexandrum *DIUTIUS* substituisse in eadem regione, quam Satrapem vocat, ac ne desides otio dimitterent animos, certamine instituto præmia proposuisse de virtute militari contendentibus, atque alia gessisse, quæ apud ipsum legere licet. His igitur peractis Alexander reliquum itineris Susas usque perfecit. Si ergo in itinere Babylone Susas longas adeo moras traxit, ubi ea tanta festinatio ad ejus Urbis opes occupandas? Tandem si nec properandi causam ullam habuit Alexander, neque revera properavit; iter ejus viginti milliarium in singulos dies expeditionis Susianæ non acceleratum sed justum ac legitimum fuit.

Alterum diurni militum itineris testimonium Herodotus lib. v. suppeditat. Aristagoras Mileti tyrannus expeditionem in Persidem suadebat Cleomeni Spartarum regi, ac manu tenens æream tabulam, in qua totius terræ ambitus continebatur, illi ostendebat regiones per quas cum exercitu transiturus esset, atque iter Susas usque Persarum regiam urbem
trium

trium mensium spatio absolvi posse pollicebatur. Herodotus rationem hujus itineris demonstraturus, primum per partes, & regiones viam totam metitur, deinde *peragendo*, inquit, *stadia 150. seu milliaria VIGINTI singulis diebus, erunt solidi nonaginta dies*. Planum est viginti hæc milliaria ad diurnum militum iter referri; nam Historicus de expeditione bellica, quam suadebat Aristagoras, loquitur.

Verum apud Xenophontem in libris de expeditione Cyri tot militarium itinerum exempla, atque adeo luculenta occurrunt; ut non tam auctoritate sua firmare sententiam nostram, quam multitudine veluti obruere videantur. Describit ille toto libro primo profectiōem Cyri Sardis in Lydia usque ad loca proxima Babyloni, ubi cum fratre Artaxerse confligit, atque in prælio extinctus est. Singulas ejus itineris mansiones enumerat Xenophon oculatus testis, & præcipuus inter Græcos duces, qui Cyro cum auxiliariis Copiis aderant, notatque accuratissime distantias inter unam & alteram mansionem, seu diurni itineris quantitatem. Octoginta peragratæ sunt mansiones, & bis mille sex minus millia passuum confecta. Habuit Cyrus sub signis centum millia barbarorum, & ex Græcis auxiliariis decem millia quadringenta Scutatorum, & Peltatorum millia duo. Cum hoc ergo ingenti exercitu profectus Sardis, inde Cyrus *per Lydiam tertius castris* (ita habet interpres, cum in textu Græco ubique sint *Stathmi*, seu *Mansiones*) *parasangas viginti duas* progressus ad Mæandrum amnem pervenit. *Parasanga* mensura est itineris Persica, triginta stadiis, seu milliaribus quatuor æstimata: nam secundum veriorem putationem stadia septem cum dimidio faciunt unum milliare Romanum. Quamobrem Cyrus tribus diebus millia passuum octoginta octo peragravit, & in singulos dies NOVEN ET VIGINTI. Hinc per Phrygiam *primis castris parasangis octo confectis*, seu M. P. XXXII. ad Colossas venit: inde *tertiis castris octoginta millia passuum*, & unoquoque die SEPTEM ET VIGINTI permenus est. Postea *secundis castris M. P. quadraginta* ad Peltas processit, nimirum uno die VIGINTI millia confecit. Verum ne superiore

flore narratione paginas impleam, tabulam totius itineris contractam dabo, in qua, quot milliaria in singulos dies exercitus Cyri ambulaverit uno adspectu cognoscere licebit. In prima columna, uti etiam capite antecedente notavi, Civitates & loca sunt posita: in secunda Mansionum numerus: in tertia parasangæ in milliaria resolutæ: & demum in quarta ex his deductus milliarium numerus, qui itineris quantitatem in singulos dies demonstrat. Ante vero quam tabulam hanc exhibeam, longius aliud iter est expediendum.

Post cladem Babylonicam Græci auxiliares viam eandem per Asiam relegere intutum arbitrati, difficillimum ac longissimum iter ingressi sunt, & per Mediam & montes Armeniæ asperrimos ad mare Euxinum, atque inde per Paphlagoniam, aliasque regiones in Græciam evasere. Xenophon, qui expeditionis hujus dux fuit, a libro secundo ad septimum postremum eam fusc & diligenter enarrat, & loca, civitates, mansionesque, ad quas exercitus divertit, adnotatis identidem, sed non ubique, distantis, exponit. At in fine mansiones omnes, & summam totius itineris recolligit, ex qua, ut videbimus, quot milliaria confecta fuerint in singulos dies cognoscitur. Interim exempla quædam diurni itineris subji- cio. Libro altero, a *Pirgete*, inquit, *quartis castris*, seu mansionibus, *parasangis viginti*, quæ M. P. LXXX. tribuunt, *confectis, ad Phiscum amnem pervenere. Hinc senis castris* M. P. CXX. Et lib. IV. *per altæ camporum nives castris ternis* M. P. LX. sunt ubique VIGINTI milliaria diurni itineris. Inde *septimis castris, confectis* IN DIES SINGULOS XXV. *millibus passuum, ad Phasim pervenere.* Reliqua itinera, quæ cum milliarium numero signavit Xenophon, in tabula exponam. Demum in exitu postremi libri hæc ait: *Totius itineris spatium, quod aut progredientes aut regredientes confecerunt, fuere mansiones CCXV. parasangæ M. C. L. Quo quidem in itinere annus, & menses tres consumti.* Ex parasangis 1150. confiunt milliaria 4600. quæ divisa per numerum mansionum 215. reddunt milliaria UNUM ET VIGINTI in singulas mansiones, seu itineris dies. In

hoc Græcorum exercitu initio expeditionis decem millia hominum numerabantur: ad Cerasuntem, quæ ad mare Græca urbs est in Colchorum finibus, censa sunt armatorum octo millia & sexcenta. Non arma solum ferebant, verum etiam impedimenta, ut passim apparet: & feminæ quoque exercitum comitabantur. Per montes asperissimos, & nive duobus passibus quandoque alta obsitos, fuit illis progrediendum, & cum hostibus sæpe dimicandum, sæpe rerum omnium penuria laborandum. Quod si inter tot difficultates & incommoda potuit exercitus iste viginti & plura aliquando in dies milliaria conficere; mirum profecto accidere nequit, exercitum Elagabali, aliosque, qui com meatibus instructi per vias regias & militares incedebant, eandem diurni itineris potuisse persolvere quantitatem.



T A B U L A

ITINERIS EXERCITUS CYRI MINORIS

SARDIS in Lydia Babylonem.

Urbes. & loca	Numerus Mansionum	Distantia Mansionum M. P.	Mansio una feu Iter diurnum M. P.
Sardis ad Meandrum fluvium	III.	88	XXIX.
Ad Colossas	I.	32	XXXII.
Cælenas	III.	80	XXVII.
Peltas	II.	40	XX.
Ceramuntem	II.	49	XXIV.
Ad Caystri Campos	III.	120	XXXX.
Tyriæum	II.	40	XX.
Iconium	III.	90	XXVIII.
Lycaoniam	V.	92	XIX.
Danam	IV.	100	XXV.
Tarsum	III.	100	XXXIII.
Ad flumen Pharon	II.	40	XX.
Ad Pyramum	I.	20	XX.
Iffum	II.	60	XXX.
Ad portas Ciliciæ	I.	25	XXV.
Myriandrum	I.	20	XX.
Ad Chalon fluvium	IV.	80	XX.
Ad Dardacis fontes	V.	120	XXIV.
Ad Euphratem amnem	III.	60	XX.
Ad Araxem amnem	IX.	200	XXII.
Per deserta loca	V.	140	XXVIII.
Ad Arabiæ portas	XIII.	360	XXVIII.
Babylonem	III.	48	XVI.

Sunt Stathmi seu Mansiones LXXX. Millia Passuum MDCCCCVIC.

T A-

T A B U L A A L T E R A

Quorundam itinerum exercitus Græcorum.

A Pirgete flumine	IV.	80	XX.
Per Mediæ solitudines	VI.	120	XX.
Per Solitudines	V.	80	XVI.
A Lariffa	I.	24	XXIV.
A Mespila	I.	16	XVI.
Per Armeniæ campos	I.	20	XX.
Per Campos	III.	60	XX.
Per altas nives ad fontes Euphratis	III.	60	XX.
Ad Phasim fluvium	VII.	175	XXV.
Ad Phasim per montium vertices	II.	40	XX.
In Chalybas	VII.	200	XXX.
Per Scythinorum campos	IV.	80	XX.
Gymnias urbem	IV.	80	XX.
Trapæzuntem	II.	28	XIV.

Totum iter Mansiones CCXV.

M. P. IVMDC.

In singulos dies M. P. XXI.

Ut tandem, quæ dicta sunt hætenus, recolligam, du-
ctis in summam Castris, seu Mansionibus Romanorum 83.
Cyri 80. Græcorum 215. & Alexandri 7. additis etiam vi-
ginti diebus profectionis Susianæ, fiunt diurna itinera 405.
quæ præter octo, exæquant omnia, vel excedunt vigin-
ti millia passuum. Satisne hæc, ut firmatum undequaque
sit, & probatum, fieri non modo potuisse, sed factum quoque
esse, ut exercitus antiquorum VIGINTI, & QUINQUE
ET VIGINTI milliaria in singulos dies justi ac legitimi iti-
neris peregerint?

Opponat nunc Cl. Vignolius unum & alterum Cæsaris testimonium, quo certum esse putavit, itinera militaria antiquorum non ultra OCTO in dies singulos milliaria producta fuisse. Anne bina hæc cum quadringentis itinerum exemplis conferri poterunt? Verum loca illa Cæsaris expendamus. *Confesto*, ait lib. III. de bello Civili cap. 23. *justo itinere ejus diei quod proposuerat Cæsar, trasductoque exercitu flumen Genusum, veteribus suis in castris contra Asparagium confedit, militesque omnes intra vallum continuit: equitatum per caussam pabulandi emissum confestim decumana porta in castra se recipere jussit.* Paucis vero interjectis, *Meridiano fere tempore*, subdit, *signo profectiois dato, exercitum educit, DUPLICATOQUE ejus diei itinere VIII. millibus passuum ex eo loco procedit.* Ex his infert vir Clarissimus, si postquam Cæsar iter mane confecerat quod *justum* appellat, circa meridiem exercitum iterum movit, & millibus passuum octo progressus, ejus diei iter se duplicasse ait, necessario sequitur, quod ante meridiem ~~justum iter fecerat~~, millia itidem VIII. non xx. fuisse.

Verum ego id necessario sequi non video. Nam neque Cæsar iter meridianum *justum* appellat, nec illud profecto *justum* fuit. Si enim *justum* fuisset, non opus erat, ut Cæsar indicaret expressis verbis passuum millibus octo constituisse. Itineri matutino milliarium numerum non adjecit, quia cum *justum* esset, omnes noverant, quot milliaria completeretur. Adjecit autem numerum itineri meridiano, quia cum *justum* non esset, nemo scire poterat, quot milliaria contineret, nisi id explicate docuisset. Itaque Cæsar non alterum tantum iter confecit meridiano tempore, ac mane confecerat, sed *duplicavit iter ejus diei*, hoc est, iter matutinum *auxit*, illique *addidit* octo millia passuum. Nam *duplicare* rem aliquam non solum eam *geminare* significat, & *duplum* ejus facere, sed etiam *augere*, illique rem aliam *addere*, quamvis non ejusdem numeri aut quantitatis. Servius ad versum Virgilio Ecl. 2. *Et Sol decedens crescentes* DUPLICAT *umbras*, variavit, inquit, *nam supra dixerat: majoresque cadunt*

dunt altis de montibus umbra. DUPLICAT autem AUGET. Sallustius: *Marius victus duplicaverat bellum.* Hactenus Servius. Quam phrasim Sallustii imitatus est Tacitus hist. IV. cap. 54. *Audita,* inquit, *interim per Gallias Germaniasque mors Vitellii* DUPLICAVÉRAT bellum. Non duplex bellum fecerat; sed bellum renovaverat, vel auxerat. Nam Civilis, subdit statim Historicus, *posita omni dissimulatione in populum Romanum ruere capit.*

Lucræti lib. VI. describens causas impetus fulminis hanc inter alias proponit:

Deinde quod omnino natura pondera deorsum

Omnia nituntur: cum plaga sit addita vero

Mobilitas DUPLICATUR, & *impetus ille gravescit.*

An Poeta vim & impetum fulminis ante plagam, seu ictum ad pondus dimensus est, ut sciret altero tanto prorsus impetu post ictum fieri? Ergo duplicatur mobilitas, scilicet crescit & augetur, uti confestim explicat: & *impetus ille gravescit.*

Livius lib. I. cap. 43. loquens de Comitibus centuriatis tempore Servii Tullii: *Nec mirari oportet,* inquit, *hunc ordinem, qui nunc est, post expletas quinque & triginta Tribus, DUPLICATO earum numero, centuriis juniorum seniorumque ad institutam a Servio Tullio summam non convenire.* Sigonius de jure Provinciarum lib. III. cap. 3. explicans hunc locum ait, Tribus institutas a Servio fuisse numero XIX., cumque post aliæ atque aliæ additæ sint, ita ut factæ sint XXXV., vere dixisse Livium post expletas XXXV. Tribus numerum Tribuum esse *duplicatum*, cum a XIX. ad XXXV. pervenerint. Vides numerum duplicatum non esse prorsus alterum tantum, sed additum & auctum: Quam verbi hujus notionem non animadvertens interpres Livii ad usum Delphini, mirum in modum se torquet, ut hanc Tribuum multiplicationem ad æqualitatem perducatur. Rursus Livius lib. VI. cap. 7. ubi narrat Romanorum adversus Hernicos bellum, *Dictatoris,* inquit, *deinde adventu novus veteri exercitus jungitur,*

gitur, & copia **DUPLICANTUR**. Non ego pacto pignore contendam, novum exercitum fuisse numero militum prorsus æqualem cum vetere. Sed paullo post Historicus ipse docet, non aliud *duplicare* copias esse quam *augere*. Neque segnius, ait, & hostes bellum apparant, qui & parti ante decoris memores, neque ignari **AUCTARUM** virium hosti, suas quoque vires augent. Eundem loquendi modum usurpat Tacitus, qui lib. v. hist. cap. 14., *sequutus est eodem*, inquit, *Cerialis*, **DUPLICATIS** Copiis adventu secundæ, & **XVI**, & **XIX**. legionum. Si quis mihi ostendat tres legiones jam tenuisse Cerialem, non negabo tres istas numerum parem fecisse. Sed cum de hoc non constet, nihil aliud apud Tacitum sunt *duplicatæ* copiarum quam *auctæ*: uti & antea lib. IV. cap. 36. dixerat: & adventu *Quintanorum*, *Quintadecimanorumque* **AUCTÆ** legiones donativum exposcunt.

Non moror Fulvium Urfinum, in cujus Adversariis hæc verba se reperisse testatur Vignolius: *Diurnum iter militum millia VIII*. Nam nemo ignorat, in *Adversaria* conjici plerumque etiam a viris doctis obvia quæque sine delectu: quæ postea cum usui esse debent, accuratiori examine expensa aliquando probantur, sæpius etiam rejiciuntur. Fortasse Urfinus in hunc ipsum locum Cæsaris inciderat, quem in Schedas suas transtulit memoriæ causa, ad examen vocaturus, cum occasio postulasset. Ceterum nec unus auctor quamvis doctissimus totam antiquitatem subvertere potest; cum constet certissime apud veteres Romanos & Græcos multo plura quam octo milliaria diurno militum itinere tributa fuisse.

Alterum exemplum Cæsaris petiit ex lib. VI. de bello Galli. cap. 3. *Dum hæc inquit, a Cæsare geruntur, Treveri magnis coactis peditatus equitatusque copiis, Labienum cum una legione, quæ in eorum finibus biemaverat, adoriri parabant. Jamque ab eo non longius bidui via aberant, cum duas venisse legiones missu Cæsaris cognoscunt. Positis castris a millibus passuum XV. auxilia Germanorum expectare constituunt. Putat vir eruditus, hunc locum, in quo Treveri posuere castra a Labieno passuum millibus quindecim, eundem*

idem esse illum, quem ante dixerat Cæsar distare ab eodem Labieno bidui via: ex quo inferre vult, bidui viam complecti milliaria quindecim. Sed res non ita se habet. Nam Treveri aberant quidem a Labieno bidui via cum cognoverunt venisse legiones: sed harum adventu intellecto ab eo loco progressi sunt, & castra posuere a Labieno millibus passuum quindecim. Docti judicent, quis nostrum rectius assequutus sit sensum Cæsar. Interim duo hæc mihi persuaderi non patiar, Treviros nempe, barbaram gentem & militiæ laboribus assuetam non ultra septem milliaria cum dimidio explevisse in singulos dies; & Cæsarem, qui duces omnes celeritate expeditionum, & disciplina militari superavit, adeo pigrum fuisse & ignavum, ut cum illi diurno ac justo militum itinere, ut vidimus, viginti & amplius milliaria impenderint, ipse octo milliaria, & ne dimidium quidem ejus itineris conficere fuerit solitus. Quod certe vel uno illo exemplo, quod capite superiore retulimus, aperte revincitur, in quo ostensum est, Cæsarem biduo justi itineris quinquagena milliaria explevisse.

At vero vir Clarissimus, cum ad putandum iter Elagabali accedit, liberaliori manu duo insuper milliaria itinere diurno militum tribuit, & posse fieri, ait, ut exercitus, qui Elagabalum ad urbem deduxit, aliquam sui itineris partem celeriter gradu cursuque alacriori peregerit, ac proinde non octo, sed passuum millia decem singulis suæ profectionis diebus ambulaverit, quot nimirum ter in mensem militibus armatis in suis sedibus degentibus ex veteri consuetudine, & Augusti, atque Hadriani constitutionibus fieri solita fuisse tradit Vegetius lib. 1. cap. 27. Vellem nobis etiam legenda exhibuisset verba ipsa Vegetii, quæ hujusmodi sunt: *Vetus, inquit, consuetudo permansit, & D. Augusti & Hadriani constitutionibus præcaveatur, ut ter in mense tam equites quam pedites educantur ambulatum. . . . DECEM millia passuum armati instructique omnibus telis pedites militari gradu IRE ET REDIRE in castra jubebantur. Decem ergo passuum millia ibant, totidemque redibant: fiunt viginti.* Ita intel-

ligen-

ligenda sunt hæc verba Vegetii: atque ita intellexit Lipsius de Militia Romana lib. v. dial. 14. Hujus loquendi formæ exemplum habeo apud Hirtium de bello Africo cap. 25. *Cæsar*, inquit, *legiones duas cum equitatu mittit a castris suis millia passuum DECEM, atque inde magno numero frumenti onustos recepit in castra.* Certe totum iter viginti miliarium fuit, decem usque ad locum frumentationis, decem alia inde ad castra. Vegetius igitur tantum abest, ut Vignolio optuletur, ut nobis omnino faveat, qui viginti miliaria diurno militum itineri dedimus, quot plane scriptor ille eorumdem exercitationi tribuit.

Attamen vir doctus ad hanc decem miliarium mensuram totum Elagabali iter componit. Nam miliaribus M. D. quot Nicomedia ad Urbem numerantur, per decem divisis colligit dies centum & quinquaginta, qui menses quinque plenos faciunt. Addit dies alios quinquaginta quietis, propterea quod exercitus solitus fuerit *triduo* ambulare, *quarto die* requiescere, ex S. Ambrosio in Psalm. 118. octon. 5. Confiunt menses fere septem. Quare, inquit, si Elagabalus iter suum per Illyricum suscepit, ejus in Urbem adventus non in mensem Julium, uti ego putaveram, sed potius in Novembrem conferri debet.

Quæ quamvis, subdit ille, satis firma & certa sint, vel solius Cæsaris auctoritate, exemplo tamen ex Dione petito, quo magis idoneum occurrere vix poterat aliud, magis magisque firmantur. Dio siquidem in vita Neronis lib. 63. pag. 716. Tiridatis regis Armeniorum Romam per Illyricum adventum describens, iter illius ab Euphrate novem mensium fuisse narrat. Porro inito calculo Tiridates miliaria 2174. confecisse subjicit: quæ per decem distributa, additis mensibus fere duobus quietis, quæ quarto quoque die exercitui dari solet, summa erit mensium novem, & dierum aliquot, a Dione fere expressa. Ita vir doctus. Ego vero alienissimum hoc esse exemplum ad militare itinerum, atque ipsius Elagabali definiendam mensuram plane existimo. Nam Tiridatis profectio militaris non fuit, neque
cum

cum exercitu quem præscriptum itineris militaris modum & gradum observare oporteret; sed iter ejus, ait Dio, fuit ut in triumphis per omnes regiones ab Euphrate, magno famulorum comitatu, Parthorumque ac Romanorum, atque apparatu regio, eumque urbes & populi magnis lætisque clamoribus excipiebant, quæque necessaria erant, faciente sumptus populo Romano, omnia ei præstabantur. Habuit quoque secum non solum suos, sed etiam Vologesi, Pacori, & Monabazi regum liberos, atque itidem uxorem adeo delicatam & superbam, ut galeam auream pro integumento gereret, ne contra morem patriæ conspiceretur. Quid mirum ergo si Tiridates tanta cum turba imbelli ac molli, regia pompa & fastu inter delicias & luxum incedens longas adeo moras extraxerit, & tardiore gradu viam difficilem & longissimam peragraverit? Adde quod totam hiemem in itinere transegit: qua anni tempestate parum progressum fuisse, & plurimos dies identidem quievisse necesse est; ut erat potissimum cum regia femina, & pueris regiis, qui frigoris viæque inclementiam tolerare non poterant. Nam Tiridates Romæ erat æstivo tempore: illum enim excepit Nero in theatro extensis peripetasmatis *ad defendendos Solis ardores*, inquit Dio. Quamobrem retroductis novem mensibus, pars itineris in hiemem inciderat. Non est igitur *Tiridatis* iter conferendum cum itinere Elagabali, qui placidissima anni tempestate cum iusto exercitu, ut non semel fatetur vir doctus, profectus est: quo cum exercitu debuit militari gradu incedere, habuitque præterea accelerandi causas, ipso nimirum ad capeßendum in Urbe Imperium anhelante, atque ejus avia *Mæsa festinante ad Romanam aulam*, ut ait Herodianus lib. v. cap. 5.

Verum si patiaturn Vignolius me longiorem esse, dabo iter militare, quo sane verius ego dicam, nullum aliud est magis idoneum, quod cum Elagabali itinere comparari possit. Postquam Vespasianus Alexandriæ consalutatus est Imperator *Kalendis Julii A. C. 69.*, Syria omnis, cui præerat Mutianus, *ante Idus Julias* in eodem sacramento fuit, ut narrat

Tacitus hist. II. cap. 79. & 81. Mutianus in Italiam adversus Vitellium iturus Antiochia cum parte copiarum Vespasiani, addita mox legione sexta, profectus est: quod non ante Augustum mensem fieri potuit. Per Moesiam transiens Dacos repressit, favente fortuna populi Romani, inquit idem historicus lib. III. cap. 46., quæ Mutianum viresque Orientis illuc tulit. Quæ adnotata sunt, ut appareat Mutianum cum exercitu omni apparatu bellico instructo expeditionem hanc suscepisse: additque Josephus de Bello Jud. lib. IV. cap. 13., cum exercitu Romam fuisse ingressum. Romam vero ingressus est *postero die* cædis Vitellii, ut memorat idem Josephus eodem loco, nimirum uno & vicesimo mensis Decembris; seu paullo postea ex Tacito lib. IV. cap. 4. nam Mutianus audita morte Vitellii literas misit ad Senatum, quæ materiam sermonibus præbuere, potuisse *paucos post dies* eadem loco sententiæ dici. Ergo tunc parum aberat ab Urbe. Demus advenisse post duodecim dies a nece Vitellii, nimirum initio Januarii. Ita Mutianus Antiochia Romam profectus est cum exercitu quinque mensium spatio. Antiochia Constantinopolim in Itinerario Antonini numerantur septingenta millia passuum. Adde M. D., minus sexaginta quatuor, quantum distat Byzantium Nicomedia, consunt miliaria fere duo millia & ducenta. Hæc divisa per XX. relinquunt dies CX. quibus si addas dies XXXVI. quietis, paucosque alios, quos certe in reprimendis Dacis consumpsit Mutianus, dies plus minus CL. seu menses quinque comperies. Rursus Mutianus cum Dacos, ut paullo ante dixi, compressit, *gnarus erat* Cremonensis victoriæ, inquit Tacitus eodem loco. Pugna Cremonensis contigit die 25. Octobris, quod ostensum est capite superiore. Cum vero diebus duodecim potuerit nuncius ejus pugnæ in Moesiam pervenisse, illum accepit Mutianus circa diem sextum Novembris. Irruptio Dacorum, qui utraque Danubii ripa potiebantur, in Moesia facta est, cujus primaria urbs Viminacium: & fortasse *castra legionum*, quæ excindere parabant Daci, ut ait Tacitus, erant apud ipsum Viminacium, quæ urbs a Ptolemæo *Viminacium*

cium legio vocatur, quod ibi legiones castra habebant. Porro Viminacium Nicomedia abest DCCXXIV. millia passuum in Itinerario: quæ subducta a M. D., remanent DCCLXXVI., quantum Viminacium ipsum Roma distat. Hæc divisa per XX. dant dies XXXIX. Additis diebus XIII. quietis, uno scilicet post tres dies, fiunt dies LII. qui numerati a die VI. Novembris, quo die Mutianus erat in Moesia, ducunt ad exitum Decembris mensis, seu initium Januarii, cum Mutianus Romam intravit.

Videat Cl. Vignolius, quam belle omnia hæc inter se conveniant. Iter Mutiani Antiochia Romam ex temporum notis apud Tacitum mensibus quinque absolutum fuit. Menses quoque eosdem obtinemus putato itinere ad rationem XX. miliarium in singulos dies. Hinc etiam recte a nobis iter Mutiani cum itinere Elagabali comparatum est. Nam si miliaria MMCC. Mutianus confecit mensibus quinque, potuit utique Elagabalus mensibus tribus MD. miliaria absolvere. Ergo iustus ac legitimus itineris militaris modus non minus quam XX. millibus passuum definiendus est. Quod si ex ejusdem docti viri sententia intra X. millia passuum coaceretur; Mutianus non quinque tantummodo menses, sed plane decem in itinere Antiochia Romam exhausisset, quod historice veritati omnino repugnat.

Huic igitur exemplo itineris Mutiani si tot alia, quæ in superioribus allata sunt, jungantur, alterum hoc colligemus verum esse, exercitus scilicet antiquorum viginti, ac quinque & viginti millia passuum in singulos dies, alterum hoc falsum esse, non amplius quam octo vel decem miliaria peregrisse. Proinde rursus verum est, Elagabalum intra tres circiter menses, putatis XX. miliaribus in singulos dies, datoque ad quietem quarto quoque die, viam Nicomedia Romam, quæ mille quingentis miliaribus æstimatur, potuisse perficere; falsum autem eandem viam non potuisse absolvere nisi mensium septem spatio. Hinc illud quoque certissimum sequitur, si Elagabalus Nicomedia discessit ineunte Aprilis anni vulgaris 219., qua de re non ambigitur, *adven-*

rum ejus in Urbem conferendum esse in Julium mensem: quæ verba mea in limine operis vir Clarissimus sibi impugnanda præfixerat. Denique si Elagabalus advenit Romam initio mensis Julii ann. 219., ab hoc cardine numeratis mensibus octo supra annos duos, quos Eutropius, eodem docto viro adstipulante, exegisse in Imperio post adventum in Urbem testatur, mors ejus in mensem Martium ann. 222. incidit: quod erat demonstrandum.



C A P U T III.

Matrimonium Elagabali cum Cornelia Paulla recte fuit ab Auctore positum mense Novembri ann. Ch. 219. Cur non possit referri ad finem Junii ann. 220. Nummos Elagabali cum Congiario secundo & epigraphe TR. P. II. COS. II. ad has Cornelie nuptias pertinere probatur. Nummi Egyptii cum L. F. anno tertio, & L. Δ. anno quarto quomodo non repugnent. Argumenta Vignolii diluuntur. Verba Herodiani μετ' ὀλίγων χρόνων, male vertunt Politianus & Vignolius. Probatur ex ipso Herodiano, & ex ipso Vignolio. Tempus Matrimonii Cornelie non recte definit. Herodianus ex Dione explicatur. Non constat cur tam cito Elagabalus illam dimiserit. Sed causam prætexisse constat. Hoc fieri potuit etiam post octo vel novem menses.

Differit in hoc cap. II. Cl. Vignolius de nuptiis Cornelie Paullæ prioris Elagabali feminae, deque Congiario secundo ejusdem Augusti, quod ego pag. 9. scripseram cum Vaillantio distributum fuisse ob easdem nuptias, in quibus ait Dio lib. 69. pag. 911. Elagabalum dedisse Congiarium amplissimum. Matrimonium cum Cornelia posueram mense Novembri æræ vulgaris 219. quod vir Clarissimus refert ad finem Junii 220. Si verum hoc esset, Elagabalus post annum solidum ab sui adventu in Urbem primas nuptias contraxisset; nam initio Julii anni antecedentis 219. Romam venit,

venit, uti in superioribus abunde probatum est. Annum vero integrum cælibem eum fuisse nemo credet, qui legerit apud eundem Dionem, Elagabalum celebrasse matrimonium cum Cornelia Paulla, *quo pater fieret*, sicut dicebat, CÆLERIUS. Hinc etiam non absurde mihi videor conjecisse cum Vaillantio, nummos Elagabali exprimentes Congiarium secundum cum Epigraphe: TR. P. II. COS. II. ad has cum Cornelia nuptias pertinere: quod vir Clarissimus negat. Primum Congiarium dedit Elagabalus in sui adventu in Urbem, *ut mos est Imperium suscipientibus*, ait Herodianus lib. v. cap. 5. Nullum aliud Congiarium memorant scriptores ante hoc, de quo agimus, propter nuptias cum Cornelia. Nihil ergo obstat, si dicamus hoc ipsum secundum illud esse, quod exhibent nummi: qui cum præferant Trib. Potestatem secundam, & Consulatum secundum, fuisse datum oportet ante exitum anni 219. quo tempore Elagabalum egisse Matrimonium cum Cornelia arbitramur.

Non enim repugnant, quos opponit vir doctus, nummi Ægyptii Corneliæ cum L. F. *anno tertio*, & L. Δ. *anno quarto*; quia potuit Elagabalus menses octo cum ea vixisse in matrimonio, nempe a Novembri an. 219. ad initium mensis Julii anni insequentis 220. ita ut Ægyptii nondum accepto nuncio repudii ineunte anno IV. Elagabali die XXIX. Augusti ejusdem anni 220. tunc percussissent nummos Corneliæ cum nota L. Δ. quod fusius exposui in prima Dissertazione At verum minime esset, inquit Vignolius, cum ea *paullo post* divortium fecisse, ut scribit Herodianus lib. v. cap. 14. *Duxit præterea uxorem illustrissimam Romanam feminam, quam Augustam appellavit cumque ea tamen* (μετ' ὀλίγον χρόνον) PAULLO POST divortium fecit: quæ dictio *paullo post* subdit ille, octo mensium spatio aptari nequit.

Verum præterquam quod minus recte Politianus, eumque sequutus Vignolius verba illa μετ' ὀλίγον χρόνον per hæc reddunt, *paullo post*, cum vertere debuissent, *post breve tempus*, vel *brevi tempore*, quæ videntur longioris temporis significationem habere; minime quoque verum est eadem verba

ὀλίγον

ὀλίγον χρόνον octo mensium spatio aptari non posse. Unum & alterum exemplum dabo. Idem Herodianus lib. III. cap. 7. *hunc finem vitæ*, inquit, *habuit Albinus* BREVI, *πρὸς ὀλίγον, sane lætatus funesto honore*, scilicet dignitate Cæsarea: nam paullo ante dixerat, Albinum Cæsaris honore atque auctoritate præditum fuisse. Albinus Cæsaris titulo ab Severo donatus est an. 293. ab eodemque prælio victus atque interfectus mense Februario an. 297. Ergo *πρὸς ὀλίγον* quatuor ferme annos complectitur. Quid non etiam octo menses? Alterum exemplum Vignolio ipsi debeo. Refert ille pag. 152. in excerptis Dionis a Valesio editis verba ea, quæ in vulgatis ipsius codicibus leguntur, Elagabalum scilicet exegisse in Imperio annos tres, menses novem, & dies quatuor, non reperiri; sed eorum loco hæc esse scripta, *ὀλίγον χρόνον, breve tempore*. Ergo si totum tempus Imperii Elagabali, quod ad quatuor circiter annos extenditur, a Dione, seu ab ejus excerptore *breve tempus* vocatur; cur menses tantum octo Imperii ejusdem Augusti, quibus cum Cornelia vixit, Herodianus non potuit itidem *breve tempus* appellare?

Præterea in alio opere pag. 41. notaveram, Herodianum initio historiæ suæ *ὀλίγον χρόνον, breve tempus* ad spatium sexaginta annorum prorogasse. Sed vir eruditus ait, Herodianum recte vocare potuisse *breve tempus* spatium sexaginta annorum universo suo opere comprehensum, habita nimirum ratione longe plurium annorum, qui jam inde ab Augusto ad M. Aurelii tempora fluxerunt: qui plures anni ex verbis Herodiani ab ipso statim allatis sunt numero ducenti. Comparisonem accipio, atque ad calculum voco. Sexaginta anni, quos *breve tempus* esse dixit Herodianus, tertiam circiter partem ducentorum annorum conficiunt. Si ergo *breve tempus*, quod idem Herodianus matrimonio Cornelie tribuit, cum reliquo tempore, quo cum ceteris uxoribus egit Elagabalus, conferatur, ut quidem Vignolius confert, tertiam ejus partem occupabit, & proinde menses fere novem: nam putato tempore a Novembri mense anno 219. quo primam uxorem Corneliam duxit, ad ejus necem Martio mense ann.

222. menses quatuor supra annos duos conflantur. Ergo *breve* illud *tempus* Corneliæ comparatum cum aliarum uxorum tempore, ex ipsamet Vignolii argumentatione novem menses complectitur. Ceterum verius puto, ut olim dixeram, *breve tempus*, quo Elagabalus cum Cornelia mansit, comparandum esse cum toto vitæ spatio, quo solet conjugalis consuetudo constare: qua ratione octo mensium tempus breve omnino dici poterit.

Quamdiu vero Elagabalus, subdit ille, Corneliam Paul-
lam retinuerit, & quodnam temporis spatium verba illa He-
rodiani *μὲν ὀλίγον χρόνον* denotent, a Dione exponitur. Mu-
neribus enim recensitis, quæ in ejusdem Paul-*læ* nuptiis lar-
gitus Elagabalus fuerat, statim subdit: *POSTHÆC repudia-
ta Paula, quod maculam haberet in corpore, sicuti dicebat,
Aquiliam Severam duxit aperte contra jus fasque*, quare *post
hæc*, videlicet post munera, seu Congiarium distributum re-
pudiatam Paul-*lam* ab Elagabalo fuisse, auctor est Dio. Hæc
ille. At nos in textu Græco Dionis comperimus hæc verba:
εἴτα ἢ παύλαν, quæ particula *εἴτα* adverbium est, reddique
debet, *postea, deinde*, non vero *post hæc*. Narrat hoc loco
Dio matrimonia Elagabali, uxorumque ejus casus. De pri-
ma, nempe Cornelia Paula, ait, in ejus nuptiis Elagaba-
lum dedisse Congiarium amplissimum. *Deinde*, inquit, ea
repudiata Aquiliam Severam duxit. Hoc *deinde* non refer-
tur ad Congiarium, sed ad matrimonium Paul-*læ*: Sermo e-
nim de Elagabali matrimoniis est. Quare inter unum & aliud
matrimonium quodcumque velis temporis spatium, interfe-
rere poteris.

Quod V. Cl. subdit, Dionem etiam prodidisse caus-
sam, cur tam cito Elagabalus dimiserit Corneliam, quod nimi-
rum *maculam haberet in corpore*, poterat certe omitti. Nam
Dio prodidit quidem caus-*am*, cur dimiserit; sed nusquam
prodidit, *cur tam cito*. Imo Historicus Elagabalum prætexisse
hanc caus-*am* aperte indicat, subdens, *ut dicebat*. Caus-*am*
vero hanc ideo prætexuit Elagabalus, ut Aquiliam duceret,
eujus se captum amore fassus est in Epistola ad Senatum apud
Hero-

Herodianum lib. v. c. 6. & quoniam me non decet secreta thorii maritalis licentiae pervertigare, & cum Vignolio inquirere, utrum *verisimile*, ac *rationi consonum* sit, quod ille negat, Elagabalum non ante menses octo vel novem animadvertere potuisse maculam in corpore Corneliæ Paulæ; hoc dicam tamen, Elagabalum tum solum de macula locutum fuisse, cum impotenti amore Aquiliæ flagrans causam aliquam dimittendi Corneliæ quærebat, ut illam sibi jungeret: quod fieri potuisse etiam post octo vel novem menses, nemo non videt.

C A P U T IV.

Perperam Auctori imponit, visum aliquando nummum Græcum, vel Ægyptium cum epigraphæ ADVENTVS AVG. Imo, ideo nummum Corneliæ Paulæ Ægyptium asseruit referri non posse ad Elagabali adventum. Quid sit figura nuda in eodem nummo equo insidens. Iterum Auctori imponit. Ejus mentem, nec Plinium est assequutus. Mos Romanorum & Græcorum in statuis velandis. In explicanda illa figura varius est Vignolius. Ejus rationes & conjectura falsæ: & stare non possunt. Epigramma Archæ non intellexit. Victores Pythici coronabantur ex pomo arbore. Acervus globorum in nummis græcis, in quibus ludi Pythici representantur, quid indicet. Corneliæ nummum male explicatus a Vignolio. Quid sint globi in nummo Ægyptio Domitiani. Item falsa explicatio nummi M. Aurelii. Mercurialis defensio. Virga Consularis etiam sine Aquila invenitur. Baculus sive sceptrum insigne est proprium Consulibus, neque ad triumphantes pertinet.

DOcet me initio hujus capituli Cl. Vignolius; nusquam visum nummum aliquem Græcum, vel Ægyptium, qui alicujus Imperatoris adventum exhibeat, titulo hujusmodi inscriptum: ADVENTUS AVG. tanquam si ego id adseruisssem

fem in verbis hifce, quæ in limine ejusdem capitis ex pag. mea 17. recitat: *Non negaverim in nummis Imperatorum plerumque cum Imperator pacificatoris habitu effertur, appositam esse Epigraphen ADVENTUS AUG. Sed in hoc nummo Corneliæ Paulæ, quod equidem doleo, deest hujusmodi Epigraphæ.* Sed præter quam quod non advertit animum ad festivum quendam loquendi modum, quo ego usus fueram, prætermisit etiam verba, quæ sequuntur, in quibus quid senserim aperte dignoscitur. Deesse cum dixi in nummo Corneliæ epigraphen ADVENTUS AUG. statim hæc subjeci: *Summa ratione deest: nam neque Elagabalus Pacificatoris habitu in eo repræsentatur, nec nummus ipse ob ejusdem ADVENTUM percussus esse potest.* Causam vero, ob quam nummus Corneliæ percussus esse non poterat ob adventum Elagabali legendam præbueram pag. 21. lin. 21. ubi & ipse poterat eam legere: *Profecto Civitatem Græcam, seu Ægyptiam, in qua sculptum est hoc numisma, cogitasse de ADVENTU Elagabali in Urbem, non est verisimile. Quare L. F. annusterius in eo nummo ob signatus referri nequit ad Elagabali adventum.* Quid ergo sibi persuasit Vignolius, putasse me reperiri nummos Græcos, seu Ægyptios, qui adventum Imperatorum in Urbem exprimerent?

Ab altera hujus capitis controversia libenter abstinuissim, tum quia aliena ab argumento est, tum etiam quod & ego, & Vignolius divinando tempus terimus. Nam quid sit figura illa nuda, quæ in eodem nummo Corneliæ equo insidet, neque me, neque illum quicquam certi adsequutos arbitror. Ego statuam Elagabali repræsentare conjeceram; & eo potissimum ducebar, quod nuda est: nam Græci artifices plerumque statuas nudas effingebant, ut Antiquariis notum est, & Plinius lib. XXXIV. cap. 5. de statuâ ait: *Græca res est nihil velare.* Cl. Vignolius ita me intellexisse hunc locum Plinii putat, *perinde ac si Græci, vel Ægyptii statuas suas OMNES nudas fecerint, & Elagabali statuam istam velare non potuerint.* Atque ut hoc falsum esse probet, præclara quædam exempla congerit ex Pausania, Æschine, & Plinio, quibus

evincit, Græcos etiam velare statuas consuevisse; uti contra Romanos quandoque etiam nudas exhibuisse. Quare opinatur eam esse mentem Plinii, ut frequentius quam Romani statuas suas Græci nudaverint.

At præter quam quod non ego scripsi, statuas *omnes* nudas Græcos effinxisse, sed *plerumque*, ignoscat vir Clarissimus, si dixerò, eum neque mentem Plinii fuisse assequutum, neque meam. Integrum ejus locum afferamus: *Græca*, inquit, *res est nihil velare: at contra Romana ac militaris thoracas addere*. Ergo *nihil velare* non est, nullas unquam statuas velatas facere, uti me Plinium intellexisse putat; multo minus est, aliquas non velatas, aliquas velatas, ut ipse intellexit. Sed *nihil velare*, est nihil in statua, seu nullam partem statuæ velare, ac vestimentis tegere. Hunc esse Plinii sensum, diversus Romanorum mos ostendit, qui velabant aliquam partem statuæ *thoracas* addendo. Thorax appellatum est munimentum militare, quod pectus & ventrem usque ad pubem regit; ~~cetera nuda sunt~~ cuiusmodi statuas militares complures adhuc cernimus. Ideo Romanam ac militarem rem esse, *thoracas* addere, dixit Plinius. Hoc ergo intererat inter Græcorum & Romanorum morem; quod isti partem aliquam statuæ velare consueverant, illi nullam.

Figuram eandem equestrem Elagabalum, seu ejus statuam, repræsentare conjeceram; quod coronam gesserit in capite, atque in manu globum, quo denotatur orbis terrarum, cujus ille imperium obtinebat. His nihil opponit Cl. Vignolius; sed ex sua sententia opinatur ad pag. 29. figuram illam *Genium* esse aliquem ex iis quos vetusta superstitio nudos & coronâ ornatos sæpe effingere solebat. Deinde pag. 34. non amplius eam esse *Genium* decernit; sed juvenem *lusem*, e quo insidentem; nudatumque, uti *lusem* effingebantur, qui victor in certamine in honorem Corneliæ ab urbe aliqua Ægyptia instituto, gestat in capite coronam vel pineam, vel ex oleastro, vel ex apio, simulque pomum victoriæ suæ insignia. In quam rem hoc affert Epigramma Archiæ, quod in Anthologia Græca primum est.

Hellas

*Hellas habet quatuor, quatuor certamina sacra,
 Altera sunt superis, altera sacra viris.
 Portuno, Archemoro sacra sunt, Phæboque, Jovique,
 Pinum, oleastrum, apium, POMAque victor habet.*

Hinc errasse etiam contendit Mercurialem, qui lib. 2. cap. 5. de arte Gymnastica globos illos, qui in nummo M. Aurelii a Byzantinis perculso visuntur, esse pilas trigonales in ludis Actiis Pythiis adhiberi solitas arbitratur. Nam ipse eos esse potius poma putat, quæ victoribus in iisdem ludis dabantur. Demum pag. 34. ad Genium reddit, atque ita cum corona & pomo Ægyptios suorum quandoque ludorum Genios designasse autumat, ut in nummo Domitiani, cujus eclypum exhibet: in quo duo juvenes nudi pariter occurrunt, qui sinistra globum ejusmodi gestant, dextera vero mutuo se coronant, ut ambo in certamine victores evasisse indicio esset.

Hæc vir Clarissimus: quæ non levibus difficultatibus sciant. Primo enim equestria certamina a nudis hominibus fuisse peracta, tam ego ignore, quam ille se ignorare paullo ante aiebat, nudas Imperatorum statuas equestres fuisse effictas. II. Si ex Epigrammate Archiæ sumenda est explicatio insignium nostræ figuræ, ut facit V. C. poma quidem in quarto Epigrammatis ludo, qui Pythicus in honorem Apollinis est, video, coronam non video. III. Si ceteri ludi in Epigrammate expressi coronas suas habent, Olympici nimirum Jovi sacri ex oleastro, Isthmii Portuno seu Palæmoni ex pinu, Nemei Archemoro ex apio, nescio cur quartus ludus Pythicus Phœbo dicatus corona sua carere debeat: nam ex pomis coronas factas nemo dixerit, nec Vignolius ipse, qui pomum, ut in nostra figura, manu gestatum asseverat. IV. Si poma data sunt in ludis Pythicis, & pomum manu gestare in manu juvenem equo insidentem victoriæ suæ indicem ille contendit; non intelligo, cur velit, eidem juveni datam coronam, *vel pineam, vel ex oleastro, vel ex apio*, quæ coronarum genera ad alios tres ludos pertinebant. V. Si in tri-

bus hisce ludis dabantur coronæ unicuique propriæ, non debuit ergo quartus Pythicus corona sua caruisse: quæ cum ex pomis fructibus fieri nequeat, necesse est in Epigrammate Archiæ pro pomo fructu intelligendum esse pomum arborem, ex cujus ramis coronati fuerint victores in ludis Pythicis. Quod si hoc verum, frustra ex hoc Epigrammate deducit Vignolius, juvenem equo insidentem gestare manu pomum fructum. Verum autem hoc esse luculenter docet nos Ausonius, qui in versione ejusdem Epigrammatis sub hoc titulo, *de lustrilibus agonibus*, vocem Græcam *μῦλα*, non pomum fructum reddit, sed pomum arborem, ex qua corona dabatur.

Quattuor antiquos celebravit Achaja ludos:

Calicolum duo sunt, & duo festa hominum.

Sacra Jovis, Phæbique, Palæmonis, Archemorique,

SERTA quibus pinus, MALUS, oliva, apium.

Huic interpretationi auctoritatem addit Libanius in libro de laudibus palmæ & pomi arboris, ubi perspicue victores Pythicos testatur coronatos fuisse pomo arbore: *Palma quidem*, inquit, *omnis certaminis fit corona, & ramum habet victoriæ signum: POMUM vero rursus CORONAT Pythicum certamen*. In Græco est *μῦλα*, quæ vox pomum arborem, non fructum significat. Ergo Archias *μῦλα*, fructum posuit pro *μῦλα* arbore: quod factum est etiam ab auctore *γεωπονικῶν*, qui est Constantinus lib. 10. ubi hæc verba; *ἐγκατερίζεται μῦλον εἰς πᾶσαν ἀχράδα*, *inseritur malus in omnem pyrum silvestrem*. Infitio fit ramo arboris, non fructu. Haud ignoro alios auctores de his quattuor certaminibus loquentes habere *μῦλα* fructum, ut Lucianus in Anacharfi, seu de Gymnasiis, & Maximus Tyrius in quadam Orat. At vel isti hoc verbum eadem notione ac Libanius acceperunt; vel ita intelligendi sunt, ut victor in ludis Pythicis coronatus fuerit ramusculis pomi arboris suo fructu oneratis, uti intellexit Jacobus Palmerius conciliaturus Libanium cum Luciano in exercit. ad auctores Græcos pag. 549. Verum ne quid dissimulem, scio etiam in pluribus nummis Græcis, in quibus agones Actii Pythii repræ-

præsentantur, reperiri acervum globorum, quos Antiquarii poma esse victoribus in præmium tributa existimant. Nolim eorum auctoritati obstare: at quoniam in ludis Aëtiis Pythiis, ut mox ostendam, certamen pilarum inter cetera erat in usu, nonne dici posset, globos illos esse pilas seu folles iis in nummis positos ad denotandum ludi genus, quo in Pythicis tunc aëtiis certatum fuerat? Ut ut vero hæc sint, certum videtur, Epigramma Archiæ Cl. Vignolio non profuisse ad demonstrandum, equestria certamina designari in nummo Corneliæ, & figuram equestrem illi insculptam gestare pomum victoriæ suæ indicem.


Nec magis illi profuit Ægyptius Domitiani nummus; propterea quod globi, quos manu tenent duo illi juvenes, quos vocat *Genios*, se invicem coronantes, non poma videntur esse, sed pilæ seu folles, quibus in ludo aliquo se evasisse victores ostendunt. Quæ quidem nostra explicatio ita vera esse potest, uti ea est falsa, quam vir doctus nummo Byzantinorum M. Aurelii, a Mercuriali exhibito, affingit. In mensa stat urna, in qua tres palmæ, atque inscriptio ΠΥΘΙΑ ΑΚΤΙΑ. Inferius tres nudi homines, qui globos manibus gestant, præter duos, qui in aëra jactati cernuntur. Motus manuum, figura & habitus corporum, ac duo globi jam manibus excussi, apertissime ludentes viros pila trigonali, ut explicaverat Mercurialis, demonstrant: quo genere ludi in certaminibus Pythicis, vel in Sacrificiis, ut mavult idem auctor ob vas sacrificale in mensa positum, nisi vas illud sit præmium victorum, illi victoriam reportaverant. Quæ certiora sunt ex nummo altero Gordiani tertii apud eundem Mercurialem eodem ipso cap. 5., in quo iidem ludi Aëti Pythii, ac in superiori M. Aurelii nummo, eadem urna cum tribus palmis, idem vas, tres item viri manu globum gestantes spectantur. Hos porro globos pilas lusorias esse, vel homines illi cesto armati ad pilas, seu folles jactandos fortius & impellendos declarant. Ergo nequaquam poma sunt globi in nummo Byzantino M. Aurelii, sed pilæ: quod dixerat Mercurialis, immerito etiam in Indice a Cl. Vignolio nota-

tus. Proinde neque poma esse possunt globi in nummo Ægyptio Domitiani, sed pariter pilæ lusoriæ, quas ostentant duo illi juvenes se invicem coronantes: qui non Genii ludorum sunt, sed lusores ipsi, in hoc nummo non secus ac in duobus aliis M. Aurelii & Gordiani, licet sub diversa figura, repræsentati.

Postremum signum, ex quo figuram equestrem in nummo Corneliæ Elagabalum referre arguebam, baculus est seu scipio, qui Consulatum ejus demonstrat. Hoc negat V. C. eo quod desit Aquila, sine qua scipionem *nunquam* posse indicare Consulatum asseverat. Aquilam super virga eburnea peculiare Romanorum Consulum insigne fuisse, quod ille ostendit exemplis, non ignoro: at virgam Consularem *nunquam* sine Aquila inveniri, hoc ita ignoro, ut plures nummos viderim, qui illam sine *Aquila* præferunt. Vidi siquidem binos aureos apud Senatorem amplissimum Jo: Dominicum Theupolum, Vespasiani unum, Trajani alterum, dextera räum, sinistra scipionem sine ullo vestigio *Aquilæ* gestantium. Vidi alterius typum, quem non vidit, vel dissimulavit Cl. Vignolius: nam cum ex Museo Carpineo unum retulisset Antonini Caracallæ a Perinthiis percussum, in quo Imperator sceptrum habet cum *Aquila*, extatque in tabula IX. num. 5., prætermisit alium in tabula X. num. 1. ejusdem Caracallæ, atque ab iisdem Perinthiis signatum, in cujus parte adversa Imperator in quadrigis dextera tenet räum, sinistra sceptrum sine *Aquila*. Quem quidem nummum Senator doctissimus Philippus Bonorotà in Commentariis ejusdem Musei pag. 155. percussum fuisse in Caracallæ Consulatu primo non dubitat: & quamquam nummus ipse ejusdem triumphum repræsentat, attamen sceptrum, ait pag. insequenti 156., positum fuisse in signum Consulatus, quamvis probe vidisset carere *Aquila*: qua caret etiam apud Josephum Monterchium, qui hunc ipsum nummum dedit in numismatis ejusdem Musei num. 8. Ceterum baculus sive sceptrum insigne est proprium Consulis; neque ad triumphantes pertinet, ex eodem Cl. Bonorotà pag. 187. Norisio

fio de numm. Diocletiani cap. 5. & Vaillantio de numm. aureis & arg. pag. 288. aliisque in locis. In nummis Arscotanis tab. LV. num. 16. vifitur numisma Elagabali infcriptum TR. P. III. COS. III., in quo Imperator in quadrigis ramum una manu, fceptrum altera fine Aquila geftat. Proceffus eft Elagabali in Confulatu III. ann. 220. peractus. Vaillantius in nummis aureis, & arg. pag. eadem 288. argenteum alium defcribit ad proceffum Confulatus IV. pertinentem, in quo ait fpectari ramum in dextera, fcipionem eburneum in finiftra, nulla Aquilæ facta mentione. Qui etiam pag. 279. aureum Macrini in quadrigis delineatum exhibet cum TR. P. II. COS. II., in quo ad oculum nudus eft baculus; ficut in alio æreo apud Angelonum in tabula Macrini num. 6.

Ceterum vir doctus, qui *globum* & *Coronam* in figura noftri numismatis ad ludos in honorem Cornelie actos retulit, nusquam tamen explicavit, quo modo baculus ad ludos eodem pertineat. Quod, ut faceret, optandum erat, ne obijcere poffemus: fi baculus aptari nequit certaminibus, nec poffe cetera infignia.



CAPI TULU V.

Utrumque monumentum, nempe Programmata Cycli Paschalis S. Hippolyti, & Infcriptio Panvini, verum efle nequit, eo quod inter fe pugnent. S. Hippolytus more Romano computavit annum primum Alexandri. Nota falſitatis ſaxi Panvini iterum afſeruntur, novis argumentis probantur: & ab obiectis vindicantur. Cur monumentum Hippolyteum Panviniſano ſit præferendum. Panvinius infcriptiones falſas aut vitiatas aliquando obtulit. Id accidit etiam aliis antiquariis. Probatur maxime exemplo duarum Infcriptionum. Veriſimile non eſt Elagabalum Deo Serapidi Statuam diſceſſe. Dio, & Herodianus explicantur; Illud etiam deducitur ex ipſius Vignolii argumentatione. Veteres Theologiam

logiam suam in tria genera distinxere. Alius in Egypto deus erat Serapis, alius Elagabalus in Syria, etiam cum eorum Religio Romam delata fuit. Hinc iterum inverisimile Elagabalum Serapidi statuam dicasse. Argumentum ab exemplo Septimii & Caracallæ petitur, cur sit alienum. Nec est vera Inscriptio Panvinii, quia reperitur descripta in Codice Vaticano. Hinc cum vera tantum sit Inscriptio S. Hippolyti, verum etiam est Elagabalum die XIII. Aprilis ann. 222. jam extinctum fuisse, & Alexandrum imperasse. Item illius mortem in diem X. vel XI. Martii ejusdem anni incidisse.

MORS Elagabali in Martium mensem ann. æræ vulgaris 222. eo potissimum conjecta a me fuerat, quod Alexander ejus successor die XIII. Aprilis jam Imperator proponitur in lemmate Cycli S. Hippolyti his apertissimis verbis: *Anno 1. Imperii Alexandri Imp. facta est XIV. Paschæ Idibus Aprilibus, Sabbato. Sed obstabat Inscriptio relata a Panvinio lib. 2. Fast., in qua statua, seu aliud signum legitur dedicatum Serapidi ab Elagabalo iisdem prorsus Idibus Aprilibus. Propterea dixeram, alterutrum ex his antiquitatis monumentis falsum vel mendax esse: quam notam, cum Hippolyteo inurere piaculum sit, certe in Panvinianum rejiciendam esse. At Cl. Vignolius initio hujus capituli utrumque legitimum ac verax pronunciat: quandoquidem nihil, inquit, habet marmor S. Hippolyti, quod veritati, atque adeo Inscriptiōi Panvinii repugnet. Hoc se demonstraturum promittit suo loco, nimirum cap. XI., ubi contendit S. Hippolytum accepisse annum primum Alexandri veluti cæptum a Kalendis Januariis anno 222. modo computandi Juliano. Hanc nos interpretationem suo item loco refutabimus, nec aliter loquutum S. Hippolytum ostendemus, quam Romano more computasse annum primum Alexandri, nempe a die ejus imperii natali, non vero a Kalendis Januarii antecedentibus. Satis hoc esset, ut legitimum ac verax utrumque monumentum dici nequeat: nam si cæpti sunt anni Alexandri*

ab exordio ejus imperii, non poterat Elagabalus vivus esse XIII. Aprilis, quo die Alexander jam regnabat. Ergo legitima ac vera non est Inscriptio Panviniana, in qua Elagabalus die eodem XIII. Aprilis dicat Statuam Serapidi. Satis, inquam, hoc esset, nisi Clarissimus vir argumenta falsitatis saxi Panviniani, quæ ego aliis etiam ex fontibus petiveram, longa disputatione convellere in hoc capite fuisset adgressus. Quamobrem mihi etiam in his diutius est immorandum.

Ac primum compellat me vir doctus, ut quandoquidem Inscriptionem Panvinii suspectam habeo, vitia ipsius patefaciam, atque idoneis argumentis probem. Non enim, ait, satis est, quod marmor illius amplius non extet, vel quod a Panvinio productum sit, qui nobis non semel falsas & vitiatas inscriptiones obtrusit. Nam, subdit ille, si ita res se haberet, inscriptiones, quas non paucas a Panvinio exceptas, vel quorum marmora periere, Gruterus recitat, jam dubiæ fidei ac nullius auctoritatis essent: ac proinde Gruterus ipse, & cum eo Reinesius, Fabrettus, ceterique Inscriptionum Collectores operam lusissent: a quibus etiam Inscriptiones quamplurimæ adduci solent, quarum lapides vel prorsus non extant, vel ubi sint penitus ignoratur. Sed vir Clarissimus nimium sibi, ac literis timet: Nam quod ego tantulam Inscriptionem Panvinii in suspicionem vocavi, non ideo Grutero, Reinesio, Fabretto, atque universæ antiquariorum genti diem dixi; omnesque Inscriptiones ab iis ex Panvinio collectas, vel quorum saxa non extant, falsi crimine damnavi. Novumne hoc est, & non antea auditum, Inscriptiones aliquas vel culpa exscriptoris, vel ævi detrimento, vel fallendi ingenio, vel aliis demum ex causis vitiatas, suspectas, ac falsas esse? Illæ vero potissimum Inscriptiones merito suspicionis, aut falsitatis arguuntur, quæ aliis monumentis non dubiæ fidei repugnant. Ergo eam ob causam Inscriptionem Panvinii suspectam aut falsam habui, quod programmati Cycli S. Hippolyti adversetur. Quis vero si componat alterum monumentum cum altero, non statim

Hippolyteo primas deferat? Hoc extat integrum, incorruptum, atque omnium oculis patet: Panvinianum nusquam est, neque ejus characteres adspectu explorare possumus, nosque certiores reddere, an autographum exemplo Panvini respondeat. Hinc non ego eo solum, quod marmor non extet, Inscriptionem hanc dixi falsam; sed quia cum programme Hippolyteo non consentit, & ex autographo de ejus veritate judicare non licet.

Ut vero suspicionem falsitatis confirmarem, Panvinium, quamquam antiquitatis peritissimum, Inscriptiones falsas aut vitiatas nobis obtulisse subdidi, vel ab aliis perperam exscriptas, vel quod ipse, ut crebro etiam oculatissimis usu venire solet, minus accurate eas reddiderit. Hæc ostendo exemplis. Et primo, quamvis possem & alia, unum insigne adducam ex Card. Norisio, qui quamquam Panvini civis, & admirator perpetuus, fatetur tamen in Epistola Consulari pag. 15. illum vitiasse Inscriptionem, quæ extat apud Gruterum pag. CXIII, & præter fidem posuisse nomen *M. Furii Camilli Scriboniani*, quod nomen deletum est in marmore. Cur etiam in nostra additum aliquid, vel demtum esse non potuit?

Deinde etiam oculatissimos in re antiquaria Inscriptiones minus accurate vel exscripsisse ipsos, vel ab aliis corruptas in lucem emisisse, ita exploratum est eruditis, ut probati one non egeat. Attamen hoc loco duo illustria exempla, tum quod ad me pertineant, tum etiam eruditionis gratia, prætermittere nolo. Raphael Fabrettus, quo nemo in perscrutandis marmoribus diligentior, nemo in exponendis doctior, lib. IV. domestic. inscript. pag. 258. Epigramma hoc a se exscriptum Romæ ex urna apud Lucam Gorsum produxit.

D M

T. AELIO. AVG. LIB. TATIANO. PROX.
 A. LIBR. SACERDOTAL. DEI. CARNVNT
 ANN. XXXXII. M. III. D. XIX. MARIT. VIRGIN.
 DVLCISS. ET. INCOMPARABILI. BENE
 QVE. MERITO. QVEM FVNERAVIT
 FL. AMPELIS. CONIVX. CARISSIMA
 ET. RELIQVIAS. EIVS. PERMISSV. IMP
 IPSA. PERTVLIT. CONSECRAVITQVE
 CVM. Q. V. A. XII. M. III. D. XXL SINE. VLLA
 QVERELA

Legit ergo Fabrettus DEI. CARNVNT., atque hunc
Deum Carnuntum tutelare patriumque numen fecit Carnun-
 ti opidi Germaniæ. Ego vero ejus auctoritatem & fidem se-
 quutus, in dissertatione de Beleno, quæ post Monumenta
 veteris Antii extat, pag. 288. deum ipsum Carnutum ad
 Apollinem Carneum, seu Belenum retuli. Quis credat nul-
 lum esse *deum Carnutum* in hac Inscriptione, & virum ocu-
 latissimum se ipsum, nosque sefellisse? Etenim in marmore
 est scriptum DEF. CARNVNT., non vero DEI, ut mihi
 semel iterumque per literas testatus est doctissimus Gisbertus
 Cuperus, qui vidit & accuratissime perlustravit marmor
 ipsum, quod ex Italia deportatum nunc prostat Amstelæda-
 mi apud Cl. Vylembroechium: atque etiam nuper ab eo-
 dem delineatam Inscriptionem ipsam ad me misit. Ergo Æ-
 lius Tatianus, seu potius Titianus, ut scribitur in lapide
 DEFunctus est CARNVNTI: cujus *reliquias* Fl. *Ampelis*
Coniux permissu Imperatoris pertulit, & consecravit. Vox
pertulit, subdit illustri Cuperus, indicat satis superque alio
 in loco mortuum esse Titianum, & Cineres vel Cadaver,
 Romam forte, concedente istud Imperatore, veluti Pontifi-
 ce Maximo, uti fieri solebat, deportatum esse.

Alterum exemplum præbet vetus Inscriptio ADRIAE ex-
 tans, quam Petrus Appianus in sua collectione pag. CV.,
 & Gruterus pag. DCCXLIV. I. referunt; sed perperam Mo-

rimundi in agro Mediolanensi inveniri scribunt. Cum primum Adriam accessi, oculis in eam coniectis, miratus sum nondum quemquam ejus characteres intellexisse: nam præter Appiani, & Gruteri exemplaria, vidi etiam aliam Adriæ, tum Rhodigii pessime depravata. Ergo has literas marmor in turri Campanaria Ecclesiæ de Tumba infertum exhibet.

D M
Q. TITIO SERTORIA
NO Q. TITIVS SEVE
RVS FILIVS QVI ET
COL NAVT MA DEDIT
S N CCCC AD ROSAS ET
ESCAS DVCENDAS EI
OMMIBVS ANNIS

Appianus scribit: QVI EI COL NAVIM DEDIT. Gruterus: QVEI COLL. ANN. DEDIT. alii: NAVIM ADDIDIT: perperam omnes, & sine congruo sensu: At literæ ita se habent, nec dubia ulla mihi est, præter tertiam in voce COL. quæ videtur I. præferre. Attamen cum lapis eo in loco valde sit exesus relinquenda est L., & ea nota compendiaria sic reddenda: COLlegio. Sequitur NAVT: perspicue. MA item nullam dubitationem patitur. Inscriptio itaque hoc modo est explicanda: Q. TITIO SERTORIANO Q. TITIVS SEVERVS ejus FILIVS hoc monumentum posuit, QVI Severus ET, pro etiam, COLlegio NAVTarum Municipii Adriensium DEDIT Sextertios Nummos CCCC AD ROSAS ET ESCAS DVCENDAS EI Sertoriano OMNIBUS ANNIS. Collegium Nautarum sub nomine corporis Nautarum reperitur apud Gruterum pag. CCCCLXVI. 7. & Collegium Naviculariorum p. CCCCLXIX. 6. Sub duabus illis literis singulariis MA autumo latere Municipium Adriense. Scio etiam legi posse, Nautarum Maris Adriatici: imo etiam conjunctis literis, Nautarum Maritimorum, ad differentiam Nautarum fluvialium; quod placuit

cuit Cl. Cupero, quocum olim varias has lectiones communicavi; atque etiam Cl. Silvestrio nostro in notis ad Juvenalis Satiram VII. num. 207. sed primam lectionem omnino amplectendam statuo, quod alia idoneis exemplis careant, hæc vero compluribus fulciatur, quibus litera singularis M. in *Municipium* resolvitur. In Thesauro Gruteri pag. LXXXVIII. 13. M. A. A. significat Municipium *Albae Augustae*: pag. sequente 11. DEC. M. APUL. *Decurio Municipii Apulensis* in Dacia: pag. CDXXXVI. M. B. *Municipium Bergomatum*: pag. CCCXCLVI. 4. M. M. *Municipium Mediolanense*: pag. CCCCII. 2. M. S. *Municipium Saffinatum*: & pag. DCCXLVIII. 2. M. R. *Municipium Ravennatum*. Quod quidem postremum exemplum omnium est aptissimum ad nostri lapidis explicationem, tum quia ab urbe proxima Ravenna petitur, tum quia in ceteris quoque consentit: ut vero prorsus simile videatur, alterum ad alterius imitationem fuisse compositum. Ita autem Ravennatense est scriptum: OB MEMORIAM. PATRIS. SUI. DEC. VII. COLLEGI. FABRUM. M. R. (Municipii Ravennatum) H-S 4. 0 0 N. LIBERALITATE. DONAVIT. SUB. HAC. CONDITIO- NE. UT. QUOT. ANNIS. ROSAS. AD. MONUMENTUM. DEFERANT. ET. IBI. EPULENTUR. Ergo M. A. est *Municipium Adriensium*; uti M. R. est *Municipium Ravennatum*, & M. B. *Municipium Bergomatum*, cum cæteris. Accedit auctoritas Reinesii, qui M. singulare notare *Municipium* docet, Class. I. 8. Class. II. 27. Class. III. 57. & Class. VI. 46. 56.

Ergo si Fabrettus oculatissimus ac doctissimus lapidem, quem sub oculos habuit, perperam legit, atque exscripsit, cur etiam Panvinio id accidere non potuit? & si lapis idem modo non extaret, eumque Cl. Cuperus non vidisset, in errore de Deo Carnuto adhuc versaremur. Adriensis quoque Inscriptio cum sua mala litera nobis adhuc imponeret, nisi faxum perlustrare & legere nobis liceret. Quis igitur, si procul abest lapis Panvinianus, nos certos faciet, non illum etiam, cum exscriptus fuit, ratione aliqua vitiatum aut corruptum fuisse?

Verum

Verum quid de vitio, aut corruptione disceptamus, si falsi indicia, quæ postulabat Vignolius, propemodum manifesta sese nobis offerunt? Dixeram pag. 64. & nunc audentius assevero, nequaquam esse verisimile, Elagabalum deo Serapidi statuam, vel signum aliquod dicasse, uti expressum est in lapide Panviniano. Qui enim *religiones omnes extinguere* voluit, nullumque deum alium Romæ coli præter unum deum suum Elagabalum, quo potuit fieri modo, ut Serapidi publico monumento atque insigni honorem cultumque tribuerit? *Heliogabalum*, inquit Lampridius cap. 3. *in Palarino monte consecravit, eique templum fecit, studens & matris typum & Vestæ ignem, & Palladium & ancilia, & omnia Romanis veneranda in illud transferre templum, & id agens, NE QUIS ROMÆ DEUS NISI HELIOGABALUS COLERETUR.* Atque ut cap. 6. subdit, adeo vesano cultu in Deum hunc suum raptus est, ut *non Romanastantum religiones extinguere voluerit, sed per Orbem terræ, unum studens, ut HELIOGABALUS DEUS UNUS UBIQUE COLERETUR.*

Hiscæ adeo expressis ac perspicuis testimoniis opponit Cl. Vignolius Dionem ac Herodianum, qui tradunt Elagabalum anteposuisse deum suum aliis diis, atque ipsi Jovi: non ergo, inquit, ille voluit, ut religio eorum omnis & cultus cessaret. Atqui potuit Dio eadem cum Lampridio scripsisse; sed Xiphilinus hoc solum in epitomen suam transtulit. De Herodiano certum est, eum Lampridio consentire, ut mox patebit. Ac primum hoc moneo, ejus verba, quæ in suam sententiam vir Clarissimus profert, ad rem non pertinere. *Edixit item*, inquit Herodianus lib. v. cap. 5. *ut omnes Romani magistratus, quique publice sacra facerent, ANTE ALIOS DEOS, quorum meminisse inter sacrificandum solent, novum illum deum Heliogabalum nuncuparent;* nam hoc edixit Elagabalus ante adventum in Urbem, cum adhuc Nicomediæ esset: nos vero de Romæ gestis loquimur. Noluisset scilicet Elagabalus initio imperii, ne Romanos statim offenderet, omnem prorsus abolere religionem, contentus deum suum aliis anteponi; ideoque etiam ut paullo ante narrat

Hero-

Herodianus, figuram numinis depictam in tabula præmisit Romam, iussitque in media Curia poni, ut a Senatu coleretur. *Sed ubi primum ingressus est Urbem, Heliogabalum in Palatino monte consecravit, ceteraque gessit, quæ supra ex Lampridio expressimus, id agens ne quis Romæ deus nisi Heliogabalus coleretur.* Præterea, subdit Historicus cap. 6. *Et signum, quod Palladium esse credebat, sustulit, Et auro fictum in sui dei templo locavit. Typum quoque matris deum eripuit, Et sanctum nomen ablatum in penetrabile dei sui transtulit.* Ita cum deorum sacra & imagines in dei sui templum transduxisset Elagabalus; post ejus mortem initio imperii Alexandri restituta omnia fuerunt delubris suis. *Igitur primo, inquit Herodianus initio lib. VI. deorum simulacra quæ ille propriis sedibus extulerat, suis quaque templis, delubris, fanisque restituerunt.* Quamvis vero Elagabalus Nico-medix edixerit, ut deus suus nuncuparetur *ante alios deos*, Romæ tamen aliter se gessit, ipso Herodiano teste: deos enim omnes a suis delubris abstractos in templum dei sui transtulit; ut scilicet eorum cultum & religionem demoliretur, & unum deum suum colendum proponeret. Quod illud ipsum est, quod tradidit Lampridius.

Porro *voluit* pessimus Imperator *religiones omnes extinguere*, sed non effecit; nec potuit a Romanorum animis intitum deorum cultum avellere. Hinc Senatus, quod opponit vir doctus, non dubitavit numismata cudere deorum illorum nominibus insignita, quos ille commemorat pag. 44. Neque quod fecit Senatus, fecisse etiam Elagabalum dici potest. Nam si eo animo fuit Elagabalus erga deos, & si eorum simulacra a suis templis ac fanis abstraxit, quis credat, illum ipsum statuam posuisse Serapidi in ipsomet ejus templo, ut pag. 49. verisimile putat Vignolius?

At profecto cum ille pergit Elagabali causam agere, ab eoque crimen extinguendæ deorum religionis amovere, parum illi consuluit referens ex Lampridii capite 7. illum dicere solitum, OMNES DEOS sui dei ministros esse, cum alios ejus cubicularios appellaret, alios servos, alios diversa-

rum

rum rerum ministros. Parumque etiam honori Serapidis prospexit, cum veritus non est tribuere illi *aliquem locum* inter hos deos cubicularios, & servos, ministrosque. Sane Momus rideret deos hosce, qui apud Lucianum in Concilio deorum, ridet *deos pedisequos, & famulos*, petitque ab Jove, ut eos a deorum albo expungat, & è Cælo in Tartarum præcipitet. Certe non aliter exauctoratos, & a deorum numero sublato *deos omnes*, atque adeo & Serapidem, volebat Elagabalus, qui eos vilioribus servitiis mancipaverat, & cubicularios, pedisequos, & famulos dei sui fecerat. Nam *isti dii non erunt*, ut apposite verbis utar Lactantii lib. 1. cap. 3. *sed satellites & ministri*, quos ille UNUS maximus & potens, Elagabalus, omnium officiis his præfecerit; ut ipsi ejus imperio, ac nutibus serviant. Si ergo dii non sunt dii famuli, ministri, ac servi; atque inter hos tam abjectos, adeoque ab Elagabalo contemptos deos locum tribuit Serapidi vir doctus, me nescire fateor, cur adhuc eidem Serapidi ab Elagabalo magno cum honore & solemnî ritu dicatam statuam affirmare velit.

Nec vero hoc mihi persuasum est, quod ille subjicit, ideo Antoninum Elagabalum statuam Serapidi dicasse quod is naturali significatione acceptus a deo Elagabalo non sit diversus; atque ut ipse a Syris, ita iste ab Ægyptiis & Romanis uti Sol & Jupiter credebatur; quemadmodum vetera monumenta fidem faciunt, quæ JOVI OPTIMO MAXIMO SERAPIDI, & JOVI SOLI INVICTO SERAPIDI inscribuntur. Etenim veteres Theologiam suam in tria genera distinxere, in Mythicam seu fabularem, Physicam, & Civilem, ut tradit S. Augustinus de Civitate Dei lib. v. cap. 27. & lib. vi. cap. 5. & Eusebius Præparationis Evangelicæ lib. IV. in præfatione. De primo nunc nobis sermo non est. At secundum de genere & ortu deorum disputabat; & *propius*, inquit, Eusebius, *ad naturam allegorica fabularum explicatione traductum erat*; ac physiologicas seu naturales rationes scrutabatur, quibus inter se vel participatione potestatis ac virtutis, vel communione significationis numina conveniebant.

bañt . De his idem Eusebius lib. III. antecedente , & plures ex Gentilibus . Tertium genus , inquit Augustinus ex Varrone , *in urbibus cives , maxime Sacerdotes nosse atque administrare debebant . In quo est quos deos publice colere , quæ sacra ac sacrificia facere quemquam par sit* ; unde illud ad ceremonias spectare ait Salustius Philosophus de Diis & Mundo c.4. Quamvis ergo Elagabalus a Syris , & ab Ægyptiis Serapis naturali significatione , juxta alterum Theologiæ genus ; uti Sol & Jupiter creditus sit ; in tertio tamen genere , quod ad cultum deorum pertinet , alius in Ægypto deus erat Serapis , alius Elagabalus in Syria , uti etiam cum Romam eorum religio delata fuit ; quia diversis ac distinctis ritibus , ceremoniis , sacrificiis , & , quod propius ad rem attinet , Simulacris & Symbolis unusquisque eorum colebatur . Cum vero statuæ dei alicujus dedicatio ad ritus & ceremonias pertineat , ad tertium videlicet memoratum genus , non potuit Antoninus Serapidem putare unum & eundem deum cum Elagabalo , eique specie communionis divinitatis statuam publico ac solemni ritu dedicare . Multum quippe , & longe diversa erant sacra , quibus Syri , & ipsemet Antoninus , qui ea è Syria in Urbem traduxit , Elagabalum deum celebrabant , a sacris quibus Ægyptii Serapidem . Atque uti Sacris dei sui Antoninus tam perditæ erat addiæctus , ut religionem aliorum deorum omnium ejus causâ despiceret , imo & extinguere vellet , credendum non est ; sacris alterius dei se immiscuisse , & Serapidi cultum publicum exhibuisse . Denique si ad communionem inter deos aliquos exprimendam exemplum petitur a recitatis monumentis , uti in iis *Jovi Optimo Maximo* , & *Jovi Soli Invicto* conjunctus est *Serapis* ; ita si Antoninus voluisset significare communionem inter deum suum Elagabalum & Serapidem , saxum inscripisset ELAGABALO SERAPIDI .

Quod porro ducitur argumentum , multa eruditionis copia exornatum , ab exemplo Septimii avi , & Caracallæ patris , qui Serapidem impense coluerunt , nimis alienum ac longe est petitum . At si Elagabalo cordi fuisset religionem avi & pa-

tris imitari, qui *Pantheum*, diis omnibus sacrum, *vetustate corruptum cum omni cultu restituerunt*, uti adhuc legitur in fronte ejusdem templi, non ille deos ipsos omnes contumeliose deo suo famulari coactos dedecorasset.

Ex his satis patere arbitror, quæ fides atque auctoritas insit Inscriptioni Panvinianæ, in qua statua legitur Serapidi dedicata ab Antonino Elagabalo Idibus Aprilibus. Neque vero id mihi negotium ullum faceffit, quod eam Inscriptionem Cl. Vignolius etiam in Codice Vaticano invenerit. Si enim tot argumentis eam vitiata, aut falsam probatum est; nihil refert ubi illa descripta reperiatur. Multum vero referret, si lapis existeret, vel certi essemus Panvinium, aut Collectorem Vaticanum eam a lapide autographo exscripsisse. Sed neutrum affirmare licet. Porro memini, me a Clarissimo Fabretto audivisse, Collectionem Inscriptionum Vaticanam, quam illam ipsam, quam Vignolius præ manibus habuit, esse arbitror, Inscriptiones quamplures mendosas, corruptas, & falsas etiam continere: quarum una cur hæc esse non poterit?

Quod si falsa, aut corrupta est Inscriptio Panvinii, nihil ea obest programmi S. Hippolyti, & nihil dubitandum remanet, quin Elagabalus die XIII. Aprilis A. C. 222. jam facto functus fuerit, & Alexander ad Imperium evectus, uti in eodem programme legitur. Et proinde dubitari etiam nequit, illius mortem, ducta ratione ex annis, mensibus, & diebus a Dione consignatis, incidisse in diem decimum vel undecimum Martii anni ejusdem 222.



C A P U T VI.

Maximæ difficultates, quæ occurrunt ad conciliandam Trib. Pot. V. Elagabali cum annis ejus Imperii ob signatam. Auctor ad suam sententiam firmandam scripserat, facile potuisse Librarios Majum pro Martio in textu Xiphilini conjicere;

cere ; aut ipsum Xiphilinum mensium nomina per unicam initialem litteram scripsisse . Opposita a Vignolio expenduntur . In Spartiano Augustus pro Aprili irrepsit . Verissimile est tam ipsum , quam Xiphilinum eo modo mensium nomina scripsisse . Hoc exemplis probatur . Ostenditur de facto libarios commutasse in textu Xiphilini mensem Martium in Majum . Nec Vignolius , nec Valsechius gesta ab acclamatione Elagabali usque ad diem praelii cum Macrino , ex Herodiano & Dione recte componunt . Ex ipsis probatur majora temporum intervalla sibi deposcere . Hinc acclamatio Elagabali dici debet sequuta die XVI. Martii . Quæ opponit Valsechius , cur stare non possint . Aliud argumentum Vignolii diluitur , ex Solis Eclipsi petitur quam memorat Dio accidisse an. 218. die 12. Aprilis . Quæ idem scripsit referri debent ad alteram Eclipsim diei VI. Octobris ejusdem anni . Quæ mala potuerit hæc prænunciare .

AT non potuit Elagabalus e vivis ereptus fuisse die *undecimo* Martii an. 222. quia numismata extant Tribunicia ejus Potestate *quinta* insignita . Nam si Imperium ille accepit & Tribunicium Potestatem die septimo mensis Junii an. 218. a prælio cum Macrino , vel die XVI. Maii , cum a militibus acclamatus fuit Imperator , die eodem *undecimo Martii* anno 222. nondum expleverat Tribuniciam Potestatem quartam , & quintam inchoaverat , quam iidem ejus nummi præferunt . Nimirum hic ille nodus est , ad quem expediendum tum ego , tum Vignolius , & Valsechius tantis conatibus hæctenus insudavimus . In priore Dissertatione ipse quidem sententiam Pagii de anticipatione primum sequutus fueram ; deinde in Addendis pag. 193. dixeram , Elagabali Trib. Potestatem inchoandam esse a die XVI. Martii ann. 218. quo die salutatus fuit Imperator a militibus , non vero a die XVI. Maii , ut vulgati Dionis , seu Xiphilini textus produnt : propterea quod ea quæ acta narrantur inter salutationem & pugnam cum Macrino , nequaquam confici potuerint intra illud temporis spatium , quod a die XVI. Maii

ad diem VII. Junii, quo ea pugna commissa fuit, numeratur: atque exinde conjectaveram, ob similitudinem principis literæ utriusque mensis librarios Majum pro Martio in textu Xiphilini coniecisse.

Hæc ego verba de permutatione mensis Martii in Majum scripseram pag. 193. At vir clarissimus, illis prætermisiss, alia ex pag. 67. in fronte hujus capituli VI. exposuit; quibus ejus permutationis causam in Xiphilinum rejeceram, ut qui solam primam litteram M. scripserit, quam librariis placuit potius in Majum, quam in Martium vertere. Itaque rem hanc nullam cum vero affinitatem habere ait, cum nunquam Xiphilinus, ubi illi Menses nominare contingit, per unicam initialem litteram mensium nomina scripserit; & certe nostrum nemo menses, eosque maxime qui ab una eademque litera initium ducunt, puta Januarium, Junium, & ceteros, ita compendio scriberet & indicaret. Cur itaque, subdit, Xiphilinum & Spartianum (nam ego exemplum Spartiani cap. de vita Septimii adduxeram, apud quem Augustus mensis pro Aprili suppositus est) ita eos scripsisse & indicasse volumus? Atque ita parum cavisse, ut non viderint litteram illam, M. scilicet Xiphilini pro Majo, non minus quam pro Martio, & A. Spartiani tam pro Aprili, quam pro Augusto accipi potuisse? At ego curiosius quærere, & disputare nolo, utrum id factum fuerit a Xiphilino & Spartiano; sed hoc ajo quod olim quoque dixi, fieri id potuisse a librariis, qui Majum pro Martio in Xiphilini textum conjecerint; sicuti revera Augustum pro Aprili in textum Spartiani conjecerunt. Sed Vignolius exemplo huic Spartiani nihil quidem respondet, contentus negare, id a Spartiano ipso commissum fuisse. Dicat ergo, quo factum fuerit modo, ut in Spartianum Augustus pro Aprili irrepserit; nam haud inficiabitur, puto, in ejus textu non esse legendum *Idibus Augusti*, sed utique legendum *Idibus Aprilis*, ut docti omnes consentiunt, & ratio temporum quibus Septimius Carnunti acclamatus fuit Imperator, & inde Romam ad capeffendum imperium ingressus est, evidenter ostendit.

Fateatur profecto oportet, vel librarios integrum nomen Mensis Aprilis in Augustum commutasse; vel quod facilius accidere potuit, eosdem primum scripsisse literam initialem A. pro Aprili, ac deinde alios, qui nomen plenum exprimere voluerunt, eam literam A. in Augustum vertisse. Quidni igitur factum non potuit esse hoc ipsum a librariis in Xiphilino, in cuius textu, ab aliis librariis ante conscripto, solitariam literam M. cum invenissent, Majum pro Martio posuere.

Nec putet vir doctus, rem hætenus nunquam audiram me obtrudere, atque a nemine prius traditam. Consulat virum doctissimum Camillum Peregrinum in Castigationibus ad Lupum Protospatham, cujus verba ex pag. 92. quamvis longiora, recitare non piget: *Mensem Martium pro Majo sæpe alias suppositum, manifestum est: idque ex ea forte occasione natum, quod nomina propria cum sub Normannorum ætate capitalibus tantummodo literis compendiarentur, Martius mensis sic descriptus, pro Majo a recentioribus librariis sæpenumero est acceptus; sicut in Kalendario antiqui etiam Breviarii Campani, in quo festum Sanctæ Potentianæ Virginis perperam notatur ad diem 19. Martii, quod colitur 19. Maii. Et in percelebri quoque diplomate præfati Comitis Rogerii apud Surium die 5. Octobris, in quo habetur, structas in eum, dum in Capuæ manebat obsidione, insidias Kal. Martii, ubique legendum esse Kal. Maii, jam olim docti censuerunt viri.*

Et primum postremis hisce verbis meis prætermisiss, hæc alia quæ scripseram ante pag. 67., in fronte hujus capituli præposuit: quæ permutatio non adeo est inverisimilis, ut quia Xiphilinus scripserit solam primam literam M, quam librarii placuit potius in Majum, quam in Martium vertere. Nempe hoc nullam cum vero affinitatem habere ait, cum nunquam Xiphilinus, ubi illi menses nominare contingit, per unicam initialem literam mensium nomina scripserit: neque hoc etiam Græcis unquam aut Latinis auctoribus in usu fuerit. Nolo de Xiphilino, aut priscis auctoribus litem facere, quam solam ille intentat: at profecto si causam in-

eorum exscriptores refundamus, quos norunt omnes infinitis mendis codices antiquos commaculasse, nemo reprehendere possit ea verba, quæ ante retuli ex addendis meis, quæque ille sine censura præterit; potuisse nimirum fieri, ut ob similitudinem principis literæ utriusque mensis librarii Majum pro Martio in textum Xiphilini conjecerint. Exemplum attuleram, quo nullum aptius ad rem hanc commonstrandam esse potest; quodque latius nunc expono. Refert Spartianus cap. v. de vita Septimii Severi, hunc fuisse salutatum Imperatorem Carnunti in Germania *Idibus* AUGUSTIS. Neminem fugit ex temporum supputatione Julianum Imp. occisum diem prima Junii A. C. 293., & statim Septimium in Urbem ingressum Imperium suscepisse. Oportuit ergo ante hunc diem Carnunti, unde profectus erat Romam, Septimium appellatum fuisse Imperatorem. Quod certe non potuit fieri Augusto mense anni superioris, quia tunc vivebat Commodus; neque Augusto subsequente, quo ille jam Romæ aderat. Quare salutatio ejusdem facta fuit *Idibus Aprilibus*, uti omnes eruditi consentiunt. Ergo in textum Spartiani AUGUSTUS irrepsit pro APRILI; sive quia in Codicibus scripta fuerit sola litera initialis; sive oscitatione librariorum *Augustus* locum occupaverit *Aprilis*. Quidni igitur etiam in Xiphilino *Majus* pro *Martio* supponi potuit? Similia hujus duo alia exempla profero. In Codice Justiniani lex 6. de *Collationibus* data legitur a Gordiano Juniore VII. *Kal. Martii* Peregrino & Æmiliano Cos. hoc est anno 244. Pearsonius in Annal. Cyprian. ad annum 249. §. v. & post eum Tillemontius annotat. I. in Gordianum, *Majum* pro *Martio* positum omnino asseverant, ob eas rationes, quæ apud ipsos videri poterunt. Recentius est aliud in Medio-barbo pag. 524. ubi scribitur Arcadium Imperatorem obiisse *Kal. Martii*, pro *Kal. Maii*, quo die Arcadius vere decessit. Vide quam facilis sit duorum horum mensium ob affinitatem literarum permutatio. Sed etiam in illis mensibus, qui nullam inter se similitudinem habent, aliquando hoc pisum accidit. In eodem Codice lex II. ejusdem Gordiani, de

de *curatore furiosi*, data est *Kal. Januarii* Pio & Pontiano Coss. quo die vivebat Maximinus non Gordianus. Quare mensis alius ejusdem anni, quo jam ad Imperium evectus erat Gordianus, pro Januario scribi debuerat. Ita l. 3. *de his qui accusare non possunt*, recitatur sub die III. Non. Febr. Alexandro Aug. Cos., qui Alexander nondum Augustus erat; atque ideo falsus est mensis. Si lapsus librariorum in aliis vocibus quam in mensibus recensere vellemus, plures paginæ essent implendæ. Videndus Cl. Valsechius, qui in postremo opere suo pag. 18. egregia aliquot exempla profert.

Quod vero menses *Martius*, & *Majus* etiam in autographis potuerint exarari prioribus tantum elementis, en tibi illustre exemplum vel in ipsis faxis. Floravantes Martinellus, vir in antiquitatibus Romanis apprime versatus, in libro inscripto, Imago B. Mariæ Virginis apud Moniales S. S. Sixti & Dominici pag. 18. hanc recitat inscriptionem.

ANTONIN....
V. C. PONTIF. ET
DECEMVIR. SA. F
TAUROBOLIO
CONFECTO. III. KAL
MA. FL. ANICIO. ET
NICRINIANO. CON
ARAM. FELICITER
CONSECRAVIT

Inscriptionem hanc se excepisse ait Martinellus ex libro Jacobi Grimaldi, qui eam exscripsit cum aliis compluribus repertis in Vaticana Basilica, cum ea reædificaretur a Paulo V. Pont. Max. Ergo in sexta linea MA. compendium est mensis, qui tum in *Martium*, tum in *Majum* verti potest. Fabrettus domesticarum Inscriptionum pag. 669. *Majum* fecit, præter fidem apographi apud Martinellum, a quo hanc Inscriptionem se duxisse fatetur.

At si fieri potuit, ut librarii ob affinitatem priorum litera-

rarum commutaverint in textu Xiphilini mensem *Martium* in *Majum*, id factum etiam ab eis fuisse nunc est demonstrandum. Hoc ab eo pendet, utrum ea quæ gesta sunt ab acclamatione Elagabali, quæ in vulgatis Xiphilini codicibus accidisse narrantur die XVI. Maii, confici potuerint intra tempus, quod excurrit usque ad diem VII. Junii, quo die prælium cum Macrino peractum fuit, diebus nimirum uno & viginti non computato ipso die prælii. Hoc ego negaveram in *Addendis* pag. 193. at contra Cl. Vignolius intra pauciores etiam dies fieri potuisse contendit. Ejus ergo vestigiis insistens rerum gestarum narrationem persequar; deinde argumenta proponam, quibus videri possit probatum, in rebus iis gerendis multo plures quam unum & viginti dies elapsos fuisse. Quod si evicero, necesse erit Elagabalum consalutatum fuisse Imperatorem non die XVI. *Maii* sed XVI. *Martii*, atque hunc mensem in textum Xiphilini esse restituendum. Et demum id assequar, ut perspicue hac ratione explicatio numismatum cum Trib. Potestate v. expediti possit: quæ totius controversiæ nostræ summa est.

Ita igitur vir doctus res & tempora ex Herodiano & Dione componit. Exercitum, qui prope Emesam in Phœnicia erat, Antoninum Elagabalum salutasse Imperatorem, Macrinus Antiochiæ certior est factus. Emesa ex Itinerario millia passuum 133. ab Antiochia distat; quare, inquit, unius fere diei spatio per celerem tabellarium id perferri ad Macrinum potuit. Hisce auditis Macrinus Julianum cum copiis, quantæ suffecturæ videbantur, ad compescendos rebelles mittit: quod iter septem diebus peractum fuit. Nam vir Clarissimus, qui olim iter militare diurnum tanta contentione non amplius quam octo miliaribus æstimaverat, nunc se vel sententiam meam complecti professus, quinque & viginti miliaria lubens adoptat, & datis duobus diebus ad quietem, iter illud miliarium 133. septem dierum spatio definit. Nimirum tempus itineris Elagabali Nicomedia Romam tunc erat illi maxime extrahendum, nunc Juliani hoc, quoad ejus fieri poterat, decurtandum. Altero die, sequitur auctor,

stor, post adventum Juliani ad castra Elagabali, milites ejus donis & promissis illecti, caput amputant ipsi Juliano, mittuntque ad Macrinum, & intra castra recipiuntur. Miles qui ad Macrinum Apameæ tunc degentem caput Juliani detulit cursu celeri unius diei spatio illuc pervenerit, cum miliaria quatuor & sexaginta tantum conficienda sibi fuissent. At Elagabalus tanta celeritate, ut ait Xiphilinus, contra Macrinum profectus est, ut in vico quodam Antiochenorum cum eo confligit, eumque prælio superavit. Quare, inquit Vignolius, cum summa celeritate profectus fuerit, altera die post interitum Juliani eduxisse exercitum contra Macrinum verisimile est. Iter vero istud, quod centum & decem miliaria complectitur, intra dies quinque aut paullo amplius absolvere potuit. Qui dies, concludit ille, cum reliquis in unum collecti dierum sexdecim summam conficiunt.

Haud valde dissimili modo Cl. Valsechius in egregio opere, quod post hæc scripta in lucem edidit, hæc eadem cap. XIII. persequutus quindecim dierum spatium computat, professus inter cetera in re hac distantiam solam rationemque itineris spectandam esse. Ita uterque omnia illa nulla interposita mora, & cunctatione fuisse suscepta & confecta arbitrat. Quod sane mirum atque incredibile videri posset omnibus, qui norunt, quanta, & quam magna, atque ardua ad bellum, in quo de summa Imperii agebatur, peragendum debuerint esse necessaria. Sed præter hæc, historiæ quoque ipsius veritas ex Herodiano & Dione majora temporum intervalla videtur exposcere. Quod nunc non uno argumento ostendere aggredior.

Et primo, quod Vignolius proposuit, non adsenferim, nuncium defectionis exercitus apud Emesam uno die 133. miliaria confecisse. Non enim satis est causæ, quamobrem ab exercitu hostili mitti debuerit *tabellarius* qui tanta ac fere incredibili celeritate ea perferret ad Macrinum, quæ potius celari intererat, ut interim firmarentur res ejus & subsidia quærentur. Demus ergo triduo confectum illud iter fuisse. Deinde verisimile non est, quod Vignolius & Valse-

chius sumunt, Macrinum post acceptum nuncium defectionis extemplo Julianum misisse ad eam compescendam. Herodianus lib. v. cap. 4. hæc narrat: *At Macrinus rem totam quasi puerilem contemnens, consuetamque obtinens animi alacritatem, domi sedens, unum e suis ducibus Julianum Præfectum Prætorio mittit, traditis copiis, quantæ ad rebelles expurgandos viderentur suffecturæ.* Qui cogitaverit Macrinum ita cunctabundum, non curantem, & rem totam veluti puerilem ac ludicram aspernantem, credatne unquam adeo sollicitum ac trepidum fuisse, ut ipso die, vel altero post nuncium acceptum dimiserit Julianum? Non ego id antea factum existimo, quam Macrinus exploratoribus missis, atque iteratis nunciis, edoctus, rem serio agi ab Elagabalo, sibi que verum imminere periculum, incuriam tandem atque oscitantiam exuerit. Quod certum videtur ex eo etiam, quod post discessum Juliani Apameam venit, ut tradit Dio pag. 902., ibique filium Imperatorem designavit, ac milites donis ac promissis delinivit. Cur non amplius Macrinus rem quasi puerilem contemnit, domique sedet securus, consuetam obtinens alacritatem? Nimirum postquam ab exploratoribus missis certior factus est discriminis sui, tunc veluti a somno experrectus mittit Julianum, Apameam venit, & milites sibi conciliare satagit. Ergo inter primum nuncium defectionis, & discessum Juliani non paucos dies intercessisse necesse est, quantum scilicet temporis novis nunciis atque exploratoribus recipiendis opus erat. Adde quod Macrino erant colligendi milites, qui huc illuc per castella Syriæ erant dispersi, ut paullo ante narraverat Dio pag. 901., & commeatus aliaque necessaria ad profectiorem comparanda. Quas ob causas expeditionem Juliani dilatam octo minimum dies non ambigo. Qui dies octo, duoque alii ultra unum, quem Vignolius dederat tabellario, additi ad summam sexdecim dierum, quos ille collegerat, sunt dies sex & viginti. Jam ergo consumtis diebus uno & viginti, qui intercurrunt inter diem XVI. Maii & VII. Junii, quinque adhuc supersunt dies.

Sed

Sed his plures aliis dies sunt adjiciendi. Nam primum falli videtur Cl. Vignolius; qui ex celeritate qua Elagabalus perrexerat contra Macrinum, arguit ejus profectiōem susceptam fuisse altero die post interitum Juliani. Nam Xiphilinus loquitur de celeritate qua iter a castris ad locum pugnae confectum est; non de subita & continenti post mortem Juliani profectiōe. *Contra hunc*, inquit, *Pseudantoninus tanta celeritate proficiscitur, ut difficile Macrinus in vico quodam Antiochenorum cum eo conflueret.* Nec etiam id ex Xiphilino deduci poterat; qui nec verbum quidem de Juliano facit: & quæ de ejus casu habemus, extant in Dionis fragmentis, & apud Herodianum. Non statim igitur ac decessit Julianus; profectus est Elagabalus adversus Macrinum; quod plane evincitur ex Herodiano, qui exposita nece Juliani, & receptione militum Macrini in castra Elagabali, adauctas fuisse ejus copias subdit, *transfugarum etiam magna vi PAULATIM QUOTIDIE se aggregante.* Quæ verba spatium temporis non modicum diesque designant.

Præterea Dio pag. 903. narrat Macrinum cognita cæde Juliani Apamea festinanter se contulisse Antiochiam; militesque Albinios ceterosque ab eo defecisse: quæ consonant cum Herodiano. Deinde statim subjicit Dio: *Quapropter jam cum aliis fiebant apparatus utrimque; tum in provincias & ad legiones nuntii, literæque mittebantur.* Si post necem Juliani, & reditum Macrini Antiochiam fiebant tum ab illo, tum ab Elagabalo apparatus, necesse est longum temporis spatium defluxisse inter ejusdem Juliani mortem, & profectiōem Elagabali, præliumque cum Macrino. Hoc vero longum temporis spatium junctum cum aliis xxvi. diebus, quos jam numeravimus, contineri cum nequeant inter diem xvi. Maii & vii. Junii, reliquum est, ut acclamatio Elagabali dici debeat facta die xvi. Martii.

Perfentit Cl. Valsechius vim hujus argumentationis, quam Pagius ad annum 218. num. viii. & ix. jam attigerat; quare in ea refellenda omnem operam collocavit. Etenim falsum esse ait, eos factos fuisse apparatus post cædem Julia-

ni & Macrini Apamea discessum. Nam etsi Dio post hæc ipsos apparatus, & missos utrinque nuncios & literas recenset, non ita tamen ea recenset, quasi tum primum fieri coepta sint, sed quæ utrinque jam fiebant: atque ut hoc confirmet, eundem Dionis locum ita ad verbum reddit: *Et hi quidem alia contra parabant, & contra mittebant in populos & in legiones nuncios & literas.* At non ego ex his verbis sic etiam redditus intelligo, cur ordo & series narrationis Dionis sit invertenda; & quod ille tradit factum post cædem Juliani, dici debeat factum ante ipsam: quo maximus gravissimo scriptori antichronismus imposeretur. Addit vir doctus verisimile videri, apparatus illos fieri coeptos ab Elagabalo statim ac salutaturs fuit Imperator; a Macrino vero, ubi primum illi eadem acclamationes innotuerunt: nam licet Macrinus initio rem quasi puerilem contemserit; attamen uti post Juliani discessum sibi milites & populum conciliare studuit, ita potuit etiam tunc subsidia alia sibi comparare. Quod spectat ad Elagabalum, quos apparatus ille fecerit statim ab sui acclamatione, docet Herodianus lib. v. cap. 3. in fine. *Tum, inquit loquens de militibus Elagabali, commeatu omni simul cum suis natis, & conjugibus, ceterisque adeo rebus importatis, quas in vicis agrisque propinquis habebant, ita se intus comparabant, ut, etiamsi opus foret, castrorum obsidionem reciperent.* Nihil aliud ergo initio studuit Elagabalus, quam ut se ad sustinendam Macrini aggressionem disponeret; neque de castris egredi atque adversus illum proficisci cogitabat. Macrinus autem Apameæ quidem milites & populum continere in officio quæsit; Sed sibi satis esse virium ad compescendam seditionem ratus, externa auxilia neglexit. Cum vero Julianum cæsum, partemque exercitus amissam cognovit, tum demum ad alia sibi comparanda subsidia animum adjecit, & missis nunciis ac literis provincias & legiones sollicitavit. Si quis porro perpenderit, quæ Dio narrat accidisse post literas & nuncios utrinque missos, quæ ego, ne longior sim, prætermitto, facile intelliget, quodnam temporis spatium res tantæ ac variæ sibi postulaverint.

Postre-

Postremum argumentum illudque inter alia minime neglegendum, hoc est. Refert Dio, ut ante memini, Macrinum audita cæde Juliani Antiochiam rediisse, *atque ita*, subdit, *tum milites Albini, & ceteri, qui locis iis HIBERNABANT, ab eo defecerunt.* Tunc ergo ea anni tempestas esse debuit, qua milites adhuc in hibernis manebant. At milites hibernis expletis, si quietæ res essent, & bellum non immineret, in æstiva proficiscebantur. Nam castra hiberna ab æstivis diversa erant cum re tum appellatione. Suetonius de Druso Claudio Imperatoris in hujus vita cap. I. *supremum*, inquit, *diem morbo obiit in castris AESTIVIS.* Verum Dio lib. LV. sub initium de eadem Drusi morte loquens, scribit, ejus corpus fuisse a Centurionibus & Tribunis delatum *usque ad hiberna*: nempe ab æstivis, in quibus ex Suetonio decesserat, ad castra quæ hieme superiore tenuerant. Alia hinc fuisse castra hiberna apparet, alia æstiva. Ad hæc vero deducebatur exercitus cum pax esset & quies. Livius lib. VII. c. 39. *Consul*, inquit, *educto in AESTIVA milite, dum quieros Samnites habebat, exercitum purgare missionibus instituit.* Et paullo post: *Quidam in commeatus mittebantur . . . quia procul ab domo ac rebus suis HIBERNASSENT.* Ab his scilicet hibernis in æstiva deduxerat Consul. Demum Valerianus Imper. apertius distinxit in ea Epistola, quam ad Aurelium scripsit apud Vopiscum in hujus vita cap. XI. *Tuum*, ait, *est pro virtutibus tuis, atque solertia illic HIEMALIA & AESTIVA disponere.* Quo igitur tempore cæsus est Julianus, nondum erat æstas, quia Dio scripsisset milites Macrini fuisse in æstivis; dum quietæ res erant ab externo bello. Proinde ejus mors non potuit accidere sub initium Junii, quo ducit calculus coeptus cum viris doctis a die XVI. Maji; quia Junio mense jam inchoata est æstas. Cum ergo Dio tradat in hibernis fuisse milites, cum Julianus interiit, acclamatio Elagabali omnino facta est die XVI. Martii, unde mors ipsius Juliani deducitur ad exordium Aprilis, quo tempore milites esse poterant in hibernis.

Demum Cl. Vignolius falsitatem nostræ opinionis ex eo

con-

confirmari ait, quod Dio pag. 901. scribat per idem tempus, quo exercitus Phœniciz a Macrino secessionem fecit, & Elagabalum Imperatorem salutavit, inter alia Solis Eclipsin, tanquam triste ejus seditionis nuncium accidisse: *At mihi*, inquit Dio, *sane videtur, si quid aliud unquam, hoc quoque denunciatum fuisse signis evidentissimis. Nam & Solis defectus iis diebus insignis accidit.* Cum vero, subdit Vignolius ex tabulis Astronomicis ad meridianum Romæ initis constet solem defecisse eo anno 218. die duodecima Aprilis, hora quinta cum scrupulis 42. post meridiem; abunde certum sit, milites non mense Martio, sed Majo rebellasse, quia hæc Eclipsis non Martium proxime antecessit, sed Majum. Fatetur tamen Eclipsin ipsam toti Europæ non fuisse conspicuam; adeo ut a Dione, qui tunc Pergami agebat, conspici non potuerit. Quare alio se vertit, & sufficere ait, illam ab ejus temporis mathematicis indicatam; unde patere Dioni potuit vere contigisse, ac luminarium saltem contactum in aliqua orbis Romani parte spectatum esse. At frustra est hujusmodi perfugium; nam mathematici indicassent etiam Dioni, nulla mala & calamitates portendere posse Imperio Romano illam Eclipsin, quæ videri non poterat; quod scirent ex eorum principe Ptolemæo in Quadripartito, seu de Judiciis lib. 11. cap. 5. in fine, eventus tantum ad eas regiones pertinere, in quibus deliquium supra terram apparuerit. Minimè autem contactus in nulla ab Astronomis ratione habetur. Proinde sicuti tunc hæc Eclipsis Imperio Romano nocere non potuit; ita nunc nobis atque opinioni nostræ nihil admodum nocet.

Dio itaque de hac Eclipsi, quam non vidit, quamque ideo sciebat nihil mali portendere posse, loquutus non est; sed utique de altera quam ipsemet Vignolius testatur accidisse eodem anno die sexta Octobris horis duabus ante meridiem. Cum enim illa quam memorat Dio, *insignis* ab eo vocetur, uti nequaquam aptari potest Eclipsi diei 12. Aprilis, quæ nulla fuit, quia non conspicua; sic mirifice congruit huic secundæ diei sextæ Octobris, in qua, ut tradit vir doctus, Sol

toto fere lumine suo caruit. Præterea *gravem perturbationem* sibi attulisse ait Dio signa evidentissima, quæ refert in verbis mox recitandis, inter quæ signa recenset etiam defectum Solis. Non illa igitur Eclipsis diei 12. Aprilis ea est, de qua loquitur Dio, quia ab ea perturbari non potuit, quam non vidit; sed altera diei sextæ Octobris, a qua maxime perturbari potuit, quia totum fere lumen Solis abstulit. Nihil vero obstat, si dicatur hoc deliquium portendere non potuisse secessionem exercitus Macrini, & acclamationem Elagabali; propterea quod postea mense Octobri celebratum fuit. Nam neque hos solos casus denunciatos fuisse, neque ab Eclipsi sola, perspicue tradit Dio. Narrat ille primum, Syriacos milites mutuis armis concidisse; loco movisse Imperatorem suum Macrinum, & alium talem substituisse, quo rerum potiente nihil non scelerate turpiterque gestum fuit. Statim vero subjicit: *Ac mihi sane videtur, si quid aliud unquam, hoc quoque denunciatum fuisse signis evidentissimis*; nimirum signa hæc non solum denunciarunt casum Macrini, & acclamationem Elagabali; verum etiam totum ipsius Elagabali nefandum Imperium. Nam, sequitur Dio, & *Solis defectus iis diebus insignis accidit, & Sidus comatum diu conspectum fuit, aliudque Sidus quoddam ab occidente versus ortum multis noctibus caudam porrigens, adeo gravem nobis perturbationem attulit, ut illud Homeri semper in ore haberemus*:

Jupiter intonuit, Clangor calum occupat ingens.

Hæc igitur signa omnia si congrue distribuuntur, quædam eorum accidere potuerunt per idem tempus, quo facta fuit acclamatio Elagabali, & prælium cum Macrino, & mala hæc denunciare; at Solis defectus, qui postea mense Octobri commissus est, portendere potuit pessimum Elagabali Imperium, sub quo nihil non scelerate turpiterque gestum fuit. Quod vero ait Solis defectum *iis diebus* accidisse, præterquam quod latiori significatione ad longum temporis spatium extendi potest, reliqua etiam signa, quæ non simul & uno eodemque tem-

tempore evenisse credibile est, comprehendit. Denique cum duos solis defectus intra paucos menses habeamus, unum Dionii non visum, alterum visum; nemo hoc sibi persuaserit ab eo potius non visum, quam visum memoratum fuisse. Sed redeundum est ad Cl. Valsechium, qui plura adhuc & gravissima mihi opponit, tum in eodem capite XIII. tum toto sequente XIV. quæ sepositis interim Cl. Vignolii rebus, peculiari capite sunt expedienda.



C A P U T VII.

Sententia de initio Imperii Elagabali auctoritate Græcorum Scriptorum firmata, opponitur. Verbum græcum ἡγεῖρα quid significet. Auctoritas Nicephori Callisti, ubi scribit Macrinum neque ad annum perseverasse, iterum ab Auctore asseritur, & explicatur. Nummi Ægyptii Annia Faustina & Aquilia Severa L. E. anno quinto Imperii Elagabali obsignati; item Galba, Hadriani, L. Veri, & Otacilia interpretati a Valsechio. Rejicitur. Prior explicatio defenditur, & obfirmatur. Eorundem Augustorum initia in hisce nummis, deducta non sunt more Romano a die natali Imperii. Aliæ oppositæ difficultates perpenduntur, & rejiciuntur. Allati nummi Ægyptii carent vitiis, quæ inveniuntur in nummis Nervæ & Volustiani. Hinc iterum falsum Ægyptios numerasse annos Principum a die eorum inaugurationis. Nulla ratio facilior ad hos nummos explicandos est ea, quam Pagius & Auctor deduxerant ex Canone Ptolemæi. Quæ contra disputat Valsechius expenduntur, & improbantur. Non est incredibile Ægyptios Astronomos eundem morem signandi annos Principum, etiam ad popularem usum traduxisse. Pagius defenditur. Hinc recte ex sententia Auctoris explicantur nummi Ægyptiaci Annia Faustina & Aquilia Severa inscripti anno V. Imperii Elagabali. Item Conjugia earum Augustarum rite fuerunt disposita. Proinde nihil obstant objecta sententiæ de capto

- capto Elagabali Imperio ex ante diem XVI. Martii an. 218.
 Explicatio numismatum ejusdem Imperatoris cum TR. P.
 V. magis fulcitur.

UT ostenderem, coeptum Imperium Elagabali a die XVI. Martii an. 218. Auctores Græcos in *Addendis* pag. 194. advocaveram, qui quatuor annos eum regnasse tradiderunt. Cl. Valsechius annos hos esse plenos & integros, quos passim usurpant Scriptores Græci in numerandis annis Principum, contendit: de quo haud valde disputo. Solidius illud videtur, quod subdidi, Nicephorum Callistum lib. v. histor. Ecclæs. cap. 17. scripsisse, Macrinum cum NEQUE AD ANNUM perseverasset, ὃς ἔδ' ἐπ' ἐνιαυτὸν διαγεγὼνός, alteri Antonino Imperium reliquisse. Cum autem Macrinus Imperium acceperit die undecima mensis Aprilis ann. 217. si neque ad annum perduravit, regnum ejus fuit numeratum usque ad acclamationem Elagabali factam die XVI. Martii ann. 218. Quod opponit primo Cl. Vir, non valde nocet, quamvis enim verbum græcum διαγεγὼναι, a quo est διαγεγὼνός, quo usus est Nicephorus, aliquando significet, *persevero in vita*, aliquando etiam denotat tantum, *persevero, duro*; ut docent Lexicographi, ad quos provocat Valsechius. Deinde quærit, undenam Nicephorus acceperit, Macrinum *neque ad annum* regnasse; cum nemo ex veteribus Scriptoribus id tradiderit? Ego hoc haud scio: sed scio equidem, compluribus antiquis Scriptoribus nos carere, a quibus id accepisse potuit Nicephorus. Demum confert hunc locum Nicephori, in quo Macrinum *neque ad annum* perdurasse scribit, cum altero in libro eodem v. cap. 25. ubi omissa illa particula ἔδ' *neque*, hæc verba habet: *Hic vero cum AD ANNUM VIXISSET πέποιδ' ἐπ' ἐνιαυτὸν διαγεγονένου, alius Antoninus qui Heliogabalus vocatus est, Romanorum Imperium suscepit*. Fatetur autem a librariis facilius potuisse omitti in hoc secundo loco particulam ἔδ', *neque*, quam fuisse adjectam in primo. Quam ingenuam ejus confessionem uti libenter amplectimur, non ita admittimus quod statim subdit, primum tamen omnino

contigisse, videlicet, fuisse eam particulam additam a librariis in primo loco Nicephori. Hoc ex eo probari posse putat, quod Nicephorus ut plurimum sequutus est Eusebium, qui unum annum Macrino tribuit. At quamvis Nicephorus *ut plurimum*, quod ipse etiam vidit, Eusebio addictus sit, non tamen in annis Imperatorum computandis illi semper adhereret. Exemplo sit Tiberius cui Nicephorus duos & viginti annos cum dimidio, Eusebius autem duos circiter & viginti consignat; ac Titus, quem ille regnasse scribit annos duos, hic annos duos totidemque menses. Quis vero non etiam in Macrino Nicephorum discessisse ab Eusebio pignore oblato spondere veller? De Librariis autem, quod vir doctus fassus est, dubitari nequit, quin facilius vocem aliquam omittant, quam sponte sua addant: illud enim oscitationis, hoc maximæ est audaciæ. Ceterum ut librariorum a mendii suspitione, & Nicephorum ab inconstantia culpa liberemus, non alienum fortassis a veritate erit, si in primo loco dixerimus Nicephorum loquutum fuisse de solo Imperio Macrini, quod computatum usque ad acclamationem Elagabali *neque ad annum* perduravit; in secundo de vita simul cum Imperio, in qua *ad annum* perseveraverit.

Sed maximus ille obex est amovendus, quem Cl. Valsechius in fine ejusdem cap. XIII. tantum ostendit; in sequente autem ingenti eruditionis ac doctrinæ apparatu latissime diffundit. Cum ego, ut in superioribus dictum est, in prima dissertatione mortem Elagabali adscripserim diei decimæ Mensis Martii anni 222. in quo a Cl. Viro non dissentio; ac in *Addendis* Tribuniciam Potestatem v. instaurandam die XVI. ejusdem Mensis proposuerim; ait ille, licet quoquo modo per hanc conjecturam explicari possint nummi Elagabali eadem Pot. Tribunicia v. inscripti, nullo tamen modo explicari posse nummos Ægyptios Annæ Faustinae & Aquilæ Severæ L. E. *anno quinto* Imperii ipsius Elagabali obstrictos.

Refert Xiphilinus ex Dione Elagabalum primo duxisse in matrimonium Corneliam Paullam, & hac repudiata, junxisse

xisse sibi Aquiliam Severam; deinde tertiam, quæ fuit Annia Faustina; & post eam aliam & aliam, & demum iterum ad Aquiliam rediisse. Recitatis verbis Xiphilini, doctus vir accurate exponit modum, quo ego in priore dissertatione hæc matrimonia collocaveram. Siquidem me amplexum fuisse, ait, opinionem eorum, qui docuere Alexandrinos annos Imperatorum non a die natali eorum Imperii, ut Romanis mos erat, sed a Neomenia Thoth fixi, hoc est a die XXIX. Augusti, numerasse: ita nimirum ut si quis ante eam diem salutatus fuisset Imperator, nummi ei percussi fuerint cum anno primo usque ad dictam diem XXIX. Augusti; exinde vero cum anno secundo, & sic de aliis. Hac ratione cum Pagio ad an. 69. num. III. me explicasse, subdit, nummos Galbæ Hadriani, L. Veri, & Otaciliæ, de quibus postea; atque juxta hanc doctrinam explicasse etiam, quod ad præsentem rem attinet, annum v. Elagabali in nummis Annæ Faustinae & Aquiliæ Severæ notatum, atque alia conjugia post ipsum annum v. jam initum celebrata.

Ut vero hanc Pagii, & nostram opinionem refellat, hoc præcipuum sibi sumit, tanquam verum atque indubitatum fundamentum, Ægyptios numerasse annos Principum a die eorum Imperii natali, non secus ac Romani numerabant; atque hac ipsa ratione computatos esse annos Imperatorum cum in nummis indicatis Galbæ, Hadriani, L. Veri, atque Otaciliæ, tum etiam in nummis Annæ Faustinae & Severæ. Proinde cum sint nummi harum Augustarum v. Imperii Elagabali anno insigniti, revocari amplius in dubium non posse ait, quin Elagabalus *quintum* annum Imperii revera iniecit, ac post eum initum Anniam Faustina repudiaverit, & duo alia matrimonia contraxerit, ac demum ad Aquiliam redierit. Hæc vero, subjicit, nullo modo explicari queunt secundum meam opinionem: nam si Elagabalus decessit ante initam diem XVI. Martii Trib. Potestatem v. nullus remanet locus, quo collocari possint duo illa matrimonia post repudium Faustinae contracta, ac postremum cum Aquilia Se-

vera; quæ, ut nummi illi Ægyptiaci ostendunt, celebrata sunt post inchoatum quintum Imperii annum.

Recte hæc quidem, si solidum esset ac firmum primum illud fundamentum, quo ea innituntur, in nummis scilicet Ægyptiacis, quos retulimus, annos numeratos esse more Romano a die eorum Principum *natali*, quibus nummi sunt percussi. Sed cum hoc nec verum sit, nec probatum, nummis ipsis manifeste repugnantibus, & viri docti objectiones corruunt, & nostra opinio magis magisque obfirmatur. Sæpius ille dixit, in nummis Ægyptiis Annæ Faustinae, & Aquilæ Severæ, de quibus est quæstio, notatos esse annos Imperii Elagabali; ac proinde anni quoque signati in nummis Augustorum, quos ante memoravi, erunt anni eorundem Imperii. Hi vero nummi sex sunt Galbæ cum nota L. B. *anno secundo* ejus Imperii, quinque Hadriani cum L. KB. *anno xxii.* unus L. Veri cum ΔΕΚΑΤΟY. *anno decimo*, & alter Otaciliæ uxoris Philippi cum L. Z. *anno septimo*: quos retuli & explicavi in priore dissertatione Cap. III. Nihil est certius, quam neminem ex his Augustis attigisse eum annum, qui in iisdem nummis notatur: hocque Cl. Valsechius non negat. Nihil proinde esse certius potest, quam eorundem Augustorum initia non esse deducta a die eorum inaugurationis, seu a *natali Imperii*.

Hoc tamen nihil referre ait vir doctus; nam hæc est ipsamet difficultas quæ ex ipsis nummis profisciscitur; quæque reperitur etiam in aliquot Latinis & Græcis, qui tamen eo modo quo nos explicamus Ægyptios, expediri nequeunt. Quare, postea subjicit, ut Romani annos Imperatorum a die Imperii eorum *natali* certo numerabant; idem quoque de Ægyptiis dicendum, donec ratio aliqua quæ contrarium suadeat producat. Ego vero rationem quæ contrarium suadeat, imo evincat, in promptu habeo; & nummi ipsi Ægyptiaci eam perspicuis notis impressam unicuique ob oculos ponunt. Galba inchoavit Imperium vel in Hispania die 2. Aprilis A. C. 68. cum salutatus fuit Imperator a militibus, vel die nona Julii post excessum Neronis, obiit vero die 15.

Janua-

Januarii anni insequentis 69. Annus primus coeptus ab acclamatione definebat secundum Romanorum morem, & inibat secundus die 2. Aprilis ann. 69. duobus mensibus cum dimidio post necem Galbæ. Cum ergo Ægyptii notaverint in nummis annum secundum, non computarunt Imperium Galbæ more Romano a die ejus natali. Hoc ipsum fit in ceteris nummis Hadriani, L. Veri, & Otaciliæ, ut exposui in eodem cap. III. Verum ajebat Valsechius, hæc ipsa ea est difficultas, quæ ex ipsis nummis proficiscitur. Imo nulla adest difficultas; & nihil clarius & luculentius esse potest, quam in hisce nummis annos Principum non esse deductos, ut mos erat Romanis, a die eorum *Imperii natali*. At subdit ille, nummos habemus Nervæ cum TR. P. III. & Volusiani cum TR. P. IIII. in quibus pariter plures anni notantur, quam Imperatores illi regnaverint; nec tamen inferri licet, ipsos annos more nostro Ægyptiaco fuisse numeratos. Rem hanc non sollicitabo, contentus responsione Pagii, qui ad ann. 103. num. VII. nummos hos, atque alios Latinos, in quibus anni Tribunicie Potestatis annos Imperii excedunt, aut mendose descriptos esse, aut a monetariis in iis cudendis erratum, aut annos unius Imperatoris alteri attributos. Nemo ullum ex his vitiis, nec ipse Cl. Valsechius, nostris Ægyptiacis nummis affixerit; cum tot sint numero, & tam certæ ac legitimæ notæ. De Græcis consulendus idem Pagius eodem loco; dummodo cum his non confundantur Ægyptiaci, ut fecit V. C. qua de re postea.

Verum igitur non est, nec probatum, quod nobis toties inculcat Cl. Valsechius, Ægyptios numerasse in nummis suis annos Principum eadem ratione ac numerabant Romani, a die eorum *inaugurationis*. Quapropter alio modo sunt explicandi ac numerandi anni Principum in nummis Ægyptiacis obsignati. Nullus vero modus facilius ac magis obvius occurrit, quam qui a Pagio allatus est, atque a nobis paullo ante, uberius vero in priore dissertatione explicatus.

Porro hanc rationem ac modum computandi annos Principum in nummis Ægyptiacis idem Pagius ad ann. 69. numer.

mer. III. deduxerat ex Canone Ptolemæi, in quo anni Regum non a *vero die* eorum *natali*, sed a Thoth vago numerantur. Ut hoc ejus argumentum refellat, Cl. Valsechius longiore ac doctissima disputatione primum ostendit, Canone illum pro usibus Astronomicis fuisse concinnatum, atque ut numerandi annos Principum ratio ubique constans ac certa esset, debuisse annos omnes ab uno eodemque exordio procedere. Deinde postquam docuit eundem modum servasse Ptolemæum etiam in *Almagesto*, extricatisque summo labore atque accuratione gravissimis difficultatibus, quæ in annis Hadriani occurrunt, tandem concludit, Ptolemæi atque aliorum Astronomorum rationem putandi annos Principum a Thoth vago eorum *inaugurationem* antecedente, non esse trahendam ad popularem Alexandrinorum annos Principum numerandi, aut in nummis signandi rationem. At quacunque ex causa a Ptolemæo atque ab aliis Astronomis hoc factum fuerit, quandoquidem ita factum fuit, non videtur incredibile, Alexandrinos, apud quos Astronomi illi morem hunc induxerant, eundem morem ad populares usus traduxisse. Si enim indubitatum ex jam dictis est, annos Principum in nummis Ægyptiacis non esse numeratos secundum Romanorum consuetudinem ab eorundem Principum natali die, utique ab alio cardine numerati sunt. Quod si habemus hunc cardinem apud Astronomos fuisse Thoth vagum, quid vetat suspicari, hunc ipsum etiam in usu civili fuisse Thoth fixum, seu diem *xxix. Augusti*, a quo ratio numerandi annos Principum in moneta fuerit deducta? Nihil vero refert, si dicamus, coeptos fuisse annos eosdem sive a Thoth fixo antecedente, sive annum primum appellatum fuisse spatium illud temporis, quod intercedit inter diem inaugurationis eorundem Principum & diem *xxix. Augusti*, & secundum annum ab hac die inchoatum, & sic de aliis; uti ex sententia Pagii in priore dissertatione firmavimus: utrumque enim in idem redit.

Poterat vero prætermitti, non uno in loco Pagium opinionem hanc suam abdicasse. Nam in priore loco, qui obijci-

tur,

tur, Pagius aperte loquitur de nummis tantummodo Græcis, & Valsechius sua sponte, eoque invito, iisdem accenset Ægyptios. In secundo, explicat quidem nummos Hadriani alio modo, qui tunc obvius illi erat, sed priorem non reputat. In tertio & quarto, non opus erat adhibere modum Ægyptiacum; propterea quod anni expressi in nummis ejusdem Hadriani & Maximini non excedunt annos eorum Imperii. Demum quis credat, doctissimum Chronologum, qui ad annum 69. hanc opinionem, uti *jure ac merito* ab aliis propositam, consulto suam facit & defendit, eam postea adeo leviter atque inconstanter deseruisse? quæ opinio si nihilominus Cl. Viro displicet, proferat ille, qui adeo in Chronologicis Ægyptiorum doctrinis versatus est, aptiorem ac meliorem explicandi hos nummos rationem; dummodo Romanam illam toties explosam nobis iterum non obtrudat.

Jam vero, dum potiora expectamus, non veremur explicare nummos Ægyptiacos Annæ Faustine & Aquilæ Severæ inscriptos anno V. Imperii Elagabali, eo modo quo in priore dissertatione cap. III. factum est; & earum conjugia ita aptissime disponere, ut si Elagabalus consalutatus fuit Imperator die XVI. Martii A. C. 218., quemadmodum in superioribus dictum est, annus ejus primus secundum morem Ægyptiorum desierit die XXIX. Augusti ejusdem anni, & quintus cœperit eodem die anni 221.; a quo tempore, cum deinde Elagabalus vixisset usque ad mensem Martium anni 222., recte potuit intra id sex mensium spatium Anniam Faustina dimittere, duas alias uxores sibi adsciscere, & demum ad Aquiliam Severam redire. Ita collocatis hisce Matrimoniis, non obstant amplius objectiones Cl. Valsechii, & sententia nostra de cœpto Elagabali Imperio ex ante diem XVI. Martii ann. 218. unde quaque solidis atque idoneis conjecturis obfirmata, explicationem numismatum Elagabali cum TR. P. V. ab omnibus incommodis vindicatam tutissimo in loco ponit. Nunc Valsechio expedito ad Vignolium redeamus.

CAPUT VIII.

Nummos Elagabali TR. P. V. quando potuerint signari; & in commercium transfere. Ratio, qua negat Vignolius extare nummos, qui anni notam præferant, quem Imperator, cujus est nummus, non attigit, contra ipsum probat. Hanc deducit ex nummis Septimii Severi. Nec Pagii sententia probatur. Nuncii mortis Severi potuerunt Romam pervenire ante ingressum ejusdem Trib. Potestatis XIX. In viis publicis Rom. Imperiis ubique aderant Cursores. Cur cum Pagio affirmet, sero Senatum cognovisse mortem Severi. Aliud argumentum de Vespasiano nihil probat. Exemplum Domitiani & Antonini Pii incerta. Falsum est in nummis horum Imperatorum nullum spectari Sacrificium, aut Processum Consularem, sicuti in omnibus nummis Elagabali TR. P. V. inscriptis. Causa declaratur. Quinquennialia Processu & Sacrificiis agi consueverunt ipso satente Vignolio. Hinc non alio die quam XVI. Martii ann. 222. fuerunt percussi illi nummi Elagabali. Ejus acclamatio retrocedendo redit in diem XVI. Martii ann. 218., ut & initium Trib. Pot. & Imperii. Et hinc nulla facilior ratio explicandi nummos eosdem TRIB. P. V. insignitos.

SI verum est, quemadmodum verum esse posse satis dixi capite superiore, Phoeniciæ milites die XVI. Martii anni Chr. 218. Elagabalum Imperatorem salutasse, illumque eodem mense ann. 222. trucidatum fuisse, ut ex annis ejus Imperii a Dione consignatis cum in prima, tum in hac Dissertatione collegi; nummos qui annum quintum, seu Tribuniciam ejus Potestatem quintam præferunt paucis diebus antequam illam iniret, percussos esse, ut die ipsius natali XVI. Martii spargerentur in populum, quamquam Vignolius initio hujus capituli negat, futurum tamen aliquem qui non negaverit, fatetur. Neminem autem fore putat, qui

qui hoc admiserit, eodem Elagabalo mortuo hanc monetam eum anno, ad quem non pervenerat, signatam, Magistratus Romanos, ut ex officinis prodiret in publicum maxime ob commune in eum odium, permisisse. At qui concesserit, quod ab omnibus concessum iri non dubito, potuisse signari nummos Elagabali cum Trib. Potestate v. paucis ante diebus quam eam initurus erat, nisi morte fuisset prædeditus; nescio, cur ille ipse concessurus non sit, data etiam qua velis diligentia Romanorum Magistratuum in suppressendis ejus nummis, potuisse aliquos saltem ex ipsis nummis eorundem industriam effugere, & in commercium hominum transire. At si credibile non est, Magistratus propter odium in Elagabalum non permisisse nummos educi, falsa est Inscriptio Serapidis, de qua ante loquuti sumus; quia ob eandem causam minus credibile est, eosdem Magistratus ab ea non erasisse nefariam Elagabali memoriam, & nomen. Quod vero mali hoc est, ut in publicum prodeant etiam pessimi Imperatoris numismata?

At V. C. cum negat extare nummos, qui anni notam præferant, quem Imperator cujus est nummus, non attigit, exemplo ipso, quod ultro exhibet, atque ego jam proferre paraveram, sese conficit. Nam nummos Septimii Severi, quos ei, die IV. Februarii Trib. Potestate XVIII. decurrente jam in Britannia defuncto, Senatus Romanus Trib. Potestate XIX. inscripsit, nequicquam excusare nititur, propterea quod Senatus ipse *sero* de illius morte certior factus fuerat; nempe postquam coepta jam esset eadem Trib. Potestas XIX., & primis post eam initam diebus nummi ipsi sculpti fuissent cum ejusdem anni caractere, ut paullo postea declarat. Præiverat huic opinioni Pagius ad ann. 212., monetariis ignorationem excessus Septimii tribuens: ita ut nummos hos percusserint, postquam novæ illius Potestatis dies advenisset. Vellem, docuisset nos Cl. Vignolius, qua de causa tam *sero* Senatus Romanus obitum Septimii perceperit: nam me plane ea fugit. Non enim verum esse potest, quod ait Pagius, Severi mortem aliquandiu

celatam fuisse; quia non solum, ut ipsemet fatetur, nullus Historicus id tradidit, sed etiam Herodianus & Dio aperte repugnant. Primus lib. III. cap. 15. narrat, Caracallam mortuo Severo patre summam potestatem nactum, *confestim* multos occidisse: alter pag. 868. corpus ejus militari more elatum a militibus fuisse impositum rogo. Romam vero nuncios extemplo convolasse, quis potest ambigere?

Sed neque Senatus ideo cognovit *sero* interitum Septimii, quod nuncii non potuerint Romam pervenire ante ingressum Trib. Potestatis XIX. Nam a die IV. Februarii ad diem XIII. Aprilis, a quo die post Pagium Clarissimus vir in diagrammate imperatorum pag. 84. deducit Trib. Potestatem Severi, cum ceteroquin alii eam exordiantur a Kalendis, vel a die altera Junii, intercedunt menses duo, & dies octo. Porro quamvis sit nostro divisa Britannia mundo, non illa tamen ultra Sauromatas, & Oceanum glaciale sita est, ut ignorare possimus, quanto locorum intervallo, & quot dierum itinere disjuncta sit ab Urbe. Tabellarius ille, qui Emesa Antiochiam uno die 133. milliaria emensus est, facile decem diebus Romam attigisset. Singulis hebdomadis legimus literas novarum rerum, quæ Londino Venetias viginti plus minus diebus deportantur, inde vero Romam quatuor æstate, quinque hiberno tempore dies Tabellarii infumunt. Certe Romanis magis intererat Imperatoris sui obitus certiores fieri, quam nobis Reginæ Britanniae, cujus mortem intra idem temporis intervallum ante paucos percepimus menses. Quamvis autem apud veteres non esset statum illud literarum commercium institutum, quo nos hodie commodissimo utimur; attamen in viis publicis Romani Imperii ubique aderant cursores, qui mandata Principum, & cetera pro rerum occurrentium necessitate perferrent. Demus horum cursorum commoditati alterum tantum temporis spatium, quinquaginta videlicet dies, addamusque tres vel quatuor dies usque ad urbem Eboracensem, in qua decessit Septimius, adhuc supersunt quatuordecim dies, antequam inchoata esset Tribunicia Pot. XIX. die XIII. Aprilis mensis.

fis. Possset etiam putari hoc iter in Itinerario Antonini; sed a labore abstineo. Quid causæ igitur potuit esse, quomobrem docti viri affirmaverint, *fero* Senaturn cognovisse mortem Severi, & non ante, imo aliquot diebus post cœptam Trib. Potestatem XIX.; nisi quia aliter se expedire ab hac difficultate non poterant? Ergo certum manet, nummos Septimii cum Tribunicia Potestate XIX. percussos fuisse antea quam illa inchoata esset; & propterea hoc idem fieri potuisse in nummis Elagabali cum Potestate V. dubitari nequit.

Nondum tamen acquiescit V. C., sed Vespasianum, ait, obiisse diebus sex antequam undecimum imperii annum delibare potuisset; & tamen non inveniri nummos cum ejus Trib. Potestate XI. Verum, præterquam quod negativum, uti vocant, argumentum hoc est, nos non quærimus de nummis qui non extant; sed de his qui inter manus antiquariorum sunt, & qui rem ipsam, quam ille negat, loquuntur. Præterea profert exempla Domitiani, & Antonini Pii, quorum nummos aliquot contendit conflatos esse ipsis primis diebus, quibus annum novum inchoaverant; quod alter eorum obierit sex diebus postquam nova ejus Pot. Tribunicia iniverat, alter vero decem. Libenter quærerem, quis certo affirmare possit, eos nummos conflatos fuisse *post* initam Tribuniciam Potestatem, & non *antea*? Alterutrum enim si dixerimus, nemo poterit contrarium evincere. Ceterum cum negat in iis spectari Sacrificium ullum aut processum Consularem, qui illos diebus aliquot ante natalem imperii diem signatos fuisse designent, quod ego de nummis Elagabali dixeram; videtur non satis accurate Thesaurum numismatum Mediobarbi perlustrasse. Nam tres nummos ipsius Antonini Pii ille profert pag. 206. in quibus cum Trib. Potestate XXIV. figura visitur sacrificans, & alia signa sacrificium representantia.

Hinc illi argumento fit locus; quod in *Addendis* pag. 195. exposueram, quodque rem totam pene conficit. Omnes Elagabali nummi qui Tribunicia Potestate V. sunt inscripti;

in parte averſa vel Proceſſum Conſularem, vel Sacrificia præſeferunt. Cauſſa certe nulla alia eſſe poteſt, quam quia ad ſolemnitatem aliquam inſignioreſ pertinebant: quæ ſolemnitas in hiſce temporum articulis ſola hæc diei natalis Elagabali eſſe poterat. Adde, quod etiam Quinquennialia celebranda erant; quod eo die quintum Imperii annum Elagabalus auſpicabatur. Quæ proſecto Quinquennialia Proceſſu maxime, & Sacrificiis agi conſueviſſe, nemo eſt qui ignoret. Non rejicit, imo probat hoc argumentum Cl. Vignolius. Nam de nummis Domitiani, atque Antonini paullo ante memoratis hæc ſcribit: *In his tamen neque Sacrificium, neque Proceſſus Conſularis ullus viſitur, qui eos diebus aliquot ante natalem Imperii percuſſos fuiſſe designet: cujus indices a me obſervatum ſubdit, fuiſſe in nummis Elagabali Sacrificia, & Proceſſus Conſulares.* Quod cum referat, & ſine ulla objectione dimittat, probari a ſe manifeſte demonſtrat. Imo & probavit conceptis verbis mecumque nummum Elagabali a Pagio relatum cum Proceſſu Conſulari & Tribunicia Potestate v. ſpectare ad Proceſſum ipſo ejus natali die ineunte eadem Potestate quinta peractum declaravit in ſcripto ad me miſſo hoc modo: *ac proinde ad munus aliud poſt Kal. Januarias anni 222. ab Elagabalo celebratum, ipſo forſan Imperii ſui, ſeu Tribunicæ Potestatis v. natali die ſpectare omnino TECUM aſſerimus.*

Ut denique in unum colligam quæ dicta ſunt in hoc capite, atque in duobus antecedentibus, ſi nummi Elagabali cum Pot. Tribunicia v. ante ejus mortem percuſſi ſunt, ut *proximo die ejus natali*, quo inſtauranda erat eadem Trib. Potestas quinta, & *quintus Imperii annus* inchoandus, ſpargerentur in populum; non is dies ullus alius eſt, quam *decimus ſextus Martii an. 222.* qui *ſex tantum diebus* ejus obitum antecellit; quique retroactus ad diem eandem, xvi. Martii, an. 218. redit, quo die acclamatus eſt Imperator Elagabalus a militibus, & ſumtum initium Tribunicæ Potestatis, & Imperii. Hæc ergo uti perfacilis, ita etiam vera erit & germana ratio explicandi nummos eoſdem Trib. Potestate v. inſi-

infigritos: quæ difficultates, quæ objectæ sunt in hac nostra controversia; simul omnes exhauriuntur: Siquidem stant jam anni, menses, & dies Elagabali; quos Dio Cassius computat a pugna cum Macrino: stat ejus mors collata in diem decimam mensis Martii an. 222. stat inscriptio Canonis Hippolytei, quæ Alexandrum offert jam imperantem die XIII. Aprilis: & stat denique nummus a Vignolio productus cum TR. POT. II. COS. III. qui alteri opinioni nostræ de initio Imperii per anticipationem cœpto a Kal. Januariis maxime obstat, ut alibi dicitur.

C A P U T IX.

Quæ contra primam Auctoris & Pagii sententiam de anticipato Elagabali Imperio exaggerat tanta non sunt, ut propterea nunc ab illa fuisset recedendum. Cur in priore dissert. concesserit Auctor Cl. Valsechio Processum Consulare in nummo Elagabali cum TR. P. V. COS. IIII. non fuisse actum die prima Januarii an. 222. Verba & sensum Lampridii Vignolius non est assequutus. Explicantur. Verbum procedere plura significat. Lampridius iterum explicatus. Pagius defensio; & argumenta diluuntur contra sententiam de annis Elagabali per anticipationem numeratis. Ex Fastis Vossianis frustra argumentum contra Pagium detorquet. Quæ ratione sint explicandi. Omnes Fasti & Canones Graeci numerum plenum annorum Elagabali recensent. Pagius defenditur. Auctoritas nummi Carthusiani expenditur; item alterius ex Vaillantio cum TR. P. V. COS. IV. Hi duo nummi, & programma Canonis S. Hippolyti in prima Dissert. fuerunt in concordiam redacti. Hinc perperam auctor tamquam sibi contrarius notatur. Cl. Valsechius frustra immoratur expendendo argumenta de anticipatis annis Imperii Elagabali. Is contra hanc sententiam disputans facilius potest refelli. Perfugium ei nullum.

HÆc si ita sunt, & si hæcenus satis est probatum, exordium Imperii Elagabali petendum esse a die XVI. Martii anni 218. quo a militibus consalutatus est Imperator, res videri posset supervacanea de eo initio amplius disputare, quod ipse post Pagium in priore dissertatione cap. V. a Kalendis Januariis ejusdem anni per anticipationem deduxeram. Et quidem hanc opinionem jam tum in *Addendis* dimiseram, vel quia nummus Carthusianus a Cl. Vignolio prolatus eidem obstabat; vel quia altera de cœpto a die XVI. Martii Elagabali Imperio jam tum aptior ad difficultates omnes expediendas esse videbatur. At Cl. Vignolius non contentus eundem nummum opponere, cujus auctoritati jam concesseram, plura etiam adversus eandem opinionem, cum in hoc cap. VIII. tum in IX. XII. & XVII. accumulavit. Quæ quamvis a me prætermitti possent, ostendam tamen, ea tanti non esse, ut propterea, nisi aliæ suaderent causæ, a priore sententia esset mihi discedendum.

Et primum grave illud valde mihi est, in quo me peccasse statim ab initio hujus capituli VIII. contendit. In priore Dissertatione pag. 72. dederam Cl. Valsechio, Processum Consulare in nummo Elagabali cum TR. P. V. COS. IV. non fuisse actum die ipsa prima Januarii mensis A. C. 222. ut Pagius putaverat; propterea quod diserte tradat Lampridius cap. 15. Elagabalum Kalendis Januarii noluisse cum consobрино Alexandro procedere. Hoc tam facile concedi non posse ait vir clarissimus, si Lampridii *verba*, ejusque *orationis sensum* integrum spectemus. Verba ejus hæc sunt: *Denique Kal. Januariis, cum simul tunc designati essent Consules, noluit cum consobрино procedere. Ad extremum cum civia & mater dicerent, imminere milites adejus exitium, nisi concordiam viderent inter se consobrinorum, sumpta prætexta hora diei sexta PROCESSIT ad Senatum.* Igitur, inquit Vignolius, fero quamvis, ac sine collega, processit tamen: atque ideo quadrigas in nummo Elagabali a Senatu Romano exhibitas cum hoc titulo, P. M. TR. P. V. COS.

IIII. recte Pagius ad processum eundem consularem, nempe Kal. Januariis actum, referre poterat. Atqui vereor, ne ille potius *verba*, & *sensum orationis* Lampridii assequutus fuerit. Non enim animadvertit diversum Lampridii loquendi modum, & diversam hujus vocis *procedere* significationem. Cum scripsit de Elagabalo, *noluit cum consobrina PROCEDERE*, processum vere consularem, solemnem, & cum quadrigis designavit: at cum postea subdidit, *sumpta prætexta hora diei sexta PROCESSIT AD SENATUM*, nequaquam de processu eodem Consulari cum quadrigis intellexit. Hoc primum patet, quod Elagabalus *sumpta prætexta* processit: quæ vestis, ut omnes eruditi norunt, non est Consulium solemnium pompa in quadrigis procedentium. Id vero notavit consulto Lampridius, ut indicaret, Elagabalum privatim ivisse in Senatum ad capefendum Magistratum. Porro is etiam sensus est hujus verbi *procedere*, cum adjunctum habet locum ad quem procedendum est: tunc enim stat in propria ac naturali sua significatione, idemque valet ac *ire*, & *progredi*. Exemplum unum profero, quod de Consule est. Plinius in Panegyrico c. 65. de Trajano Consule ait: *jam torres PROCEDERE in Rostra, inascensumque illum superbiæ Principum locum terere* &c. Laudat Orator Trajanum quod sæpius iret in Rostra, ad quæ non accedebant priores Imperatores. Nimirum *Sæpius ibat in Rostra Trajanus*.

At cum *Processum* Consularem & Solemnem significat, nullo adjuncto effertur. Plura exempla videri poterunt apud Card. Norisium de nummo Diocletiani cap. 5. pag. 26. & 27. ubi, Consul *processit*, Consules *procedentes* &c. Ita etiam loquitur Justinianus Imp. in Novella 105. in qua sæpius fit mentio Processuum. Noluit ergo Elagabalus procedere solemniter in quadrigis; sed aviæ & matris monitu perrexit tamen ad Senatum privatim, ac sine ulla pompa ac solemnitate, & ne sumta quidem veste Consulium ineuntium Magistratum propria. Demum tantum abest, ut in quadrigis processerit, ut *Sella* perductus fuerit ad Senatum una cum avia Mæsa. Hæc habet Lampridius post verba recitata: *hora diei sexta*

sexta processit ad Senatum avia sua ad Senatum vocata, & ad SELLAM producta, imo, ut legit Salmasius, perducta, ab ipso nimirum Imperatore. Tandem ita certum est, Elagabalum non processisse more Consulum, ut neque alia fecerit post initum in Senatu Magistratum, quæ solemnibus fieri a Consulibus erant solita. Deinde, prosequitur Lampridius, in Capitolium ad vota concipienda, & perficienda solemnia ire noluit: omnia per Præfectum urbanum facta sunt, quasi Consules illic non essent.

Hæc vero Clarissimus Vignolius objectat Pagio, ejusque opinioni de numeratis annis Elagabali per anticipationem. Primum existimat non ideo cum Pagio argui recte posse, Tribun. Potestatem quintam tantum cum quarto Elagabali Consulatu concurrisse, quod nummus ejus, qui TR. P. IV. COS. IV. inscribatur, nondum aliquis apparuerit; contra vero nummos ejusdem Imperatoris TR. P. V. COS. IV. plures habeamus. At mihi certe hujusmodi argumentationem apud Pagium reperire non licuit. Ex nummo Vaillantii cum quadrigis TR. P. V. COS. IV. inscripto arguit quidem Pagius, Elagabalum primo die anni 222. numerasse annum quintum, atque hoc non aliam ob causam, quam quia Tribuniciam Potestatem per anticipationem capessebat; sed nusquam dicit, ex quo plures nummi extent cum eadem Trib. Potestate V. COS. IV. nullus vero cum Tr. Pot. IV. COS. IV. ideo deduci posse Tribuniciam Potestatem V. tantum cum quarto ejus Consulatu concurrisse. Quamobrem, cum hæc argumentatio Pagii non sit, frustra adversus eam videtur esse instructa ingens illa Tabula Chronologica, quam ab Augusto usque ad Alexandrum per Tribunicie Potestatis annos, & Consulatus dispositam a pag. 73. ad 88. vir doctus nobis exhibuit.

Quamquam Kalendis Januariis ann. 218. summa Imperii apud Macrinum erat, dixeram pag. 75. cum Pagio, potuisse tamen Elagabalum ab eodem cardine Tribunicie Potestatis, sui que Imperii exordia cepisse per anticipationem; quia occupaverat etiam initia Consulatus Macrini, perinde ac, si ante-

antequam esset Imperator, ab iisdem Kalendis annum Consul aperuisset. Opponit Cl. Vignolius in cap. IX. Elagabalum non ideo arripuisse Consulatum Macrini, ut præterita, quæ jam Macrini nomine signata erant, sed reliqua anni tempora non Macrini amplius, sed suo & Adventi nomine signarentur. Verum hoc quidem est; & sane præterita quæ jam sub Consulatu Macrini transferant, Elagabali esse non poterant. Sed neque præterita sub Imperio Macrini, quod ferre in idem recidit, sibi Elagabalus adscribere potuit; at potuit certe Imperii sui ac Tribunicia Potestatis initia ab eo etiam die, quo nondum erat Imperator, numerare, a Kal. nempe Januariis, sicuti vir Clarissimus pro certo habet, Herodianum numerasse ab iisdem Kalendis annos Imperatorum de quibus scribit, & S. Hippolytum annos Severi Alexandri, quæ de re in sequentibus. Ille porro fatetur tandem, potuisse Elagabalum hoc etiam stultitiæ suæ specimen edere, ut præter Senatus Romani morem annos suos non a die suscepti Imperii, sed a Kalendis Januariis repeteret, & paribus Consulatus ac Trib. Potestatis numeris in nummis monumetisque aliis ornatum se esse gestiret. At quando potuisse hoc fieri concedatur, nihil refert, si stulte ac leviter factum sit.

Hæc scripserat Cl. Vignolius in priori Dissertatione pag. 66. *Si Elagabalus a Kal. Januariis ann. 218. per ejusmodi anticipationem Tribunicia sua Pot. exordium sumfisset, Kalendis deinde Januariis ann. 222. quibus quartum Consulatum iniit, Alexandro Casare collega, certe non quartus, sed quintus, quæ Pagii opinio fuit, Imperii illius annus decurrere cæpisset.* At Kal. Januariis an. 222. decurrisset quintum annum Elagabali, falsum esse subdit, ex Fastis Græcis Vossianis, in quorum initio legitur: *Αντωνίνος τὸ δ' καὶ Ἀλέξανδρος, Antoninus IV. & Alexander*, scilicet Consules: δ', α', IV. & I. hoc est anno quarto Imperii Elagabali, & primo Alexandri. Ex hisce Fastis hoc elici negaveram ego pag. 100. ea ratione quam ibi exposui; sed ita sentiebam, ut non aliter hi characteres explicari debeant, quam eo anno Consulari alte-

rum ex Consulibus decessisse, cum quartum Imperii annum ageret, alterum eodem anno exorsum fuisse Imperium. Postquam mea hæc verba retulit V. Clarissimus, ita caput XVII. exorditur: Recte quidem: neque aliud characteribus istis d' à probare ipse volui, qui pag. 66. a me ita explicari fuisse videntur. At mihi longe aliter videntur fuisse explicati characteres illi pag. eadem 66. Probandum tunc sibi proposuerat vir doctus, ut in allatis verbis ex pag. 66. patet, initio anni 222. non quintum, ut Pagius voluit, sed quartum Elagabali annum decurrisset; quare in hanc sententiam adduxit Fastos Vossianos, in quorum initio legitur, anno IV. Elagabali. Hoc porro, quod nunc mecum sentit, Elagabalum videlicet ex Fastis Vossianis obiisse, dum quartum Imperii annum ageret, contra Pagium nihilominus detorquet. Si, inquit, Elagabalus cum quartum Imperii annum ageret, interfectus est; quo unquam modo potuit Pagius affirmare, eundem Elagabalum Kal. Januarii ejusdem anni jam præteritis quintum annum iniisse? Si hæc argumentatio adversus Pagium valeret, valeret quoque adversus Vignolium. Nam si ex Fastis Græcis deducitur, Elagabalum decessisse quarto Imperii sui anno, verum non est, quod V. C. contendit, eundem Augustum cœpisse numerare annum quintum post diem XVI. Maii ann. 222. & propterea falsi sunt nummi omnes, qui ejus Tribuniciam Pot. V. nobis offerunt. Quid igitur? Fasti Græci neque Pagium, neque Vignolium, neque nummos lædunt. Nam, ut alii quoque Fasti, & Canones Græci, ita Fasti Vossiani numerum plenum annorum Elagabali recensent.

Neque ab Julio Africano, qui Seleuco & Grato Consulibus, anno nempe 221. affigit annum tertium Elagabali, contra Pagium petenda erat auctoritas. Ille quippe, qui rerum veritatem, ut historicum decet, persequutus est, ficti & anticipati exordii rationem habere nullam debuit. Uti neque habuit Dio, qui non numeravit annos Elagabali a Kal. Januariis, sed a pugna cum Macrino. Non sic Senatus Ro-

ma-

manus, qui vel metu vel adulatione ingenium Imperatoris sui ac voluntatem in cudendis monetis coactus est sequi.

Ab hisce igitur objectionibus nec mihi, nec Pagio esset timendum; nisi nummus Carthusianus ad res turbandas accederet. Opposueram illi nummum alterum ex Vaillantio, in quo Elagabalus in quadrigis visitur cum Epigraphe: TR. P. V. COS. IV. rixamque inter eos exciveram, de qua in c. VI. prioris operis. At Cl. Vignolius cap. XII. de rixa hac agens, nummum Vaillantii comparandum nequaquam esse cum nummo Carthusiano contendit; quod istius numerici TR. P. II. COS. III. interprete non egeant, nummus vero Vaillantii cum quadrigis nequeat ad Processum actum Kal. Jan. anni 222. referri, nisi ego cum Pagio interpretes accesserim. Verum hoc quidem: sed addere debebat etiam S. Hippolytum auctoritatis non dubiæ interpretem, ex cujus Canonis programme evincitur, Processum illum non potuisse celebrari nisi ante mensem Martium ejusdem anni 222. Verum ea rixa in *Addendis* fuerat sublata, & duo illi nummi inter se, & cum S. Hippolyto in concordiam redacti; quod ego in aliam sententiam, de qua ante satis est dictum, descenderam. Propterea poterat V. C. in hanc solam incumbere, & ea verba transmittere, quæ in fine ejusdem c. XII. scribit, se videlicet *adsequi non posse, qua ego ratione ductus modo unius, modo alterius ex Pagii divinationibus, quæ tam manifeste inter se pugnant, adsertor ac propugnator fuerim*. Nimirum si rationem scire cupiebat, se ipsum consulere poterat, qui in hoc opere suo abdicatis prioribus opinionibus non semel in contrarias transgressus est, ut capite insequente, atque alibi apparebit. Quid vero de Cl. Valsechio, qui toto cap. XII. postremi sui Operis adversus hanc Pagii opinionem latissime disputat? Ille quidem ingeniose & docte mea omnia argumenta expendit, quæ si vellem singulatim repellere; longissimus mihi esset contentionis funis texendus, & quidem nullo operæ pretio atque utilitate, cum jam Pagianam hanc sententiam dimiserim. At certe si rem aggrederer, potior mihi esset conditio cum Valsechio, qui nequit opponere num-

num Carthufianum ; propterea quod solutiones illæ , quas cap. xx. nummo huic accommodat ad tuendam suam opinionem de cœpto Imperio Elagabali ab interitu Caracallæ , etiam Pagianæ de initio a Kal. Januariis petito aptari omnino possent. Ad hæc nunquam ille , qui mortem Elagabali ad initia Martii ann. 222. mecum refert , se se ab ea argumentatione extricaverit , quam pag. 73. prioris Dissertationis ab nummo Vaillantii cum TR. P. V. COS. IV. petiveram , in eo si quidem cum Processus Consularis Elagabali repræsentetur , gestum hunc fuisse oportet ante exordium Martii anni 222. Proinde si Processus iste actus est decurrente Tribunicia Pot. quinta , ut nummus idem docet , instaurata illa esse debuit non alia die quam Kalendis Januariis ejusdem anni 222. & inchoata iisdem Kalendis an. 218. quandoquidem initium aliud a nece Caracallæ a docto viro excogitatum , rejectum a me olim ac confutatum est. Ille quidem eodem cap. xii. pag. 121. vim hujus argumentationis agnoscens , non aliam viam evadendi reperire potuit , quam personam illorum induendo , qui mense Martio mortem Elagabali contigisse negant. Quod sane extremum dejecti animi consilium est , cum vincere propriis armis adversarium non possis , ab alio hoste præsidia quærere. Ceterum non negat , ab eo nummo Vaillantii , atque ab aliis TR. P. V. signatis probe concludi , ubi certum sit , uti certum existimat , Elagabalum mense Martio anni 222. excessisse , ejus Imperii ac Trib. Potestatis exordium alio a tempore , quam a die xvi. Maii anni 218. desumendum esse. Cum vero tempus hoc non solum a Kalendis Januariis ejusdem anni peti possit , quod fecit Pagius , verum etiam ab interitu Caracallæ , quod placuit Valsechio , num hoc initium recte a me conclamaturn deploratumque fuerit appellatum , tunc erit discutiendum , cum ejus argumentis , quibus illud tueri contendit , satis a nobis fiet.



CAPUT X.

In multis sibi contrarius Vignolius. Chronologiam ab se olim firmatam de morte Elagabali, & Alexandri exordio: item de tempore mortis ejusdem, & Maximini, modo totam subvertit. Causa detegitur. Herodiani exemplo frustra probare nritur S. Hippolytum usum fuisse in suo Canone anno Civili. Rationes, quibus Alexandri mortem in Septembrem confert, expenduntur. Ejus iter a montibus Armenia in Germaniam ex Herodiano non recte disponit. Aliud iter ejusdem Imperatoris ab Urbe in Germaniam gravi absurdo concludit. Roma Moguntiacum iter militare statuitur. Triumphus Alexandri non ad ann. 235., pertinet, sed ad ann. 234. antecedentem. Ita ejus iter Germanicum recte potest componi, & ejus mors sub finem mensis Martii ann. 235. statui. Herodianus non hinc est falsus; sed fallitur Vignolius. Quæ fuerit causa bujus erroris. Ejus argumenta rejiciuntur. Herodianum expeditionem Persicam narrantem, non satis perpendit. Quod demonstratur. Hinc ostenditur octo menses non satis fuisse ad illam expeditionem. Textus Herodiani in numero annorum corruptus, emendatur. Hinc perperam mors Alexandri traducta fuit in proximum Sept. vel Octobr. mensem ann. 235. Aliter insequentium Imperatorum tempora quomodo subverterentur, declaratur. Neque SS. Martyrum natales dies certos haberemus; quod exemplis probatur. Totius Capitis complexio & conclusio. Vignolius amplectitur emendationem Auctoris in textu Herodiani, ubi de annis Imperii Elagabali loquitur. Sed frustra voluit probare annos eosdem Julianos esse, & cæptos cum anno civili 218.

QUI me nuper inter se pugnancia scripsisse arguebat, & qua ratione, modo unam, modo aliam sententiam adseruerim, se non posse adsequi profitebatur, ille ipse

ipse Vignolius in hoc Capite x. nuncium remittit iis, quæ in priore Dissertatione velut indubitata posuerat; eademque sponte sua contrariis opinionibus evertit. Hæc quo se habeant modo, paullo fusius est exponendum. Cum dissidium, quod inter Eruditos, ut sæpe dixi, agebatur, quo die, ac mense anni vulgaris 222. Elagabalus decesserit, & Alexander Imperio admotus fuerit, sibi componendum vir Clarissimus suscepisset, novam hanc, & a ceteris diversam sententiam excogitavit, ut id post mensem Junium ejusdem anni omnino contigisse putaverit. Hoc pag. 76. ejusdem primi Operis colligebat ex Lampridio & Eutropio, qui Imperio Alexandri tribuunt annos XIII. & dies octo, vel novem ex quo consequitur, ut eodem anni tempore declaratum illum Imperatorem dici oporteat, quo fuit a Maximino interfectus. Porro ex eodem Lampridio, & ex Herodiano, quorum longa testimonia vir doctus recitat, & expendit, cum Alexandrum a Maximino in Germania, tum Maximinum a Militibus in obsidione Aquilejæ contendebat interemptos fuisse *æstivo tempore*. Quod quidem tempus pag. 90. ex Dionis textu a se correcto, ita etiam ad dies composuit, ut Alexandrum occisum fecerit die xx. Julii A. C. 235., Maximinum vero initio Augusti 238. Itaque si a morte Alexandri, cum annis tredecim, diebus octo, vel novem retro ducatur ratio, Imperii ejus exordium, & finem Elagabali, eadem æstiva tempestate, videlicet die xi. vel xii. Julii accidisse manifestum fit. Ita olim Cl. Vignolius. At nunc totam hanc Chronologiam plane subvertit: nam posteaquam initio hujus Capituli x. fassus est testimoniis eorundem Lampridii & Eutropii, imo & utriusque Victoris, ac auctoris libri de divisionibus Gentium, se inductum fuisse ad mortem Elagabali in ætatis, seu mensis Julii initium conferendam; deinde pag. 114. certum habet, illum ante, non vero post Kal. Julias anni 222., uti putaverat, fatum obisse. Porro pag. 101. Scriptores eosdem omnes, tanquam minus veridicos, in ejusdem Alexandri Imperii spatio definiendo, repudiat; propterea-quod *certiore* Herodiani *testimonio* sibi constet, Alexan-

lexandrum non ante initium Septembris ann. 235. a Maximino interfectum fuisse, in quod Herodianum testimonium infra latius inquiram. At quoniam Alexandri obitus collatus est in mensem Septembrem, argumenta quoque illa fuerunt ipsi prætereunda, quibus, ut ante indicavi, ex Lampridio, & Herodiano exploratum sibi esse dixerat, Alexandrum, & post ipsum tribus exactis annis Maximinum, interfectos fuisse æstivo tempore. Quæ quidem argumenta tanti olim faciebat, ut in iis adornandis, utpote ab aliis nondum observatis, plenas octo paginas insumserit; & in scripto ad me misso questus perhumaniter nihil me ad ea respondisse, denuo integra mihi obtulerit, professus ab iis omnino pendere ea, quæ ipse de programme S. Hippolyti, & de annorum numero, quo Dio circumscribit Elagabali regnum, pronuntiaverat. At nunc altum de his omnibus silentium, nihil usquam de somno meridiano, nihil de pulvere ab Equitibus excitato, nihil de nive montium soluta; nisi quod in vestibulo hujus capitis se dubium animi hædere ait, num ex his, quæ de tempore mortis Alexandri, & Maximini scripserat, recte potuerit conjicere, initio æstatis, seu mensis Julii Elagabalum interfectum fuisse. Nimirum si ex novis ejus cogitationibus Alexander fato concessit Septembri mense, certe vetera illa argumenta æstivi temporis non dubia modo sunt, verum etiam inania prorsus, & supervacanea. Qua de re rursus alio in loco tedibit sermo.

Cogitanti mihi, atque hæc animo pervolventi non statim occurrit causa, quamobrem vir Clarissimus a se ipso, & a prioribus opinionibus desciverit, & tanta curaverit contentione mortem Elagabali retroducere ad diem aliquem ante mensem Julium, obitum vero Alexandri in Septembrem proferre. Nam quod spectat ad institutum, & scopum operis sui, qui versatur in eo, ut mortem Elagabali ad explicandam Tribuniciam ejus Potestatem v. post diem xvi. Maii A. C. 222. conjiciat, æque id obtrinebat si ante, vel post initium Julii eam collocasset; & si obitus Alexandri cum annis tredecim Imperii secundum Eutropium, aliosque Scriptores

ptores ab æstivo tempore ad eundem cardinem deductus fuisset. At re penitus inspecta consilii ejus ratio, quam ipse nobis occuluit, aperte tandem se se mihi obtulit.

Sententiæ ejus de morte Elagabali post diem xvi. Maii A. C. 222. quam ad explicandam Tribuniciam ejusdem Imperatoris Potestatem excogitaverat, objeceram ego Capite vi. Dissertationis meæ de annis Imperii Elagabali programma Canonis Paschalis S. Hippolyti, in quo annus i. Severi Alexandri notatus exhibet hunc Augustum jam regnantem Idibus Aprilibus ejusdem anni 222., atque adeo Elagabalum jam tum defunctum. Objectum hoc Vignolius ut averteret, cum sibi non admodum prodesse quæ scripserat alio in opere fatis intellexisset, ad annum Julianum, seu Civilem confugit, quo, ut Capite sequente exponam, usum fuisse S. Hippolytum, atque annum primum Alexandri in programme expressum ab Kalendis Januariis, non a die ejus Imperii natali numerasse, sibi probandum suscepit. Ut vero invento huic suo viam sterneret, & magnæ auctoritatis exemplo aliquo præiret, Herodianum in partes vocavit, illumque computasse annos Imperatorum a Kalendis Januariis cum anno Civili, seu Juliano in hoc Capite x. demonstrare adgressus est. Tabulam itaque Chronologicam sexaginta annorum, quos Herodianus in Historia sua complectitur, statim exponit: in qua eorum Augustorum, qui intra illud spatium regnarunt, ita tempora digerit, ut anni Imperii, quos Historicus unicuique tribuit, non aliter sint dispositi quam si cœpti a Kalendis Jan. cum anno Civili essent. In primis autem pro certo sumit, Herodianum hanc servasse regulam, ut annum, quo Imperator aliquis ante Kalendas Julias obiisset, Successori integrum tribuerit; contra vero Antecessori, si post easdem Kalendas decessisset: nimirum illi Augusto, qui majorem anni partem Imperio tenuisset, annum cum totum adscripserit: quam regulam etiam S. Hippolytum servasse in computando anno primo Alexandri mox capite sequente contendit. Ergo ut annus hic primus Alexandri, cum in tabula Chronologica ex Herodiano ordinata,
tum

tum in lemmate Canonis S. Hippolyti, annum totum 222. a Kalendis Januarii complecteretur, debuit ex regula idem Imperator inchoasse regnum, & Elagabalus vitam explevisse ante Julium mensem anni ejusdem 222. At cum in alio opere ut vidimus, Elagabali interitus, & Alexandri inaugurationio a viro docto conjecta fuisset post easdem Kal. Julias, propterea necesse illi fuit de vetere hac sententia decedere & Elagabali mortem retro abire jussam inter diem XVI. Maii, & Kal. Julias collocare, ut annus primus Alexandri utrobique, videlicet in Tabula Chronologica, & in programme Hippolyteo secundum regulam dici posset cœptus cum anno Civili a Kal. Januariis anni vulgaris 222. Hinc silentio prætereunda fuerunt argumenta, quibus in æstivum tempus & post Kal. Julias anni 235. Alexandri obitus conferebatur, & Lampridio, Eutropio, & utrique Victori auctoritas omnis abroganda; propterea quod inde retroducti anni tredecim regni Alexandri perduxissent ejus exordium, & finem Elagabali in mensem Julium, & ipsum Alexandrum a possessione anni 222. deturbassent. Hoc etiam incommodi importabant anni illi XIII. Alexandri, ut constituto ex nova Vignolii sententia ejus Imperii initio ante Kal. Julias ann. 222., mors ejus incideret pariter ante Kal. Julias anni 235. qui annus hoc pacto per regulam, non ad ipsum Alexandrum, sed ad Maximinum pertineret, & proinde Tabula Chronologica, in qua ob complendum numerum annorum XIV. ab Herodiano traditum regno Alexandri annus ille huic ipsi Augusto datus est, omnino luxata, tum in hujus annis, tum etiam Maximini, in discrimen adduceretur. Totâ igitur ratio novæ hujus Chronologiæ cum consistat in everrendis testimoniis eorundem Scriptorum, Eutropii, Lampridii, & utriusque Victoris, quorum auctoritate, ut ipse fatetur pag. 95. & 102. mortem Elagabali in mensem Julium contulerat, idcirco minus illos fuisse veridicos in Alexandri Imperii spatio definiendo *certiore* Herodiani *testimonio*, quo ejusdem Augusti mors, non amplius, ut olim factum fuerat in tempus æstivum seu in mensem Julium, quo auctores

illi ducebant, sed in Septembrem conferretur, sibi ostendendum proponit. At si ego demonstravero, quod quidem nullo labore, quamvis ex rei necessitate, non paucis faciam verbis, procul a vero hoc esse, omnia illa tunc jacta fundamenta ad programma S. Hippolyti, nam summa hæc ejus operis est, explicandum, convelli funditus, & labefactari necesse erit.

Æstate anni Chr. 235. inquit vir Clarissimus pag. 102.; Alexandrum per montes Armeniæ exercitum ducentem Herodianus exhibet lib. 6. cap. 13. Bello hoc inde Persico absoluto Antiochiam rediisse eum narrat, ubi *statim* defectionis Germanicæ certior est factus. Quare adversus Germanos eum progredi Antiochia opus fuit, *adversus quos*, inquit Herodianus, *cum reliqua omni multitudine approperebat, confectoque celeriter itinere, constitit ad Rheni ripas, atque ibi res ad bellum Germanicum necessarias comparabat.* Quo fit, subjicit vir doctus, ut Alexander, etiam si ætatis initio in montibus Armeniæ dicatur fuisse, neque tamen ante initium Septembris in Germania interfici a Maximino potuerit: præsertim, cum non statim atque illuc pervenerat, *sed post dies plurimos* mortem ipsius evenisse Herodianus referat.

Ergo Alexander cum initio ætatis (quamquam Herodianus nihil de initio habeat), seu mensis Julii, demus etiam Junii, anni 235. in montibus Armeniæ esset, hinc Antiochiām, & inde cum ingenti exercitu in Germaniam profectus est, ubi apud Moguntiacum mense Septembri ejusdem anni 235. Maximini fraude vitam amisit. Ergo totum hoc iter confecit spatio trium mensium. Hæcne serio? Montes Armeniæ Mediam versus, nam exercitus iste Mediam invaserat, ab Antiochia quingentis ad minus distant milliaribus. Antiochia Constantinopolim numerantur in Itinerario Antonini millia passuum 726. Hinc Sirmium 851., & inde Laureacum, Augustam Vindelicorum, Argentoratum, & demum Moguntiacum 986. Summa a montibus Armeniæ Moguntiam M. P. 3063. Itane qui olim Capite primo *sibi persuaderi baud facile* poterat, Elagabalum iter milliarium M. D.

tam

ram celeri gradu facere potuisse, ut intra trium mensium spatium Nicomedia Romam pervenerit; nunc in animum inducere potuit Alexandrum intra idem trium mensium spatium alterum tantum itineris, milliaria videlicet tria millia cum ingenti exercitu, quamvis celeriter processerit, emensum fuisse? Memoria repetat quæso diurnum militaris itineris octo, vel decem milliarium a se constitutum modum, & calculum ineat, quot mensibus opus Alexandro fuerit ad tantum terrarum intervallum percurrendum. At si mecum, ut alias fecit, putare velit viginti milliaria in singulos dies, expeditio hæc Alexandri sex saltem mensibus erit definienda. Nec tamen adhuc res acta est. Siquidem addere oportet plurimos dies, quos inter adventum Alexandri in Germaniam & ejus mortem intercessisse ille ipse falsus est; deinde etiam tempus illud, quod res gestæ post transgressos initio ætatis montes Armeniæ sibi poscunt; & demum moram Alexandri, non enim *statim*, ut aiebat Vignolius, discessit, in urbe Antiochiæ ante profectionem Germanicam: quæ ab Herodiano fufius narrantur. Horum omnium si habeatur ratio, ut profecto est habenda, jam non menses sex, sed complures insuper alii computandi erunt a transitu montium Armeniæ ad Alexandri interitum.

Quæ cum parum visa fuerint, vel potius visa non fuerint, nec animadversa, adjunctum est etiam aliud Alexandri iter; & absurda, quæ retulimus, graviore alio cumulata sunt. Postea enim quam V. C. librum suum in lucem ediderat, ad me misit unam, ac deinde alteram tabulam corrigendorum, ubi verbis, quæ antea recitavi, quibus Alexandrum Septembri mense interfectum scripserat, hæc alia pag. 103. vers. 23. addenda jubet: *Imo, inquit, si Lampridio credi potius debet, qui die VII. Kal. Octobris ejusdem anni, videlicet 235., Roma illum maximum, & splendidissimum triumphum agentem (cujus tamen nullum in ejus nummis indicium extat) atque inde post lætas Romani Senatus acclamationes in Germaniam proficiscentem repræsentat, neque ante Octobris initium mors ejus poterit consignari.* Ego vero quid dicam ad hæc

nescio. Præter enim quam quod recurrunt hic ea omnia, quæ ante objekti adversus iter Germanicum tribus mensibus absolutum, si die VII. Kal. Octobris ann. 235. Alexander Romæ triumphavit, & non ante initium ejusdem Octobris mortuus est, septem solis diebus ab Urbe profectus est in Germaniam, & Moguntiaci vitam finivit. Quis feret hoc? At si regerat Vignolius se non conclusisse inter hos septem dies iter atque obitum Alexandri, sed affirmasse ante initium Octobris hæc non potuisse fieri; declaret ergo, quot dies velit intercessisse a die triumphi ad diem mortis. In itinerario Antonini commodior via ad ducendos exercitus Roma Moguntiacum ea videtur esse quæ per Veronam, Augustam Vindelicorum, & Argentoratum progreditur: in qua colliguntur M. P. mille, & proinde itineris militaris sexaginta dies. Si vero addamus *plurimos* illos *dies*, quos ex Herodiano consumpsit Alexander terendo tempus, computatione ducta a die triumphi 26. Septembris ann. 235. mors ejus erit proroganda post exordium anni 236. insequentis: quod neque ipse Vignolius unquam admisit. Quamobrem quocumque se vertat novam hanc, de qua adeo sollicitus fuit, rationem collocandi mortem Alexandri, five ante, five post initium Octobris anni 235. a veritate undequaque alienam deprehendet. Id vero eum fefellit, quod triumphum Alexandri putavit pertinere ad annum 235., qui cum ex aliis, tum ex ante dictis certissime referendus est ad annum antecedentem 234. Ita porro post triumphum die 26. Septembris hujus anni actum potuit Alexander iter Germanicum explere, & moram plurium dierum ad ripas Rheni extrahere, ubi demum sub fine mensis Martii an. 235., quæ nostra sententia est, de qua alibi, dolo Maximini sublatus est. Nunc ad Herodianum revertamur. Si intra spatium trium mensium tot, & tantæ res geri non potuerunt, ergone falsus est Herodianus, qui initio æstatis exercitum Alexandri per montes Armeniæ transduxit? Nequaquam: sed fallitur ejus interpret Vignolius, qui insigni metachronismo transisse Alexandrum montes Armeniæ æstate anni 235. patat,

tat, cum id non potuerit accidere, nisi anno saltem antecedente 234. Erroris hujus causam gravior alius præbuit error.

Susceperat probandum in hoc capite V. C. Herodianum Imperatorum annos per annos Julianos putasse: quam in rem hoc primum utitur argumento. Herodianus lib. 6. Cap. 6., vel 2. in mea editione Patavina, narrat, Alexandrum *anno tertio decimo Imperii jam exacto, & decimo quarto inchoato* in Mesopotamiam adversus Artaxersem regem Persarum castra movisse, & cum eo graviter inde pugnasse, post pugnam vero Antiochiam se recepisse, ibique aliquandiu commoratum in Germaniam contendisse. Quæ, is licet festinato itinere ab Urbe Antiochiam, indeque in Germaniam se contulisset, nunquam tamen intra dies octo, vel novem, quos post integros Imperii sui annos tredecim a prima suscepti principatus die imperasse illè dicitur, contingere, atque effici poterant. Hæc ipsa sunt Vignolii verba: ex quibus haud facile quis intelligat annum Julianum probari. Sed eo redit ejus argumentatio, ut quandoquidem Alexander ex Herodiano Roma discessit *anno XIII. Imperii jam exacto, & XIV. inchoato*, cui anno numerato a prima Imperii die, non amplius, quam octo, vel novem dies supersunt, ex sententia Eutropii, & aliorum, de quibus supra memini, fieri nequit, ut Herodianus ipse numeraverit annos ejus a die Imperii natali; quia illis octo, vel novem diebus, quos supra annos tredecim auctores illi tribuunt Alexandro, expediri non potuerunt illa omnia, quæ gesta refert Herodianus. Ergo necesse est hunc Historicum computasse annum XIV. inchoatum modo Juliano, & a Kalendis Januariis: a quo die ad initium Septembris, seu Octobris insequentis, quo Vignolio judice contigit Alexandri mors, recte ea ipsa confici potuerunt, quæ a profectioe ab Urbe ad obitum confecta narrat Historicus. Nimirum hoc est, quod fidem omnem superat, & a quo cum hujus argumentationis, tum prioris de itinere Germanico falsa ratio dimanat. Vidit V. C. in contextu Herodiani scriptum, expeditionem Persicam ab Alexandro susceptam anno XIII. *Imperii completo*, sed non animadver-

tit ea, quæ subsequuta sunt usque ad ejus mortem, quæ cum nullo unquam modo geri potuerint, nedum post exordium ejusdem anni XIII. etiam si is annus coeptus dicatur ab Herodiano a Kal. Januariis an. 235. intra scilicet octo menses, sed neque tribus solidis, & fortasse quatuor annis; proinde certissimum sit, numerum illum annorum XIII. plane corruptum esse. Hoc pridem observarunt viri doctissimi, Pagius ad annum 228. num. IV. & Tillemontius not. VIII. in Alexandrum, quod ex his ego etiam notavi pag. 45. primi operis. Rei momentum exigit, ut gestorum seriem ex octo Herodiani capitibus summatim ante oculos ponam.

Cum Alexander *trêdecim annos* Imperium gubernasset, ecce, inquit Historicus initio cap. 2. lib. VI. *sibi haud opinato litera e Syria & Mesopotamia reddita* a Ducibus, in quibus scriptum esset Artaxerxem Persarum Regem &c. Alexander his intellectis amicorum consilio *legatos cum literis ad Artaxerxem mittit, persuasurus pacem*: quas epistolas cum barbarum contempsisse intellexisset, *agre tandemque* ad expeditionem se comparat, & *habitis per Italiam, & provincias cum ingenti motu Romani Imperii delectibus*, Roma profectus per Illiricas gentes itinere festinato Antiochiam contendit. In hac Civitate *moratus aliquandiu* comparandis ad bellum necessariis, *aliam* ad Persarum Regem de pace *Legationem mittit*, a quo Oratores Romani re infecta cum *remissi fuissent*, Imperator *magno jam coacto exercitu*, milites triariam distributos *in diversas Persidis regiones* impellit: quos exercitus Artaxerxes huc illuc incurrens *post varias pugnas* profligavit. Ergo Alexander accitis militibus *Antiochiam* redit, ubi *copias instaurabat, comparabatque ex integro*, & hilarior jam, & liberior laxatis bellorum curis *urbis ejus deliciis indulgebat*. Inter hæc auditis motibus Germanorum, *cum nihilominus metu cunctaretur*, tandem adversus ipsos *cum reliqua multitudine* appropinquavit: & cum consisteret ad Rhæni ripas, & *res ad bellum necessaria compararet*, *misit Oratores de pace ad Germanos*, & indignantibus militibus *frustra se tempus terere*, denique conspiratione obtruncatus est.

Hæc

Hæc ne tanta, & tam varia, tot consiliis, Legationibus, delectibus, & cunctationibus dilata, tot expeditionibus, pugnis, & longissimis itineribus producta, hæc, inquam, omnia octo mensibus? Si putentur sola itinera ab Urbe Antiochiam, & ad Persidis regiones, hinc rursus Antiochiam, & inde Germaniam, sexies pene mille milliaria conflatur, quæ si continenter in expeditione Alexander fuisset, annum integrum absorbent. At si addantur temporum omnia illa intervalla, quæ descripsimus, plures colligi insuper annos facile unusquisque conjiciet. Quid vero si Alexander, ut ex Lampridio ipse V. C. agnoscit, ante Germanicam profectio- nem ad Urbem accessit, & triumphum egit splendidissimum? Si quis vero quærat, quisnam igitur Alexandri annus, quandoquidem annus XIII. omnino est expungendus, in textu Herodiani restitui debeat, res plane est incerta. Pagius ad annum 228. n. III. profectio- nem hanc Persicam in annum octavum Alexandri & 229. æræ vulgaris confert: quæ tamen opinio pluribus difficultatibus scætet. Tillemontius not. VIII. in Alexandrum rectius constituit annum Chr. 231. vel 232.

Ex his ergo firmamentis temporum, quibus extrema Imperii Alexandri intervalla innixa sunt, evidenter constat æstate anni 235. exercitum ejus non transisse per montes Armeniæ, neque illum triumphasse die XXVI. Septembris ejusdem anni; & proinde hinc perperam fuisse traductam ipsius mortem in proximum Septembris, vel Octobris mensem. Quæ sane opinio eo etiam est a veritate longe alienissima, quod sequentium Imperatorum tempora mire labefactata subvertit. Auctorem ipsum appello, qui in prima Dissertatione pag. 7. recte monet ab Alexandri Epochâ pendere terminos nonnullorum insequentium Imperatorum. Si ergo Alexander obiisset Septembri, vel Octobri mense an. 235. interitus Maximini, qui quartum annum delibavit, uti ejus nummi docent Potestate IV. insigniti, prorogandus esset saltem in Novembrem an. 238. Hinc Balbinus, & Pupienus, qui tres circiter menses illi superfuerunt, trucidati essent

sent Februario anni 239. qua anni tempestate quis unquam putet ludos Capitolinos actos fuisse : nam illi ludis Capitolinis perierunt, teste Herodiano libro, & capite extremis. Præter quam quod ex celebri Censorini loco, de quo alibi, colligitur certissime; agonem hunc Capitolinum tricesimum nonum celebratum fuisse intra annum 238. Eodem vero tempore Gordianus III. Augustus appellari debuisset, cujus tamen leges habemus datas ante sex, vel septem menses : & ejus obitum necesse esset producere in annum 245. quod certis Chronologiæ characteribus adversatur. Sed de his rursus alio loco, & occasione.

Atque ita convulsis horum Imperatorum cardinibus, neque certos Sanctissimorum Martyrum, qui sub iisdem passi fuerunt, natales dies habere possemus, ut ipse etiam Vignolius eadem pagina notavit. Profecto ut hoc tantum exemplo utar, si Alexandrum Septembri, vel Octobri mense anni 235. defunctum fecerimus, S. S. Pontiani Papæ, & Hippolyti Presbyteri, qui sub initium Maximini passi sunt, natales dies in Fastis Ecclesiasticis incerti plane, & dubii essent: imo cum Dodwello heterodoxo, qui Sanctis Martyribus bellum indixit, S. Hippolytum Episcopum Portuensem, cujus dies obitus in Martyrologiis xxi. Augusti assignatur, Martyrum albo expungere cogeremur. Hæc exposuit doctissime Cl. Valsechius in priore Dissertatione sua cap. III.

Ut vero priora recolligam, cum *certiore* illo Herodiani *testimonio* nihil prorsus effectum sit, ut Alexandri mors in mensem Septembrem an. 235. produceretur, Eutropium denique, Lampridium, duosque Victores oportebit in sua jura, & pristinam auctoritatem veluti postliminio redire. Patia-
tur itaque Clarissimus vir necesse est, eodem tempore post annos xiiii. dies octo Alexandrum occisum, quo inauguratus est ipse, & Elagabalus interemptus. Pati etiam proinde debet alterum de duobus, aut hoc accidisse ante Kal. Julias ann. 222. aut post ipsas Kalendas. Utroque modo tabula Chronologica, & annus Julianus Herodiani concidunt. Si enim ante Kalendas eodem tempore anno 235. fato obiit
Ale-

Alexander, & annus hic ex regula Maximino imputandus est: si post Kalendas annus 222. pariter ex regula Elagabalum complectitur, non Alexandrum. His autem ita compositis, duo nobis commoda derivantur: alterum illud est, quod sublato anno Juliano Herodiani, ejus exemplo dici nequit Hippolytum quoque annum eundem Julianum usurpasse in computando anno primo Alexandri; alterum, quod & maximum, hoc est, quod nova Cl. Vignolii ratio explicandi Tribuniciam Pot. v. Elagabali, non habet amplius quo loci consistat, & quo certo innitatur fundamento. Nam quæ olim argumenta mortem Elagabali, & Alexandri inaugurationem in æstivum tempus conferebant, ille ipse jam sponte sua abjecit, & repudiavit; quæ vero eam retrahunt ante Kal. Julias a nobis satis superque everfa, & refutata sunt. Cum igitur neutra opinio valida sit, & firma, hoc demum superest solum, ut Elagabali finis & Alexandri exordium Martio mensi restituatur: quæ nostra sententia, Pagii & Eruditorum pene omnium hætenus fuit.

Interim mihi gratulor quam maxime, illum, qui olim in primo opere pag. 91. non dubitabat, quin in textu Herodiani lib. v. cap. ult. legi deberet, Elagabalum produxisse Imperium *in quintum annum*, nunc pag. 100. mecum sponte sua legendum omnino arbitrari, *in quartum annum*: quam emendationem amplexus est etiam supra toto capite IV. Ut vero sibi invicem ego consentiam, annos hos quatuor Elagabali Julianos esse integros, & cœptos a Kal. Januariis cum anno civili 218. ita ut annus 222. totus sit adscribendus Alexandro, expediat ille prius & dissolvat nodos illos, & difficultates, oportet, in quas ob eam rem illum se se conjecisse in superioribus demonstravi.

Quæ vir Clarissimus fufius disputat in hoc capite de die natali Alexandri, & de nomine Severi, erudita quidem sunt, & egregia; sed quoniam ad argumentum, in quo versamur, minus pertinere videntur, sine ullo discrimine possunt a me prætermitti.

CAPUT XI.

Nova Vignolii ratio, qua pertentat tollere dissidium inter suam sententiam de morte Elagabali, & annum primum Alexandri inscriptum in lemmate Cycli S. Hippolyti, ex ipsius assertis est incredibilis. S. Hippolytus in usum Christianorum Rom. Urbis se accommodavit; non vero exterarum gentium. Rom. Ecclesia primis temporibus in celebratione Paschatis diversos ab Alexandrina Canones recepit. S. Hippolytus Romanos Canones usurpat. Quando Eccl. Latina Alexandrinorum Canones amplexata sit. Non est credibile eundem sanctum Pascha posuisse sub Imperio Alexandri, quod omnes noverant celebratum sub Elagabalo. Exempla quæ congerit, non pertinent ad Romanos usus. Falsum, veteres Chronologos aliam regulam adhibuisse a Romana diversam in annis Rom. Pontificum consignandis. Henschenius a Pagio emendatus; & alia regula ei opponitur. Perpenduntur auctoritates Scriptorum ex Petavio a Vignolio adductorum ad suam regulam firmandam. Petavius explicatur ubi de anno mortis S. S. Apostolorum Petri & Pauli agit. Ejus interpretatio nec Vignolio suffragatur. Petavii sententia quamvis esset vera, est contraria regulæ a Vignolio propositæ de anno tribuendo illi Imperatori, qui potiore ejus partem tenuerit. Quid censendum de hac questione, sub quo nempe Imperatore facta sit Pascha, quam S. Hippolytus signavit in programme sui Cycli. An recte sentiat Vignolius, quomodo intelligendi sint Auctores, qui anno Juliano, seu a quocumque alio cardine annos Principum numerarunt. Ex iisdem a Vignolio pro sua sententia adductis, ostenditur quomodo subverteretur historia & Chronologia cum sacra, tum profana. Et quæ absurda sequerentur. Item hac regula admisa Acta Martyrum incerta redderentur & confusa. Hinc quid concludendum.

Annus Julianus priores iterum turbat res, & annum consulem, qui olim programmatis Hippolytei facta moderabatur, loco cedere, & sibi jura illius tuendi & explicandi deferre cogit. In limine hujus capituli XI. exponit Cl. Vignolius Severum Alexandrum idibus Aprilibus anni 222. qui in programme Cycli S. Hippolyti per ejusdem Augusti annum primum indicatur, nondum Elagabalo successisse; siquidem a se certis gravissimisque testimoniis firmatum fuerit, eundem Elagabalum non obiisse nisi post Idus Majas quinto anno Imperii sui inchoato. Cum vero dici nequeat, Hippolytum ignorasse diem Imperii Alexandri natalem, nec fides possit derogari publicis Senatus Romani monumentis, propterea ut dissidium hoc tolleretur, se ait in primo opere putasse, S. Hippolytum in Chronico suo posuisse annos Consulares, & in Capite Cycli hæc verba, *HOC ANNO*, nempe Consulari, adscripsisse. Quod tamen nunc ita vult esse intelligendum, ut in Chronico tum anni Imperatorum, tum etiam Consulum fuerint expressi, eo modo quo in tabula nunc primum a se concinnata expositum reperitur.

Itaque ad hanc conjecturam devenire sibi opus fuisse subdit, ut nimirum homo ille minime accuratissimus, qui ex Hippolyto exscripsit Cyclum, anno consulari neglecto, annum Imperii ex Hippolyti Chronico acceperit, illumque loco harum duarum vocum, *hoc anno*, Cyclo substituerit. Quod vero ad hanc conjectandi rationem tunc devenerit, culpam in me transfert: nam cum per literas sensum suum hunc esse mihi aperuisset, ut annus primus Alexandri in Programme positus, non a die Imperii Alexandri natali, sed ab alio capite, nempe a prima die Januarii an. 222. secundum annum Julianum numeratus fuerit, & ego huic opinioni contradixissem, auctoritati meæ, quæ erat ejus erga me humanitas, sibi acquiescendum ratus, ad illas conjecturas se confugisse ait, ita tamen, ut etiam sententiam de anno primo Alexandri pro anno Juliano 222. accepto, quamquam dubitanter, ostenderit. Nunc ergo prorsus abacto an-

no Consulari, solius anni Juliani ab Hippolyto cum anno Civili a Kal. Januariis inchoati rationem se habere profitetur his plenissimis verbis: *ita vero annum illum primum Alexandri ab Hippolyto acceptum fuisse, nunc adeo sum persuasus, ut de hoc amplius hæsitare, atque alio vertere se animus nequeat.*

Hoc vero mihi mirum videtur, atque incredibile. Cum enim S. Hippolytus conscripserit Cyclum suum in ea urbe, in qua *Senatus solitus semper fuit annos Imperatorum numerare non a Kalendis Januariis cum anno Civili, seu Juliano, sed a prima suscepti Imperii die*, quæ viri clarissimi sunt verba ex pagina 127. & 92. non ego animo comprehendere valeo, qui fieri possit, ut aliam regulam usurpaverit, quam popularem illam, & *solemnem*, qua Senatus Romanus uti solitus semper fuit: & annum primum Alexandri computaverit a die prima Januarii an. 222. non vero a die ejus Imperii natali. Nimirum quod paullo ante pag. 93. *Stultitia* erat, & *levitas* in Elagabalo, hoc ipsum nunc esset in Hippolyto optimum factu consilium. Quocirca aliena sunt ea omnia, quibus contendit ostendere, populos alios annum suum civilem vel ab Autumno, vel a Thoth Ægyptiaco, vel a quocumque alio cardine fuisse exorsos. Scribebat siquidem Hippolytus in usum Christianorum Romanæ urbis, quos absurdum omnino est arbitrari, voluisse ad exterarum gentium mores potius, quam ejus urbis, in qua debebant, confectandos traducere. Hujus rei argumentum ex eo etiam sumitur, quod ad alios quoque Christianorum Romanorum usus, nequaquam vero alterius gentis, in condendo Cyclo suo, se se Hippolytus accommodaverit.

Romana Ecclesia primis temporibus in celebratione Paschatis diversos ab Alexandrina Canones & discrepantes recepit: de quibus agit Victorius Aquitanus in præfatione Cycli sui Paschalis. In primis Latini mensem primum ordiebantur a quinto die Martii, & producebant usque ad diem secundum Aprilis viginti novem dierum spatio. At Alexandrini Neomeniam primi mensis ab octavo die Martii ad diem quintum Aprilis

Aprilis extendebant. Rursus Romani nunquam solemnitate Paschalem luna xv. peragebant: ut si xiv. luna incidisset in Sabbatum, non die postero Dominico Pascha celebrabant, sed illud ad Dominicam insequentem, & lunam xxii. diffundebant. Contra Alexandrini uno die citius quam Romani Pascha agebant, nempe ipsa luna xv., nec illud ultra lunam xxi. trans mittebant. Utrumque hunc Canonem more Romanorum usurpat S. Hippolytus in suo Cyclo. Nam citimam Neomeniam a die quinta Martii desumit; quapropter lunam xiv. etiam ante Æquinoctium occurrentem uti Paschalem admittit: ut videre licet in primo latere in annis vi. & xiv. ubi decima quarta incidit in diem xviii. Martii; quia videlicet Neomenia desumpta est a die quinto ejusdem mensis. Deinde secundum alterum Canonem Latinorum numquam in xv. Lunam Paschale festum conjicit; sed si terminus in Sabbatum competit, non postriedie, sed Luna vigesima secunda solemnitatem incidit; ut in ipso anno primo, de quo disputamus, & in annis iv. vii. x. xiii. & xvi. apparet. Ceterum Ecclesia Latina, ut hoc etiam addam, a vetere hac regula, quæ saltem usque ad S. Leonis Magni tempora viguit, postea discessit, & Alexandrinorum Canones amplexa est: nunc enim termini Paschales figuntur in diem viii. Martii & quintum Aprilis; & si Luna xiv. Sabbatum obtineat, die sequente Dominico festus dies Paschatis peragitur: uti fieri poterat anno mdcc. nuper elapso, nisi auctor Kalendarii Gregoriani rationibus suis Pascha transmisisset ad Lunam xxii.

Ergo si Hippolytus, repudiatis Canonibus Alexandrinorum in Cyclo suo Paschali condendo secutus est consuetudinem Romanorum, quis credat illum in ejusdem Cycli programmate contra *morem solemnem* eorundem Romanorum invexisse annum Julianum, & annum primum Alexandri inchoasse a Kal. Januariis, vel cum iisdem Alexandrinis, & aliis exteris populis eum ab alio capite numerasse; Et rursus quis credat, Hippolytum exhibuisse spectandum sub Alexan-

Alexandri imperio Pascha illud, quod omnes Christiani sciebant celebratum fuisse vivente Elagabalo.

Perspicuam magis rem hanc faciam exemplo nostri ævi, quod docto viro proposueram in memorata epistola, sed illud sine responsione dimisit. Josephus Imperator fato functus est die 17. Maii ann. 1711., cui successit CAROLUS Felix Augustus. Condiderit aliquis Viennæ Austriæ Cyclum Paschalem incipientem ab anno eodem 1711. & primum Pascha hoc modo descripserit: *Anno 1. Imperii Caroli Imperatoris factum fuit Pascha die Dominico v. Aprilis.* Quid ad hæc Vienneses, qui Paschatis festum ejus anni egerunt *vivo Josepho*, quippe annos Cæsarum numerare solent a die suscepti imperii? Quid etiam si Pascha anni insequentis sub anno 11. Caroli, & sic deinceps signatum fuisset? Ego vero cum in epistola illa hoc neque in Hippolyto tolerari posse scripserim, videant æqui rerum æstimatores, num ob eam causam arguendus fuerim; & utrum exempla illa externa, quæ in me congesta sunt in hoc capite, ad Romanos usus, & regulas quicquam pertineant. Sed de his etiam postea.

Verum ille contendit, Hippolytum in numerandis annis Imperii Alexandri nequaquam secutum fuisse morem Senatus Romani, sed quemadmodum factum fuerat ab Herodiano, ita illum non Elagabalo tribuisse annum Christi 222., sed *primum Alexandri* dixisse, secundum eam regulam, quam alii etiam veteres Chronologi in annis Romanorum Pontificum concinnandis quandoque adhibuere, quia scilicet Alexander potiorum ejusdem anni 222. partem Imperio tenuit. Nimirum ad hoc foedus inter Herodianum & Hippolytum constabiliendum, & ad hanc condendam regulam, ea omnia parata erant, quæ capite antecedente dicta sunt. Cum vero structura illa omnis convulsa a nobis fuerit: uti Herodianum nihil prorsus adjumenti contulisse Hippolyto tunc demonstratum est; ita neque Chronologos Pontificios quicquam illi prodesse nunc ostendam.

Godefridus Henschenius in prologo sui apparatus ad Chronologiam Pontificiam, qui habetur in Propylæo ad Acta Sanctorum mensis Maii pag. 2. num. 8. hæc verba scribit, quæ a viro Clarissimo allata, ego integra repetam, quod infra etiam usui non modico futura sint : *in hac priori parte*, inquit Henschenius, *nulli Consules repetuntur, quamvis sub iisdem, sub quibus sedere inceperunt quidam, fuerint vita functi, aut martyrio coronati eorum decessores.* SED EJUS PONTIFICATUI, QUI POTIOREM ANNI PARTEM VEL INCIPIENS, VEL FINIENS TENUIT, RELINQUUNTUR. Exempli causa: S. Alexander dicitur fuisse temporibus Trajani a Consulatu Palmæ & Tullii usque Æliano & Vetere. Creatus is est, & ordinatus anno CVIII. cum Cos. Gallo, & Bradua: *sed quia hunc annum decessor Evaristus tenuit usque ad XXVI. Octobris, huic illi relinquuntur, & in designando initio Alexandri primi nominantur Palma & Tullius.* Deinde Ælianus & Vetus fuerunt Consules anno CXVI. quos ultimos toto anno habuit Alexander, & superstit usque ad diem III. Maii anni CXVII. quo Consules erant Niger, & Apronianus: *qui tamen non attribuuntur S. Alexandro, sed soli S. Sixto ejus Successori.*

Præclare quidem Henschenius favet regulæ; sed non ita Pagius, qui ad annum 67. num. XIII. eam omnino falsam, & commentitiam fusiore disputatione evincit. Supervacaneæ res esset, & molesta singulas ejus rationes afferre, quæ ab ipso peti poterunt. Aliam porro regulam Henschenianæ opponit Pagius, eamque certam vocat, & indubitatam, ut scilicet Pontifices tam in priore parte Chronici, quam in posteriore, memorati, sub illis Consulibus intelligi debeant demortui, ad quos in iisdem Chronicis pervenisse dicuntur, sive parum, sive multum sub illis Consulibus vixerint. Quæ quidem cum simplicior, tum & verior explicatio est.

Cum ergo neque Chronologus Pontificius, neque Herodianus suffragentur. Hippolyto, videndum superest, num magnæ auctoritatis scriptores alii, Eusebius, Hieronymus, & Cassiodorus, quos V. C. appellat ex Petavio, morem hunc

putandi annos Imperatorum ab anni exordio familiarem habuerint. *Sed minime*, inquit ille de doctrina temporum lib. XI. cap. 15. quod in mea editione Amstelædamenti est 14., reprehendendi sunt veteres illi, qui Imperatorum annos non ab eo die putare solent, quo primum inierunt, sed a Civili, & populari anni primordio, quod illorum initium antecepsit. Nonnunquam vero proleptice anteverunt, sive a Paschali mense, & Ecclesiastico anni exordio numerant, sive a Januario, præsertim cum res Romanorum præscribunt. Atqui est inspiciendum, qua de causa, & qua occasione magnus Chronologus hæc scripserit. Quærit hoc loco, quo anno SS. Apostolorum principes interfecti fuerint. Eusebius, inquit, in Chronico, Hieronymus, Cassiodorus, & alii Petrum, & Paulum Neronis anno decimoquarto cæsos esse, memoriæ prodiderunt. At cum, subdit ille, Neronis primus annus inierit ex ante diem XIII. Octobris A. C. 54., & octo menses dumtaxat anni decimiquarti confecerit usque ad diem decimum Junii ann. 68., quo obiit, & Apostoli die XXIX. Junii necati fuerint, fieri nequit, ut anno Neronis XIV. Martyrium fecerint, sed antecedente, nimirum decimotertio, eadem die XXIX. Junii anni 67. In hisce igitur angustiis se deprehensum sentiens, ne cogeretur cum Baronio ad A. C. 69. num. 1. falsos dicere auctores istos, qui mortem Apostolorum in annum Neronis decimumquartum conjece-
runt, in hanc descendit sententiam, ut putaret auctores eosdem numerasse annos Neronis non a die suscepti Imperii, sed a Paschate, vel a Kalendis Januariis antecedentibus anni Juliani 54., quo fiebat, ut cæpto anno ejus XIV. ab iisdem Kalendis, vel a Paschate anni 67., recte dici posset, Apostolos passos fuisse die XXIX. Junii ann. 67. decurrente ejusdem Neronis anno decimoquarto. Sed frustra Petavius hoc perfugium quæsit, & frustra noster eo usus est. Nam primo verum esse nequit, Neronem Martyrio affecisse SS. Apostolos die XXIX. Junii ann. 67., propterea quod non ante hunc annum exeuntem ab Græcia reversus est in Italiam, quod certissimis argumentis evincit Card. Norisius in adden-
dis

dis ad epistolam Consularem, & post ipsum Pagius ad eundem annum 67. & Tillemontius not. XI. ad S. Petrum tom. I. hist. Ecclesiasticæ. Præterea æque verum esse potest, hunc morem putandi annos Imperatorum ab exordio anni Civilis *familiarem* non fuisse Eusebio; nam contra stat ipsemet Eusebius. Narrat hist. Eccl. lib. VIII. c. 2. fuisse a Diocletiano proposita Edicta contra Christianos, cum *agebatur nonus decimus annus ejus Imperii, mense Dystro, quem Romani Martium vocant, appertente die Festo Dominicæ passionis*. Edicta hæc emanasse refert Lactantius de mortibus Persec. cap. 12. *Diocletiano octavum, & Maximiano septimum Consulibus*: qui annus est vulgaris 303. Si ergo mense Martio hujus anni Eusebius numerabat annum XIX. Diocletiani, ejus exordium sumserat a die ejus natali XVII. Septembris, quo imperium coepit anno 284. Nam si ab antecedentibus Kal. Januariis putasset ejus annos, mense Martio 303. fuisset in cursu annus vicesimus, non vero decimus nonus.

At quamvis sententia illa Petavii vera esset, ea tamen, ut ante indicavi, ob hoc etiam uti non posset vir doctus, quia contraria prorsus est ejus regulæ de anno tribuendo illi Imperatori, qui potiorẽ ejus partem tenuerit. Siquidem Petavius Neroni adscribit totum annum vulgarem 54., cujus majorem partem occupavit Claudius, nimirum usque ad diem XIII. Octobris quo die ille obiit, & Nero Imperium adeptus est. Demum nec cum Petavio affirmare posset, Eusebium putasse annos Imperatorum a Paschate, quia hoc pariter adversaretur rationibus suis. Nam si Hippolytus annum primum Alexandri inchoasset a Paschate anni 222., scribere non potuisset, decimam quartam Paschalem, quæ octo diebus antecefferat, factam fuisse anno primo Alexandri.

Hactenus, ut vestigiis Clarissimi viri insisterem, quæ ipse argumenta ad annum Julianum inculcandum adornaverat, contrariis persecutus sum rationibus. Ceterum uterque nostrum in perpetuo parallogismo versatus est; & quæ utrimque disputavimus, vel extra quæstionem sunt, vel eam cer-

te non dirimunt. S. Hippolytus hæc habet in programme Cycli sui: *Anno 1. Imperii Alexandri facta est decima quarta Pascha Idibus Aprilibus*. Contendit ille hoc die XIII. Aprilis A. C. 222. vivum adhuc fuisse Elagabalum, & imperantem. Quamquam autem superstes erat Elagabalus cum decima quarta Luna Paschalis die XIII. Aprilis facta fuit; attamen Hippolytus illam posuit sub *anno primo* Alexandri. Hoc vero illud est, quod quæstionem nostram facit; & hoc erat illi probandum, Hippolytum scilicet potuisse recensere Pascha anni 222. sub *anno primo* Alexandri, quod Pascha celebratum fuerat sub ejus antecessore. At de re hujusmodi toto hoc capite ne verbum quidem ullum. Ille vero nervos omnes intendit, ut probatum faceret, Hippolytum computasse *annum primum* Alexandri non a die suscepti imperii, sed proleptice a Kalendis Januariis cum anno Juliano seu Civili: quemadmodum annos Principum Herodianus, auctor Pontificalis, Eusebius, & Scriptores alii, & populi numerare consueverant. Quod sane quamvis esset verum, non ideo rem nostram conficeret. Nam ut inferri posset, Hippolytum consignasse sub *anno primo* Alexandri Pascha illud, quod commissum fuerat sub Elagabalo ejus decessore, oportebat ostendere, Scriptores eosdem, & populos, qui annos Principum non a die eorum Imperii natali, sed a Kalendis Januariis, seu ab alio Cardine anni Civilis putarunt, res actas ab exordio ejusdem anni Civilis ad illorum Principum inaugurationem, cum adhuc antecessor viveret, non huic tribuisse, sed eorundem *anno primo* consignatas literis mandasse. Hoc vero est, quod testimonio ullo, vel exemplo probatum reperire apud Cl. Vignolium nusquam potui. Porro si Scriptores aliqui seu ab anno Juliano, seu a quocumque alio capite annos Principum auspicantur, id solum volunt, ut eorundem Principum annos eo modo cœptos in plenum, seu rotundum annorum numerum colligant; nequaquam vero ut res gestas designent sub eo die, & tempore, quo Principes illi nondum regnabant. Petavius, ut exemplum hoc repetam, censuit, Eusebium inchoasse annos Neronis proleptice

leptice a Kalendis Januariis anni vulgaris LIV. quo hic annus tamquam ejusdem Neronis *primus* ab eo acceptus est; sicut annus 222. veluti *primus* Alexandri ab Hippolyto sumtus dicitur. At hoc ille fecit non alium ad finem, quam ut colligeret annos ejus Augusti quatuordecim, & in annum LXVII. Apostolorum mortem componeret. Anno eodem LIV. M. A. finio, & M. Acilio Cos. narrat Tacitus lib. XII. Annal. cap. 64. plura ante obitum Claudii prodigia evenisse. Hæc prodigia si commemorasset Eusebius, vel Petavius ipse, credatne aliquis, eos dicturos fuisse, illa accidisse *sub anno primo Neronis*? Nec igitur mente capere quisquam poterit, Hippolytum, etiam si, quod negamus, annos Alexandri numerasset a Kal. Januariis an. 222., posuisse sub ejus *anno primo* Pascha illud, quod inter easdem Kalendas, & ejus imperii initium, vivente adhuc Elagabalo, celebratum fuerat. At profecto si hanc sententiam admitteremus, nec facta, nec tempora sibi constarent; & perturbari ac subverti historiam & Chronologiam cum Sacram, tum profanam, necesse esset. Hoc ut pateat, exempla quædam in medium proferam ex eisdem petita scriptoribus, Herodiano, & Chronologo Pontificio, ex quibus ille rem hanc tantam deduci posse arbitratus est.

Quandoquidem tum Hippolytus, tum etiam Herodianus ex Vignolii sententia eandem regulam in designandis Imperatorum temporibus amplexi sunt, hoc sequi oportet, ut quemadmodum Hippolytus Paschalem solemnitatem, quæ acta erat sub Elagabalo posuit sub *anno primo* Alexandri; ita Herodianus rem quamlibet gestam a Kalendis Jan. anni postremi Imperatoris alicujus ad Successoris inaugurationem, recensere debuerit sub ejusdem Successoris *anno primo*. Pertinax occisus est die 28. Martii A. C. 193., post quem duobus mensibus, & quatuor diebus regnavit Julianus, inde Septimius Severus. Hic annus in tabula Chronologica, de qua Capite superiori, est primus ejusdem Septimii. Si Herodianus, cum memorat necem Pertinacis, diem adnotasset, hoc modo igitur eam rem prodidisset. *Pertinax obiit*

die xxviii. Martii anno 1. Imperii Septimii Severi. Caracalla paullo ante mortem iter suscepit ad urbem Carras in Mesopotamia. Ergo hoc factum narrasset Herodianus accidisse, *anno primo Imperii Macrini*; qui totum annum 217. in tabula Chronologica obtinet. Demum Julianus obiisset anno primo Septimii, Caracalla anno 1. Macrini, Macrinus anno 1. Elagabali, Elagabalus anno 1. Alexandri. Quis ferret ita loquentem Herodianum, & tam immanem rerum, & temporum perturbationem? Alia possem hujusmodi exempla colligere; sed unum non præteribo propius cum S. Hippolyto comparandum. Dixerat V. Cl. Elagabalum processisse Consulem Kalendis Januariis A. C. 222. qua de re actum est Capite 8. Iphis Kalendis jam cœperat annus primus Julianus Alexandri in eadem tabula, & secundum regulam. Ergo *Elagabalus processit Consul anno 1. Alexandri Kalendis Januariis.* Hocne pateretur ille? Cur igitur pati vult, Pascha ejusdem anni, celebratum sub Elagabalo, positum fuisse ab Hippolyto sub *anno primo Alexandri*?

Quæ in Herodiano absurda adnotavimus, eadem quoque in Chronologum Pontificium, qui Damasus putatur, irreperent, si, ut viro Clarissimo placet, ipse etiam secundum Hippolyti regulam annum totum ei Pontifici tribuerit, qui ejusdem anni majorem partem obtinuit. Nam pariter cum Hippolyto res gestæ sub uno Pontifice signandæ fuissent ipsi nomine alterius: quò perpetuus in Sacram Historiam metachronismus induceretur. Exempla sint duo ex verbis Henschenii paullo ante recitatis. Alexander Papa creatus est anno CVIII. Sed quia hunc annum decessor Evaristus tenuit usque ad xxvi. Octobris, ideo huic annus idem CVIII. totus relictus est. Si ergo quidpiam gestum mense Decembri, cum jam sedebat Alexander, nam ex antiquis Catalogis cessavit Episcopatus dies xxix.; narrandum suscepisset Chronologus ille, dicere debuisset, id factum *sub Evaristo*. Nos quoque ex hac regula cogeremur dicere, *sub Pontificatu Innocentii XII. die 23. Novembris electum fuisse CLEMENTEM XI.* cujus hoc anno QUINDECENNALIA solvimus,

VICENNALIA multa ad temporum felicitatem, & Christiani Orbis lætitiā, nuncupamus. Rursus, quia S. Alexander decessit die III. Maii an. CXVII. annus hic integer ad Sixtum ejus successorem pertinet. Ergo acta mense, puta Aprili, ejusdem anni CXVII. quo tempore vivebat Alexander, signanda fuissent *nomine Sixti*, qui nondum Episcopatum adeptus erat. Hinc Alexander creatus fuisset *anno postremo Evaristi*, & mortuus *anno primo Sixti*, atque ita nec annum natalis sui, nec annum obitus haberet. Pascha quoque ejusdem anni CXVII. quod celebratum fuit die v. Aprilis superstitē Alexandro notari debuisset *sub Sixto*. Sic antecedentium, & insequentium Romanorum Pontificum natales, & obitus, Paschata quoque, & res aliæ quæcumque in alienum tempus incurrerent. Si Chronicon totum hac methodo, quæ ex semel admissis S. Hippolyti regulis necessario dimanat, constructum esset, mira quædam oriretur, & inextricabilis annalium Ecclesiæ confusio, certa Cardinum Pontificiorum momenta nulla essent, omnia denique luxata, & soluta extra suas sedes dilaberentur. An vero Damasus, ne legentes deciperentur, opus suum, ut programmati S. Hippolyti nunc fit, commentario præmunire debuisset, quo doceret, sibi placuisse, præter Romanorum suorum solemnem morem; annos Pontificum a Kalendis Januariis deducere, eos qui majorem anni partem tenuerint, toto eo anno donare, res gestas sub eorum uno alteri tribuere, & novam annorum secundum hanc methodum sibi succedentium seriem texere?

Hæc quidem, ut ajunt, ex hypothesi: nam Damasus hisce regulis Chronicon suum infarsit. Sed si ille, & Herodianus in exemplum Hippolyti adducuntur, & regulam huic affictam de numerandis annis cum anno Juliano, & de tribuendo anno integro ei Pontifici, seu Imperatori, qui majorem ejus partem transgressus est, vere illos observasse affirmatur; ut appareat consequutionem, quæ ex hac regula elicitur, potuisse videlicet Hippolytum Pascha anni 222. actum sub Elagabalo signare Alexandri nomine, falsam esse, fuerunt

runt necessario exponenda absurda & mala, quæ exinde orta in historiam sacram, & profanam redundarent.

Rem istam semel adhuc urgebo; nam & Sanctorum Martyrum valde interest, ne in eorum acta regulæ Hippolyto adscriptæ invadant. Siquidem acta Martyrum passim signantur annis Imperatorum, quos annos si demus posse intelligi perscriptos secundum easdem regulas incerta plurima in Fastis Ecclesiasticis, & ambigua esse oportebit. Si enim potuit Hippolytus annos Alexandri numerare a Kalendis Januariis, & Pascha referre sub eo Imperatore, qui nondum regnabat; hoc ipsum potuisse facere quemlibet Scriptorem passionum Martyrum, licebit asseverare. Ita unusquisque arbitrio suo judicabit, hanc, vel illam eorum Scriptorum fuisse vel usitatam computandi annos Principum rationem, vel Hippolyteam: & si alicubi annus primus notatus inveniatur, alter divinabit, Martyrem illum passum fuisse sub illo Imperatore, cujus nomen acta præferunt: alter vero hoc accidisse contendet sub ejus decessore. In annis subsequentibus eadem difficultas, & confusio continget, nullo charactere, aut signo ostendente, num anni numerati fuerint a die suscepti Imperii, an a Kalendis Januariis cum anno Civili, ex quo unius solidi anni differentia emerget. Hinc campus novus patebit Heterodoxis criminandi Fastos veteres Ecclesiæ, tamquam ex hoc etiam capite liqueat, nihil in iis esse certum, nihil constans, nihil non aliqua suspicionis labe adpersum.

Maneat ergo certumque sit, Scriptores, & populos, quos in exemplum adduxit Cl. Vignolius, cum narrant quidquam gestum sub *regno alicujus*, intelligere, *hunc ipsum* regnare, non *aliū*: & cum S. Hippolytus scripsit ANNO PRIMO IMPERII ALEXANDRI idibus Aprilibus factam fuisse XIV. Paschalem, eam vere factam fuisse Imperante Alexandro, non Elagabalo.

C A P U T XII.

Iterum sibi contrarius Vignolius in exponenda anni nota quam S. Hippolytus suo Cyclo affixit. Uti in hoc, sic & in suo Chronico non annum Consularem, sed tantum annum 1. Alexandri notavit. Idem affirmant Eusebius & Hieronymus a Vignolio adducti. Probatur item ex Clemente Alexandrino. Argumenta Vignolii nullius momenti ostenduntur. Contra eundem defenditur mos Scriptorum ætate S. Hippolyti signandi annis Imperatorum, non Consulum. Inter hos Eusebius. Non jure queritur, se nullum Chronicon vidisse per annos expansos. Eo non est opus ad hunc priscorum Patrum morem cognoscendum. Tabula Consularis digesta, nullo nititur fundamento. Mos illorum temporum iterum demonstratur. Contraria argumenta diluuntur. Auctor bene distinxit librum S. Hippolyti de divisionibus gentium a Chronico ejusdem. Julii Africani testimonium contra ipsum Vignolium facit. Quid per seriem, seu per descriptionem temporum, quam in opere suo de Paschate explanavit S. Hippolytus, sit intelligendum.

CUM hætenus pro anno primo Imperii Alexandri Cl. Vignolius pugnaverit, atque illum modo Juliano scriptum in Cyclo suo ab Hippolyto fuisse contenderit; nunc contra initio capitis XIII. se putare ait, nullam anni notam, neque forsan Imperii in eodem Cyclo expressam ab Hippolyto fuisse: Rem tantam auctoritate Eusebii, ac S. Hieronymi fulciri censet, ii siquidem, inquit, in Chronico solum, non autem in Cyclo annum primum Alexandri scriptum fuisse innunt. Præterea quamvis iidem Eusebius, & Hieronymus affirmant, Hippolytum anno tantum Cæsareo usum, perduxisse scilicet Chronicon suum usque ad annum primum Imperatoris Alexandri; ipse tamen pro certo habet, Hippolytum in eodem Chronico una cum anno Imperii adnotasse etiam

tiam annum Consularem. Ita gravissimi scriptores in diversa trahuntur; semel, ut quod de uno dicunt, de altero dici nequeat: iterum, ut quamquam hoc non dicunt, id tamen dici debeat.

At ego fidem oculis negare nequeo, & cum videam in cathedra marmorea Cyclum S. Hyppoliti inscriptum *anno primo Imperii Alexandri*, in eodem Cyclo notatum non fuisse ab Hippolyto annum eundem primum, affirmare non audeo. Contra, cum legam apud Eusebium, & Hieronymum in Chronico adscriptum fuisse solum *annum primum Alexandri Imperatoris*, non possum in animum inducere fuisse etiam signatum annum Consularem. Quod ita esse docemur alio exemplo apud eundem Eusebium; qui de Clemente Alexandrino hæc scribit lib. VI. cap. 6. *Hic Clemens in primo Stromatum libro ordinem temporum describens, obitu Imperatoris Commodi computationem suam circumscribit*. Verba plane eadem usurpat Eusebius de S. Hippolyto loquens: *in quo temporum seriem describens, anno primo Imperatoris Alexandri computationem temporum circumscribit*. Uterque locus est ex versione Valefii. Idem ergo statuendum est de Hippolyto, ac de Clemente; nam de utroque eodem prorsus modo loquutus est Eusebius. Atqui certum est, Clementem nullos Consules in suis computationibus temporum posuisse, sed annum tantum Commodi Imperatoris; ergo nullos quoque consules posuit Hippolytus cum anno primo Alexandri. De Clemente patet ex ipso libro primo Stromatum, quem citat Eusebius, in quo a pag. 336. ad pag. 341. Editionis Colonienfis an. 1688. describens ordinem temporum per annos collectos, ab Adam, a Romulo, a Julio Cesare, ab Augusto, a morte Christi Domini, aliisque ab Epochis, computationem suam ubique *usque ad obitum Commodi* perducit, plane uti Eusebius tradidit. Nullos, ut hoc repetam, in Clemente vides Consules; nullos quoque in Hippolyto quisquam vidit unquam. Hinc exemplo hoc Clementis omnino eliditur exemplum aliud, quod a Chronico Paschali, seu Alexandrino vir Clariss. petit; atque etiam evane-

evanescit conjectura illa, nullo argumento subnixa, ut quamvis Eusebius, & Hieronymus de anno tantum primo Alexandri meminerint, fieri tamen possit, ut Consularem quoque annum consignaverint.

Ideo autem in primo opere dixeram, verisimile non esse, Hippolytum usurpasse annum Consularem, propterea quod *ea ætate mos invaluerat, ut qui temporum historiam texerent, non eam annis Consulum, sed Imperatorum inscriberent.* In quam rem exempla eorum temporum attuleram, primum Judæ ex Eusebio & Hieronymo, deinde, prælucente Pearsonio, Theophili, Clementis Alexandrini, Tertulliani, & demum ipsius Hippolyti. Impugnaturus eadem mea verba, quæ præfixit cap. XIV. Cl. Vignolius, se primum hunc morem scire non posse ait, quod nullum Chronicon per annos expansos, ut in eo Consules locum obtinere potuerint, ea ætate conditum inspexerit. *Unum tamen instar omnium testem gravissimum, Julium nempe Africanum, se habere subdit, qui falsum omnino istud esse diserte nos moneat.*

Primum non jure queritur vir doctus, se nullum Chronicon vidisse per annos expansos, cum videre potuisset Chronicon Eusebii, quod quamquam non ejus plane ætatis, morem tamen Scriptorum superiorum, a quibus sua hausit, probe demonstrat. In eo siquidem Chronico per annos expansos digesto, Eusebius perpetua, & constanti methodo annos Imperatorum apponit, nusquam memoratis Consulibus, nisi semel, aut iterum, nec quidem in annorum serie, sed in rerum gestarum narratione, ut cum obitum Virgilii recenseret his verbis: *Virgilius Brundusii moritur, Sentio Saturnino, & Lucretio Cinna Cos.* Ille etiam in sua historia Ecclesiastica ubique sub solis Imperatorum annis consignat initia, & obitus Romanorum Pontificum, aliorumque Episcoporum, passiones Martyrum, ceterosque historiæ Sacræ eventus. Ut profecto mirum sit, Cl. Vignolium pag. 141. inter eos, qui per Consules annos numerarunt, etiam Eusebium recensuisse.

Præterea nihil opus est eo, quod optat vir Clarissimus,

Q

Chro-

Chronico per annos expansos, ut cognosci possit, num per Consules, an per Imperatores prisca Patres tempora designaverint. Nam, præterquam quod non constat S. Hippolytum Chronicon suum per hujusmodi annos expansos digessisse, siquidem tabula illa Consularis quam exhibuit Vignolius pag. 120. ex ejus tantum ingenio prodiit; satis est quæcumque temporum descriptio ad ostendendam ejus ævi consuetudinem. Hinc morem suorum temporum probe demonstrarunt Theophilus, Clemens Alexandrinus, & Tertullianus, quos adduxi post Pearsonium; quamvis ut apponit V. Cl. *historiam temporum per annos expansos* non texuerint, sed *aliquam tantum temporum* supputationem ab Adam ad suam ætatem perductam, descripserint. In quo quidem eorundem scriptorum calculo per ætates, annosque collectos, verum non est, quod ille subdit, *locum nullum esse potuisse Consulibus*. Nam, ut unius Clementis exemplo utar, recte is poterat, in supputatione temporum pro Imperatorum annis, annos Consulium exhibere; sicut inter cetera, *pro initio Imperii Claudii* Consules Cajum, & Saturninum; *pro anno secundo Vespasiani*, quo Hierosolyma excisa narrat, eundem Vespasianum, & Titum, *pro decimo anno Antonini* Langum, & Messalinum, atque ubi sæpius rationem temporum perducit *usque ad mortem Commodi*, substituere Consules *Falconem, & Clarum*. Quæ perpetua Clementis consuetudo signandi tempora per *Imperatores*, uno, & altero exemplo, in quibus *Consules* memoravit, nihil patitur detrimenti: uti nec lædit morem Tertulliani alterum exemplum mortis Christi, quam ille notavit cum Tiberii Cæsaris annis, tum Consulatu duorum Geminorum. Porro veteres Patres morem hunc fortasse hauserunt ex Evangelista Luca, qui initium prædicationis Christi, non Consulium nota, sed *anno xv. Tiberii Cæsaris* expressit. Hinc & ante Clementem consuetudo hæc obtinuit; siquidem ille refert lib. primo Stromatum pag. 340. fuisse aliquos, qui natalem Christi Domini in *annum xxviii*. Augusti conferebant; Basilidiani dicebant ejus baptismum esse *quintum decimum annum Tiberii*, atque alii censebant eum passum

sexto

*sexto decimo. anno ejusdem Imperatoris. Nusquam ulli Consul-
les. Et Clementi Synchronus S. Irenæus lib. III. cap. 25.
Nativitatem Domini circa primum, & quadragesimum an-
num Augusti Imperii collocat. Sed & acta Martyrum anti-
quissima passim notantur Cæsareo temporum charactere; cu-
jus rei exempla non profero, quod ubique sint obvia.*

Quod porro testimonium ex ipso Hippolyto desumferam
pag. 85. qui librum *de divisionibus gentium* concludit in an-
num XIII. Imperii Alexandri, ita Cl. Vignolius accipit,
quasi ego hunc librum eundem esse ac *Chronicon*, cujus me-
minit Eusebius, & S. Hieronymus, scripsissem. At ego aper-
te, ac perspicue utrumque opus distinxi his verbis pag. 86.
*Quis credat Hippolytum diversum esse ab Hippolyto, ut nimi-
rum in hoc Chronico de divisionibus gentium, consignaverit
Pascha sub annis Imperii Alexandri nulla prorsus Consulum
mentionem facta, & in ALIO CHRONICO, de quo scilicet
Eusebius, & Hieronymus, atque in Cyclo Paschali, ut vir
clarissimus opinatur, Consulum notam usurpaverit? Ita ego
scripsi, non quod ille me scripsisse putavit. At denuo locum
non esse Consulibus, neque in hoc Chronico de divisionibus
gentium ille inculcat; quia per annos expansos digestum non
est; cui nos iterum reponimus, satis esse ad consuetudinem
ejus ævi demonstrandam, ut quandocumque tempora descri-
bantur, hoc fiat per annos Imperii, non per Consules, uti
in eo Chronico non semel, sed sæpius factum legimus.*

Nunc ad Julium Africanum accedamus, *restem illum om-
nium gravissimum, qui falsum omnino esse diserte nos monet,
ævo Hippolyti morem invaluisse, ut qui temporum histo-
riam texerent, non eam annis Consulum, sed Imperatorum
inscriberent. Ille ergo, inquit Cl. Vignolius, qui eodem
tempore, Historiam temporum, quo S. Hippolytus Tempo-
rum Canones scribebat, ut ex Georgio Syncello proditum est
pag. 107. Pastorale, inquit, Jacob tentorium Edessæ usque ad
Antonini Romanorum Imperatoris tempora servatum, fulmi-
ne dejectum est, ut testis est Africanus, qui ad Imperium us-
que Antonini deduxit historiam.* Hactenus nullos Consules

habemus ; imo *Cæsarei* temporis characterem . At, subdit V. C. in ea historia Consularibus etiam annis usum illum fuisse, ex eodem Syncello abunde constat pag. 212. cujus verba non hoc loco , sed infra pag. 157. recitat , quæ hujusmodi sunt : *Hujus Phileni tempore consulatum Romæ gerebat GRATUS Severianus (lege Sabinianus) , & SELEUCUS , ex iis , qui circa Bruti ætatem Regibus exactis creati sunt Consules* 725. numero usque ad vulgarem mundi annum 5723. *ut auctor est Africanus , qui Antonini Augusti fuit annus tertius .* Quare Scaliger, sequitur vir doctus, in Eusebii Chronico (imo in notis ad fragmenta Græca Eusebii) pag. 429. ait, *Africanus enim scribit , se terminasse opus suum GRATO , & SELEUCO CONSULIBUS anno tertio Antonini Aviti , qui Elagabalus dictus fuit .* Ægidius Bucherius in Cam. Paschal. Victorii cap. 13. pag. 234. *Julius Africanus , inquit , illustris Chronographus Chronicon se suum perduxisse scribit ad initium Olympiadis 250. quo GRATUM & SELEUCUM Consules fuisse testatur .* Pagius item in Crit. Baron. ad annum Chr. 220. num. 11. *imo ipsemet Africanus docet , se anno legationis suæ absolvisse opus suum GRATO & SELEUCO Cos. Et Card. Norisius in Epist. Consul. pag. 132. Alterum , inquit , cognomen prioris Consulis prodidit Julius Africanus , qui suum Chronicon clausit CONSULIBUS , ut ipse ait , GRATO SABINIANO , & SELEUCO .*

Ad hoc ergo Testem gravissimum Africanum inducit Cl. Vignolius , ut probatum faciat , ipsummet Africanum docere se opus suum terminasse *Grato , & Seleuco Consulibus .* At cur verba ipsa Africani nobis non obtulit, sed recentiorum testimoniis usus est ? Nam certe ea verba Africani , quæ nuper ex duobus Syncelli locis adduxit, probant quidem , Africanum perduxisse historiam suam usque ad Imperium Antonini Elagabali , & Phileni tempore anno Mundi 5723. fuisse Romæ Consules *Gratum , & Seleucum ;* sed eum terminasse eandem Historiam *Grato , & Seleuco Cos. nequaquam probant .* Verum neque doctissimi illi viri locum Africani produxerunt, in quo conceptis verbis, ut ipsi affirmant, il-

le prodat, se clausisse opus suum *Grato & Seleuco Consulibus*. Nam Scaliger post verba recitata, refert se ad ea, quæ ante notaverat num. CCXXXVII. Ad hunc vero numerum in Animadversionibus pag. 21. nihil aliud adducit, quam textum Græcum Syncelli, quem paulo ante ex ejus pag. 107. retulimus, in quo nulla prorsus Consulium mentione illata, tantum ait, *Africanum ad Imperium usque Antonini deduxisse historiam*. Norisius, & Bucherius ipsis verbis Scaligeri loquuntur. At Pagius plura insuper addit, & postquam narravit ex Eusebio, Africanum scriptorem temporum legationem pro Nicopoli suscepisse, hæc subjicit: *Imo Africanus docet, se anno legationis suæ absolvisse opus suum Grato & Seleuco Cos. ut videre est apud Georgium Syncellum pag. 212., ubi & dicit Africanus se perduxisse opus illud usque ad annum mundi secundum Alexandrinos 5723. Incarnationis vero secundum eosdem 223. qui uterque annus cum anno æræ vulgaris CCXXI. convenit*. Atqui ego apud Syncellum eadem pagina 212. neutrum, quod Pagius dicit, invenio, nec scilicet *Africanum* docere, se anno legationis suæ, neque *Grato*, & *Seleuco Consulibus* absolvisse opus suum. Verba ejusdem paginæ paulo ante recitavi: nec quicquam aliud habet ibi Syncellus. Etsi vero id ex conjectura deduci posset, ut quoniam Syncellus pag. 107. ut supra vidimus, tradit *Africanum ad Imperium usque Antonini historiam suam perduxisse*, ea terminata fuerit *Grato*, & *Seleuco Cos.* qui fuit annus tertius ejusdem Augusti, & Mundi secundum Alexandrinos 5723., non ideo tamen poterat Pagius, & tres alii viri doctissimi affirmare, Africanum docere, *se absolvisse opus suum Grato, & Seleuco Consulibus*; nec Vignolius testem Africanum appellare ejus rei, quam Africanus nequaquam dixit.

Præter hæc, nullis Consulibus Africanum terminasse opus suum, manifeste evincit etiam Photius, qui in excerptis ejusdem operis Cod. 38. testatur, *Africanum deduxisse historiam suam usque ad Macrini Imperatoris tempora, quo tempore, ut idem Africanus affirmat, hoc Chronicon absolutum est*,

est, annorum scilicet 5723. Dixit ergo Africanus, se Chronicon suum absolvisse anno mundi 5723., nequaquam dixit, *Grato, & Seleuco Consulibus.* Porro quod Photius ait, Africanum deduxisse historiam suam usque ad *Macrini* Imperatoris tempora, falsa est ejus computatio, qui annum mundi 5723. cum *Imperio Macrini* concurrere arbitratus est, cum re vera concurrat cum anno tertio Antonini Elagabali, ut Syncellus recte supputavit. Quam Photii hallucinationem pridem notavit Scaliger ad Eusebium num. 2237. pag. 232 alterius editionis.

Nusquam igitur constat, Africanum testari, se absolvisse Chronicon suum *Grato, & Severo Consulibus*; quamvis anno Mundi 5723., Christi 221., quo hi Magistratum gesserunt, id fortasse contigerit. Sed hoc erat, quod Cl. Vignolius probandum ex Africano gravissimo teste susceperat, quodque ad ejus scopum pertinebat, illum scilicet expressis Consulibus eorundem nominibus clausisse opus suum. Quod cum nequaquam probaverit, ostendere proinde non potuit, *falsum omnino* esse, quod a nobis erat propositum, ævo S. Hippolyti morem invaluisse, *ut qui temporum historiam texerent, non eam annis Consulibus, sed Imperatorum inscriberent.*

Porro, præter Syncellum & Photium, qui Chronicon Africani, ut dixi, anno Cæsareo conclusum asseverant, alia etiam testimonia suppetunt, ex quibus apertum fit, Africanum *Imperatorum* annis, non *Consulibus*, tempora designasse. Primum est ejusdem Syncelli pag. 308. ubi ex Africano narrat, Cornelium Gallum Ægypto Præfectum Thebas subvertisse, quod inquit, *Romanorum Monarchiæ & Imperii* (scilicet Augusti) ANNO XI. (legendum XVI.) *contigit, Olympiadis vero CLXXXVII. anno IV.* Rursus pag. 323. Africanum, ait conferre mortem Christi Domini ad *SEXTUM ET DECIMUM ANNUM TIBERII CAESARIS, qui fuit Olympiadis CCII. annus secundus.* Demum Africanus, teste S. Hieronymo in Daniele cap. 9. in computatione hebdomadam semel, atque iterum usurpat annum

QUINTVM DECIMVM TIBERII CAESARIS; & apud Apollinarium tradit arma Romana contra Judæos OCTAVO CLAVDII CAESARIS ANNO fuisse correpta. Omitto, Africanum passim annos computare per Olympiades, ut pluribus in locis Syncelli videre licet, quod ostendit eum *Consulares* annos non adhibuisse.

Quid per *Seriem*, ut habet Eusebius, seu per *descriptionem temporum*, ut S. Hieronymus, quam in opere suo de *Paschate* iisdem testibus explanavit S. Hippolytus intelligendum sit, postrema est Cl. Vignolii in capite xv. disquisitio. Ego quidem non *Chronicon* aliquod, seu solam *Chronologiam* hoc opus complexum fuisse, sed *Paschaliū* etiā temporum descriptionem, & *seriem*, cui canonem sexdecim annorum de *Paschate* Hippolytus adjecit, opinatus sum: quod cum Doctrina Cangii, quem tunc non videram, in præfatione Chronici Paschalis num. XIII. & XIV. ad unguem propemodum convenit. Ille enim docet, *duplicem* conscribendorum Paschaliorum rationem fuisse: altera videlicet in Paschalis festi diei investigandæ methodo, tabulis etiā in idem argumentum confectis, tota versatur, cujusmodi est noster S. Hippolyti Canon sedecennalis: altera conscribitur in methodi formam, qua Paschales, aliaque festa, & cetera, quæ in Ecclesiasticis computis recentioribus disquiri solent, investigantur, qua ratione usus fuit Hippolytus in opere de *Paschate*, de quo Eusebius, & Hieronymus, & de quo nostra agitur quæstio: in quo scilicet opere (prosequitur Cangius) digestis a mundo condito ad sua usque tempora elapsis annis, sedecennalis Cycli a se reperti in inveniendo Paschate methodum firmavit, descriptis subinde Paschalibus festis, Legalibus forte, & Christianis: cui operi demum Canonem sedecennalis Cycli præfixit.

Placuit viri doctissimi integrum locum referre, ut liqueat, me prorsus paria cum ipso scripsisse; ut percurrenti prioris operis mei paginam 93., & 94. patebit; nisi quod addidi, egisse etiam fortasse Hippolytum in eo opere de anni Solaris, & Lunaris periodis, de revolutione Feriarum, de Neo-

meniis, terminis Paschalibus, aliisque ad rationem Paschæ pertinentibus. Cum ergo ducem tantum habeam, quem sequar, ac Vignolio proponam, ejus auctoritati utrique nostrum acquiescendum esse arbitror.

C A P U T XIII.

Dionis locus in quo Imperii Elagabali annos definit, est indubitata fidei & auctoritatis. Cum eo consentiunt Xiphilinus, Zonaras, Cedrenus, & Glycas. Item Lampridius, & Eutropius. Vignolius sibi contrarius in hujusmodi annis assignandis. Dionis vulgata lectio eadem fuit etiam ævo Xiphilini, Zonaræ, Cedreni, & Glycæ. Imo sub ipsa fere Dionis ætate. Frustra in antiquissimo illius fragmento Vaticano menda querit. Item frustra Elagabali annos cogitat expungere, eo quod non reperiantur in excerptis Constantini Porphyrogenetæ. Iterum sibi non constans. Cedreni, Zonaræ, & Glycæ exemplaria minime corrupta in assignandis annis Elagabali; imo cum Dione mire conveniunt. Textus Dionis iterum incorruptus probatur. Programmata S. Hippolyti evincit, Elagabalum quartum Imperii annum non excessisse; nec occubuisse post diem XVI. Maii ann. 222. Ideo nec Pagijs, nec Auctor nimium Dionis tribuerunt; nec ejus auctoritatem numismatum dignitati prætulerunt.

NUM erat in hac concertatione potissimum, quod mihi defendi, Vignolio labefactari maxime interesset, Dionis nempe locus, in quo Imperii Elagabali tempus designatum est ac definitum. Antoninus, ait ille in fragmento inserto lib. LXVIII. pag. 907. tempus in Imperio exegit ad ANNOS TRES, ET NOVEM MENSES ET DIES QVATVOR, numerandum a prælio cum Macrino quo potestatem protinus omnem adsequutus est. Historici cœvi, & gravissimi, qui annos, menses & dies enumerat, auctoritas

ritas & fides in suspensionem adduci nequit. Eosdem prorsus numeros exscripsit Xiphilinus in excerptis Dionis, & Zonaras, Cedrenus, & Glycas in suas historias traduxerunt, ut in alio opere pag. 97. ostendi. Consentiant Lampridius & Eutropius, quorum primus prope triennium, alter biennium & octo menses, ab ejus videlicet accessu ad Urbem, numerant. Pluribus & certioribus munimentis tempus Imperii Elagabali niti non poterat.

At Cl. Vignolius, cui visum est ultra annum quartum ejusdem Imperii terminos proferre, errorem in Græcum Dionis codicem irrepsisse *certum* habuit in priore dissertatione pag. 89. & 90., ac librariorum illum vitiasse, *numerosque partim transposuisse, partim depravasse*; ita ut legendum omnino sit, Elagabalum fuisse in Imperio *annis quatuor, & mense uno, & diebus tribus*. Nunc vero pag. 155. ab hac conjectura libenter ait, se recedere, quod animadverterit, eam minus cum Herodiano consentire: adhuc tamen contendit textum Dionis vulgatum in manifesto errore cubare, de quo quidem integrum eruditius rectius judicandi locum relinquit. Ita a se ipso iterum desciscit, ut Herodianum *tueatur*, cui innitebantur rationes omnes programmatis S. Hippolyti. Atqui ut Dio cum Herodiano consentire dici possit, affirmandum esset, Dionem ipsum quadriennium plenum dedisse Elagabalo: quod profecto eruditi, ad quos ille judicium defert, nunquam admiserint, qui norunt omnes, Dionem in annis Imperatorum computandis non rotundo annorum numero, uti consuevit Herodianus, usum fuisse, sed diligentissime adnotasse præter annos, menses quoque & dies.

Quoniam igitur neque amplius arridet prior emendatio, ut in textu Dionis transpositis & inversis numeris legi debeat *annus quartus cum mense uno, & diebus tribus*, neque quadriennium integrum probari possit, nihil aliud restat, quam ut vulgata lectio quam ante septingentos annos Xiphilinus, Zonaras, Cedrenus, & Glycas in Codicibus Dionis agnoverunt, ab eruditibus quos V. Cl. appellat judicio suo afferatur, confirmetur, & sanciat. Sed quid ego de se-

ptingentis annis? Ante alios septingentos annos & sub ipsam Dionis ætatem, ejus Codices eandem plane lectionem præferebant, quam ævo Xiphilini, Zonaræ, Cedreni, Glycæ, & usque in hunc diem constantissime retinuerunt. Fragmentum ipsum Dionis, quod Leunclavius Editioni suæ Hannovianæ pag. 907. inferuit, asservari adhuc in Bibliotheca Vaticana Cod. 1288. docet nos ipse Vignolius cap. IX. pag. 91. in Codice, qui reliquias librorum ejus LXXVIII. & LXXIX. continet, huncque esse membranaceum, grandioribus literis perpetuo scriptum; *quem Fulvius Ursinus, cujus erat, tanta quidem antiquitatis esse censuit, ut sibi fere ipso Dionis ævo exaratus videretur.* Ita vir doctus.

At nos verba ipsius Ursini referamus in notis, quas Leunclavius pag. 1052. subjecit Dioni a se Editio Hannovianæ ann. 1606. & verba ejus hæc sunt: *Hoc fragmentum libri, ut ex inscriptione apparet, LXXVIII. & LXXIX. extat apud me in membranis, scriptum literis, quas majores & vere antiquas appellant: quasque supra mille ab hinc annos, hoc est, ipsa fere Dionis ætate, stilo exaratas fuisse; ex ipsa literarum forma, qua temporibus illis utebantur, intelligere facile possumus.* In hoc ergo fragmento vetustissimo, quod inferuit Leunclavius eidem Editioni suæ pag. 907. adfunt verba in vestibulo hujus capitis allata, quibus Imperium Elagabali intra annos tres, menses novem; & dies quatuor a pugna cum Macrino concluditur.

Fragmenti hujus veluti sacram auctoritatem cum V. C. fateatur, valde tamen torquet se, ut nodum in scirpo invenire possit. Nam pag. 153. ejus verbis græcis allatis, syllabas quasdam & vuculas excutit, & in judicium vocat, ut earum testimonio fragmentum hoc a sequiori manu emendatum fuisse evincat. Quæ sane non moror, ut liberum cuique sit judicare, num quicquam hujusmodi tricæ numeris annorum Imperii Elagabali officere possint: atque eo potissimum, quod ille statim ab ejusmodi conjecturis se removeret: *quamvis igitur, ait pag. 155. jam inde ab initio, hoc est sæculis amplius septem ante Cedrenum, Xiphilinum, Zonaræ,*

ram, & Glycam, locus iste Dionis ita male acceptus a librariis fuerit, ut de illius integritate haud temere suspicari, dubitareque potuerim, numeros illos partim corruptos, partim transpositos fuisse, me tamen ab ejusmodi conjectura, quæ, ut postea animadverti, cum Herodiano minus quidem consentit, libenter removeo: integrumque eruditis de manifesto ejusmodi Dionis errore rectius judicandi locum relinquo.

Ante tamen majus quidpiam excogitaverat, ut nimirum annos, menses, & dies Imperii Elagabali a Dionis textu penitus expungeret, quod in excerptis Dionis Constantini Porphyrogenetæ a Valesio editis eorum enumeratio non appareat: tanquam excerptorum mos is & propositum non sit, hoc illud, ut sibi videtur, obtruncare, decidere, & omittere. Sed neque ipse ita Constantino fidit, ut ejus verba genuina esse Dionis, quæ vero non solum in exemplaribus Cedreni, Zonaræ, Glycæ, & Xiphilini, sed etiam in vetustissimo fragmento Vaticano habentur, insititia videri, affirmare velit. Ita, tot cogentibus argumentis, quæ vulgatum textum Dionis communiunt, & ab omni suspitione vindicant, sibi ipsi nusquam certus est & constans.

Quæ modo exemplaria Cedreni, Zonaræ, & Glycæ ubi ex Dione annos, menses, & dies Imperii Elagabali recensent, damnare non sustinuit vir Clarissimus, diversis studiis & affectibus corrupta prorsus & depravata pag. 147. & seqq. pronunciat. Cum enim ego pag. 90. dixissem, credibile non videri Codices Dionis, in annis Imperii Elagabali etiam ævo Cedreni, Zonaræ, & Glycæ corruptos omnes fuisse, ut imo hoc credibile faciat, tabulam adornat pag. 149. in qua excerptis numeris annorum Imperii Cæsarum omnium ab Augusto ad Elagabalum, qui ab tribus illis Scriptoribus & a Dione notantur, quam tum illi non cum Dione solum, sed etiam inter se, pugnent, ob oculos ponit. At si, ubi numeri illi pugnant vel cum Dione, vel inter se, conjici potest, alterutrum eorum corruptum fuisse; certe ubi non pugnant neque inter se, neque cum Dione, sed omnes invicem consentiunt, fateri oportet neutrum eorum corruptum,

sed omnes integerrimos ad nos pervenisse. Atqui in tabella, cum Dio, Cedrenus, Zonaras, & Glycas in numeris annorum Imperii ceterorum Augustorum identidem vitio aliquo scaterere conspiciantur, in annis tamen Elagabali conveniunt omnes, eique miro consensu tribuunt annos III. menses IX. & dies IV. Ergo, quidquid de ceteris Augustis suspicari velimus, profecto manifestum fit, numeros Imperii Elagabali tum in Dione, tum in aliis ab eorundem ævo usque ad nostrum plane incorruptos & integros fuisse transmissos.

Hinc vero ut dici possit, *errorem in textu Dionis undique patere, & certis atque idoneis testimoniis satis superque demonstratum esse*, mihi sane compertum esse nequit. Nam, si quæ objecta erant, nihil admodum nocent, & stat ideo immota fides vetustissimi fragmenti Urfiniani, & Codicum Dionis ævo Cedreni, Zonaræ, & Glycæ sancita auctoritas; jam contra undique pater, & demonstratum est, Elagabalum regnasse annos tres, menses novem, & dies quatuor. Ad hoc autem incorruptum Dionis testimonium si accedat programma S. Hippolyti, ex quo, mortem Elagabali contigisse ante diem XIII. Aprilis ann. 222. capite antecedente ostensum est, neque idem Augustus quadriennium Imperii transilire potuit, nec fato occumbere post diem XVI. Maii ejusdem anni.

Si hæc ita sunt, quid facimus nummis Tribunicia Potest. quinta Elagabali signatis, ad quos V. C. tum initio hujus capitis, tum alibi sæpius provocat?

Hinc neque ego, nec Pagius nimium Dioni tribuimus, neque illum dignitati numismatum præferimus, de quo nos V. C. arguit initio hujus capitis. Maneat nummis illis publica Romani Senatus auctoritate percussis sua fides: at nobis interdictum non sit, si quandoquidem nummi ipsi cum veterum certissimis monumentis pugnant, eos congrua interpretatione temperare, & hinc inde concordiam sancire. Festivum enim illud est quod dicitur pag. 146. & in scripto ad me misso, Romanos, quoties notam hanc V. scribebant, quinque

que vel quintum, non quatuor vel quartum per eam intelligi posse existimasse. Id quidem & nos scimus, & numerum v. ex nummis Elagabali nunquam expungere cogitavimus. Sed si licere sibi arbitratus est Cl. Vignolius *annum* 1. Alexandri in marmore S. Hippolyti literis rotundis expressum, modo una ratione, modo alia interpretari, cur nobis vetitum erit, Tribunitiam Pot. v. Elagabali nummis inscriptam congrue explicare, & cum veritate historica, gravissimorumque Scriptorum testimoniis componere?

C A P U T XIV.

Præsentis quæstionis conclusio, atque complexio: Elagabalus in vivis esse non poterat post diem XVI. Maii A. C. 222. Ejus obitum, atque exordium Alexandri collocandum esse in initium Martii mensis. Tempus Imperii Elagabali; & a quo cardine petendum. Vignolii sententia de morte Elagabali, & initio Alexandri a Valsebio discussa; iterum impugnatur. Ea admissa maxima oritur confusio in Chronologia insequentium Imperatorum. Iterum eorundem Caesarum epochæ illustrantur; & mors Elagabali in diem XI. Martii firmatur an. 222. Tempus mortis Maximini inquiritur, & firmatur. Valsebius Vignolii de hoc tempore opinionem confutavit. Ut hoc habeatur, tempus perquiritur quo e Thracia in Italiam contendit, & Aquilejam obsedit. Circa medium Februarii mensis obsidionem Aquilejæ aggreditur. Solvitur objectum Vignolii. Quid per anni tempore Herodianus intellexerit. Cur idem Herodianus diuturnam, atque inexplicabilem vocet obsidionem Aquilejæ. Argumenta a Vignolio opposita iterum a Valsebio rejecta. Ex his firmatur tempus necis Maximini, Elagabali, nec non mortis, & initii Imperii Alexandri. Hinc recte nummi Elagabali Trib. ejusdem Potestate V. signati cum annis ejus Imperii fuerunt in concordiam redacti.

Post-

Postquam universum Cl. Vignolii opus decursum a nobis est, atque ejus argumenta singula, quibus cum res suas tueri, tum nostras invadere contendit, satis sunt, nisi me fallo, labefactata atque everfa, constare jam puto, Antoninum Elagabalum in vivis esse non potuisse post diem XVI. Maii A. C. 222. ut vir doctus existimavit; sed ejus obitum, atque exordium Severi Alexandri esse omnino collocandum in Martii mensis initium, quod mihi in priore atque in hac Dissertatione propositum fuit.

Siquidem vindicato a novis atque alienis interpretationibus programme Cycli Paschalis S. Hippolyti, quam ob rem suscepta præcipue a nobis hæc est cum Cl. Vignolio disputatio, sublatoque lapidis Panviniani impedimento, dubium amplius esse nequit, Alexandrum die XIII. Aprilis ejusdem anni 222. jam Imperio potitum fuisse. Hinc cum Dionis locus, tantopere exagitatus, suis jam temporum characteribus constet, ut capite antecedente demonstratum est, diem etiam ipsum quo extinctus est Elagabalus & Alexander inauguratus, in tuto positum agnoscimus. Quippe numeratis diebus quatuor supra menses novem, & annos tres a die pugnae cum Macrino, quæ commissa fuit die VII. Junii an. 218. venimus ad diem undecimam Martii emortualem Elagabali. Ad hoc vero constabiliendum tempus mire confert Eutropius, a quo, Vignolio ipso adstipulante, certissimus sumitur mortis ejus dies. Etenim cum Elagabalus, eodem teste lib. 8. cap. 13. post adventum transegerit Romæ annos duos atque octo insuper menses, adventus vero conferendus sit ad Julii mensis initium, quod capite primo liquido probatum fuit, interitus ejus non ultra exordium ipsum Martii an. 222. prorogari potest.

Hinc errore fallitur Cl. Vignolius, qui cæsum Elagabalum, suffectumque ei fuisse Alexandrum post diem XVI. Maii, imo circa initium Julii an. 222. scribit. Cui sane opinioni plura sunt adhuc quæ repugnant, eamque a vero prorsus discrepantem faciunt. Hæc quidem in opere suo postre-

mo maxima eruditionis ubertate, atque ingenii acumine pertractavit Cl. Valsechius, & Cl. Vignolio luculentissime objecit; ut videri possim actum agere, atque ejus me armis munire, si denuo in aciem singula producerem. Sed cum olim eadem propemodum argumentationum capita ipse quoque, quod sancte profiteor, paravissem, facere nequeo, quin quædam ex his saltem delibem, addamque alia quæ ad viri docti firmandas objectiones inservire possint.

Ille itaque pag. 19. novem Severi Alexandri leges ex Codice Justiniani protulit, quæ datæ sunt anno ejus Imperii primo a die XXV. Martii & per subsequentes menses Aprilis & Maii usque ad diem XVI. Junii. Ergo intra hæc duo extrema jam decesserat Elagabalus, & regnabat Alexander. Certum vero est, has leges, ut V. C. monet, editas fuisse ab Alexandro primo Imperii sui anno, hoc est Ch. 222. quo Consulatam gesserant Antoninus Elagabalus IV. & ipsemet Alexander; qui ideo in iis subscribitur solus hoc modo, *Alexandro Aug. Cos.* quia nomen Elagabali jussu Senatus ab annalibus erasum fuerat. Addo, id etiam deduci posse ex ordine, quo leges in Codice disponuntur. Nam sub quolibet Imperatore Consulatatus sunt positi secundum seriem annorum succedentium. Unum & alterum exemplum Alexandri profero. L. I. *de accusation.* lib. IX. Cod. tit. 2. data legitur, III. Kal. Aug. *Alexandro A. Cos.* L. II. XI. Kal. Dec. *Alexandro A. Cos.* Lex vero III. quæ statim sequitur, subscripta est, IIII. Non. Novemb. *Maximo II. & Æliano Coss.* Hi Consules annum 223. aperuerunt. Priores igitur leges datæ sunt anno antecedente 222. Alexandri primo. Libro quoque VIII. tit. 45. *de evictionibus* quatuor extant leges datæ *Alexandro A. Cos.* post quas subsequitur alia signata iisdem Consulibus *Maximo II. & Æliano.* Præterea aliis in annis, in quibus Alexander Consulatam gessit, cum collega subscribit, ut in L. VII. *de testamento militis*, quæ data legitur *Alexandro A. II. & Marcello Coss.* Quod solus Alexander in recitatis legibus reperiatur, non alia est ratio quam,

quam, quia ejus Collega Elagabalus omiffus fuit.

At quoniam ab Alexandri epocha pendere terminos nonnullorum insequentium Imperatorum monuerat Cl. Vignolius in priore Differtatione pag. 7. fatis non prævidit, quantam cladem eorundem Cæfarum Chronologiæ effent illatura ea, quæ de ejusdem Alexandri exordio atque interitu literis mandavit. Hoc a me jam indicatum est cap. 6. & Cl. Valsechius lato calamo egregie demonstravit a cap. IV. ad VI. & rursus initio cap. XVI. Si enim Alexander circa mensem Julium an. 222. inauguratus, atque initio Septembris aut Octobris an. 235. extinctus est, Maximini mors prorogari debet usque ad mensem Octobrem an. 238. nam Maximinus tertium Imperii annum excessit, ut ejus nummi cum TR. P. IV. docent. Jam vero post Maximinum Balbinus & Pupienus tres circiter menses regnarunt, teste Zonara & Eutychio, utque res ab eis gestæ ex Herodiani narratione postulant. Balbinus ergo & Pupienus non ante exitum Decembris an. 238. interempti fuissent, & Gordianus III. in eorum locum suffectus. Sed hoc falsum: nam illi trucidati sunt dum agerentur ludi Capitolini. At excussis & perpenfis singulis opinionibus, quæ de tempore horum ludorum feruntur, Valsechius post Petavium ostendit actos eos fuisse æstiva tempestate. Rursus Gordiani exordium collocari nequit in Decembrem exeuntem anni 238. quia extant duæ supra triginta ejus leges, quas recitat Valsechius pag. 53. datæ omnes ante Idus Octobres ejusdem anni 238. *Pio & Pontiano Cos.* Hinc si Gordianus cœpisset Imperium Decembri mense, in idem tempus anno 244. ejus obitus esset figendus, eo quod annos circiter sex regnaverit. At vero prorsus alienum hoc esse docet Valsechius pag. 56. exhibitis duodecim legibus Philippi ejus successoris, quæ subscriptæ apparent ante Idus Octobres anni ejusdem 244. *Peregrino & Æmiliano Cos.* quarum duæ datæ sunt die XVI. Junii, altera die XIX. atque altera die XXX. ejusdem mensis. In unum coacta tot inscriptionum auctoritas, quamquam in dubium vocari nequeat, certiore adhuc

adhuc munimento firmanda mihi est. Extat Romæ in hortis Barberinis hoc Epigramma, quod exhibet Fabrettus domesticarum Inscript. lib. IV. pag. 339.

VICTORIAE. REDVCIS. D. D. N. N.

.....
PII. FELICIS. AVG. ET. OTACI

LIAE. SEVERAE AVG CON

IVGI. D. N. MILITES. LEG. II.

PART. P. F. F.

AET. Q. M. COCLATINO. AD

VENTO. COS. QVORVM. NOMI

NA. CVM. TRIBVS. ET. PATRI

.. S. INSERTA. SVN. DEVO

.. I. NVMINI. MAIESTATI

.. VE. EORVM. D. X. K. A/G. PERE

.. RINO. ET. AEMILIANO. N. HIS

... ET. EVOK. AVGG. NN. CVRA. AGE

.. E. POMPON. IVLIANO. R. LEG. EIVS

Consules Peregrinus & Æmilianus annum Chr. 244. monstrant: quo anno Gordianus occisus & Philippus proclamatus est Imperator. Hic vero, non primus, in parte exesa, five detrita latet; siquidem literæ illæ LIAE & subtus IVGI dictatum marmor Philippo & Otaciliae Severæ ejus CON-IVGI produnt. Ergo duobus saltem mensibus ante *Diem x. Kalendas AVGUSTAS*, seu 23. Julii, quo die ex Mesopotamia jam Romam pervenerat nuncius, Imperium adeptus erat Philippus, & Gordianus obierat; nimirum circa dimidium mensis Maii an. 244. quam Inscriptionem exscribendam diligentissime curavi.

Hæc cum ita sint, nequit mors Alexandri conferri in Septembr. vel Octob. mensem an. 235. quod in hac Differtatione veluti fundamentum suarum hypothesium præstruxit Vignolius; sed neque in diem xx. Julii mensis ejusdem anni, quod in priore opere statuerat. Nam retroactis uno vel duobus

bus mensibus, quor intercurrent ab extremis Julii ad Septembrem vel Octobrem, eodem fere modo tempora Maximini, Balbini, Gordiani, & Philippi extra suas sedes dilabantur. Hinc statutum ab erudito viro tempus necis Elagabali, atque inaugurationis Alexandri, quod tempus ab hujus pendet interitu, labefactari necesse est, atque evanescere excogitatam ab eo rationem explicandi Tribuniciam ejusdem Elagabali Potestatem quintam.

Ut vero tempus idem mortis Elagabali, quod nos in diem undecimam Martii ann. 222. conjecimus optime convenire cum temporibus succedentium Imperatorum ostendamus, eorundem epochæ, ut ante fecimus, sunt percurrendæ. Ergo si die undecima Martii an. 222. Elagabalo suffectus est Alexander, atque is annos tredecim, & dies novem regnavit, uti ex Eutropio, Lampridio, duobusque Victoribus ostendimus, mors ejus incidit in diem xx. Martii ann. 235. Jam Maximinum ultra tres annos regnasse diximus, seu *triennio & paucis diebus*, ut tradit Eutropius: quare ejus mors concurrit cum initio Aprilis an. 238. Ab hoc capite ducti dies minus quam nonaginta ex Zonara, Balbini & Maximini obitum conferunt ad exitum Junii ejusdem anni, hoc est circa Solstitium Æstivum, quo ludi Capitolini agebantur. Nam ludos hos circa Solstitium commissos fuisse, verum omnino arbitror; quippe qui a Domitiano ad exemplum Olympicorum instituti sunt. Plura atque egregia de illis commentatus est Cl. Valsechius.

Post Balbinum & Maximinum Gordianus *Romanum suscepit Imperium*, inquit Herodianus postremis verbis Historiæ suæ. Regnavit annos sex, ex Capitolino in Gordianis cap. 31. Eusebio lib. 6. cap. 24. atque utroque Victore; imo eos videtur excessisse, siquidem extant duo ejus nummi apud Mediobarbum pag. 341. TR. P. VII. notati. Si exorsus est Imperium circa medium Junii ann. 238. illud prorogandum esset ultra eundem mensem ann. 244. quod repugnat legibus ante relatis, atque Inscriptioni Fabrettianæ, ex qua ejus obitum, atque initium Philippi in Majum antecedentem retraxi-

traximus. Atqui plenus ille annorum numerus, quem tradunt Scriptores memorati, tam ultra sex annos quam citra referri potest. Nummi vero percussi sunt Romæ ineunte anno septimo circa medium Junium, cum nondum nuncius ejus mortis allatus fuisset, quas ob res nihil obstat, quin exordium Gordiani Junio Menſi an. 238. finem vero adſcribamus Maſjo an. 244. Ita a capite ad calcem Chronologia Cæſarum ab Elagabalo ad Gordianum & Philippum ſuis Cardinibus optime congruit; adeo ut exinde conſequatur Elagabali interitum, atque initium Alexandri nullo aptiore tempore quam die undecima Martii ann. 222. collocari poſſe.

At vero inter hoſ temporum articulos, iſ qui mortem Maximini ſpectat, quam nos ad initium Aprilis retulimus, cum non levibus difficultatibus ſit involutus, adhuc nobis firmandus eſt atque explicandus. Hoc ipſum quidem toto capite VIII. præſtitit Valsechius, ut Vignolium conſutaret, qui in primo opere ex Herodiano obitum Maximini in tempus æſtivum contulerat. Sed Vignolius ab hac poſtea ſententia in poſteriore opere cum reſceſſiſſet, omnia ea quæ tum longa diſputatione aſſeruerat, vel præteriit vel abjecit, quod cum novis ſuis hypotheſibus non convenirent, ut alibi monuimus: quo cum falſa ea eſſe, vel contemnenda falſus ſit, poteram equidem ab iſſdem retractandis abſtinere; eo etiam quod Valsechius, ut dixi, egregie penſum iſtud exſolverit. Sed ratio argumenti poſtulat, ut tempus perquiram, quo Maximinus in Italiam contendit, quo Alpes Juliæ tranſivit; & Aquilejam obſidione tentavit, ut inde mortem ejus congrue collocari poſſe ad initium Aprilis confirmem. Rem itaque ſic conſtituo.

Maximinus audita Afrorum defectione *tertio die milites alloquitur*, atque in Italiam *uno tantum die interjeſto* facere iter incæpit, inquit Herodianus lib. VII. cap. 6. In Thracia tunc morabatur cum exercitu, teſte Victore *de Cæſaribus*; qui addit propere eum in Italiam petiſſe; nimirum ſtatim ac audivit Afrorum defectionem. Romæ recitata ſunt in Senatu literæ Gordiani die 27. Maii, a quo die intra unum aut

alterum mensem potuit in Thraciam deferri nuncius rebellionis ad Maximinum. Ergo circa exitum Julii iter in Italiam suscepit. Cardinalis Norisius apud Pagium ad an. 238. num. IV. observat, cum Maximinus *Solva*, non *Salva*, uti Pagius typographi errore scribit, Norici Urbe transiret, adulationis gratia Inscriptionem dicatam VICTORIAE AVG. Kal. Februarii eodem anno, apud Gruterum pag. CIV. 3. Eam Gruterus ex Wolfangi Lazii cap. V. lib. XII. de Rep. Romana cum suis mendis exscripsit, atque hujusmodi est.

VICTORIAE. AVG

SAC

: : FL. TACITVS. CALAE

AVG

: : SEL. MARTIVS

: : C. CONI. AEL. BRT

: : PRO. S. ET. S. VISO. OMIN

: : CL. M. KAL. FEBR

: : PIO. ET. PONT

COS

Nuperi Editores Gruteri in tertio versu optime ex Scaligero legendum jubent *Calator* Augusti; sed non ita in quinto, & *suis nomine*: quod nihil significat. Relinquenda igitur sua lectio; nulla enim mutatione facta legendum, *Pro se & suis viso omine*, & in sequenti pro L. reposito I., C. I. M. nimirum, *Cai Julii Maximini*. Sensus itaque Inscriptionis hic est: Flavius Tacitus Calator Augusti & Sel. Martius Cornicularius Alæ Britannicæ adulationis gratia Inscriptionem dicatam: VICTORIAE AVGVSTAE: ita enim ii characteres sunt corrigendi; pro se & suis *viso omine*, fortasse per somnium, quod *omen* erat felicitis expeditionis *C. Julii Maximini*, ob eam causam *Victoria* ejusdem Augusti, *pro se*, & *suis* Commilitonibus, qui in omen ipsum conspirabant, monumentum hoc dicarunt, *Kal. Februarii, Pio & Pontiano Consulibus*, anno nempe 238. Certum itaque videtur, Ma-

ximi-

ximinum initio Februarii mensis Italiam propinquare; eo enim tempore, qui Solvæ erant in hibernis milites, non longe prætereuntem susceptis votis salutarunt. *Solva* Norici Mediterranei urbs erat, *Flavium Solvense* Plinio lib. III. cap. 24. dicta, hodie *Solfeld* prope Clangensfurtum in Carinthia. A Thracia vero, unde ex Victore discessit Maximinus defectione Afrorum audita, recta via per Pannoniam pergens, cum *Æmonam* pertransiit, de qua meminit Herodianus lib. VIII. cap. 1. hoc Maximini iter describens, non amplius quam millia passuum quadraginta ab urbe Solvensi aberat. In hac porro urbe stationem habuisse milites, præter Inscriptiones, quas refert Wolfangus Lazius de Rep. Rom. lib. XII. Cap. v. inter quas & nostra recitatur, aliæ etiam nuper circa eundem campum Soliensem erutæ, quarum memini in opere meo de Monumentis Veteris Antii, demonstrant. Eas vero, ne orationis cursum abrumpant, ad finem hujus capituli seponam; addamque ceteras iisdem in locis repertas, tum quod nondum sint editæ, tum etiam quod eruditis potissimum ob barbarorum nominum insolentiam, novitatis gratiam sint habituræ.

Itaque si Maximinus initio Februarii circa *Æmonam* erat, quæ urbs Italiæ fines proxime attingit, *Lubiana* nunc appellata, Sontium flumen, quod per aliquot dies, ut mox tradam, iter ejus interceptit, circa medium ejusdem Mensis, transgredi potuit: ut demus maximum hoc temporis intervallum difficultati itinerum, atque hiemis asperitati; cum ceteroquin ejus viæ, quam ego olim confeci, intercapedo tres dies sibi vix postulet; atque in Itinerario Antonini millibus passuum LXIV. definiatur.

Circa idem vero tempus obsidionem Aquilejæ aggressus est Maximinus; nam ab eo flumine, ubi pons erat, Aquileja duodecim tantummodo milliaribus abest, etiam Herodiano teste. Quod si medio Februario, obsidio Aquilejæ cœpta fuit; mensis unus cum dimidio qui superest usque ad finem Martii, ad quem retulimus mortem Maximini, satis super-

superque sunt ad ea omnia perpetranda, quæ in eadem obfidione acciderunt, quæque Cl. Vignolius in priore opere diligenter descripsit.

Sed jam objecerat idem vir Clarissimus pag. 81. non ante Aprilem vel Majum inceptam fuisse obfidionem, cum nives, quas, ut refert Herodianus lib. VIII. cap. 4. eo anno *longa hiems duraverat*, vix antea in ea regione potuerint esse solutæ. Historici verba sunt: *Ut autem ad fluvium pervenit, qui ad lapidem duodecimum procul est ab urbe, Aquileja, invenit ipsum maxima alvei profunditate ac latitudine defluentem. Etenim anni tempore solutæ vicinarum montium nives, quas longa hiems duraverat, maximum torrentem effecerat, sic ut nullo pacto transire exercitus posset.* Fluvius is Sontius est, nunc *Lisonzo*, qui a Plezianis montibus Goritiam præterfluens inde alluens Gradiscam tribus ab Aquileja passuum millibus ad Orientem in mare delabitur. Hunc amnem inter regionis maximos numerandum, apud antiquiores Geographos Strabonem, Plinium, Ptolemæum, non reperies, quod illum cum Natisone confuderint. At Natiso alius est, quem Paulus Diaconus lib. v. cap. 23. ad Forum julii collocat, hodieque nomen ipsissimum retinet, eandem urbem meam patriam interfecans, nobilissimo quadrati lapidis ponte utramque ripam jungente. In Sontium vero una cum Turro defluit, quod veterum errori causam dedit. Jornandes de rebus Get. cap. 42. vocat *Natissam*. Mela lib. 2. c. 2. *ditem attingit Aquilejam*. Plinius lib. 3. c. 18. *Natiso cum Turro præfluens Aquilejam*. Et licet Jornandes vocet Natissam, hæc eadem est ac Natiso; ut in nostris chartis, & præsertim in Chronico Juliani. Herodianus lib. 8. c. 2. in fin. ait, fluvium quem non nominat, præterfluere Aquilejam. Fluvius hic erat, quem postea memorat; scilicet Sontius. Ergo hic cum Natisone & Turro attingebat Aquilejam. Prima Sontii mentio est apud Cassiodorum lib. 1. Ep. 18. & Jornandem de rebus Geticis cap. 57. quo loci narrat Theodoricum per Sirmium, & Pannoniam recto itinere ascendisse, & Venetiarum fines ingressum ad pontem
Son-

Sontium nuncupatum castrametatum fuisse. Paulus Diaconus in continuatione Eutropii lib. xv. narrans excidium Aquilejæ: fuerat, inquit, in ea civitate *feminarum nobilissima*, *Tugna* nomine, forma quidem eximia, sed candore pudicitiae amplius decorata. Hæc dum habitaculum supra ipsa urbis mania haberet, turremque excelsam suæ domui imminentem sub qua *Natissa* fluvius vitreis labitur fluentis. Pius Pontifex in Decadum Blondi Epitome pag. 6. narrans hunc casum, fluvium non *Natissam*, sed *Natisonem* appellat & lib. xvi. idem Paulus narrans adventum Theodorici in Italiam: per *Sirmium Pannoniamque iter faciens ad Italiam venit*. Ac primum juxta *Sontium flumen*, quod non longe ab *Aquileja* labitur, castra componens: . . . ibi ei cum grandi suorum exercitu totius Odoacer Italiae viribus occurrit. Ceterum pontem *Sontii* demoliti sunt Aquilejenses, ut viam eidem Maximino interciperent, quod opus magnum, inquit Herodianus lib. viii. cap. 4., atque pulcherrimum veteres Imperatores, non Triumviri qui Coloniam Aquilejam deduxerunt, uti arbitratus est Palladius Rer. Forojul. lib. 3. pag. 38. & lib. vii. pag. 119., lapide quadrato, non uno fornice, ut idem auctor priore loco scribit, quod situm & latitudinem fluminis intuentibus incredibile fit, sed pilis veluti quibusdam parvis sensim crescentibus, construxerant. Pilarum vestigia inter Goritiam & Gradiscam, in loco qui *Mainiza* vocatur, nostri adhuc ostendunt. Porro post Maximini interitum Aquilejenses pontem *Sontii* refecisse ex Jordanis paullo ante allatis verbis constat.

Cum habeamus Maximinum pertransisse vicina *Æmonæ* loca circa initium Februarii, atque ob eam causam accessus ad fluvium, de quo Herodianus, differri non possit ultra medium ejusdem mensis, liquido apparet, eundem Herodianum, cum anni tempore solutas nives vicinorum montium scripsit, non intellexisse vernam tempestatem circa Majum mensem vel Junium, quo solent nives liquari; sed peculiarem temporis rationem seu certam aeris calive temperiem, qua eorum montium nives solvi etiam medio Februa-

bruario potuerint. Quæ res cum a Cl. Valsechio cap. VIII. postremi operis pag. 73. egregie deducta fuerit ex verbis ipsis Herodiani *ἡ τῆ ἐτὸς ὥρα anni tempus: quæ temporis ratio, quæ solvi nives potuere*, pergit vir doctus, *perspicuum est non solum a calore aeris, quod iis certe in locis adultum ver indicaret, sed & ab ingruentibus pluviis, & a flantibus austris induci potuisse; quibus vel media hieme nives liquari, fluviosque exinde turgescere & exundare quotidie videmus*. Hoc quoque ex nostra pene certa observatione mirifice confirmatur. Nam eam *temporis rationem, quæ solvi nives potuere, perspicuum est*, ut iterum verbis ejus utar, petendam esse, *non a calore aeris adulto vere nives liquante, sed ab ingruentibus pluviis, & a flantibus austris, quibus vel media hieme nives liquari, fluviosque exinde turgescere & exundare quotidie videmus*. Aliter stare non posset, quod jam firmavimus, Maximinum medio Februario invenisse Sontium a nivibus solutis maximum torrentem effectum. At certe si ceteris fluviis, Sontio potissimum id accidere solet; qui sepiissime ut & ceteri provinciæ nostræ Foro-Julien-sis omnes, hiemis tempore in immensum augetur, austrino vento nives solvente, ac pluvias copiosissimas ciente. Quod ita esse mihi nuper, cum Forum Julium patriam urbem inviserem, quæ a Sontio duodecim fere milliaribus abest, testati sunt viri ipsius fluminis accolæ; atque accidisse præsertim hieme ante præterita, ipsoque Januario mense labentis hujus anni MDCXVI. cum Sontius liquatis nivibus vicinorum montium ingenti aquarum mole turgescens, uti ripis & aggeribus minime continetur, in campos atque agros undequaque exundavit. Quod facilius & frequentius in Foro-Julien-sis provinciæ fluminibus accidit, ob ejus regionis situm ac positionem. Alpes enim Juliæ, quæ eam provinciam in theatri modum undique ambiunt, recta objectæ sunt Adriatico mari, quod cum in tota sui longitudine in Austrum, imo Notopeliotem vergat, venti ab ea plaga flantes, qui non raro per hiemem immensam vaporum copiam a pelago haustam longe lateque in oppositos mon-

montes impellunt, atque in pluvias immodicas cogunt; & cum temperie sua tepidiores sint, nives iis incumbentes etiam liquant. Quapropter quandocunque hiberno tempore Australes venti adspirant, duplici ea de causa ingens aquarum vis undequaque irrumpit. In aliis regionibus non ita frequenter, sed tamen non raro amnes exundant hieme. Anno 1706. mense ipso Januario vidimus non longe ab hac Rhodigina urbe Padum adeo excrevisse immaniter, ut non uno loco aggeres altissimos, quibus continetur, absumpserit, & latissime per uberrimos campos immensum pelagus effuderit.

Mirum itaque esse nequit, medio Febuario Sontium flumen nivibus solutis, quas non *longa*, ut Politianus interpretatur, sed *tota hiems*, quæ idibus ipsis Februariis, secundum morem antiquorum finiebat, ut recte Valsechius monet, duraverat, maximum torrentem effecisse. Atque inde deducto initio obsidionis Aquilejæ, additoque etiam tempore, quo eam præmissæ a Maximino copiæ ante ipsius adventum tentaverant, recte ab Herodiano *diuturna atque inexplicabilis* vocari eadem obsidio potuit; usque ad finem videlicet mensis Martii, quo a militibus Maximinus obtruncatus est. Quod erudite atque apposite idem vir Clarissimus explicat adversus Cl. Vignolium, qui id objecerat, ut dilata obsidione Maximinum æstivo tempore interemptum offerret. Nec minus solide confutat argumentum ejus alterum, ex diurna seu meridiana Maximini quiete petittum; tum quod verbum *quiescere* quo hoc loco utitur Herodianus, non tam *dormire*, quam *vacare otio* significet; tum etiam quod veteres meridiabantur quocunque anni tempore. In quam rem addam exemplum unum, quo Principes in Castris quoque & verno ipso tempore, quo Maximinum credimus interfectum, meridiari solitos apparet. Cæsar cum Gergoviam obsideret, tanta celeritate hostium castra ingressus est, ait ipse de bello Gall. lib. VII. cap. 19., ut *Theutomatus rex Nitobrigum subito in tabernaculo oppressus, ut meridie conquieverat, superiore corporis parte nudata, vulnerato equo, vix se ex manibus prædantium militum eriperet.*

Sublatis itaque iis impedimentis, quæ olim Vignolius ob-
jecerat, dein præterierat, nihil amplius obstat, quin Maxi-
minum interfectum fanciamus sub exitum mensis Martii
ann. 238. atque inde recedendo cum annis tribus & aliquot
diebus, quibus in Imperio vixit, Alexandri obitum ad diem
xx. ejusdem Martii ann. 235. figamus. Et demum ejus an-
nis tredecim, diebusque novem computatis, Elagabali mor-
tem, atque ipsius Alexandri initium undequaque multiplici
argumentorum genere obfirmatum in diem xi. Martii an. 222.
conferamus: quæ erat præcipua, & cum Cl. Vignolio longe
lateque agitata hætenus disputatio.

Quod ita cum sit, spesque nulla supersit amplius eidem
Clarissimo viro proferendi utrumque illum temporis cardi-
nem ultra diem xvi. Maii, atque exinde explicandi Tribu-
niciam Pot. v., nobis contra, constituto tot præfidiis firmis-
simo illo diei undecimæ Martii munimento, hoc denique
sedet animo, nummos Elagabali cum Trib. Potestate v. cu-
sos ante eum diem extremum ejusdem Imperatoris, ut pro-
ximo die xvi. ejusdem mensis, quo ipsa Potestas quinta
solemnibus Elagabali quinquennialibus instauranda erat, in
populum spargerentur. Quæ latius explicata, atque a ra-
tionibus objectis sunt vindicata Capite viii.



C A P U T XV.

*Valsecbii de initio Imperii Severi Alexandri opus. Vignolii de
hoc initio sententiam oppugnat. Ab se denuo proposita,
iterum iisdem argumentis impugnatur, quæ & novis ratio-
nibus fulciuntur. Tria congiaria distribuit Elagabalus.
De tempore & occasione tertii, non satis constat. Nisi
quod datum apparet eodem Consulatu ii. quo alii duo,
hoc est ann. 219., in quo decurrebat Trib. Pot. ii., atq.
an. ii. Imperii Elagabali. Hinc Valsecbii Systema falsum.
Ejusdem obiecta dissolvuntur. Frustra contendit, hæc con-
giaria Nicomediæ fuisse distributa. Quod incredibile osten-
ditur.*

ditur. Nummos sic signatos pertinere ad congiaria Romæ distributa, non vero ad largitiones factas militibus Nicomediæ, iterum probatur. Donativa militum in nummis; item largitio facta militi & populo simul, quomodo dignoscantur. In memoratis nummis adsunt signa congiarii distributi populo, non militibus. Hinc iterum falsum ejusdem Systema. Cur etiam incredibile. Nullum reperitur numisma Elagabali, in quo numeri Trib. Pot. discrepent a numeris Consulatus; nisi eo anno in quo Consul non processit; quod eveniret in supposito ejus Systemate, quod omnino deploratum est. Hinc objecta omnino inania sunt. Quantumvis Elagabalus filius fuerit dictus Antonini, ac successor; non inde sequitur verisimilis ratio, cum traxisse Imperii sui initium a morte Caracallæ.

SED nihil haftenus effectum, si rebus Cl. Vignolii ever-
sis, stet adhuc adversarius alter, qui olim a nobis
priore in Opere pro conclamato dimissus, instauratis nunc
viribus rursus in arenam descendit. Is est Virginius Valse-
chius, qui nuper, ut ante non semel dictum est, opus sane
eximium atque eruditum, *de Initio Imperii Severi Alexan-*
dri, in lucem edidit; in quo cum eodem Vignolio sibi præ-
sertim disceptandum suscepit, quod ipse indicat titulus, ut
ejus de eodem initio Alexandri opinione convulsa, quo mihi
socias manus adjunxit, suam deinde tueretur quam antea
proposuerat in libro alio, cui titulum fecerat *De M. Aurelii*
Antonini Elagabali Tribunicia Potestate v. Illius vero ad
hanc Potestatem explicandam sententiæ in eo stabat ratio, ut
Elagabalus annos Imperii sui, ac Tribunicia Potestatis nu-
meraverit ab interitu Caracallæ. At ego in priore Disserta-
tione *de Annis Imperii M. Antonini Elagabali*, novam hanc
methodum exponendi Tribuniciam ejus Potestatem v. totis
quatuor primis capitibus impugnaveram, atque argumenta
omnia Cl. Viri continenti oratione disjeceram. Quapropter
ille, postquam Vignolio, qui eandem molam versaverat,
fatis se fecisse arbitratus est, tela quoque mea retundere, &

singulatim objecta adgressus est dissolvere. Hæc vero objecta duplicis erant generis: quæ videlicet adversus ejus rationes, quibus sententiam suam suadere conabatur, protuli; ac quæ jugulum causæ statim petunt, atque ejus structuram funditus evertunt. Priora, quæ in conjecturis utrimque compositis versantur, prætereunda mihi sunt; nam si posterioribus vinco, res tota confecta est. Ac vincendum mihi esse, tam puto, quam quod maxime. Duo vero argumenta hæc erant, quibus potissimum Cl. Valsechii Systema oppugnabam: alterum quo illud plane falsum evincitur, alterum quo incredibile. Utrumque paucis comprehendam, & ea quæ V. C. obiecit, dissolvam.

Quoniam explicandi erant nummi Elagabali cum Tribunicia Potestate V., neque annis ejus Imperii, quod a pugna cum Macrino non excessit annos tres, menses novem, & dies quatuor, ut sæpe diximus, idem numerus Potestatis quintæ aptari posset, arbitratus est Cl. Valsechius, Elagabalum numerasse annos suos a morte Caracallæ, qui ante Macrinum regnavit. Cum vero Caracalla fato functus fuerit die VIII. Aprilis anno Chr. 217. ab eo die numeratis annis Imperii ac Tribunicie Potestatis, quintus annus, & quinta Tribunicia Potestas inibat die VIII. Aprilis ann. 221. a quo tempore usque ad interitum Elagabali initio Martii mensis ann. 222., cudi potuerunt nummi eadem Potestate V. insigniti. Commodior certe ratio nulla inveniri poterat, qua difficultates omnes, quæ in hac controversia agitantur, uno veluti spiritu exhauriantur. Quæ ego verba cum ante scripssissem alio in opere, mirifice mihi delectatus est V. C., eaque semel, iterumque, ac tertio repetiit; non animadvertens quo figuræ colore a me prolata fuerint. Itaque commentum hoc ejus falsum omnino dixeram, atque ex ipsis nummis ab eo recitatis evictum. Nummi sunt apud Mediobarium ac Vaillantium, in quibus repræsentantur Congiaria duo ab Elagabalo distributa, in aliis sub hac epigraphe: TR. P. II. COS. II. LIBERAL. AVG. in aliis vero; TR. P. II. COS. II. LIB. AVG. II. quibus nunc addo
alium

alium exhibentem tertium Congiarium: TR. P. II. COS. II. LIB. AVG. III. Primum ex his Congiariis distribuit Elagabalus statim ac Romam advenit: de quo luculentum est testimonium Herodiani lib. v. cap. 5. *quapropter*, inquit, *ut in Urbem pervenit, nihil scilicet novum Romani viderunt, insueti jam pictura. Diviso igitur CONGIARIO in populum, ut mos est Imperium INCIPIENTIBVS.* Alterius est mentio apud Dionem, seu ejus excerptorem Xiphilinum, quod datum refert in nuptiis Corneliæ Paullæ: quas nuptias celebratas fuisse in eodem secundo Consulatu, mecum consentit Valsechius. De tempore & occasione tertiaræ liberalitatis nihil constat; nisi quod ex nummi Epigraphæ recitata data apparet in eodem Consulatu. Porro in Urbem pervenit Elagabalus post mensem Aprilem, nimirum sub initium Julii, ut latius a nobis demonstratum est, atque idem vir Clarissimus fatetur. Post mensem igitur Aprilem in Consulatu secundo, hoc est anno 219. labebatur Tribunicia Pot. II. atque annus secundus Imperii Elagabali. Atqui si ejus anni cœpti fuissent numerari a morte Caracallæ, nempe die VIII. Aprilis ann. 217., post Aprilem anni 219. non SECUNDA Tribunicia Potestas fuisset in cursu, sed TERTIA. Falsum itaque est, Elagabalum computasse annos Imperii sui a Caracallæ excessu. Hoc eorum est in genere argumentorum, quæ necessario evincunt; & facti, ut ajunt, evidentiam afferunt.

Persensit hoc vir doctus, atque etiam aliquando fassus fuit. Sed quoniam de rei summa agebatur, & ne uno ictu, quæ ipse tantis operibus struxerat, labefactata conciderent, omnibus modis fulcienda sibi esse constituit. Ergo Congiaria in memoratis nummis expressa, quæ lata diximus Romæ ab Elagalo post sui adventum, novo & ingenioso machinamento in Asiam cogitavit transducere. Nimirum primo quærit; unde ego cum Vaillantio habeam, eos nummos ad Congiaria tributa Romæ pertinuisse? Notum deinde esse ait, liberalitatis nomine in nummis non solum Congiaria quæ populo, sed & donativa quæ exercitui in bello dispensabantur, designa-

ri . Cur ergo , subdit , ad aliqua id genus donativa , quæ Nicomediæ , cum Kal. Januariis anni Chr. 219. Consulatam II. iniit , ac dein cum seditiones in Bythinia obortæ componendæ ei fuere , dedisse militibus Elagabalum non inverisimile , spectasse eæ liberalitates non potuere ?

At mirum est profecto , Cl. virum a me quærere , unde habeam , Congiaria in nummis obsignata fuisse tributa Romæ , qui habeo testes amplissimos , Herodianum ac Dionem , sibi nequaquam ignotos , Congiaria duo fuisse ab Elagabalo distributa populo cum Romam pervenit ; & non ego ab eo quæram potius , unde habeat , hæc ipsa Congiaria data fuisse militibus Nicomediæ , qui nullum prorsus auctorem habet testantem , concessa unquam donativa militibus , dum Imperator Nicomediæ morabatur ? Hoc quidem absurdo se adpersum agnovit : sed , inquit , notum est , non omnia a Scriptoribus commemorari ; & ad hæc Congiaria & Donativa quod attinet , persæpe Antiquarii ipsi observarunt , Historicorum de illis silentium a nummis , in quibus eadem repræsentantur , non raro suppleri . Sed nos silentes Historicos non habemus ; quinimo clamat hinc Herodianus datum populo in sui adventu in Urbem Congiarium ab Elagabalo ; inde Dio non multo postea in nuptiis Cornelie Paullæ . Quis vero in animum inducat , Congiaria in nummis expressa non ea esse , quæ tam manifeste ab Historicis memorantur ; sed ea esse , quæ nusquam reperiuntur , neque ulli uspiam Scriptori sunt cognita ? Sed mirum hoc rursus accidit , extare nummos , ut viro Cl. placet , repræsentantes tres Liberalitates Elagabali tributas militibus in provincia remotissima ; nullos vero extare nummos exhibentes duo Congiaria , quæ certo certius , Valsechio etiam satente , ipsa in Urbe distributa sunt . Nam si extarent , signati essent , secundum docti viri hypothesim , Trib. Potestate III. Cos. II. Ejusmodi nummi nusquam visi sunt . Demum tres largitiones militibus dedisset Elagabalus in tribus mensibus , qui a Kalend. Januariis ann. 219. in quibus iniit alterum Consulatam , ad initium Aprilis , cum Nicomedia discessit , lapsi sunt : quæ
&

& sine exemplo, & plane incredibilis res est; eo etiam maxime, quod non multo ante *acervos nummorum* largitus fuerat iisdem militibus, ut sibi Imperium deferrent, Herodianò teste lib. v. cap. 3. Adde his duo alia Congiaria tributa populo Romano in eodem Consulatu secundo; jam quinque Congiaria uno eodemque anno vertente profudisset: quod rursum & sine exemplo est, & fidem prorsus excedit. Omnia hæc cum vera esse nequeant, ac ne quidem similia veri, restat ut Congiaria in nummis signata sub Trib. Potestate II. & Consulatu II. non alibi quam Romæ distributa fuerint.

Sed quandoquidem petit a me iterum Valsechius, ut ostendam, eos nummos ad Congiaria Romæ distributa referendos esse, non vero ad largitiones factas Nicomediæ militibus, ita illi morem geram, ut iudicio oculorum res tota dirimenda sit. Docent Antiquarii, & doctissimus inter eos Spanhemius de præst. & usu Numismatum Dissertat. IX. pag. 822. donativa militum in iis nummis repræsentari, in quibus ante suggestum adstant Prætoriani milites, aut in quibus figura stans dextera Congium, sinistra Labarum tenet. Quam rem confirmant nummi, alter Septimii Severi apud Vaillant. tom. I. de nummis aur. & arg. p. 112. in quo inscripta est LIBERALITAS AVGUSTI. *Imperator in substructione sedet, hinc liberalitas, hinc figura MILITARIS stans, alia in imo*; alter Philippi apud Mediobarbum pag. 345. cum hac Epigraphe: LIBERALITAS. AVG. II. *duo Imperatores subselliis insidentes donativum distribuentes, PRÆTORIANIS adstantibus*. At si largitio facta fuerit militi, ac populo, adstat cum figura TOGATA, tum alia PALUDATA, uti cernimus in duobus nummis Alexandri apud eundem Mediobarbum p. 320. & 324. Datum vero aliquando Congiarium simul populo & militi docet Dio apud Xiphilinum initio lib. 76. loquens de Septimio Severo: *Severus autem postquam attigit decennium principatus sui, Congiario populo, Prætorianisque militibus dato*.

Percurrat ergo oculis V. C. nummos nostros; & videat, num miles aliquis adstet; ut exinde inferre possit, liberalitates in ipsis expressas fuisse factas militibus. Ego vero non mili-

res video, sed utique figuram *togatam*, nempe ex populo Romano, apud Vaillantium tom. II. de nummis æreis pag. 136. qui eorum unum ita describit. LIBERAL. AUG. II. TR. POT. II. COS. II. *Imperator sedens in substructione, adstat Liberalitas, in imo alia figura TÓGATA*. Et de nummis aur. & arg. pag. 287. LIB. AUG. II. COS. II. *Imperator sedet in suggestu, hinc Liberalitas, & inde Præfectus Prætorio stant, ROMANUS ascendit gradus*. Quæ liberalitas secunda data fuit decurrente Pot. Trib. II. ut in superiore, atque aliis nummis apparet. Rursus duo sunt nummi Elagabali apud Mediobarbum pag. 312. sub iisdem Tribunicia Pot. II. & Consulatu II. in quibus visitur *figura stans, dextra CONGIUM, sinistra Cornucopiæ*. Congium, nisi junctum sit cum Labaro, ut ante docuit nos Spanhemius, significat Congiarium dispensatum populo, non militibus. Ita cum nummi nostri nequaquam pertineant ad Donativa Militaria, sed ad Congiaria divisa in populum Romanum, nullum amplius Cl. Valsechio restat effugium, quin cogatur denuo fateri, systema suum de annis Elagabali ab interitu Caracallæ numeratis undique falsum esse.

Præterea illud quoque incredibile evincitur: quod alterum erat caput ante propositum. Nam si Elagabalus numerasset Tribuniciam Potestatem suam a die VIII. Aprilis anni 217. illamque instaurasset eodem die in annis subsequentibus, cogeremur dicere, per novem fere menses in singulos ex tribus annis Imperii, a Kal. Januariis ann. 219. ad Kal. anni 222. elapsis, & in totum per septem & viginti menses nullum fuisse percussum numisma, vel certe nullum ad nos pervenisse. Si enim ejusmodi numismata haberemus, discreparent numeri Trib. Potestatis a numeris Consulatus: nimirum anno 219. a die VIII. Aprilis, quo die ex hypothesi Valsechiana, Elagabalus iteravit Trib. Potestatem III. usque ad Kal. Januarias insequentes, signati essent nummi cum Trib. eadem Potestate III. & Consulatu II. ab Aprili anni 220. ad Januarium cum Trib. Pot. IV. & Conf. III. & tandem ab Aprili anni 221. ad Januarium anni 222. cum Potestate

V. &

v. & Conf. III. hoc enim anno Consulatum non inivit. At nusquam in universa rei nummariz penu reperitur vel unum numisma Elagabali, quod exhibeat ejusmodi numeros Trib. Potestatis discrepantes cum Consulatu. Extant utique nummi, in quibus juncta est Trib. Potestas IV. cum Consulatu III. at isti pertinent ad annum 221. in quo Consul non processit, ut dixi, non vero ad annum 220. quod quidem objectum indicavit V. Cl. initio paginae 189. sed statim deferuit, agnoscens nihil nobis officere. Ergo novem menses in primo anno 219. totidem in utroque duorum insequentium siluerunt monetariae officinae Elagabali, vel temporum invidia nobis unum aliquem ex iis nummis denegavit: cum ceteroquin ad nos trasmissi sint non minus quam sexaginta nummi apud Mediobarbum cum TR. POT. II. COS. II. & TR. P. III. & IV. COS. III. quos omnes dicendum esset fuisse cufos in solis illis tribus mensibus, qui in singulis tribus annis memoratis supersunt; nullum vero in septem & viginti mensibus: quod omnino est incredibile.

Quid ad hæc vir Clarissimus? Agnoscit difficultatem, eamque fatetur, *non exiguum systemati suo molestiam creare*. Propterea huc, atque illuc se vertit, ut perfugium aliquod nanciscatur: modo scilicet inculcat, argumenta quæ ex nummis petuntur, qui ad nostram notitiam non pervenire, incerta nonnunquam fallaciaque esse: dein difficultatem difficultati opponit, ac minori cuiquam incommodo, cui hæc sua obnoxia sunt, indulgeri aliquid postulat, in gratiam alterius gravioris difficultatis, quæ ex nummis Potestate V. signatis oritur: & demum nostras quoque conjecturas ad explicandam eandem Potestatem v. olim allatas suis minime carere incommodis objectat. Habeant vero & nostræ conjecturæ sua incommoda; quæ tamen pridem depulimus: sed quæ premunt Valsechii systema ejusmodi sunt, ut se ab iis relevare nunquam sperare possit. De uno autem, vel altero nummo non agitur, qui ad nostram notitiam non pervenerit; sed de tanto nummorum numero, quantum cui-

que putare liceat, cudi potuisse intra septem & viginti mentes : quibus cum careamus, necesse est credere, nunquam extitisse. Atqui extant ferme sexaginta apud Mediobarbum, notis temporum numeralibus insigniti, quos cogitare omnes percussos fuisse intra novem menses, nullos vero percussos septem aliis & viginti mensibus, qui ex tribus annis, a Kal. Januariis ann. 219. ad Kalendas Jan. anni 222. supersunt, vel nullum ad nos fuisse transmissum, nemo qui in re antiquorum nummaria versatus est, sibi unquam persuadere poterit. Hæc vero non minoris, uti vocat V.C. incommodi res est; sed quæ gravissimam atque inextricabilem difficultatem affert, & nulla unquam indulgentia expiandam. Cum ergo nummos non habeamus, qui præferant Potestatem III. cum Consulatu II. & Potestatem IV. & V. cum Consulatu III. consistere proinde nequit Systema Cl. Viri, quod per hujusmodi discordantes numeros procedere oportet.

Hæc cum ita se habeant, opus non esse arbitror cetera refellere, quæ in hoc capite XVII. regerit Cl. Valsechius adversus ea, quæ illi ego objeceram in prima Dissertatione, Nam si evidentissime semel falsum esse constat, atque iterum incredibile, Elagabalum numerasse annos Imperii sui, ac Tribunicia Potestatis ab interitu Caracallæ, alia omnia, quæ uterque nostrum dixerit, inania erunt ac supervacanea: nihil enim evidentiâ ipsa evidentiùs esse potest. Quamobrem nec vellem, ut tam fidenter nobis inculcasset p. 195. atque alibi, pro illa ejus conjectura de annis Elagabali cœptis ab exitu Caracallæ verum fundamentum adesse, veramque unum ex alio verisimiliter inferendi rationem elucere; eo quod revera Elagabalus Antonini Caracallæ filium se se jactabat, inscribebarque: hoc nomine milites eum elegerant, ad quod caput est, non Antonini modo filium, sed & ejus in Imperio successorum iidem milites declaraverant. Vera hæc sint profecto: sed verum esse nequit, exinde ori verisimilem rationem, Elagabalum ipsum traxisse Imperii

rii sui initium a morte Caracallæ. Nam rei evidentia excludit atque evertit similitudinem veri : & quantumvis Elagabalus filius fuerit dictus Antonini, ac successor; attamen ab Antonino exordium Imperii sui auspicatus non est, quia anni ejus in nummis notati nullo artificio aut ingenio ad exordium illud referri possunt.



I.

TI. GLAVD. TERTIVS. ET. POMPONI.
PROCVLA. TI. GLA. CVPITO. F. MIL.
LEG. XXI. V. F.

I I.

[†]lit. E
decr. D. M. AVR. POTITVS. VET. AL. AVG. VEXE.
ET. SVRILLA. TRITI. FIL. CON. KAR.
ET. SIBI.

I I I.

I. O. M. D. SEVERINVS. SILVINVS. ET.
AVR. BONIATVS. MIL. LEG. II ITAL.
SEVERI. V. S. L. L. M.

I V.

D. M. M. AVRELIVS. SECVNDINVS. MIL.
LEG. II. ITAL. STR. COS. V. F. S. ET. ARRIÆ.
VALENTINÆ. CONIVGI. KARISS. ET.
VALERIÆ. TVTÆ. CON. LIB. SCRIBEN.
CVRAVER.

V.

[†]addita
es R. IVLIO. APRILI. [†]TIB. CHORT. I. ASTV=
[†]loco L
Mar I. RVM. STIP. XXII. CAVRVBLENDONIS.
F. CON. V. F. ET. SIBI.

TAC-

V I.

TACCIUS. MARCVS. ET. SATVRNINA. SATVRNI=
 NI. FIL. V. F. S. ET. ACCIO. MAXIMO.
 FIL. PIENT. MIL. LEG. II. ITAL. FRVM.
 AN. XXII.

V I I.

G. POMPONIVS. FELIX. V. F. BELA=
 =TVLIÆDVNI. F. VXORI. ET. POPONIO
 C. F. MARTIALI.

V I I I.

D. M. TIB. IVL. SENECONI. O. ET. BELL.
 AVTETÆ. TIB. IVL. ASPRENAS. ET.
 TIB. IVL. IVLIANVS. PAREN. BENE.
 MERENT. FECR.

I X.

DAPHINO. GIVLI. VOGITOVILI. ET.
 SECVNDÆ. VXORI. VIVÆ. ET. ASTERI.
 ET. FRONTONI. VIVO. FILI. V. F.

X.

IOVI. DEPVLSORI. ET. NYMPHIS. q.
 LVCCIVS. MAXIMVS. V. S. L. M.

X I.

C. ABALIO. PATAVI. F. M. VLPIVS.
 SENECIO. FRATRI.

TER.

X I I.

TERTIO. CÆSARIS. L. CAVSIA. OCCI.
F. VXOR. V. F.

X I I I.

BARBIÆ. P. F. VERÆ. VXORI. P. TITIVS.
P. L. ADRIIVS. SIBI. ET. SVIS V. L.
TITIO. P. F. CLEMENTI. AN. XII.

X I V.

SABINIA. HELENÆ. VIVA. F. SIBI. ET.
ÆLLIO. TERTIO. B. CONIVGI. OPTIMO.
ET. CASTO. F. ANN. VIII.

X V.

C. SENESIVS. HERMES. SIBI. ET TERTIÆ.
VX. ET. ENICETI. FIL. ET. CORNELIO.
AROGO.

L. M E N A V D O N I V S
I. L. F L A C C V S

FRANCISCI TRECCII
O R A T I O

I N F U N E R E

PHILIPPI A TURRE
EPISCOPI ADRIENSIS.

1. The first part of the paper is devoted to a general discussion of the problem of the existence of a solution of the system of equations

$$\begin{cases} \Delta u = f(x, y, z, u, v, w) \\ \Delta v = g(x, y, z, u, v, w) \\ \Delta w = h(x, y, z, u, v, w) \end{cases} \quad (1)$$

in the domain D bounded by the surface S .

2. In the second part we consider the case when the functions f, g, h are linear in u, v, w and the boundary conditions are of the type

$$\begin{cases} u = \alpha(x, y, z) \\ v = \beta(x, y, z) \\ w = \gamma(x, y, z) \end{cases} \quad (2)$$

on the surface S . In this case the system (1) can be reduced to a single equation for one of the functions u, v, w .

3. In the third part we consider the case when the functions f, g, h are quadratic in u, v, w and the boundary conditions are of the type

$$\begin{cases} u = \alpha(x, y, z) \\ v = \beta(x, y, z) \\ w = \gamma(x, y, z) \end{cases} \quad (3)$$

on the surface S . In this case the system (1) can be reduced to a single equation for one of the functions u, v, w .

4. In the fourth part we consider the case when the functions f, g, h are cubic in u, v, w and the boundary conditions are of the type

$$\begin{cases} u = \alpha(x, y, z) \\ v = \beta(x, y, z) \\ w = \gamma(x, y, z) \end{cases} \quad (4)$$

on the surface S . In this case the system (1) can be reduced to a single equation for one of the functions u, v, w .

5. In the fifth part we consider the case when the functions f, g, h are of the fourth degree in u, v, w and the boundary conditions are of the type

$$\begin{cases} u = \alpha(x, y, z) \\ v = \beta(x, y, z) \\ w = \gamma(x, y, z) \end{cases} \quad (5)$$

on the surface S . In this case the system (1) can be reduced to a single equation for one of the functions u, v, w .

Illustrissimo & Reverendissimo D.

JO. FRANCISCO BARBADICO
B R I X I Æ E P I S C O P O .



A semper opinio nostra fuit , Joannes Franciscus Barbadice, Præsul amplissime , ut ut res optimi moris , plenaque prudentis consilii sit , si quis forte publicis consignare litteris velit alicujus præclarissimi atque integerrimi viri laudes , illas emittere non in tutela , ac nomine alterius hominis , qui laudati dissimilis sit , dissimilitudo enim isti tacite obijceretur ; sed alicujus , qui laudatum ipsum virtute æquiparet : ita enim par paris laudes tuetur , & dum unus laudatur duo laude digni indicantur . Quidquid de ipsa sentiant , ac judicent alii , nos in hac profecto sententia semper erimus : nunc vero præsertim ab ea ne tantulum quidem abire instituimus . Quapropter cum optimi , ac sapientissimi Antistitis Adriensis Philippi a Turre , qui dum ætatem ageret , eximium Italiæ nostræ ornamentum fuit , funebrem laudationem edituri jam simus , illam addici , & commendari tibi volumus : in te enim qui vivum ac spirans perfecti Præsulis exemplum es , neutiquam disparerem illius , qua Philippus adeo præluxit , virtutem agnoscimus , ac demiramur . Verum non hac tantum de causa ipsam committimus præsidio , atque auctoritati tuæ . Committimus etiam , quia hanc tibi pergratam perque jucundam fore scimus . Illum enim amabas plurimum , plurimumque suspiciebas , & tuum ad illius consilium omnino ac prorsus accommodabas . Ut cetera missa faciamus , nonne desiderium ac consilium eruditissimi illius Præsulis explevisti , cum utilissimam Ecclesiasticæ Historiæ in-

stituisti atque adornasti Academiam? Nunc plane cognoscis, quam opportune, quamque sapienter hoc ipse studium Dei atque Ecclesiæ ministris proponeret ac suaderet, urpote emolumenti plenissimum. Ab eo certe studio ad summam utilitatem, ac laudem adductus est Brixianæ Urbis Clerus, qui Tibi paret, Urbanus. Etenim præterquam quod haurit ex eodem amplissimam rerum omnium, quæ ad Ecclesiasticam pertinent rem, notitiam, conciliavit etiam sibi adprobationem, ac benevolentiam eruditorum, præcipueque nobilissimi, ac præstabilibus scientiis ornatissimi viri, Scipionis Marchionis Maffei, cujus consilio, ac judicio laudate, ac sapienter in expendendis doctissimis Academiæ ejusdem disceptationibus identidem uteris: cujus ex ore, quasi alumni disciplinæ suæ in Academica omni sessione nos omnes pendemus: cui, ut admonet prægrande Venetæ nobilitatis decus, Abbas Antonius Contius (a), debet Italia Poetica perfectæ absolutæque Tragædiæ exemplar, Equestris vero ordo Ethices suæ correctionem, illustrationemque: cui, ut (b) idem innuit, acceptam referet Italia conservationem custodiamque honoris illius, quem ipsa in liberalium artium inventionem, & cultura luculenter indepta est: qui denique, ut alter junior Plinius, favet seculo (c), ne sit sterile, & effœtum, mireque cupit, ne nobiles nostri nihil in domibus suis pulchrum, nisi imagines habeant. Verum non hic conquiescis; sed aliud Ecclesiæ tuæ superjacis, atque addis utilitatis auctarium. Clerum scilicet ipse tuum vocas, atque excitas tum ad optima, quæ jam reviviscunt, studia, tum ad illarum linguarum notionem, ac scientiam, quibus sacra primum Biblia cum hominibus locuta sunt; tum ad SS. Patrum, Sacrorumque Conciliorum, ac Dogmatum
ite-

(a) In libro quem ipse postremum Venetiis edidit anno 1716.

(b) Ibidem.

(c) Vide Plin. lib. 5. epist. ad Spurinam.

iteratam frequentemque lectionem. Ad quæ omnia studia in Ecclesiastico ordine excitanda optabat flagrantissime (idem enim non semel ex eo audivimus) idem Adrienſis Præſul, ut Episcopī omnes continenti cura, ac ſolertia ſuæ adhiberent ſcientiæ, atque auctoritatis incitamenta. Ita facis, ut nobis minus detrimentosa, minusque gravis mors Philippi a Turre videatur. Quæ quidem amiſſio præcipuo quodam luſtu, ac mœrore proſequenda tamen eſt. Fortaſſe enim, ſi diſcedamus ab doctiſſimo ac celeberrimo Cardinali noſtro Henrico Noriſio, & ſi lubet etiam, a Venerabili, & ſapientiſſimo itidem Cardinali Joſepho Maria Thomasio, nemo per hoſce annos in Italia mortem occubuit, qui Philippo litterarum, ſcientiarumque poſſeſſione, ac gloria antecelleret.

Quamobrem, ut optimo jure tantam Italia jaſturam dolet; ita merito nos eandem mœremus graviore quadam, ac magis conſpicua doloris ſignificatione; Ille enim præclarum de civitate noſtra judicium fecit, & ampliſſimis ipſam verbis ornavit, cum in ea decem dies levandi animi cauſa commorari voluit: Nos vero & benigniſſime exceperit; & aperuit nobis, quænam utilior eſſet, atque opportunior liberalium artium, ac ſtudiorum via, atque ratio; nec deſugit, qua mente benigna erat, dum minuta quædam noſtra recitaremus, nobis aures faciles dare. Quare non eſt cur miretur quiſpiam ſi iſtud tanto, tamque bene de nobis merito viro, licet admodum tenue, doloris, & grati animi officium perſolvimus. Quod ut in tutelam, ac præſidium ſuſcipias tuum, te etiam atque etiam rogamus. Ita laus præſtantiſſimi Antiſtitis alterius non diſſimilis auctoritate deſenſa nihil ſibi ab invidia, vel inſcitia morſibus metuet. Deus immortalis facit, ut congruente virtuti tuæ dignitate, ac præmio cumulere: certe tum ingrati eſſe, aut videri nolemus, ut omnino de te ſileamus, qui tot nobis utilitatis fructus præbuiſti; qui Eccleſiam noſtram tot olim complexus eſt beneficiis; qui to-

tam denique urbem nostram tuis erga illam plurimis, atque amplissimis meritis in perpetuum tibi obstrinxisti. Interea te obsecramus per illam, quam tamdiu experti sumus, benignitatem, ac lenitatem tuam, ut nobis favere pergas, nosque certissimo illo tutissimoque præsidio tuo sustineas semper, ac tueare.



I N F U N E R E
 PHILIPPI A TURRE
 PONTIFICIS ADRIENSIS.
 O R A T I O
 F R A N C I S C I T R E C C I I.



Uam fallacia, & incerta sibi plerunque promittant, qui humanarum rerum spe quandoque duci, ac prolectari patiuntur, vel ex solo, o Socii ornatissimi, qui nostrum pectus effodit, quique nos mœstes & conturbatos huc convocavit, gravissimo, atque acerbissimo casu cognosci potest. Cum enim speravissemus in urbem nostram, atque adeo intra hos Mafsejæ Domus dignitatis & studiorum plenæ penetrales locos iterum recipere, iterum maxima, & singulari laude exornare divinam illam virtutem, illud immortalī præconio dignum ingenium Philippi a Turre Pontificis Adriensis; ecce repente quod in votis erat evanuit: ecce pene subita, ecce inopinata morte non sine nostro bonorumque omnium luctu, atque lacrymis, ille suis, ille nobis ereptus est. O miseram fragilemque spem nostram! O inanes expectationes, & caduca nostra consilia! Carebimus igitur, atque in perpetuum carebimus approbatore, atque impulsore studiorum nostrorum, qui ut veræ virtutis iter, sensumque veræ laudis caperemus, quasi quasdam, dum hic adesset, nobis sermonis sui faces admovit? Nunquam posthac eximium illud Italiæ lumen, decus, & columen scientiarum omnium, præclarum Pontificii ordinis ornamentum excipiemus, coram intuebimur, alloquemur. Merito itaque privato luctu, diuturnoque,

que, qui index certus doloris est, silentio tanti amissionem viri dolumus; merito & boni, & literarum studiis dediti homines ipsius interitum collacrymarunt; merito conclavis hujus ipsi parietes, qui nunc alter fere annus est, illius præsentia, & hospitio lætari videbantur, modo ejusdem morte squallere, atque in tristitiam discedere visi sunt. Sed quoniam omnes in irritum lamentationes nostræ cadunt, & in cunctis, quæ quotidie usuveniunt, Dei Optimi Maximi acquiescendum est voluntati; satius erit, egregias Philippi a Turre laudes commemorando, mœrorem, quem nobis ipse e terris abitio peperit, aliqua, si tamen possumus, ex parte lenire. Durum id quidem, atque infœlix tanti mœroris allevamentum est: quid enim aliud erit præclari Præfulis virtutem, ac præstantiam commemorare, nisi renovare acerbum dolorem, & nova quasi plaga primum grave vulnus conturbare? At vero, quoniam ipsius recordatio cogitationes animosque nostros obsedit; & quoniam, ut simus erga illum grati, vocem & verba in publicam ejusdem laudem mecum omnino conferre, atque excitare constituistis; illud saltem ex hoc solatium reportabimus, quod nempe ille nobis & hominum laudibus, & stellifera dignus Cœlestium sede magis, magisque declarabitur. Atque utinam illa animi incitatio, atque alacritas, qua illum tum in hoc ipso Charitum receptaculo, perbrevis, & quæ bidui labor erat, orationem præsentem, benigneque audientem laudavi, meum nunc pectus incenderet; sperarem profecto accuratorem ipsi, & quæ magis plurimas ipsius virtutes deceret, me laudationem esse daturum. Nunc quando me, non exiguus de ejusdem interitu dolor, & acres quotidianæque curæ distringunt, nihil mihi in præsentia suppetit ac præsto est ad dicendum præter ipsam dicendi, illumque sermone concelebrandi voluntatem. Enitar tamen pro viribus; & quamcumque, quæ mihi obviam fiat, meumque retardet iter, arduitatem exorbere contendam. Sed jam campus ille latissimus patet: jam apparent illæ ferme immensæ virtutum sege-

segetes, quæ Philippi a Turre animum locupletarunt. In-
grediar: ex iisque nonnullas colligam; eademque vobis
nova aliqua distinctas laude proponam. Non tamen ingre-
diar, priusquam docuero, quibus ipsæ feminibus, ac subfi-
diis ad tantam amplitudinem excitatæ sint. Nunc vos,
quot quot adestis, oro obtestorque, ut aures dicenti mihi
intentas ac faciles detis; utque mihi luctuosum verborum
munus Philippo a Turre persolventi abactos a tristitia paulis-
per animos adhibeatis.

In primis igitur si Platonis (a), Isocratis (b), Caij Cæ-
saris (c), si veterum pene omnium Oratorum instare ve-
stigiis vellem, a me in laude ponenda esset illa, in qua
plurimi iidem fuissent, & per quam plurimum Philippus a
Turre fulsit, patriæ, & generis claritudo. Sed ne quod
notum, & apud omnes pervulgatum est, multis persequar;
neve cum virtutis, quæ a me celebranda sunt, bonis illa
pariter, quæ fortunæ dicuntur, casuque nobis obveniunt,
conjungam; aliis hæc recensenda, verbisque exquisitissimis
exornanda dimittam. Laudent igitur alii per nobilem Phi-
lippi patriam, Carnorum olim urbem, Forum Julij, tum
quod ab Cajo Cæsare, uti dicitur, institutum, jus ab eo-
dem obtinuerit Romanæ Civitatis; tum quod in Colonia
prærogativam, & in Scaptiam tribum transiverit; tum
quod municipium semper fuerit clarissimorum civium, at-
que optimorum. Laudent alii amplissimam a Turre fami-
liam, quod in ea & vetus nomen, & dignitatum conti-
nens series & antiqui census divitiæ, & cognationis illu-
stris nunquam intermissum decus eluceat: nihil horum,
nihil ego externum, nihil fortuitum Philippi laudibus ado-
ptabo. Hæc ut sapientissimus quisque, ita & Philippus
propria virtutum luce similiter atque sidera (d) infixæ
cœlo,

(a) Vide Platon. in Menex.

(b) Isocrat. in Evag.

(c) Jul. Cæs. in fragm. Orat.

(d) Consule Cartes. p. 3. princip. n. 9.

cœlo, illustratus contempsit: sentiebat enim cum Plutarcho (a), virtutem sine loci delectu ubilibet radices jace-
re: nullumque aliud ab generis nobilitate manare bonum
arbitrabatur, nisi præclaram illam necessitudinem, quam
uti Boethius (b) quoque censuit, nobilibus ipsa viris im-
ponit, majorum scilicet virtutem imitandi, minimeque
ab ea descedendi. Sit igitur mihi satis, quo ipse tempo-
re, quibusque sit ortus parentibus significare. Natus est
Philippus anno Christi CIOIOCLVII, Kal. Maji, patre
Mario a Turre, matre Camilla Frumentina, utraque stir-
pe perquam nobilibus, dignisque, qui tali tantoque pi-
gnore donarentur. Et quoniam mentibus illis, quæ inge-
ntes, atque optimæ sunt, ingens itidem, affabreque com-
pactum natura solet plerumque elargiri domicilium, eo
ut mens, & corpus harmoniaca (c) quadam secum pro-
portione conveniant: non dissimiliter magnum excelsum-
que Philippi animum superindui ipsa voluit. Natus id-
circo est ea oris vultusque pulchritudine, & dignitate, ea
proceritate corporis, ac conformatione, ut quicumque
ipsum non modo, dum ætatis ver ageret, verum etiam
dum senectutem jam adeptus esset, aspiceret, imaginem
statim in illo quandam honestatis, atque ingenitæ virtu-
tis agnosceret. Collocavit se jam tum puer totum in stu-
diis, totumque in virtutibus, & solitudine: tantusque in
eo eluxit impetus animi, tantus mentis ardor ad pieta-
tem, ad literas, ad sapientiam, ut nemo tunc esset, qui
tanquam ex herbescentium segetum culmis, quæ virtutis
maturitas, & quantæ doctrinarum fruges essent in illo fu-
turæ, facile non auguraretur. Latinis litteris in patria
excultus, ibidemque in Philosophiæ tractatione laudabili-
ter exercitatus, cum nonnihil jam roboris accessisset ata-
ti, Patavium abiit, ut in illa affluente plurimum studiis
urbe

(a) Plutarch. in vita Demosth.

(b) Boeth. l. 3. de consol. Philosophiæ pr. 6.

(c) Ex Ficini doctr.

urbe litterarum, scientiarumque fontes non degustaret iterum, sed hauriret. Ut porro ad votum res caderet, Somaschenfis sodalitatis se scholis addidit; ubi non sine laude, brevique tempore (celerior enim, Tullio (a) teste, virtutis cursus est quam ætatis) iterum Dialecticæ, iterum Physicæ secretiora latibula collustravit. Ut vero Jurisprudentiam perciperet, in quam ingenii aciem, & industriam non mediocrem conferendam esse censebat, in Patavinum Athenæum, laurearum seminarium, atque officinam concessit. In iis itaque egregiis appriqueque hominum vitæ accommodis studiis tam luculenter, tam festinanter, processit, ut expleto nondum vigesimo ætatis anno, cum ad ea, quæ de utroque jure requirebantur, imperturbate, diserte, nec sine omnium plausu responderit, suffragiis omnibus deferentibus, duplicem lauream illam sibi acquisiverit, quæ amissura nunquam erat viriditatem. Non tamen hisce, quos sibi jam circumdederat, scientiarum quasi cancellis circumscribi tantummodo ac detineri sustinuit; sed ex ipsis digressus eo etiam, quo illius ad omnes disciplinas accommodatum & docile ingenium propendebat, sedulo festinavit. Conjunxit igitur, ut veterum morem æmularetur, graviora cum amœnioribus studiis. Quamobrem modo se in nobilem jucundumque vetustatis secessum se deponebat, ut temporum vices, & ordinem, gentium facta, atque imperia, populorum mores, & bella cognosceret: modo naturæ arcana per Philosophorum veterum, nuperrorumque vestigia venabatur: modo sacrarum litterarum ardentissima correptus sciendi siti haustum faciebat. Verum, ut his facilius, uberiusque cum fructu navaret operam, & sublimibus, divinisque Theologiæ institutis animum consecravit, & priscorum a Platone, & Aristotele hominum more, ad Geometriæ ceterasque Mathematicis incubuit disciplinas; a quarum notione qui absunt, absunt etiam ab omni pene Physicæ intelligentia. Hisce tot tan-

Y

tis-

(a) Philip. 5.

risque scientiarum, eruditionis; artium ingenuarum dives
 thesauris, non minori gaudio; quam quo institores, acqui-
 sita jam ingenti unionum gemmarumque copia, ad littus
 patrium appellunt, in patriam Philippus rediit: quin effu-
 siorem illorum gaudio lætitiā animo alebat; noscebat e-
 nim nobilis adolescens bona se comparasse diuturniora, at-
 que utiliora iis, quæ terra progignit, quæ tempus atterit,
 quæ aliena aviditas surripit, quæ sui subsidia atque instru-
 menta luxus perniciosus semper ambitus facit. Visum est
 tunc Forum Julii quasi emotum sedibus suis illi se se ob-
 viam ferre atque illum quodammodo amplecti velle; au-
 gurabatur enim, se in eo civem habiturum, qui non mo-
 do Pauli Diaconi, sed ceterorum quoque municipum, qui
 literarum gloria etiam tum floruerunt, famam præverte-
 ret, ac transvolaret. Confedit in patria, atque in avito
 lare ad viridioris ætatis flexum Philippus; ita tamen, ut
 neque ab ipso studiorum cursus vel paullum intermittere-
 tur; neque pietatis ceterarumque ipsius virtutum gloria
 hæreret unquam ad metas. Quin, ut integrius expeditius-
 que iisdem vacaret, & obligari voluit sacerdotalis mili-
 tiæ sacramento, & abdicatum a Patruo, qui plures eundem
 annos in illustri sacerdotii Collegio gesserat, Canonicatum
 inivit. Quid porro non suades o' industriæ pervigil comes,
 & insignium laborum artifex, sciendi amor, atque cupidi-
 tas? Si non patrio studiorum congressuumque commercio
 mentis divitabat aciem Philippus, divitabat illam aliunde
 petito, atque externo. Ad amicitiam itaque se complu-
 rium litteratorum hominum contulit; ab iisque egregia
 mutuabatur, iisdemque vicissim reddebat splendidum aliud
 quidpiam. Quamobrem & alienigenis, & civibus suis in
 pretio habitus, idem omnibus charus erat, mutisque ani-
 mis amabat, amabatur: reverebatur ipse illos, illum ipsi
 reverebantur. At non ultra in patria degentem Philip-
 pum a Turre intuebimur. Jam undetricesimum transgres-
 sus annum, jam firmata, & aucta stirpe virtutis, e patria
 ab-

abcessit, Romam adivit (a). Italiæ scilicet & omnium terrarum principi civitati, non Italiæ licet nobili municipio summum debebatur ingenium. Expectabant illum Romanæ Academiæ, atque Curiæ: expectabant illum Congregationes, quæ perpendunt, & custodiunt diligentissime omnium momenta rituum iuriumque sacrorum. Ita Philippi a Turre virtutes, quæ in patria diutius quodammodo inclusæ, & constrictæ fuerant, amplissimum illud, in quo excurrere, ac triumphare possent, theatrum nastæ, subito se profudere, atque extulere universæ. Hic ego fidem meam non interpono: res ipsa loquitur. Vix dum Philippus Romam ingreditur, cum in augustam, cui Fidei divinæ propagandæ cura mandatur, Congregationem allegitur. Quis eas igitur virtutes in Philippo, illasque videri etiam atque alta luce statim prænituisse non affirmabit, cum certum, & ante sit omnium, ut ita dicam, oculos, sapientissimam Congregationem illam ad se arcessere, atque admittere neminem præter eruditos, singularisque dignitatis, ac prudentiæ viros, præter eos, qui magnarum rerum, atque artium scientiam, virtutesque omnes in animum congefferunt. Quantam vero gravitatem, doctrinam, sapientiam in amplissimo illius ordinis consilio, atque in urbe universa prætulit, paucis docere non possumus. Satis erit dixisse in iis illum se tantopere commendasse, ut aliæ Congregationes, & præclaræ illum sibi Academiæ adjungerent: ut dignus, qui antiquæ triumviratum eruditionis una cum Raphaele Fabretto, ac Philippo Bonarotta gegeret, habitus esset: ut doctissimi, atque extra omnem laudem Patres Purpurati, Henricus Norisius, Carolus Augustinus Fabronus, Josephus Renatus Imperialis ipsum in familiaritatem reciperent: & non solum beneficiis, sed amare etiam, & perpetuo quodam iudicio suo colerent, ac diligerent. Quin horum primus cum Philippo cogitationes, & consilia sua communicabat; postremus vero in Ferrariensi

Legatione, quam laudatissime sexennium egit, ipsum audiendis judicandisque ejus vice forensibus causis præfecit: quo in munere tam honeste, sapienterque se gessit, ut integerrimum, summaque religione judicem Ferraria ipsum diceret: ejusdemque judicia, tamquam juris ipsius oracula veneraretur. Magna profecto laus est ab eruditis hominibus, major a Purpuratis Patribus, maxima ab maximis Pontificibus diligi, suspici, ornari. Nactus primam, ornatus altera, tertia item maxima, non caruit laude Philippus. Utrique enim Innocentio XI. scilicet ac XII. summis Pontificibus, quos idem nomen, perque erga Christianam Rempublicam amor ac sedulitas plurimum illustravit, tam acceptus, tam ingenii doctrinæque præstantia commendatus fuit, ut primi colloquio non semel, & eidem morienti præsens astare dignatus sit; alterius vero beneficiis, & iterata etiam laude inclaruerit; & tum maxime cum Pontificis ejusdem tutelæ antiquæ illud eruditionis miraculum, librum de monumentis veteris Antii commendavit. Et vero aliis Philippus a Turre honoris insignibus, & præstantiorum quoque dignitatum titulis jam jamque auctus fuisset, nisi munificentissimus Pontifex paullo post mortem oppetivisset. Sed quæ Innocentius præmia adornabat, persolvit illi sapientissimus, atque optimus, quem Deus difficillimis hisce temporibus ad Ecclesiam suam procurandam, ad dispellendas errorum tenebras, ad Christiani nominis hostibus exitium parandum inferendumque delegit, Pontifex Clemens XI. Hic cum dubitationibus illis, quas super Epactarum, qui hoc seculo habendus erat, delectu (a), nonnulli sapientes viri ad antecessorem Pontificem, paullo antequam vitam dimitteret, contulerant, facere satis instituisse, de Mathematicis peritissimum disciplinis, duodecimvirale Collegium coagmentavit. Præfecit illi Henricum Norisium, incomparabilem, & omnium scientiarum, omnigenæque

vi-

(a) Consule librum P. Thomæ Maffei, e D. Dominici Soldatio viri doctissimi, qui has dubitationes egregie expendit.

virum eruditionis, qui doctissimorum hominum, qui patriam nostram Romanæ purpuræ luce nobilitarunt (a), ætate quidem postremus fuit, sed gloria, & sapientiæ celebritate facile primus. Auxit optimus Pontifex Veronæ lætitiâ, dum ad excipiendas secreto Collegii ejusdem consilia elegit alteram Veronæ spem, Franciscum Blanchinium, quem scientiæ omnes vel ab illo auctæ, vel excultæ apud Pontifices, Regesque commendant; quique inter alia æterni nominis opera confecit etiam in Romana Virginis Æde lineam illam maximam Meridianam, quæ clarissimum profecto est, continuoque cœlestis lucis allapsu comprobatur scientiæ suæ testimonium, ac monumentum. Num ergo exigua Veronæ laus est, duos tanti operis, tantique consilii administros uno eodemque tempore tanto tantique prudenti dedisse Pontifici? Interjecit igitur interjecit inter duodecim electissimos viros Clemens Philippum. Ita hunc & in Ecclesiæ edictis sanctionibusque egregie versatum, & syderum, totiusque cœli conversionis incitatissimæ intentissimum animadversorem, & ad sacrorum dierum computabiles vices certo, & qui omnis expers erroris esset, ordini assignandas aptissimum declaravit. Atque utinam res tanta, finitimis interpellata bellis, ad aliud translata tempus non fuisset, profecto quid in his omnibus Philippus mente potuisset didicissemus. Sed alia vidit, & approbavit eximius Pontifex in Philippo. Vidit egregias virtutes, quarum adeptio, ut divino Hieronymo Fracastorio placuit, difficilior est, quam scientiarum, excelsi nempe animi magnitudinem, magnanimitatem in dignitatibus tuendis. Aristot-

(a) Quatuor Cardinales Veronenses, PETRUS BONA. an. 1164. creat. ab ALEX. III. ADELARDUS CATTANEUS 1183. a LUCIO III. GABRIEL RANONUS Minorita 1478. a SISTO IV. HENRICUS NORISIUS 1695. ab INNOCENTIO XII. his addi possunt tres Cardinales MAFFEI a Verona oriundi, MARCUS ANTONIUS, BERNARDINUS, HORATIUS.

stotelica (a) prudentiæ munia atque officia *εὐβουλίας, σύνεσις, γράμνη* nullis cessurum terroribus, nullis frangendum periculis, proque rei divinæ, & religionis amore in ardua omnia, atque aspera paratum pectus, atque armatum. Enimvero quid aliud intelligi voluit, cum Philippum sibi ad Sinarum imperium legare constituit? Nonne hæc omnia in eo requiruntur, cui mandatum sit immensæ pene magnitudinis navigare maria, longinquas, atque alio, ut ita dicam, Sole calentes terras adire, populorum veteres ritus, & mores expendere, Reges denique potentissimos super his alloqui, ac convenire? Sed obstitit Philippi a Turre affecta atque incommoda valetudo, quominus ipse in remotis illis regionibus & e Republica Christiana faceret, & suum, Italumque nomen magis, magisque illustraret. Quid tum præstantissimus Pontifex? Sinas, inquit, Turnonius adeat: Adriensem Episcopatum Philippus ineat. Quantum lætatum es, urbs quondam celebris Adria, quanta tum lætitia triumphasti felix fortunatumque Rhodigium, cum talem primo ad vos nuncium rumoris aura apportavit: cum Præsulem tam pium, tam solerem, tam concordi hominum probatum voce primitus excepistis? Intra vestra mœnia, atque intra tecta una cum illo advectam censuistis felicitatem, sapientiam, virtutes omnes. Atque equidem, quemadmodum exoriens nobis Autumnus quidquid annus antea promiserat elargitur; ita quodcunque spe summa a vobis speratum fuerat, vobis religiosissimus Præsul cumulativissime præstitit. Ea semper enim vobis Philippus tribuit, ut plura a parente proficisci non possent. Egit enim statim, gessitque semper Philippus omnia pro ingenio, ac consuetudine sua, sancte scilicet, amanter, ingenue, moderate, liberaliter, continenter. Præcis illis Ecclesiarum moderatoribus quam simillimus, quidquid egregii in Episco-

(a) Adi Aristotel. Ethic. lib. 6. cap. 10. 11. 12. & Magam. I.

scopis ut inquit Apostolus (a) vel præcipit, vel hortatur, mox omni tempore, ac supra cujusque votum obtinuit, exhibuitque. Si enim omnino extra culpam esse Episcoporum munus, ac laus esse debet, quænam tam præceps calumnia dentata voce impetere ausa est illam, quam semper Philippus aluit auream morum integritatem, illam honestissimam, & laudatissimam vivendi rationem? Si vero superbia (b), fastidium, iracundia ab iisdem quoque vitandæ, atque amandandæ sunt, quis ab se illas magis cautim quam Philippus abarcuit? Quis ab illis felicius absuit? Adeo modestum se, lenemque præbebat, ut aurea illa temperies animi admirationi omnibus esset, omnium ore collaudaretur. Quam vero præstans, quamque uber illius in pauperes liberalitas? Eosdem ipse largissima semper manu fovebat, augebat, amplectebatur: & quoniam, ut Seneca (c) sensit, benignitas omnis properat, propriumque libenter facientis est cito facere, eorundem preces, ac postulata antevergens, ab iis ne rogari quidem sustinebat. Nullum itaque majus in ipsius animo gaudium excitabatur, quam cum ab indigentium turba obsessas intuebatur fores; quam cum virginum pudorem dote cassum, atque inlocabilem, dotali mox ornatum præsidio cœlesti addicebat, vel mortali connubio; quam cum ad incitas redactorum calamitatem, famemque profusa stipe depellebat. Hæc sunt, quæ Ecclesiarum Pontifices, hæc quæ Adriensis commendat Præsulis nomen probitatis ornamenta, atque insignia. Sed alia jam prodeunt, quæ non dissimili ornantur gloriæ, atque amplitudinis laude. Vigilantia illa scilicet, qua ad Dei, & Ecclesiæ sanctiones omnia revocabat, exigebatque; qua contendebat assidue, ne quid detrimenti grex caperet; qua rerum ignorationem ab Ecclesiasticis, & dissolutos, diffuentesque mores arcebat; qua custodiebat solertissime, atque adaugebat divini Numinis cultum, Xenodochianam curam, sacrarum ædium nitorem. Justitia porro scelerum

vin-

(a) In Epist. ad Timoth. & ad Titum. (b) D. Paulus ibid.

(c) l. 3. de benefic. c. 1.

vindex, & sacrorum jurium pervigil tutrix; digna illo pectore, tantæque custos dignitatis fortitudo; constans, & firma in animi non rectos impetus dominatio; amor in bonos, & singularis in eisdem munificentia; aliæ denique atque aliæ virtutes tam præclare in eo splendebant, ut doctrinis etiam omnibus, quibus ornatissimus erat, lumen suum tenderent, ac porrigerent. Elucebat itaque in Philippo a Turre, sicuti in arca foederis manna cum lege, una cum virtutibus animi admiranda, ac dives sapientia; utque in illis, ita in hac assiduus ipsius cultus elaborabat. Quodque admirari licet, neque hujusmodi cultura, neque pontificalis gubernatio, neque tantarum consideratio rerum adeo delassarunt unquam Philippi mentem, ut aliquando scriptioni etiam vacare non posset. Citra itaque ministerii studiique sacri dispendium plura scripsit, in quibus ipsius spirat imago, atque ingenium; in quibus elegantiarum omnium lautitiæ & omnis recti judicii norma. Enimvero quid pulcrius, & elegantius, quid ab aculeis contumeliarum alienius (late enim, ut inquit ille (a), lucere ignis, ut nihil urat, potest) quid prisca magis eruditione refertum est, cum Epistola, quam super Damascenorum epocha Annæ Faustinae numismati adjecta exaravit, tum Disceptatione, quam edidit de annis Imperii Elagabali, deque geminis Justinii II. Consulatus, eorumque initio, ad eundem Faustinae nummum? Quid autem gravius, quid Philosophia ipsa dignius geminis illis epistolis, quarum prima lumbricorum originem, atque causam; altera vero causas item rimatur, cur obscuratio in Solis defectibus minor illa, quæ pro partium Solis obduatarum rata portione producenda esse videretur, nobis appareat. O magna (hic aliquis cum Plinio (b) nostro exclamabit) o magna fecunditas animi, quæ ad tam diversa, tamque utilia agenda, meditanda, scribenda valuit! Quid si aspiceret, legeret, admiraretur omnia quæcumque singulari præditus virtute Præsul litteris consignavit, nec adhuc in oculis habi-

tant,

(a) Publ. Syr. 12. Select. sentent. (b) In Præfat. natur. Hist.

tant, expectationis magnæ, summi laboris monumenta? Aut nullam profecto diceret, aut si aliquam, omnino perexiguam a Philippo factam fuisse sacri muneris studiorumque intercapedinem. Et recte, verumque diceret. Semper enim alterutri intentus curæ, si quando animum paullisper remittere instituebat, non aliud sibi adjuungebat solatii genus præter eruditorum colloquia, & consuetudinem. Quapropter vel Patavium se conferebat, ut germanæ litteraturæ vindicis Seminarii censui interesset; vel unum de sapientissimis, qui D. Dominici nobilissimum Sodalitium illustrent, Thomam Minorellum ad studiorum sermonisque accersebat communicationem; vel ad Rhodigii decus, Camillum Comitem Silvestrium, doctrina, scriptione, Musæo celebratissimum, vel ad alios, quos in oculis ferebat, sapientes, sui que similes viros alio divertebat. Hic iterum memoriam meam subit ante Philippi quidem interitum jucunda, nunc vero acerba temporis illius recordatio, quo Antistes idem benignissimus ad amicum suum, litterarum scientiarumque lumen, ornamentum Italiæ, & qui in urbe nostra est, quod in oculis pupilla, aut in anima ratiocinatio, Scipionem Marchionem Massejum advenit. Odies illos abeuntis Septembris (a), o noctes vere Atticas, quæ Philippum nobis dedistis, ut illum inviseremus, comitaremur, ut omnibus observantiæ officiis revereremur. Fulistis nobis profecto candidi, cum illum Massejam domum, portum atque arcem studiorum, Hebrææ, Græcæque linguæ magistrum, introeuntem conspeximus, cum illa prima, cum illa postrema ejus verba, cum sermones, cum ejusdem consultationes audivimus. Quam officiosa illius comitas, quam præclara illius sensa, quam liberalis, sapientibusque sententiis, ac verbis ornata ipsius quotidiana locutio fuerit, vobiscum ipsi recordamini. Mihi, vobis, cuique civium nostrorum, qui humanissimum Præsulem conveniret, & alloqueretur, antiquis se Athenis vivere, & cum prisorum sapientiæ antistitum aliquo sermonem conferere videbatur. Dixisset per

Z

eos

eos dies Maffejos lares, qui Principum hospitio, & gratia, qui litteraria lauro, & bellicis trophæis, qui doctissimorum hominum frequentia florent, in Academiam conversos, ut inibi, tanquam in Musarum domicilio, Philippi virtus & eruditio enitesceret. Vix enim Scipionis vultum, cujus nomine ipso recreabatur, egregius Antistes vidit, vix ipsius ædes magnificus hospes implevit; cum amoris lætitiæque perpauca ultro citroque habitis verbis cum Massejo ipso in colloquium eruditissimum venit, & in multas horas produxit. Quid horas dixi? totos pene Philippus dies, in quibus insigni illo hospitio usus est, quando officiis vel erga Deum, vel erga eos, qui consalutandi visendique illum causa confluebant, non detinebatur, consilia, & sermones suos cum Massejo suo conferebat tam doctos, & varios, ut ἐγκυκλοπαιδίας ipsius voces, cuique, qui præsens aderat, audire videretur. Nec vero quis me dicat rem amplificare, atque ornare dicendo. Vos enim, vos ipsi tum crebro testes fuistis. Ipse ego, qui ad utrumque aditu non semel dignatus fui sive in Massejis conquiescerent ædibus, sive præstantiora ædificia, & antiqua urbis monumenta conviserent, plura ab utroque, ac sæpenumero audivi & Theologiæ instituta, & placita Philosophorum, & Matheſis probationes, & scita legumlatorum, & eruditionis momenta reconditoris. Quot innotuere tunc mihi utiliores libri, quot eorundem editiones accuratiores, quarum notitia neutiquam ab sapientibus contemnenda est: illæ enim nobis, ut iis fidenter utamur, scriptorum sensa errorum liberata maculis tradunt. Tunc plane novi quam efficax, quamque acer esset ille ardor, qui pectus incendebat egregii Præsulis; qui ad excitandam optimis studiis facem, & ad expurgiscendam, vindicandamque ab invidiæ morsibus Italicorum virtutem, Diarii Veneti editionem sedulo procuravit; qui si quos adibat iisdem vel scientiæ, & cognitionis amorem injicere, vel injectum augere, vel auctum solide commendare non desinebat. Namque ubi vidit in patria, atque in adolescentibus nostris tot noviter fervere præclara sanaque studia,

ab

ab laudibus abstinere neutrquam potuit. Laudavit vos, o ingeniosissimi juvenes, quod uti Julius Cæsar (a) animadversa apud Gaditanum Herculis templum magni Alexandri imagine, totus arsit amore bellicæ gloriæ, sic vos priscorum nostrorum civium perspecta scientia ac virtute, toti ardentè ad litteras, & ad optimas artes convolaſtis. Laudavit amplissima laude tantæ incœptorem perfectoremque utilitatis, Massejum suum. Laudavit illum, quod eo scribente, atque hortante exulatum abiit omnis ineptia carminum, & quæ orationis infatuabant solutæ stylum, gerræ germanæ, atque equidem *λῆροι λήρων*: quod eo præeunte, ac suadente scientias, liberalesque disciplinas Veronenses juvenes amplexi sunt: quod ipsius cura, atque sumptibus Græcæ (b) inter nos litteræ revixerunt; quæ, Cicerone teste, pluræ ornamenta suppeditant, & consuetudinem similiter latine dicendi afferunt; quarum studium amoremque ita in civitate nostra foelicissimum illud sæculum XVI aluit, ut quam plures cives nostri & egregie Græcæ scriberent, & optime Græcæ loquerentur. Quanta vero benevolentia, quibusque exceperit non mediocris amoris significationibus doctum, certumque antiquæ illius Græcæ virtutis testimonium, Panagiotum Presbyterum Sinopensem, quem nonnullos ab hinc annos domi suæ Massejus alit, ac detinet, ut Græco sermone gratis imbuat, atque ornet patriam juventutem, nemo est, qui nesciat. Probavit ipsius doctrinam: amavit ejusdem erga Catholicam Fidem ardentissimum studium: audivit eum lubens refellentem accerrime quinquepartitam, quam Græcum schisma construxit, errorum classem: miseratus est diuturnam, quam ex suis idem traxit, & quæ eundem in Massejam domum, quasi in oppositam fluctibus molem, impulsit, periculorum, molestiarumque procellam: ipsum denique, ut pote qui litteris, & probitate excultus erat, dignum, qui Episcopali aliqua inter suos infula diffulgeret, pronunciavit. Neque sua laude caruit, dum non semel doctissimum Præfulem allocutus est, bene de patria meritum

civis, Octavius Alecchius, qui pariter atque Cato (a), librorum helluo, pariter atque Fabio memoratus Pollio (b), omnium horarum vir vocari merito & jure potest. Enimvero quis illaudatum dimitteret virum, in quo Hebrææ linguæ peritia, in quo rerum omnium patriarum notitia singularis, in quo omnigena, & digna præclaro homine eruditio? Sed aliæ, cur gauderet, & cur in laudes longius procederet, causæ ornatissimo Præsuli subortæ sunt. Ut enim invisit integerrimum, & mitissimum, diligentiaque, consilio, & virtute, commendatissimum, civitatis Antistitem nostræ Marcum Gradonicum, statim nobis gratulatus est; quod scilicet providentissimus Deus talem Veronenſi Ecclesiæ gubernatorem præposuisset, qui continenti illam vigilia, frequenti concione, liberali atque incredibili amore augetet, ac regeret; & iis paribus eandem cumulaturus esset, quæ in alias antea Ecclesias effuderat, amplissimis beneficiis: quod re ab eo præstari in dies singulos & gaudemus, & experimur. Cum vero Academicos hortos, qui jam in Theatrum abibant, & Philarmonicæ ipsius Academiæ porticum, atriumque Philippus collustravit ingressus in ejusdem aream, magnam gaudendi occasionem nactus est: animadvertit enim plura, quæ pertinaciter tempori oblectabantur, & quæ, ut ipse aiebat, tutoris eruditionis testes erant, ætatum atque hominum patria monumenta priscorum. At impendio magis lætatus est, cum Massejum audivit profitentem, se usquequaque velle, (quod nemo unus antea ne excogitaverat quidem) alia fugientis antiquitatis monumenta, quam numerosius posset, in aream eandem cogere; ibique in Academiæ decus & famam Musæo exædificato, ab ætatis injuriis illa una cum cæteris prohibere, eademque ordinatim uno veluti libro colligare. Tum denique fuit, cum has humanissimi Præsulis voces audivimus: semper ad patriæ decus, semper ad Italiæ gloriam se porrigit, atque explicat Scipio; nihil illustre, nihil honorabile prætermittit. Sed o mortis invidum, atque acerrimum ausum, quod nobis invidit, atque abstulit lætiam

(a) Vide Cicer. l. 3. de Finib. (b) Fab. Quintil. l. 6. c. 4.

tiam illam voluptatemque, quæ nos in iterato Philippi adventu invasisset. Tunc enim ipse sponderat, se huc iterum commigraturum, ut unum de locupletissimis, quæ Italia dinumerat, veterum lapidum receptaculis, expletum jam, atque auctum contempleretur. Quid igitur de ipso, quod tam magnifice nunc excrevit monumento, in numero, atque auctario Adriensis Antistes non pronunciaffet? Quam libenter nostratia, quam attente transmarina illa monumenta lætitasset, expendissetque! Maffejus enim præter quam quod illos, quos, pro ædium suarum vestibulo præcæ latinæ variatos lapides, asservabat, ad eos, qui in Academica pridem area jacebant, jam traduxit, atque associa- vit; ratus aliquid rei, ac proposito deesse, si inter latinos Græci lapides desiderarentur, Venetias sponte concessit; hucque jam remigravit auctus viginti Græcis antiqui operis monumentis, quorum partim accesserunt illi ab Senatoribus amplissimis dona, partim non exiguo auri pretio compara- vit. Quid si cruentum acerrimumque in barbaros bellum Orientis oras non præpediret? Magnam profecto turbam eorundem lapidum, qui ut illic colligerentur, idem non semel expetivit, hospitio & civitate donatam nostra nunc videremus. Certe quidem si Arundelliani Comitæ ætati Maffejus suppar fuisset, non in tot Græcorum monumentorum possessione Anglia, atque Oxonii Academia apud eruditos optimo jure gloriaretur. Verum si non nuperrime ad nos delatos antiquos lapides, alia tamen Philippus a Turre vidit, quæ & illum maxima afficerent voluptate, & causæ item forent, cur palam plura proferret, eruditionis suæ documenta. Admissus enim in Bivilaquæ domus atrium ab omni officii studiosorumque diligentissimo Viro Gulielmo Ernesto Comite Bivilaqua, qui paucis ante diebus illum lautissime, atque eleganter in suo Bivilaquensi castro hospitatus fuerat, quæ gaudia non gavissus est, quos præcæ ætatis ritus ac mores manifestarios non fecit, cum id aspexit, quod multo clarissimus Marius Comes Bivilaqua, non tam delectationis causa, quam ad invitationes adventusque

eru-

eruditorum liberaliter comparaverat, quodque ab oculis, & memoria exterorum etiam tum abfuerat: pictas nempe tabulas, ærea signa, deorum aras, hermas, sigilla, statuas pariles, & cubitales, nobili factas & antiqua manu: quæ omnes vel εἰδωλα (a) sunt, vel εἰκόνα (b), vel ἀνδριάντις (c), vel εἰκίλα (d), vel denique βριτία (e). Quæ vero præclara ab eo non audivimus, vel cum ab optime de patria historia merito comite Ludovico Moscardo congestum Musæum introspectit: vel cum animadvertit & numismata, & plures priscarum gentium memorias, penes omnis antiquitatis, & præcipue Romanæ peritissimum, natum summo loco, summo consilio, summa virtute, Gombertum Comitum Tustum; vel cum in insigni, & ad patriæ utilitatem ab nobili & integerrimo cive, Joanne Sائبantio extructa Bibliotheca tam magni sumptus, tam festivam, & quæ in dies pæne singulos gliscit, manu scriptorum codicum copiam vidit: vel cum in Clarissimi Oetolini Comitum Oetolinii succrescente, optimisque referata libris, Bibliotheca confedit: vel denique cum veteres urbis arcus, cum Theatricæmenta, ac vestigia, cum utramque D. Zenonis Basilicam, vetustiore scilicet, ac Pipinianam; cum demum priscæ argumentum magnificentiæ, fastigium artis, unicam ferme vistricem temporis molem, Amphitheatrum conspexit. Hæc fuit Pontificalis oneris allevatio: hæc feriæ studiorum: hæc a multimodis curis cessatio, quam hic tum sibi præstituit Philippus, atque irrogavit. Quæ fuerint ipsius vigiliæ, quæ ipsius solertia, quæ studia, atque administratio ex hac operosa, & illustri, quam sibi ille inter nos dedit animi remissione, cognoscite. Nihil est igitur quod miremur, si tantum a nobis abiens sui desiderium relinqueret: si tantum Adriensis Ecclesiæ in ipsius reditu lætaretur. Eo enim stante ac manente in crediti sibi gregis vigilia, non alia erat ejusdem Ecclesiæ facies, quam sereni Cæli, & nitentis. Quamobrem & amore, & virtute Antistitis sui recreata,

(a) Statuæ Deorum. (b) Heroum. (c) Regum. (d) Sapientium.
(e) Benemeritorum. Vide Philandrum in annotat. ad Vitruv. l. 2. c. 8.

ta, diuturna inturbataque se se fruituram esse felicitate confidebat. Sed omnino ac repente tanta spes concidit. Dum enim Philippus singulari virtute, & illa, qua natus erat, mente cuncta, quæ ad Dei pertinebant cultum, & Præsulis indefidis munus, procurabat, levem primo, mox mortiferum morbum contra omnium votum nactus est. Accessit enim illi in primis continens sitis, quam per bimensis spatium nulla potuit potio finire, atque excedere. Illam statim subsecuta est, urinæ reddendæ difficultas; vel quia (uti Celsus (a) dixisset) urinæ iter senectute collapsum esset, vel quia calculus, aut concretum aliquid ex sanguine intus se opponeret; vel quia inflammatio aliqua eam reddi naturaliter prohiberet. Doluit ipse paullo post levi ac lenta febricula, quam, quia curationem admittere, & ab dysuria ipsa excitari putaretur, & ipse (ut Scipioni Massejo per epistolam indicavit) & medici pariter contempserunt: in hac per plures dies sine ullo mentis metu consumpsit; cum subito tanta in eum vis morbi prorupit, ut sacramentis omnibus solummodo præmuniri atque armari ipsi datum sit, non autem testamentum condere, vel remediis uti, quæ ad illum quæsierrat nobilissimus, atque optimus Medicus, Antonius Vallisnerius, qui celerius quam opportunius e Patavino Lyceo ad amarissimi Præsulis auxilium devocatus accurrerat. Philippus igitur divinis stipatus subsidiis, morbo autem tali, qui cæcus cum Columella (b) vocari poterat, correptus; cum illius ætas studiis, & episcopalibus contrita curis, nondum anni sexagesimi limen attigisset; cumque dies V. Kal. Martii eluxisset (o Adrianis, Rhodiginis, Foro-Julien-sibus Italis, scientiis omnibus funestum diem!) ab hominibus demigravit. O Adria o Rhodigium qualis quantusque tunc vester luctus ac mœror? Certe si summam jacturam par dolor sequitur, summum profecto vos collegisse dolorem credendum est, dum Præsulem, qui nullum erga vos unquam amoris summi ac pietatis officium prætermiserat inopinantibus vobis ademptum morte vidistis. Vos quidem quasi gravissimo, & inexpectato percussæ vul-

(a) Cornelius. Cels. l. 7. c. 26. (b) Lib. 1. de re rustica. c. 3.

vulnere, totæ in squalorem mœstitiâque compositæ in luctu, lacrymis, lamentationibus jacuistis. Ut autem præclaram doloris gratique animi significationem daretis, in ipsius funeris pompam, & atratos lugubriter cives ad septuaginta, & omnes ad unum summates equestris ordinis, & maximam vulgi frequentiam, & pauperum coetus, quos larga semper ipse ope sustentaverat, vocavistis. Quid igitur aliud restat, nisi ut unanimes parique voto laudem nomenque integerrimi ac sapientissimi Præfulis memoriæ tradamus hominum sempiternæ. Hem Philippe a Turre quantus ex morte tua, & tuis, & nobis incescit luctus, & dolor. Tu, ut quidem spes nobis est, ad immortalem Dei sedem, & ad totam simul & perfectam interminandæ vitæ possessionem evolasti. Tu in laude ac litteris, tu in scientiis atque virtutibus ætatem omnem degisti. Tu quamvis ereptus fueris, cum mediæ jam jam ostium senectutis ingredereris, satis tamen amplitudini, satis claritati, satis gloriæ vixisti. Tu te ita semper egisti ut ornamenta, præstantioresque te dignitates expeterent, ut omnes certatim tibi, quem possent, honorem publice haberent, ut natum esse te cives gauderent tui, iidemque te ab hominibus discessisse nunc doleant, atque ingemiscant. Quamobrem nihil quicquam est, quod tua nos sorte, tuæque causâ mœreamus. Dolemus quidem: sed incommodo, ac detrimento, quod ex tui suscepimus amissione, dolemus. Dolet etiam Italia, quia eximium lumen, dolent litteræ, quia cultorem sui laudatissimum, dolet Ecclesia, quia optimum ac sapientissimum veritatis suæ propugnatorem, defensoremque perdidit. Sed rerum omnium æterni moderatoris decreta æquo a nobis animo ferenda sunt: *Ipse enim Deus, monente divino Vatrè, juxta voluntatem suam facit tam in virtutibus cœli, quam in habitatoribus terræ (a), & non est qui resistat manui ejus, & dicat quare fecisti?* Nos interea, quoniam aliis te adire officiis nequimus & in memoria tua (utrumque enim tantummodo possumus) diligentes erimus, & desiderium tui perpetuo plausu ac laude leniemus.

F I N I S.

(a) Dan. c. 4.

116 2070763

